

# রুশদেশের উপকথা

অনুবাদ • সুপ্রিয়া ঘোষ  
সম্পাদনা • ননী ভৌমিক



শি শু ও কি শো র সা হি ত্য

# রু শ দে শে র উ প ক থা

অ নু বা দ : সুপ্রিয়া ঘোষ

স ম্পা দ না : ননী ভৌমিক

বইপড়া ৯ ঢাকা

# স্কুলের সকল ছেলে মেয়েদের জন্য

বইপড়া  
একটি শিশুকিশোর প্রকাশনা

দ্বিতীয় প্রকাশ  
ফেব্রুয়ারি ২০১৬

প্রথম প্রকাশ  
ফেব্রুয়ারি ২০১০

প্রকাশক

সালমা বেগম

বইপড়া

৩৮/৪ মান্নান মার্কেট তৃতীয় তলা  
বাংলাজার ঢাকা ১১০০  
ফোন : ৭১১৭৮৭৪

পরিবেশক

শোভা প্রকাশ

৩৮/৪ মান্নান মার্কেট তৃতীয় তলা  
বাংলাবাজার ঢাকা ১১০০

স্বত্ব

প্রকাশক

প্রাচছদ

ফ্রন্ট এন্ড

বর্ণবিন্যাস

সোলার কম্পিউটার

মুদ্রণ

জনপ্রিয় প্রিন্টার্স

দাম

২৫০

ISBN 984 655 073 1

# সূচিপত্র

|                                    |      |
|------------------------------------|------|
| ভূমিকা                             | .৪   |
| গোল রুটি                           | .৫   |
| সীম বীচি                           | .৮   |
| হলদে-ঝুঁটি মোরগটি                  | .১০  |
| শিয়াল আর নেকড়ে                   | .১৩  |
| শিয়াল আর সারস                     | .১৫  |
| কেঠো পা ভালুক                      | .১৬  |
| চাষি আর ভালুক                      | .১৮  |
| শীতের বাসা                         | .১৯  |
| সেয়ানা চাষি                       | .২২  |
| সাত-বছুরে                          | .২৫  |
| কুড়ালের জাউ                       | .২৮  |
| যমরাজ আর সৈনিক                     | .৩০  |
| গল্পী-বৌ                           | .৩৭  |
| জমিদারের সঙ্গে কাঙালের ভোজন        | .৪০  |
| অভাব                               | .৪২  |
| বরফ-বুড়ো                          | .৪৬  |
| রাজহাঁস আর ছোট মেয়ে               | .৪৯৮ |
| হাভ্রোশেচকা                        | .৫২  |
| আলিগুশকা বোন আর ইভানুশকা ভাই       | .৫৪  |
| ব্যাঙ রাজকুমারী                    | .৫৭  |
| জাদুকরি ভাসিলিসার কথা              | .৬২  |
| বলমলে বাজ ফিনিস্ত                  | .৭২  |
| সিভ্কা-বুর্কা                      | .৭৭  |
| রাজপুত্র ইভান আরা পাঁশুটে নেকড়ে   | .৮১  |
| অ-জানি দেশের না-জানি কী            | .৮৬  |
| ক্ষুদে ইভান বড় বুদ্ধিমান          | .৯৯  |
| মাছের আজ্ঞায়                      | .১১৪ |
| নিকিতা কজেম্যাকা                   | .১২০ |
| ইলিয়া মুরমেৎসের প্রথম অভিযান      | .১২২ |
| ইলিয়া মুরমেৎস আর শিসে-ডাকাত সলভেই | .১২৫ |
| দব্রীন্যা নিকিতিচ আর জুমেই গরীনীচ  | .১২৮ |
| আলিগুশা পপোভিচ                     | .১৩৩ |
| মিকুলা সেল্যানিনভিচ                | .১৩৫ |

## ভূমিকা

তোমরা যখন ছোট ছিলে, খুব ছোট, যখন লিখতে পড়তে কিছুই শেখনি, তখন মা ঠাকুরমার কোলে বসে রূপকথা শুনতে নিশ্চয়ই খুব ভালবাসতে।

এখন তোমরা বড় হয়েছে। তবু সেই তোমাদের প্রিয় রূপকথার ভদ্র ও নির্ভয় আর হাসিখুশি সব বন্ধুনায়েকদের সঙ্গে যোগ হয়ত একেবারে হারিয়ে ফেলোনি। বইয়ের পাতায় ছবি পর্দায় বা রঙ্গমঞ্চে প্রায়ই তাদের সঙ্গে দেখা হয়।

বড়ো হয়ে তোমরা জেনেছ, প্রত্যেক জাতির নিজের রূপকথা আছে। বিভিন্ন দেশের রূপকথার মধ্যে যেমন মিল অনেক তেমনি তফাৎও প্রচুর। ভারতীয়, ইংরেজি, রুশি, জার্মান, ফরাসি, চীনে রূপকথার পার্থক্য খুব সহজেই ধরা যায়। কেননা সাধারণ লোকের জীবনযাত্রা, প্রাকৃতিক পরিবেশ এবং যে দেশে গল্পগুলো জন্মলাভ করে পুরুষানুক্রমে হাতবদলের ফলে বর্তমান আকৃতি লাভ করেছে, রূপকথায় যেসব কিছুর সুস্পষ্ট ছাপ থেকে যায়। ছোটবেলায় তোমরা নিজেরাই যে সব রূপকথা শুনেছ, আমার তো মনে হয় তোমরা যখন অনেক বড় হবে, তখন তোমাদের ছেলেমেয়েদেরও সেই সব রূপকথাই শোনাবে।

রুশদেশের লোকেরা অসংখ্য গাথা, নীতিকথা, সুস্ব হেয়ালি আর চমৎকার চমৎকারা রূপকথা রচনা করেছে।

এইসব কাহিনী পড়তে পড়তে দেখবে, যারা কাহিনী বলছে তাদের কেউ থাকে দুরন্ত নদীর পাড়ে, কেউবা বিস্তীর্ণ স্তেপ অঞ্চলে, কারও বাস সুউচ্চ পাহাড়ে, কারও বা ভীষণ গহন বনে।

এই সব কাহিনীর বেশির ভাগই যখন প্রথম বলা হয়েছিল, তারপর বহু শতাব্দী পার হয়ে গেছে। যারা কাহিনী বলেছে তারা তাদের পছন্দমত, তাদের ইচ্ছানুসারে এদিক ওদিক বাড়িয়ে নতুন কিছু যোগ করে নতুন রূপ দিয়েছে। কাহিনীগুলো যত পুরোনো হয়েছে, ততই বেশি মনোমগ্নাই হয়েছে, আর তাদের শিল্পগুণও বেড়েছে। শত শত বছর ধরে লোকেরা মেজে ঘসে তুলির নানা টানে এদের একেবারে নিখুঁত করে তুলেছে।

এই সব কাহিনীর মধ্যে এমন সব কাব্য রসের পরশ আছে যার টানে রুশদেশের বড় বড় সাহিত্যিক, শিল্পী অথবা সঙ্গীতজ্ঞ এ থেকে প্রেরণা গ্রহণ করেছেন। রুশদেশের বিখ্যাত কবি আলেক্সান্দ্র সের্গেয়েভিচ পুশকিন (১৭৯৯—১৮৩৭) তাঁর বুড়ি দাইমার কাছে এসব কাহিনী শুনতে খুব ভালবাসতেন। পুশকিন বলেছেন, ‘কী অপরূপা এই রূপকথা! প্রত্যেকটি যেন এক একটি কবিতা।’

রুশদেশের উপকথায় যেমন বিষয়বৈচিত্র্য তেমনি প্রকাশবৈচিত্র্য। রুশি শিশুরা জীবজন্তুর গল্প অনেক জানে। এই জীবজন্তুর গল্পগুলো অনেককাল আগে শিকারিরা রচনা করেছে, তারা বনেরা জীবজন্তুকে ভাল করে চিনেছিল, দেখেছিল তাদের প্রত্যেকেরই চারিত্রিক বৈশিষ্ট্য ও ব্যক্তিত্ব আছে। এই গল্পগুলো তাৎপর্যপূর্ণ হয়ে উঠেছে নীতিকথার মতো। তাতে রূপকের আকারে মানুষের লোভ, ধূর্তামি, নির্বুদ্ধিতা প্রভৃতি নানা দোষ ও দুর্বলতা প্রকাশ পেয়েছে।

সবচেয়ে কাব্যময় আর আনন্দের হল রূপকথাগুলো। এরা আমাদের অপরূপ কল্পনার জগতে নিয়ে যায়। মনে হয় এই সব রূপকথার ভিত্তি কেবল কল্পনা আর স্বপ্ন। অমঙ্গলের বাহনদের সঙ্গে এই সব রূপকথার যে বীর নায়করা যুদ্ধ করেছেন, তাঁরা কেউই সাধারণ জগতের নিয়মে বাঁধা নন। কিন্তু তবু এই সব কিছুর ভিতরে মানুষের সত্যিকার স্বপ্ন ফুটে উঠেছে। এই রূপকথাগুলোর বীর নায়কেরা লোকপ্রচলিত আদর্শের মূর্তি। তাঁরা সবসময়ই নির্ভীক, দুঃসাহসী, মহ অমঙ্গলকে তাঁরা জয় করবেনই। রুশ কাহিনীকাররা খুব ভালোবাসেন ঘরোয়া গল্পে ও চুটকি।

এইসব উপকথা যেকালে জন্ম নিয়েছে তখন মালিকরা তাদের গোলাম চাষিদের নিয়ে যা খুশি তাই করতে পারত। বিক্রী করতে পারত, সৈন্যদলে পাঠাতে পারত, কিম্বা ইচ্ছা হলে একটা শিকারি কুকুরের সঙ্গে বদল দিতে পারত। কিন্তু তবুও দেখা যায় গরিব চাষি ও সৈন্যরা সবসময় তাতে নির্ভর লোভী নির্বুদ্ধি প্রভৃ আর তার খামখেয়ালি স্ত্রীকে শেষ পর্যন্ত জন্দ করে ছেড়েছে।

এই বইটিতে তোমরা এই সব গল্পই পড়বে।

এছাড়া কয়েকটি বীলীনাও পড়তে পাবে। প্রাচীন রুশ মহাকাব্যগুলো এই নামে অভিহিত। এদের একটা অদ্ভুত ধীর হৃদয় আছে। এখনো সোভিয়েতের সুদূর উত্তরের কোন কোন লোকেরা এই সব গাথা গেয়ে বেড়ায়। এই সব বীলীনায়ে বলা হয়েছে রুশ বীর বগাতীরদের কথা, যারা তাদের মাতৃভূমিকে সাহসের সঙ্গে নিঃস্বার্থভাবে রক্ষা করে এসেছে।

উপকথা পড়তে ছোটদের চেয়ে বড়রাও কিছু কম ভালবাসে না। কারণ এইসব গল্পের ভাষার সৌন্দর্য, নায়কদের মোহনীয়তায় মুগ্ধ না হয়ে উপায় নেই। আকৃষ্ট না হয়ে পারা যায় না তাদের মর্মবাণীতে— কেননা এই সব গল্প দেশকে ভালবাসতে শেখায়, সাধারণ মানুষের শক্তিতে আস্থা রাখতে বলে, উন্নত ভবিষ্যৎ এবং মন্দের উপর ভালর জয়ের প্রত্যয় গড়ে তোলে।



## গোল রুটি

এক ছিল বুড়ো আর এক বুড়ি।

একদিন বুড়িকে বুড়ো ডেকে বলল :

‘ও বুড়ি একবার হাঁড়িটা চেষ্টে, ময়দার টিন ঝেড়ে বেছে দেখ না, একটু ময়দা পাস কিনা। একটা গোল রুটি করে দিবি?’

বুড়ি তখন একটা মোরগের পাখনা নিয়ে বসে গেল। হাঁড়ি চেষ্টে, ময়দার টিন ঝেড়ে, কোনরকমে দু মুঠো ময়দা বের করল।

ময়দা দিয়ে বুড়ি ময়দাটুকু ঠাসল। তারপর সুন্দর গোল একটা রুটি তৈরি করে, ঘিয়ে ভেজে, রেখে দিল জানালার ওপরে জুড়বার জন্যে।


গোল রুটি আছে, আছে, হঠাৎ গড় গড় গড়—গড়াতে শুরু করল—জানালা থেকে বেঞ্চি, বেঞ্চি থেকে মেঝে, মেঝে থেকে গড়িয়ে দরজার কাছে এসে একলাফে চৌকাঠ ডিঙ্গিয়ে সোজা বারান্দা, বারান্দা পেরিয়ে সিঁড়ি, সিঁড়ি পেরিয়ে উঠোন, উঠোন পেরিয়ে ফটক, চলল তো চললই।

গোল রুটি গড়াতে গড়াতে চলেছে, পথে দেখা এক খরগোশের সঙ্গে।

খরগোশ বলল :

‘গোল রুটি, গোল রুটি, তোকে আমি খাব!’

গোল রুটি বলল, ‘খাস না খরগোশ, বরং গান গাই শোন :



ছেট্ট গোল রুটি,  
চলছি গুটিগুটি,  
গমের ধামা চেষ্টে,  
ময়দার টিন মুছে,  
ময়দা দিয়ে ঠেসে,  
ঘি দিয়ে ভেজে,  
জুড়োতে দিল যেই  
পালিয়ে এলাম সেই।

বুড়ো পেল না,  
বুড়ি পেল না,  
খরগোশ তুইও পাবি না!

খরগোশ, চোখের পাতা ফেলতে না ফেলতে গোল রুটি গড়াতে গড়াতে চলে গেল বহুদূর।  
গোল রুটি গড়াতে গড়াতে চলেছে, পথে দেখা এক নেকড়ের সঙ্গে।  
'গোল রুটি, গোল রুটি, তোকে আমি খাব!'  
'পাঁশটে নেকড়ে, খাস না, গান গাই শোন্:

ছোট্ট গোল রুটি,  
চলছি গুটিগুটি,  
গমের ধামা চেঁছে,  
ময়দার টিন মুছে,  
ময়ান দিয়ে ঠেসে,  
ঘি দিয়ে ভেজে,  
জুড়োতে দিল যেই  
পালিয়ে এলাম সেই।  
বুড়ো পেল না,  
বুড়ি পেল না,  
খরগোস পেল না,  
ওরে নেকড়ে, তুইও পাবি না!



নেকড়ের চোখের পলক পড়তে না পড়তেই গোল রুটি গড়াতে গড়াতে চলে গেল বহুদূর।  
গোল রুটি গড়াতে গড়াতে চলেছে, পথে দেখা এক ভালুকের সঙ্গে।  
'গোল রুটি, গোল রুটি, তোকে আমি খাব!'  
'ওরে ট্যারা-থাবা ভালুক, আমার খাওয়া তোর কম্ব নয়!


ছোট্ট গোল রুটি,  
চলছি গুটিগুটি,  
গমের ধামা চেঁছে,  
ময়দার টিন মুছে,  
ময়ান দিয়ে ঠেসে,  
ঘি দিয়ে ভেজে,  
জুড়োতে দিল যেই  
পালিয়ে এলাম সেই।  
বুড়ো পেল না,  
বুড়ি পেল না,  
খরগোশ পেল না,  
নেকড়ে পেল না,  
ভালুক, তুইও পাবি না!



ভালুকের চোখের পলক পড়তে না পড়তেই গোল রুটি গড়াতে গড়াতে চলে গেল বহুদূর।  
গোল রুটি গড়াতে গড়াতে চলেছে, পথে দেখা এক শিয়ালের সঙ্গে।  
'গোল রুটি, গোল রুটি বল তো, গড়িয়ে গড়িয়ে চললি কোথায় ?  
'চলেছি রাস্তা বেয়ে'।

'তা বেশ, কিন্তু একটা গান শুনিয়ে যা না ভাই!'

গোল রুটি গান শুরু করল :



'ছোট্ট গোল রুটি,  
চলছি গুটিগুটি,  
গমের ধামা চেঁছে,  
ময়দার টিন মুছে,  
ময়ান দিয়ে ঠেসে,  
ঘি দিয়ে ভেজে,  
জুড়োতে দিল যেই  
পালিয়ে এলাম সেই।  
বুড়ো পেল না,  
বুড়ি পেল না,  
খরগোশ পেল না,  
নেকড়ে পেল না,  
ভালুক পেল না,  
সেয়ানা শিয়াল, তুইও পাবি না!'

শিয়াল বলল, 'বা! খাসা গান! কিন্তু দুঃখের কথা কী বলব ভাই, কানে ভাল শুনতে না পাই! এক কাজ  
কর, আমার নাকে বসে, গান ধর কষে।'

এক লাফে শিয়ালের নাকে চড়ে বসল গোল রুটি। তারপর জোর গলায় গান ধরল।

শিয়াল তবু আবার বলে:

'গোল রুটি, গোল রুটি, একটু বসে জিভের পরে, শেষবারটি শুনিয়ে দে রে।'

গোল রুটি এক লাফে গিয়ে বসল একেবারে শিয়ালের জিভের ওপর—

ব্যস্—শিয়ালও অমনি খেয়ে ফেলল।







## শিম বীচি

এক ছিল মোরগ আর মুরগি। খুঁটে খুঁটে খাচ্ছে মোরগ, খুঁটে তুলল সীমের বিচি।

‘কক্-কক্-কক্, গিন্দি, বিচি খাবি আয়!’

‘কক্-কক্-কক্, মোরগ তুই-ই খা!

সীমের বিচি খেলে মোরগ কিন্তু গলায় গেল আটকে। তখন মোরগ-গিন্দি কে ডেকে বলল:

‘গিন্দি, নদীকে গিয়ে বল আমায় একটু জল দিতে।’

মোরগ-গিন্দি দৌড়লো নদীর কাছে।

‘নদী, নদী, একটু জল দাও না? মোরগের গলায় সীম বীচি আটকে গেছে।’

নদী বলল :

‘আগে লাইম গাছের কাছে যাও, একটা পাতা চেয়ে আনো, তবে জল দেব।’

মোরগ-গিন্দি দৌড়ালো লাইম গাছের কাছে।

‘লাইম গাছ, ও লাইম গাছ, একটা পাতা দাও না? পাতা নিয়ে নদীকে দেব, নদী জল দেবে, তবে মোরগ খাবে, মোরগের গলায় সীম বীচি আটকে গেছে।’

লাইম গাছ বলল :

‘আগে চাষিমেয়ের কাছে যাও, একগাছি সুতো চেয়ে আনো, তবে পাতা দেব।’

মোরগ-গিন্দি ছুটল চাষিমেয়ের কাছে।

‘চাষিমেয়ে, চাষিমেয়ে, একগাছি সুতো দাও না? সুতো নিয়ে লাইম গাছকে দেব, তবে লাইম গাছ পাতা দেবে। পাতা নদীকে দেব, তবে নদী জল দেবে, তবে মোরগ খাবে, মোরগের গলায় সীম বীচি আটকে গেছে।’

চাষিমেয়ে বলল :

‘আগে চিরুনিওয়ালার কাছে যাও, একটা চিরুনি নিয়ে এস, তবে সুতো দেব।’

মোরগ-গিন্দি ছুটল চিরুনিওয়ালার কাছে।

‘চিরুনিওয়ালার, ও চিরুনিওয়ালার, একটা চিরুনি দাও না? চিরুনি দেব চাষিমেয়েকে, তবে চাষিমেয়ে সুতো দেবে। সুতো দেব লাইম গাছকে, তবে লাইম গাছ পাতা দেবে। পাতা দেব নদীকে, নদী জল দেবে, তবে মোরগ খাবে, মোরগের গলায় সীম বীচি আটকে গেছে।’

চিরুনিওয়ালা বলল :

‘আগে রুটিওয়ালার কাছে যাও, একটা রুটি এনে দাও, তবে পাবে চিরুনি।’

মোরগ-গিন্নি ছুটল রুটিওয়ালার কাছে।

‘রুটিওয়ালা, ও রুটিওয়ালা, আমায় একটা রুটি দাও না ? রুটি নিয়ে চিরুনিওয়ালাকে দেব, তবে চিরুনিওয়ালা চিরুনি দেবে। চিরুনি দেব চাষিমেয়েকে, তবে চাষিমেয়ে সুতো দেবে। সুতো দেব লাইম গাছকে, তবে লাইম গাছ পাতা দেবে। পাতা দেব নদীকে, নদী জল দেবে, তবে মোরগ খাবে, মোরগের গলায় সীম বীচি আটকে গেছে।’

রুটিওয়ালা বলল:

‘আগে কাঠুরের কাছে যাও, জ্বালানি কাঠ এনে দাও, তবে রুটি দেব।’

মোরগ-গিন্নি ছুটল কাঠুরের কাছে।

‘কাঠুরে, ও কাঠুরে, একটু জ্বালানি কাঠ দাও না ? জ্বালানি দেব রুটিওয়ালাকে, তবে রুটিওয়ালা রুটি দেবে। রুটি দেব চিরুনিওয়ালাকে, তবে চিরুনিওয়ালা চিরুনি দেবে। চিরুনি দেব চাষিমেয়েকে, তবে চাষিমেয়ে সুতো দেবে। সুতো দেব লাইম গাছকে, তবে লাইম গাছ পাতা দেবে। পাতা দেব নদীকে, নদী জল দেবে, তবে মোরগ খাবে, মোরগের গলায় সীম বীচি আটকে গেছে।’


মোরগ-গিন্নিকে কাঠ দিল কাঠুরে।

মোরগ-গিন্নি কাঠ নিয়ে গেল রুটিওয়ালার কাছে। রুটিওয়ালা রুটি দিল। রুটি পেয়ে চিরুনিওয়ালা চিরুনি দিল। চিরুনি পেয়ে চাষিমেয়ে সুতো দিল। সুতো পেয়ে লাইম গাছ পাতা দিল। পাতা পেয়ে নদী মোরগের জন্য একটু জল দিল।

মোরগ জল খেল। সীম বীচি নেমে গেল।

মোরগ ডেকে উঠল:

‘কোকর কোঁ, কোঁকর কোঁ!’



## হলদে-ঝুঁটি মোরগটি

এক বিড়াল, এক শালিক আর এক হলদে-ঝুঁটি মোরগটি। ছিল তারা একই বনে, একই কুঁড়েয়। বিড়াল ? শালিক গভীর বনে চলে যায় কাঠ আনতে, মোরগ বাড়িতে থাকে একা। বেরবার আগে ওরা মোরগকে সাবধান করে দেয়:

‘আমরা দূরে চলে যাচ্ছি। তুই ঘর দোর দেখিস। কিন্তু সাবধান টু শব্দটি করবি না। আর শিয়াল এলে জানালা দিয়ে আবার মাথা বের করিস না।’

শিয়াল যেই দেখে বেড়াল আর শালিক বেরিয়ে গেছে, অমনি মোরগের জানালার নিচে গিয়ে গান জোড়ে :

‘হলদে ঝুঁটি, হলদে ঝুঁটি,  
বাহারে মোর মোরগটি,  
তেল-চক্-চক্ তোমার গা,  
রেশমি তোমার দাড়িটা,  
জানালা দিয়ে মুখ বাড়াও,  
মটরশুঁটি নিয়ে নাও।’

গান শুনে মোরগ যেই মুখ বের করেছে, অমনি শিয়াল ঝঁক করে ধরে নিয়ে চলল নিজের গর্তে। ছোট্ট মোরগ চিৎকার করে কাঁদতে লাগল :

‘শিয়ালে নিল ধ-রে  
গহন বন পা-রে,  
খর নদীর ধা-রে,  
খাড়া পাহাড় ঘু-রে...’

ও শালিক, ও বেড়াল রে,  
আয় না বাঁচা মো-রে!

মোরগের কান্না কানে যেতেই বিড়াল আর শালিক শিয়ালের পেছনে ছুটল। মোরগকে ছিনিয়ে আনল শিয়ালের হাত থেকে।

আবার বেড়াল আর শালিক কাঠ কাটতে গেল। আবার মোরগকে সাবধান করল :

‘দেখ বাপু মুরগির পো, আজ আবার যেন মুখ বের করিস না। আজ আমরা আরও দূরে যাব, হয়ত তোর ডাক শুনতেই পাব না।’

বিড়াল আর শালিক বাড়ি থেকে বেরিয়েছে, অমনি শিয়াল বাড়ির কাছে গিয়ে গান ধরল:

‘হলদে ঝুঁটি, হলদে ঝুঁটি,  
বাহারে মোর মোরগটি,  
তেল-চক্-চক্ তোমার গা,  
রেশমি তোমার দাড়িটা,  
জানালা দিয়ে মুখ বাড়াও,  
মটরশুঁটি নিয়ে নাও।’

মোরগ কিন্তু চুপাটি করেই বসে রইল। তাই শিয়াল ফের গান ধরল:

‘ছেলেমেয়েরা এ পথ দিয়ে দৌড়ে গিয়েছে,  
দৌড়ে যেতে গমগুলো সব ছড়িয়ে পড়েছে।  
মুরগির দল ঝুঁটে ঝুঁটে খেতে লেগেছে,  
মুরগির দল মোরগদের বাদ দিয়েছে...’

মোরগ জানালা দিয়ে মুখ বের করে বলল:

‘কক্ কক্ কক্! বাদ দেবে কেন?’

আর অমনি শিয়াল ওকে খ্যাক করে ধরে নিয়ে চলল নিজের গর্তে। মোরগ চিৎকার করে কান্না জুড়ল

:

‘শিয়ালে নিল ধ-রে  
গহন বন পা-রে,  
খর নদীর ধা-রে,  
খাড়া পাহাড় যু-রে...  
ও শালিক, ও বেড়াল রে,  
আয় না বাঁচা মো-রে!’

মোরগের কান্না কানে পৌছতেই শালিক আর বিড়াল শিয়ালের পেছনে ছুটল। বেড়াল মাটিতে ছোটে, শালিক বাতাসে ওড়ে...শিয়ালকে ধরে বেড়াল আঁচড়ায়, শালিক ঠোকরায়, কেড়ে নিল মোরগকে।

দিন যায়, ফের আবার শালিক বিড়াল গভীর বনে কাঠ কাটতে যাবার জন্যে তৈরি হল। যাবার আগে মোরগকে ওরা অনেক সাবধান করে দিল :

‘শিয়ালের কথা শুনিস না, মুখ বের করিস না। আজ আমরা আরও দূরে যাব। চাঁচালে শুনতেও পাব না।’

এই বলে শালিক আর বেড়াল বনে কাঠ কাটতে চলে গেল অনেক দূরে। এদিকে শিয়ালও এসে জানলার নিচে বসে বসে গান ধরল :

‘হলদে ঝুঁটি, হলদে ঝুঁটি,  
বাহারে মোর মোরগটি,  
তেল-চক্-চক্ তোমার গা,  
রেশমি তোমার দাড়িটা,  
জানালা দিয়ে মুখ বাড়াও,  
মটরশুঁটি নিয়ে নাও।’

মোরগ তবু চুপ করে বসে রইল। তাই শিয়াল আর একটা গান ধরল :

‘ছেলেমেয়েরা এ পথ দিয়ে দৌড়ে গিয়েছে,  
দৌড়ে যেতে গমগুলো সব ছড়িয়ে পড়েছে।  
মুরগির দল ঝুঁটে ঝুঁটে খেতে লেগেছে,  
মুরগির দল মোরগদের বাদ দিয়েছে...’

তবু চুপটি করে বসে রইল মোরগটি। শিয়াল তাই ফের গান ধরল :

‘লোকজনরা এ পথ দিয়ে চলে গিয়েছে,  
যেতে যেতে বাদামগুলো ছড়িয়ে পড়েছে।  
মুরগির দল ঝুঁটে ঝুঁটে খেতে লেগেছে,  
মুরগির দল মোরগদের বাদ দিয়েছে...’

মোরগ তখন জানালা দিয়ে মুখ বের করে বলল :

‘কক্ কক্ কক্! বাদ দেবে কেন?’

ব্যস্! অমনি শিয়াল ঝাঁক করে ধরে গহন বনের পারে, খর নদীর ধারে, খাড়া পাহাড় ঘুরে নিজের গর্তে নিয়ে গেল ওকে...

মোরগ যত ডাকে যত চেষ্টায়, শালিক আর বিড়াল কিন্তু কিছু শুনতে পায় না। যখন বাড়ি ফিরল তখন দেখে মোরগ নেই।

শালিক আর বেড়াল তখন চলল শিয়ালের পায়ের দাগ ধরে ধরে। বেড়াল মাটিতে ছোট্টে, শালিক বাতাসে ওড়ে শেষকালে তো শিয়ালের গর্তে পৌঁছল ওরা। বিড়াল বাজনা বাজিয়ে গান আরম্ভ করল :

‘ত্রিম্ ত্রিম্ বাজনদার,  
বোল তুলেছে সোনার তার...  
শিয়াল-বোন কি আছে ঘরে  
গুটি সুটি কোটর জুড়ে?’

গান শুনে শিয়াল ভাবল, “কে রে এত ভাল বাজনা বাজায়, এমন মিষ্টি করে গায়! দেখি তো!”

গর্ত ছেড়ে বাইরে এল শিয়াল। অমনি শালিক আর বিড়াল শিয়ালকে ধরে একেবারে মারণ আর তাঁকন। শিয়ালও ভাঁ ভাঁ দৌড়।

শালিক আর বিড়াল তখন মোরগকে চুপড়ির মধ্যে বসিয়ে বয়ে নিয়ে এল বাড়িতে।

তারপর থেকে তারা সুখে স্বচ্ছন্দে বাস করতে লাগল, এখনো করছে।



## শিয়াল আর নেকড়ে

এক ছিল বুড়ো আর এক বুড়ি। একদিন বুড়ো বুড়িকে বলল:

‘বুড়ি, কটা পিঠে করে দে। আমি ততক্ষণ খোড়া স্নেজে জুতে ফেলি। মাছ ধরতে যাব।’

অনেক মাছ ধরল বুড়ো। একেবারে মাছে ভরা স্নেজ। বাড়ি ফেরার পথে হঠাৎ দেখে এক শিয়াল :  
পুঁটলির মতো গুটিয়ে রাস্তায় গুয়ে।

স্নেজ থেকে নেমে বুড়ো গেল শিয়ালের কাছে, শিয়াল কিন্তু একটুও নড়ে না, মড়ার মত পড়ে রইল।  
‘কপাল ভাল! বুড়ির গরম কোটের কলার করা যাবে খাসা।’

এই ভেবে বুড়ো শিয়ালটাকে স্নেজে চাপাল, নিজে চলল আগে আগে।

শিয়াল দেখল এই সুযোগ। চুপিচুপি স্নেজ থেকে একটি একটি করে মাছ ছুঁড়ে ফেলতে লাগল।  
একটার পর একটা, ফেলে আর ফেলে।

সব মাছ ফেলা হয়ে গেল। শিয়ালও সুট্ করে নেমে গেল।

বাড়িতে পৌঁছেই বুড়ো চিৎকার করে বুড়িকে ডাকল :

‘বৌ, তোর কোটের কলারের জন্যে চমৎকার একটা জিনিস এনেছি!’

বুড়ি তো স্নেজের কাছে গিয়ে দেখে—কিছুই নেই, মাছ না, কলার না, একেবারে ফাঁকা। বুড়ির সে কী বকুনি!

‘ওরে আহাম্মক, ওরে মুখপোড়া, আমাকে নিয়ে রগড়!’

বুড়োর তখন খেয়াল হল শিয়ালটা তো তাহলে মরা ছিল না। ভারি আফসোস হল, কিন্তু কী আর  
করে! যা হবার সে তো হয়ে গেছে।

এদিকে শিয়াল তো তার রাস্তার সব কটা মাছ একসঙ্গে জড় করে ভোজে বসেছে।

এমন সময় এক নেকড়ে এসে হাজির।

‘এই যে দাদা, খেতে বসেছ দেখছি, অতিথি বরণ করো!’

‘আমি খাচ্ছি আমার, ভাগ নেই তোমার।’

‘দাও না একটা মাছ!’

‘নিজে ধরে খাও গে।’

‘কিন্তু আমি যে মাছ ধরতে জানি না।’

‘ফুঃ! আমি পারলে, তুমিও নিশ্চই পারবে। নদীতে চলে যাও দাদা, বরফের গর্তে লেজ ঢুকিয়ে বসে  
বলবে : “এই মাছ, চেপে ধর, একটানে উঠে পড়! এই মাছ, চেপে ধর, একটানে উঠে পড়।” অমনি মাছও  
তোমার লেজ চেপে ধরবে। যত বসে থাকবে তত মাছ পাবে।’

নেকড়ে চলল নদীর পাড়ে। বরফের গর্তে লেজ ঢুকিয়ে জাঁকিয়ে বসে কেবলি বলতে থাকল :

'এই মাছ, চেপে ধর, একটানে উঠে পড়!

এই মাছ, চেপে ধর, একটানে উঠে পড়!'

আর শিয়াল নেকড়ের চারপাশ ঘোরে আর মন্তর পড়ে :

'আকাশে মিটমিটে তারা তাকিয়ে,  
নেকড়ের লেজখানা দে না জমিয়ে!'

নেকড়ে শিয়ালকে জিজ্ঞেস করল :

'কী বিড়বিড় করছো, দাদা?'

'তোমার জন্যই করছি, লেজে অনেক মাছ উঠবে।'

এই বলে শিয়াল আবার ধুয়ো ধরল :

'আকাশে মিটমিটে তারা তাকিয়ে,  
নেকড়ের লেজখানা দে না জমিয়ে!'

সারা রাত অমনি বসে রইল নেকড়ে। লেজও ওর বরফে জমে গেল। ভোর নাগাদ নেকড়ে ওঠবার চেষ্টা করতে লাগল, কিন্তু লেজ আর নড়ে না। ভাবল, "দ্যাখো, কত মাছই না ধরেছি—টেনে তোলাই দায়।"

এমন সময় একটি মেয়ে নদীতে এল জল নিতে। নেকড়ে দেখেই সে চিৎকার জুড়ল :

'নেকড়ে, নেকড়ে! কে আছ, মারবে এসো!'

নেকড়ে এদিক ঘোরে ওদিক ঘোরে, তার লেজ কিন্তু ওঠে না। মেয়েটি তখন বালতি ফেলে রেখে বাকটা হাতে নিয়ে ঝাপিয়ে পড়ল। মার মার নেকড়েকে, নেকড়ে মার খায় আর হাঁসফাঁস করে। করতে করতে যেই তার লেজটি খসে গেল, অমনি ভেঁ দৌড়।

মনে মনে নেকড়ে ভাবে, "দেখাচ্ছি দাঁড়াও শিয়াল ভায়া, এর প্রতিফল পাবে!"

শিয়াল এদিকে চুপিচুপি গিয়ে ঢুকেছিল ঐ মেয়েটির কুঁড়েঘরে। বারকোশে কিছু ময়দা ঠাসা ছিল। পেট পূরে তা সব খেয়ে, মাথায কিছুটা মেখে শিয়াল গিয়ে আছাড় খেয়ে পড়ল রাস্তায়। পড়ে পড়ে কোঁথায়।

নেকড়ে তাকে দেখে বলল :

'শিয়াল ভায়া, বেশ মাছ ধরা শিখিয়েছিলে যা হোক! এই দেখ আমার সারা গায়ে কালশিটে পড়ে গেছে...'

শিয়াল বলল :

'আরে দাদা, তোমার লেজটা না হয় নাই রইল, মাথাটা তো আছে। কিন্তু আমার যে মাথাটা একেবারে গুড়িয়ে দিয়েছে। এই দ্যাখো, পিটিয়ে পিটিয়ে ঘিলু বার করে দিয়েছে কেমন। হামাগুড়ি পর্যন্ত দিতে পারছি না।'

নেকড়ে বলল :

'তাই তো দেখছি ভায়া, আহা বেচারি! আমার পিঠে চড়ো, কোথায় যাবে আমি বয়ে নিয়ে যাই।'

শেয়াল তো তাই নেকড়ের পিঠে চেপে বসল। নেকড়ে তাকে বয়ে নিয়ে যায়।

নেকড়ের পিঠে চেপে চলেছে শিয়াল, আর গুনগুনিয়ে গাইছে :

'তাগড়া শিয়াল জাঁকিয়ে বসে  
লেজ কাটাটার পিঠে।'


'গুনগুন করে কী বলছ, ভায়া?' নেকড়ে জিজ্ঞেস করল।

শিয়াল বলল :

'ও কিছু নয়। মন্তর পড়ছি। তোমার সব ব্যথা সেরে যাবে।'

এই বলে শেয়াল আবার গান ধরল :

'তাগড়া শিয়াল জাঁকিয়ে বসে  
লেজ কাটাটার পিঠে।'



## শিয়াল আর সারস

শিয়াল আর সারসে খুব ভাব ।

একদিন শিয়াল ভাবল সারসকে নেমন্তন্ন করা যাক ।

বলল, 'এসো সই, এসো আমার বাড়িতে, নেমন্তন্ন রইল!'

সারস তো নেমন্তন্ন খেতে গেল । শিয়াল করল কি, সুজির পায়ের রান্না করে রেকাবে ঢেলে যত্ন করে অতিথিকে খেতে দিল ;

'খেয়ে নাও সই' বন্ধু আমার, নিজে হাতে রান্না করেছি ।'

সারস লম্বা ছুঁচলো ঠোঁট দিয়ে কেবলি ঠোকর মারে, কিছুই আর গলায় ওঠে না ।

ইতোমধ্যে চেটে পুটে সব পায়ের নিজেই শেষ করে দিল শিয়াল ।

খেয়ে দেয়ে বলল:

'কিছু মনে করো না সই, পাতে দেবার মতো আর কিছু নেই ।'

সারস জবাব দিল:

'ঠিক আছে । ঢের খেয়েছি । অনেক ধন্যবাদ । এবার তুমি এসো আমার বাড়ি, এক সঙ্গে খাওয়া যাবে ।'

পরদিন শিয়াল গেল সারসের বাড়ি । সারস চমৎকার ঝোল রান্না করেছিল । লম্বা সরু মুখ একটা কলসিতে করে তা খেতে দিল শিয়ালকে :

'খাও সই, খেয়ে নাও! এই সব, আর কিন্তু কিছু নেই ।'

কলসির মধ্যে শিয়াল মুখ ঢোকাতে চেষ্টা করল । এদিক থেকে এগোয়, ওদিক থেকে এগোয়, একবার চাটে, একবার শৌকে, কিন্তু এক ঢোকও খেতে পারল না: কলসির মধ্যে মাথা আর ঢোকে না ।

ঠোঁট ঢুকিয়ে সারস কিন্তু সব খেয়ে শেষ করে দিল ।

বলল, 'কিছু মনে করো না সই, পাতে দেবার মত আর কিছুই নেই ।'

শিয়াল দুঃখে মরে । ভেবেছিল সাতদিনের খাওয়া খেয়ে নেবে, তার বদলে ঘরে ফিরল খোঁতা মুখ ভোঁতা করে । যেমন কর্ম তেমন ফল!

সেই থেকে শিয়াল সারসের বন্ধুত্ব ঘুচে গেল ।





## কেঠো পা ভালুক

এক ছিল বুড়ো আর এক ছিল বুড়ি ।

বুড়োবুড়ি কিছু শালগম লাগিয়েছিল । ভালুক এসে তা চুরি করে খেত । বুড়ো ক্ষেত দেখতে গিয়ে দেখে, কে যেন শালগম উপড়ে চারিদিকে ছড়িয়ে রেখেছে ।

বুড়ো বাড়ি এসে বুড়িকে সব বলল । বুড়ি বলল :

‘কিন্তু কে এ কাজ করলে? মানুষ হলে শালগম উপড়ে নিয়ে পালাত । যত নষ্টের গোড়া ঐ ভালুকটারই কাজ । যা বুড়ো চোরের ওপর নজর রাখিস ।’

বুড়ো একটা কুড়োল নিয়ে চলল, সারা রাত পাহারা দেবে । বেড়ার পাশে চুপটি করে পড়ে রইল বুড়ো । হঠাৎ দেখে, একটা ভালুক এসে শালগমগুলো উপড়াতে লাগল । তারপর বোঝা করে শালগম নিয়ে বেড়া টপকাতে যাবে

অমনি বুড়ো লাফিয়ে উঠে কুড়াল ছুঁড়ে ভালুকের একটা ঠ্যাং কেটে নিয়ে লুকিয়ে পড়ল ।

ভালুকটা ডাক ছেড়ে তিন পায়ে খুঁড়িয়ে খুঁড়িয়ে বনের দিকে চলে গেল ।

কাটা ঠ্যাংটা নিয়ে বুড়ো চলে এল বাড়িতে । বলল :

‘এই নে বৌ, রান্না করিস ।’

বুড়ি সেটার ছাল ছাড়িয়ে সিদ্ধ বসিয়ে দিল । তারপর ছাল থেকে লোম ছাড়িয়ে নিয়ে ছালটা পেতে বসে, লোম পাকিয়ে পশম বানাতে লাগল ।

বুড়ি পশম বোনে আর ভালুকটা এদিকে একটা কাঠের পা তৈরি করে বুড়োবুড়ির ওপর শোধ তুলবে বলে বেরিয়ে পড়ল ।

ভালুক হাঁটে, কাঠের পা খটখটায়, নিজের মনে গজগজায় :

‘গরুর গরুর গুরুক,  
আমি কেঠো পা ভালুক ।  
চারিদিকে সবে ঘুমিয়ে,  
আমি চলি শুধু খুঁড়িয়ে ।’

বুড়ি হোথা ঐ জাগছে,  
আমার গায়ের ছাল পেতে বসে  
লোম দিয়ে সুতো কাটছে!  
স্পর্ধা দেখছ বুড়িটার!  
আমারি পায়ের মাংস রাঁধছে,  
বসে বসে খাবে বুড়ো তার!

বুড়ি শুনতে পেয়ে বলে :

‘বুড়ো, ও বুড়ো, দোরটা দিয়ে দে। ভালুক আসছে...’

ভালুকটা কিন্তু ততক্ষণে ভিতরে ঢুকে গেছে। দরজা খুলে গরুর গরুর করে বলল :

‘গরুর গরুর গুরুক  
আমি কেঠো পা ভালুক।  
চারিদিকে সবে ঘুমিয়ে,  
আমি চলি শুধু খুঁড়িয়ে।  
বুড়ি হোথা ঐ জাগছে,  
আমার গায়ের ছাল পেতে বসে  
লোম দিয়ে সুতো কাটছে!  
স্পর্ধা দেখছ বুড়িটার!  
আমারি পায়ের মাংস রাঁধছে,  
বসে বসে খাবে বুড়ো তার!’

বুড়োবুড়ি তো ভয়ে মরে। বুড়ো মাচার ওপরে গামলার তলায় গিয়ে লুকিয়ে রইল। বুড়ি চুল্লির ওপর।  
ভালুকটা ঘরে ঢুকে এখানে খোঁজে সেখানে খোঁজে। খুঁজতে খুঁজতে পা ফসকে একেবারে  
তলকুঠরিতে।

তখন পাড়াপড়শি সব দৌড়ে এসে মেরে ফেলল ভালুকটাকে।



## চাষি আর ভালুক

এক চাষি একদিন বনে গেল শালগম বুনতে। চাষি লাঙল চালাচ্ছে, এমন সময় এক ভালুক এসে হাজির।

‘চাষি, আমি তোর হাড় গুঁড়িয়ে দিই।’

‘না ভালুকদাদা, হাড় গুঁড়িয়ে দিও না। তার চেয়ে বরং এসো আমরা দুজনে মিলে শালগম বুন। আমি কেবল গোড়াটা নেব, তোমায় ডগাটা দেব।’

ভালুক বলল, ‘তা বেশ, কিন্তু বাপু যদি ঠকাও, তাহলে আমার চোখে পড়লে আর নিস্তার পাবে না।’

এই বলে ভালুক চলে গেল ঘন বনের মধ্যে।

এদিকে শালগমগুলো বড় হল। শরৎকাল, চাষি চলল শালগম তুলতে। ভালুকটাও অমনি ঘন বন থেকে বেরিয়ে এল। বলল :

‘শালগম ভাগ করো চাষি, আমার পাওনা দাও।’

‘ঠিক আছে, ভালুকদাদা, গোড়া আমার, ডগা তোমার।’

চাষি ভালুককে কেবল পাতাগুলো দিল। আর নিজে শালগমগুলো গাড়ি বোঝাই করে নিয়ে শহরে গেল বেচতে। পথে ভালুকের সঙ্গে দেখা।

‘কোথায় যাচ্ছ চাষি?’

‘এই শহরে যাচ্ছি ভাই, গোড়াগুলো বেচতে।’

‘দেখি তোমার গোড়াগুলো খেতে কেমন?’

চাষি একটা শালগম দিল। ভালুক শালগমটা মুখে দিয়েই গর্জন করে উঠল :

‘অ্যাঁ, তুমি দেখছি আমায় ঠকিয়েছ। গোড়াগুলো তোমার বেশি মিষ্টি। আমার বনে যদি আর কোনদিন জ্বালানি কাঠ নিতে আসো আস্ত রাখব না, হাড় গুঁড়িয়ে দেব।’

পরের বছর চাষি আবার ঠিক সেই জায়গাতেই চাষ করল। এবার শালগম নয়, রাই। রাই কাটার সময় হয়েছে। চাষি মাঠে গিয়ে দেখে ভালুক ঠিক হাজির।

বলল, ‘এবার বাপু আর আমায় ঠকাতে পারছো না! ভাগ দাও আমার!’ চাষি বলল :

‘যো হুকুম। তুমি, ভালুকদাদা, তাহলে গোড়াগুলোই নাও, আমি নেব কেবল ডগাটুকু।’

দুজনে মিলে ফসল তুলল ওরা। গোড়াগুলো সব চাষি দিয়ে দিল ভালুককে। নিজে গাড়ি ভরে রাই নিয়ে গেল বাড়িতে।

ভালুক গোড়াগুলো চিবোয় আর চিবোয়, কিন্তু বাগে আর আনতে পারে না।

চাষির ওপর হাড়ে হাড়ে চটে গেল ভালুক। সেই থেকে ভালুক আর চাষির বনে না।



## শীতের বাসা

এক ছিল বুড়ো আর বুড়ি। তাদের একটা ষাঁড়, একটা ভেড়া, একটা হাঁস, একটা মোরগ আর একটা শূয়োর।  
বুড়ো একদিন বুড়িকে বলল :

‘মোরগ পুষে কী আর লাভ হবে, বৌ ? তার চেয়ে একটা পরবের দিন দেখে দিই জবাই করে।’  
বুড়ি বলল, ‘ভাল কথা, তাই করা যাক।’

মোরগ কিন্তু শুনতে পেয়েছিল। তাই রাত হতেই মোরগ পালিয়ে গেল বনে। পরদিন সকালে বুড়ো  
আঁতিপাঁতি করে সব খুঁজল। মোরগের চিহ্নও নেই।

সন্ধ্যাবেলা বুড়ো বুড়িকে আবার বলল :

‘দেখ বৌ, মোরগ তো পেলাম না ; শূয়োরটাই মারি!’  
বুড়ি বলল, ‘তা শূয়োরটাই মার।’

শূয়োর শুনতে পেয়েছিল। রাত হতেই পালিয়ে গেল বনে।

বুড়ো আঁতিপাঁতি করে সব খুঁজল। শূয়োরের চিহ্নও নেই।

বলল, ‘ভেড়াটাকেই কাটতে হবে দেখছি!’

‘তাই কাট।’

ভেড়া সব শুনে হাঁসকে বলল :

‘চল আমরা দুজনেই বনে পালাই। নয়ত তোকেও কাটবে আমাকেও কাটবে।’

ভেড়া আর হাঁস দুজনেই চলে গেল বনে।

বুড়ো উঠোনে এসে দেখে ভেড়াও নেই হাঁসও নেই। বুড়ো আঁতিপাঁতি করে সব খুঁজল। কোথাও পেল না।

‘কী অদ্ভুত, সব ক’টা জন্তু পালিয়েছে, ষাঁড়টা কেবল বাকি। শেষ অবধি ওটাকেই কাটতে হবে!’

‘কী আর করা, তাই কাট।’

শুনে ষাঁড়ও পালিয়ে গেল বনে।

গ্রীষ্মকালে বনে থাকা তো বেশ সুবিধা। পলাতকরা বেশ আরামেই রইল। কিন্তু গ্রীষ্ম শেষ হয়ে শীত এল।

ষাঁড় গিয়ে ভেড়াকে বলল :

‘কী বল ভায়া, শীতকাল তো এসে পড়ল। কাঠের একটা বাড়ি বানাতে হয়।’

ভেড়া জবাব দিল :

‘আমার গায়েই তো পশমের কোর্তা আছে। শীতে আমার কিছুই হবে না।’

শুয়োরের কাছে গেল ষাঁড়।

‘চল শুয়োর, একটা কাঠের বাড়ি বানিয়ে ফেলি।’

শুয়োর বলল, ‘আরে ধ্যৎ, পড়ুক না শীত কত পড়তে পারে—আমি পরোয়া করি না। মাটি খুঁড়ে তলায় ঢুকব; ব্যস্, বাড়ি ছাড়াই বেশ চলে যাবে।’

হাঁসের কাছে গেল ষাঁড়।

‘হাঁস, ও হাঁস, চল একটা কাঠের বাড়ি বানাই!’

‘বাড়িতে আমার কাজ নেই। এক ডানা পেতে শোবো, আরেক ডানায় গা ঢাকব। হাজার বরফেও ঠাণ্ডা লাগবে না।’

ষাঁড় গেল মোরগের কাছে।

‘আয় একটা কাঠের বাড়ি বানাই!’

‘বাড়িতে কী হবে, ফার গাছের তলায় বসেই শীতটা বেশ কেটে যাবে।’

ষাঁড় দেখল, গতিক খারাপ, নিজের পথ তার নিজেকেই দেখতে হয়।

‘তোদের ইচ্ছে না থাকে তো বেশ, আমি নিজেই ঘর তুলব।’

ষাঁড় একাই কাঠ দিয়ে বাড়ি বানাল। চুল্লি জ্বলে আগুন পোহায় আরাম করে।

সে বছর ভয়ানক শীত পড়ল। শীতে শরীর জমে যায়। ভেড়া খুটখুট করে ঘোরে, কিন্তু শরীর আর কিছুতেই গরম হয় না। শেষ পর্যন্ত গেল ষাঁড়ের কাছে।

‘ব্যা!...ব্যা! ...দরজা খোল, ঘরে ঢুকি!’

‘না হে বাপু, সেটি হচ্ছে না, যখন তোকে সাহায্য করতে বলেছিলুম তখন বলেছিলি, গায়ে পশমের কোর্তা আছে শীতকে পরোয়া করিস না।’

‘ঢুকতে দে বলছি! নয়ত তুঁ মেরে দরজা ভেঙ্গে ফেলব, তাহলে তুইও ঠাণ্ডায় জমে যাবি।’

ষাঁড় ভাবে আর ভাবে : ‘ঢুকতেই দিই, নইলে জমিয়ে মারবে!’

বলল, ‘বেশ, ভেতরেই আয়।’

ভেড়াটা ঘরে ঢুকে চুল্লির সামনে একটা বেঞ্চিতে শুয়ে পড়ল।

একটু পরেই দৌড়তে দৌড়তে শুয়োর এসে হাজির।

‘যোঁত! যোঁত! ও ষাঁড়, ঘরে গিয়ে একটু গরম হয়ে নিই।’

‘না হে বাপু, সেটি হচ্ছে না, যখন তোকে ঘর তুলতে ডেকেছিলুম তখন বলেছিলি, যতই শীত পড়ুক না, মাটি খুঁড়ে তলায় ঢুকবি।’

‘ঢুকতে দে বলছি! নয়তো কোণগুলো সব খুঁড়ে খুঁড়ে বাড়িটি তোর ধুলিসাৎ করে ছাড়ব।’

ষাঁড় ভাবে আর ভাবে : ‘বাড়িটা দেখছি ধুলিসাৎ করে দেবে!’

বলল, ‘তা ভেতরেই আয়।’

শুয়োর দৌড়ে ঢুকে সোজা মাটির নিচের গুদামঘরে গিয়ে আরাম করে জাঁকিয়ে বসল।

তারপর এল হাঁস।

‘প্যাক, প্যাক, প্যাক! ষাঁড়, ও ষাঁড়, ঘরে ঢুকে একটু গরম হয়ে নিই!’

‘না হে বাপু, ঢুকতে দেব না! তোর দু’দুটো ডানা। একটায় পেতে শো আর একটায় গা ঢাকা দে। বাড়ি ছাড়াই তোর বেশ চলে যাবে।’

‘ঢুকতে না দিলে কাঠের ফাঁকে ফাঁকে যে শেওলা আছে সব টেনে ফেলে দেব। ফুটো দিয়ে হু হু করে তখন শীত ঢুকবে।’

ষাঁড় ভেবে ভেবে শেষ পর্যন্ত হাঁসকেও ঢুকতে দিল। হাঁসটা ঘরে ঢুকে গিয়ে বসল দাঁড়ে।

একটু পরেই মোরগ এল খেয়ে।

‘কৌকর-কো! ও ষাঁড়, দরজা খোল, ঢুকতে দে!’

‘না খুলব না, যা না ফার গাছের তলায় তোর কোটরে।’

‘ঢুকতে দে বলছি! নয়ত চালের উপর চেপে ঠুকরে ঠুকরে গর্ত করে দেব। হুহু করে শীত ঢুকবে তখন।’

মোরগকেও ঢুকতে দিল ষাঁড়। মোরগটা উড়ে গিয়ে বসল একটা কড়িকাঠের ওপর।

রইল ওরা একসঙ্গেই। পাঁচটিতে মিলে দিন কাটায়। নেকড়ে আর ভালুকের কানে গেল সে কথা। বলে:

‘চল, আমরা গিয়ে সব কটাকে খেয়ে ফেলি, তারপর আমরাই থাকব ঐ ঘরটায়।’

এই বলে রওনা হল। নেকড়ে ভালুককে বলল :

‘তোমার গায়ে জোর অনেক, তুই আগে ঢোক।’

‘না রে, আমি বড়ো ঢিলেঢালা, তুই চটপটে, বরঞ্চ তুইই আগে ঢোক।’

নেকড়েই ঢুকল বাড়ির মধ্যে। ঢোকা মাত্রই ষাঁড়টা দুই শিঙের মধ্যে তাকে আটকে দেওয়ালের সঙ্গে ঠেসে ধরল। ভেড়াটা দৌড়ে এসে টুঁ মারে—দমাস্, দমাস্! আর মাটির নিচের গুদামঘর থেকে শূয়োরটা হাঁকে :

‘ছুরিতে কুড়লে শান পড়ে,

জ্যাস্ত খাব নেকড়ে!’

হাঁস এসে চিমটি লাগায় নেকড়ের গায়ে, আর মোরগটা দাঁড়ে নেচে নেচে চ্যাচায় :

‘সে আবার কী, রাখ ইয়ার্কি,

এইখানে দে আমায়,

ছুরিও হেথা, দড়িও হেথা...

ঝুলিয়ে করি জবাই!’

হাঁক ডাক শুনে ভালুক একেবারে চম্পট। নেকড়ে এদিক ফোঁসে ওদিক ফোঁসে, কোন রকমে শিং ফসকে পালিয়ে বাঁচে। ভালুককে গিয়ে বলে :

‘বাক্সাঃ, যা বিপদে পড়েছিলাম! খুব জোর বেঁচে গেছি। পিটিয়ে প্রায় মেরেই ফেলেছিল...কালো কোটপরা একটা লোক আমায় মস্ত সাঁড়াশি দিয়ে ঠেসে ধরে দেওয়ালের সঙ্গে। তারপর ছাই রঙের কোট পরা বেঁটে একটা লোক এসে কুড়ালের ভোঁতা দিক দিয়ে কী পিটুনি পিটলে। তারপর এল সাদা কোট পরা আরো বেঁটে একটা লোক। এসেই সাঁড়াশি দিয়ে চিমটি কাটতে লেগে গেল। আর দলের সবচেয়ে ক্ষুদেটা টকটকে লাল জামা পরে কড়িকাঠের ওপর চ্যাচাতে লাগল :

‘সে আবার কী, রাখ ইয়ার্কি

এইখানে দে আমায়,

ছুরিও হেথা, দড়িও হেথা...

ঝুলিয়ে করি জবাই!’

আর তলকুঠরি থেকে কে যেন হাঁক দিল :

‘ছুরিতে কুড়ালে শান পড়ে,

জ্যাস্ত খাব নেকড়ে!’

তারপর থেকে নেকড়ে আর ভালুক কাঠের বাড়ির ত্রিসীমানায় যায় নি।

আর ষাঁড়, ভেড়া, শূয়োর, হাঁস আর মোরগ বাস করে বাড়িটায়, মনের আনন্দে দিন কাটায়।



## সেয়ানা চাষি

এক যে ছিল বুড়ি। তার দুই ছেলে। বড় ছেলে মারা গিয়েছিল। ছোট ছেলেও চলে গেল দূর দেশে। তারপর তিন দিনও হয়নি এক সৈনিক এসে হাজির হল বুড়ির কাছে। বলল :

‘আজ রাতটার মত থাকতে দেবে, ঠাকুমা?’

‘এসো বাছা, এসো। তা কোথা থেকে আসা হচ্ছে?’

‘আমি হলুম নিখোঁজ। আসছি ঠাকুমা, সেই পরলোক থেকে।’

‘দ্যাখো দিকি চাঁদ আমার, কী আর বলি, আমার ছেলেটিও মারা গেছে। দেখা হয়নি তার সঙ্গে?’

‘দেখিনি আবার? আমি আর ও তো একই ঘরে ছিলুম।’

‘বলো কী?’

‘ছেলে তোমার পরলোকে সারস চরায়, ঠাকুমা।’

‘আহা রে, বেচার! খুবই কষ্টের কাজ বোধ হয়!’

‘কষ্ট আবার নয়, সারসগুলো যে কেবল কাঁটা ঝোপেই ঘুরে বেড়ায়, ঠাকুমা।’

‘জামা কাপড়ের টানাটানি নেই তো?’

‘টানাটানি নেই আবার! একেবারে ছন্নছাড়া অবস্থা।’

‘শোনো বাছা, আমার কাছে চল্লিশ হাত কাপড় আর দশটি রুবল আছে, তুমি নিয়ে যাও, ছেলেকে দিও।’

‘তা দেব, ঠাকুমা।’

দিন যায়, বুড়ির ছোট ছেলে ফিরে এল।

‘কেমন আছো মা?’

‘তুই যখন বিদেশে ছিলি, তখন পরলোক থেকে নিখোঁজ এসেছিল আমার কাছে। তোর দাদার কথা কত বলল। একই ঘরে ছিল ওরা। ওর হাত দিয়ে আমি এক খান কাপড় আর দশটি রুবল পাঠিয়েছি।’

ছেলে বলে, 'এই যখন ব্যাপার, তখন আমি চললুম! সারা পৃথিবী ঘুরে তোমার চেয়েও বোকা যদি কোনদিন পাই তবেই ফিরব। নয়ত আর ফিরব না।'

এই বলে পথে নামল ছেলে।

এল সে জমিদারের গাঁয়ে, থামল জমিদারবাড়ির সামনে। উঠানে একটা শূয়োর তার কাচ্চাবাচ্চা নিয়ে চরছে। তাই দেখে চাষি হাঁটু গেড়ে শূয়োরের সামনে কুর্নিশ করতে লাগল। জমিদার-গিন্নি ব্যাপারটা জানলা দিয়ে দেখতে পেয়ে দাসিকে ডেকে বলল :

'যা তো, জিজ্ঞেস করে আয়, চাষি কেন কুর্নিশ করছে।'

দাসী গিয়ে জিজ্ঞেস করল :

'ও চাষি, তুমি হাঁটু গেড়ে বসেছ কেন? আর শূয়োরকে কেন কুর্নিশ করছ?'

'মনিব-গিন্নিকে গিয়ে বল মা, তোমাদের এই শূয়োরটি হলেন আমার শালী, কাল আমার ছেলের বিয়ে, নেমন্তন্ন করতে এসেছি। শূয়োরটি হবে বরকর্তী, বাচ্চাগুলো বরযাত্রী, গিন্নিমা যেন অনুমতি দেন।'

জমিদার-গিন্নি শুনে বলল :

'আচ্ছা বোকা তো, শূয়োর আর তার ছেলেপুলেকে কিনা নেমন্তন্ন করছে বিয়েতে! ভালই হবে, সবাই হাসাহাসি করবে। এক কাজ কর, শূয়োরটাকে আমার লোম-দেওয়া কোটটা পরিয়ে দে। আর দুটো ঘোড়া যুততে বলে দে গাড়িতে। জাঁকিয়ে বিয়ের আসরে যেতে হবে তো।'

দুটো ঘোড়াকে লাগাম পরিয়ে গাড়িতে জোতা হলো। কাচ্চাবাচ্চা সমেত শূয়োর নিয়ে গাড়িতে বয়ে দেয়া হল চাষিকে। অমনি চাষিও উঠে বসে ঘরমুখো গাড়ি হাঁকাল।

জমিদারমশাই শিকারে গিয়েছিল, বাড়ি ফিরে দেখে গিন্নি একেবারে হেসে আটখানা।

'ওগো, শোন শোন, সে এক মজার ব্যাপার, তুমি দেখতে পেলেন না। এক চাষি এসে আমাদের শূয়োরটার সামনে হাঁটু গেড়ে বসে কুর্নিশ করছিল। বলে কিনা তোমাদের শূয়োরটি আমার শালী, তাই আমি এসেছি ওকে ছেলের বিয়েতে নেমন্তন্ন করতে। শূয়োর নাকি হবে বরকর্তী আর বাচ্চারা হবে বরযাত্রী!'

জমিদার বলল, 'হ্যাঁ, বুঝেছি! শূয়োরটা দিয়ে দিয়েছে তো?'

'হ্যাঁ গো, যেতে দিলাম শূয়োরটাকে, আমার লোম-দেওয়া কোটটা পরিয়ে গাড়িতে দুটো ঘোড়া জুতে পাঠিয়েছি।'

'তা কোথায় থাকে চাষিটা?'

'তা তো জানি না!'

'দেখা যাচ্ছে তুমিই আস্ত বোকা, চাষিটা নয়!'

বৌ বোকা বনেছে দেখে জমিদারবাবু ভীষণ রেগে গেল। তক্ষুণি বাড়ি থেকে বেরিয়ে এক লাফে ঘোড়ায় চেপে চাষির পিছনে ধাওয়া করল। চাষির কানে এল, পিছন পিছন কে যেন আসছে। অমনি গাড়িটা ঘুরিয়ে ঘন বনের মধ্যে নিয়ে গিয়ে রেখে এল। তারপর টুপিটা খুলে মাটিতে পেতে নিজে বসে রইল তার পাশে।

'ওহে দাড়িওয়ালা, এক চাষিকে এ পথে যেতে দেখেছো? সঙ্গে তার জোড়া ঘোড়ায় টানা গাড়ি, আর তাতে শূয়োর আর তার ছানাপোনা বসে, জমিদারমশাই চিৎকার করে জিজ্ঞেস করল চাষিকে।'

'দেখিনি আবার, সে তো অনেকক্ষণ পেরিয়ে গেছে।'

'কোন দিকে গেছে বলতে পারো? ধরতে চাই একবার লোকটাকে।'

'ধরা কঠিন। নানা মোড়, নানা বাঁক। পথ হারিয়ে ফেলবে গো! এদিককার পথঘাট বোধ হয় তেমন চেনা নেই না?'



‘দেখো হে ভায়া, তুমিই না হয় আমার হয়ে চাষিটাকে ধরে এনে দাও।’

‘না বাপু, তা হয় না। আমার টুপির নিচে একটা বাজপাখি আছে যে!’

‘আমি না হয় বাজ পাখিটা দেখব।’

‘না গো, ছেড়ে দিয়ে বসবে, দামি পাখি। মনিব আমায় খেয়ে ফেলবে।’

‘দাম কত পাখিটার?’

‘তা শ’তিনেক রুবল্ হবে।’

‘বেশ, উড়ে গেলে দাম দিয়ে দেব।’

‘না বাবু, এখন তো বলছো, পরে কী হবে কে জানে।’

‘বিশ্বাস হচ্ছে না; বেশ, এই নাও তিন শ’ রুবল্ এবার তো আর ভয় নেই?’

টাকাটা নিয়ে বাবুর ঘোড়ায় চেপে বনের ভিতর ঢুকে গেল চাষি আর জমিদার বসে বসে চাষির শূন্য টুপিটা পাহারা দিতে লাগল। জমিদার বসে আছে তো আছেই। অনেকক্ষণ কেটে গেল, সূর্য প্রায় অস্ত যায়, কিন্তু চাষির আর দেখা নেই।

‘দেখি তো একবার টুপিটা তুলে, সত্যিই পাখি আছে কিনা। যদি থাকে, তবে লোকটা ফিরে আসবে, আর যদি নাই থাকে তো অপেক্ষা করা বৃথা!’

এই ভেবে জমিদারমশাই টুপি তুলে দেখে ভেঁ ভাঁ। কোথায় বাজপাখি? কিছু নেই।

‘হতভাগা! তাহলে এই চাষিটাই নিশ্চয়ই আমার গিল্লিকেও বোকা বানিয়েছে!’

রেগে মেগে থু থু করতে করতে জমিদারমশাই পায়ে হেঁটেই বাড়িমুখো রওনা দিল। চাষি এদিকে বহু আগেই নিজের বাড়ি পৌছে গিয়েছিল। মাকে ডেকে বলল :

‘শোনো মা, তোমার কাছেই ফিরে এলাম। দুনিয়ায় তোমার চেয়েও বোকা আছে। দেখো, এমনি এমনি মুফতে পেয়ে গেলাম তিনটে ঘোড়া, একটা গাড়ি, তিন শ’ রুবল্ আর ছানাপোনাসুদ্ধ একটা শূয়ার।’



## সাত-বছরে

দুই ভাই যাচ্ছে। একজন গরিব আর একজন ধনী। দুজনেরই একটা করে ঘোড়া। গরিব ভাইয়ের মাদি ঘোড়া আর ধনী ভাইয়ের মন্দা। এক জায়গায় থামল রাত কাটাতে।

রাত্রে গরিব ভাইয়ের ঘোড়া বাচ্চা দিল। বাচ্চাটা গড়িয়ে ধনী ভাইয়ের গাড়ির নিচে চলে গেল। সকালে ধনী ভাই গরিব ভাইকে ঘুম ভাঙ্গিয়ে বলে:

‘ওঠ, ওঠ, দেখ, আমার গাড়িটা কাল রাত্তিরে বাচ্চা দিয়েছে।’

গরিব ভাই উঠে বলে :

‘গাড়ির আবার বাচ্চা হবে কী? এ আমার ঘোড়াটার বাচ্চা।’

‘তাহলে তো বাচ্চাটা তোর ঘোড়ার পাশেই শুয়ে থাকত।’

ব্যাস্ লেগে গেলে ঝগড়া। ব্যাপারটা আদালত অবধি গড়াল। ধনী ভাই ঘুষ দিয়ে বিচারকদের হাত করে নিল। আর গরিব বেচারা কী করে—সত্যি কথাই তার একমাত্র সম্বল।

শেষ পর্যন্ত কথাটা রাজার কানে গেল।

রাজা দুই ভাইকে ডেকে পাঠালেন আর চারটে ধাঁধা দিলেন।

‘পৃথিবীর মধ্যে সবচেয়ে শক্তিশালী আর দ্রুতগামী কী, সবচেয়ে মোটা কী, সবচেয়ে নরম কী, আর সবচেয়ে মধুর কী?’

তিনদিন সময় দিলেন ভাবতে।

রাজা বললেন, ‘চতুর্থ দিনে এসে উত্তর জানিয়ে যেও।’

ধনী ভাই ভাবে ভাবে, তারপর সইয়ের কথা মনে পড়তে তার কাছে গেল উপদেশ নিতে।

সই তাকে আদর করে ডেকে টেবিলে বসাল। এটা ওটা খেতে দিল, তারপর জিজ্ঞেস করল :

‘এত মন খারাপ কেন গো?’

‘আর বলো কেন? রাজা চারটি ধাঁধা দিয়েছেন; তিনদিন মোটে সময়; চারদিনের দিন উত্তর চাই।’

‘শুনি কী ধাঁধা?’

‘প্রথমটা হল পৃথিবীর মধ্যে সবচেয়ে শক্তিশালী আর দ্রুতগামী কী?’

‘এ আবার একটা ধাঁধা হল! আমার স্বামীর এক বাদামি ঘোড়া আছে, এর চেয়ে জোরে চলে এমন কিছু সারা পৃথিবীতেই নেই। এক চাবুক লাগাও দেখবে দৌড়ে খরগোস পাকড়ে আনবে।’

‘এইবার দ্বিতীয়টা, পৃথিবীতে সবচেয়ে মোটা কী?’

‘দু বছর বয়সের যে শূয়োরটাকে পালছি সেইটা। শূয়োরটা এখনই এত মোটা যে, পায়ের ওপর দাঁড়াতে পারে না।’

‘এবার তবে তৃতীয়টা, পৃথিবীতে সবচেয়ে নরম কী?’

‘এ তো জানা কথা, পালকের বিছানা। এর চেয়ে নরম কী আর কিছু ভাবতে পারো?’

‘এবার তবে শেষটা, পৃথিবীতে সবচেয়ে মধুর কী?’

‘আমার নাতি ইভানুশ্কা।’

‘ভগবান তোমার মঙ্গল করুন সই, খুব বুদ্ধি দিয়েছো, জীবনে ভুলব না।’

আর গরিব ভাইটি কাঁদতে কাঁদতে বাড়ি ফিরে গেল। বাড়ির দরজায় তার সাত বছরের মেয়েটি তার জন্য দাঁড়িয়ে। সংসারে গরিব ভাইয়ের ঐ মেয়েটি ছাড়া আর কেউ নেই।

‘কী হয়েছে বাবা, দুঃখ করছ কেন, কাঁদছ কেন?’

‘দুঃখ না করে কী করি মা, না কেঁদে কী করি? রাজা আমায় চারটে ধাঁধা দিয়েছেন, সারাজীবনেও তার উত্তর দেবার সাধ্য আমার নেই।’

‘কী ধাঁধা বলো না?’

‘তবে শোনো মা, পৃথিবীতে কোন জিনিস সবচেয়ে শক্তিশালী আর দ্রুতগামী ; সবচেয়ে মোটা কী ? সবচেয়ে নরম কী? আর সবচেয়ে মধুর কী?’

‘বাবা, তুমি রাজাকে গিয়ে বলো সবচেয়ে শক্তিশালী আর দ্রুতগামী হল বাতাস। সবচেয়ে মোটা হল মাটি: যার বাড় আছে, যার প্রাণ আছে সবকিছুই আহার পায় মাটি থেকে। সবচেয়ে নরম হল হাত : লোকে যার ওপরেই গুয়ে থাক না কেন, সবসময় তার মাথার নিচে হাতটি রাখা চাই। আর ঘুমের চেয়ে মধুর কিছু পৃথিবীতে নেই।’

ধনী গরিব দু’ভাই এল রাজার কাছে। রাজা দুজনের উত্তরটাই শুনলেন। তারপর গরিব ভাইকে জিজ্ঞেস করলেন, ‘উত্তরগুলো তুমি নিজেই বের করেছো ? না কেউ বলেছে?’

গরিব ভাই উত্তর দিল :

‘মহারাজ, আমার একটি সাত বছরের মেয়ে আছে। সেই আমাকে বলেছে।’

‘তোমার মেয়ের যদি এতই বুদ্ধি, তবে এই রেশমের সুতোটা নিয়ে গিয়ে তাকে দাও। কাল সকালের মধ্যেই আমায় যেন একটা নকশি তোয়ালে বুন দেয়।’

গরিব লোকটি সেই ছোট রেশমের সুতোটা নিয়ে মনের দুঃখে বাড়ি ফিরে গেল।

বলে, ‘বিপদ হয়েছে মা, রাজা হুকুম করেছেন এই ছোট রেশমের সুতোটা দিয়ে তোমায় একটা তোয়ালে বুন দিতে হবে।’

সাত-বছুরে বলে, ‘দুঃখ করো না, বাবা।’

একটা ঝাঁটার কাঠি ভেঙ্গে নিয়ে বাবাকে দিয়ে বলে :

‘রাজাকে গিয়ে বলো যেন ছুতোরমিন্দ্রী ডেকে এই কাঠিটা দিয়ে একটা তাঁত তৈরি করিয়ে দেন। সেই তাঁতে আমি রাজার তোয়ালে বুনব।’

গরিব ভাই রাজার কাছে গিয়ে সে কথা জানাল। রাজা তখন তাকে দেড়শটা ডিম দিয়ে বললেন :  
'তোমার মেয়েকে গিয়ে বলো, কাল সকালের মধ্যেই বাচ্চা ফুটিয়ে দিতে হবে।'

আগের চেয়েও মন খারাপ করে বাড়ি ফিরে এল গরিব লোকটি।

'হায় হায়, মা, এক বিপদ যায় তো আর এক বিপদ আসে।'

সাত-বছুরে বলল, 'দুঃখ করো না, বাবা।'

ডিমগুলো সে দিনের খাবার, রাতের খাবার জন্যে রঁধে রাখল। আর বাবাকে পাঠাল রাজার কাছে।

'রাজাকে গিয়ে বলো মুরগির ছানাগুলোর জন্যে একদিনের তৈরি গম চাই : একদিনের মধ্যে মাঠ চষে, বীজ বুনে, ফসল কেটে, মাড়াই করে তৈরি করা চাই। নয়ত ছানারা ঠোঁটও ঠেকাবে না।'

রাজামশাই সব কথা শুনে বললেন :

'তোমার মেয়ের যদি এতই বুদ্ধি, তবে তাকে বলো, কাল সকালে এখানে আসা চাই : আসবে কিন্তু পায়ে হেঁটেও না, ঘোড়ায় চড়েও না, খালি গায়েও নয়, জামা পরেও নয়, কিছু দিতেও পারবে না, বিনা উপহারেও আসতে পারবে না।'

চাষিটি ভাবে, "ওরে বাবা! এ কাজ করার বুদ্ধি আমার মেয়ের নেই। সব গেল এবার!"

কিন্তু সাত-বছুরে বলল :

'মন খারাপ করো না বাবা, শিকারির কাছে যাও, একটা জ্যান্ত খরগোস আর জ্যান্ত একটা কোয়েল এনে দাও।'

গরিব লোকটি খরগোস আর কোয়েল কিনে নিয়ে এল।

পরদিন ভোর বেলা সাত-বছুরে জামাকাপড় ছেড়ে মাছ ধরার জাল পরল। তারপর হাতে কোয়েলটা নিয়ে খরগোসের পিঠে চড়ে চলল রাজবাড়িতে।

রাজবাড়ির ফটকের কাছে রাজার সঙ্গে দেখা। সাত-বছুরে রাজাকে কুর্নিশ করে বলল :

'এই নাও রাজা উপহার!' বলে পাখিটা বাড়িয়ে ধরল। রাজা হাত বাড়াতেই—ফুডুৎ করে উড়ে পালাল পাখিটা।

'খাসা! আমি যা বলেছিলাম ঠিক তাই করেছ। এবার বলো তো, বাপ তোমার খুবই গরিব, কী করে তোমাদের দিন চলে।'

'বাবা আমার জাল ফেলে না জলে, শুকনো ডাঙায় মাছ ধরে, সেই মাছ আমি কোচড়ে করে এনে ঝোল বানাই।'

'দূর বোকা মেয়ে! শুকনো ডাঙায় কি মাছ থাকে? মাছ থাকে জলে!'

'আর তুমিই বা কেমন বুদ্ধিমান, গাড়ির কখনো বাচ্চা হয়? বাচ্চা হয় ঘোড়ার।'

রাজা আজ্ঞা দিলেন ঘোড়ার বাচ্চাটা গরিব ভাইকেই ফিরিয়ে দেওয়া হোক।



## কুড়ালের জাউ

ছুটিতে বাড়ি যাচ্ছে এক বুড়ো সৈনিক। হেঁটে হেঁটে পা টাটাচ্ছে; খিদেও পেয়েছে। এক গ্রামে পৌছেই সে প্রথম কুঁড়েটার দরজায় টোকা দিল।

‘দরজা খোলো গো, পথের লোক জিরিয়ে নেবে।’

দরজা খুলল এক বুড়ি। বলল :

‘এসো, এসো সৈনিক।’

‘দুটি মুখে তোলার মত কিছু আছে গিনিমা?’

বুড়ির সবই ছিল কিন্তু সৈনিককে খাওয়াতে মন উঠল না, ভান করলে যেন অনাথা অভাগা।

‘কী আর বলি ভাল মানুষের পো, আমি নিজেই আজ এখনো কিছু মুখে তুলিনি। কিছুই নেই ঘরে।’

সৈনিক বলে, ‘নেই যখন, নেই! কী আর করা।’

হঠাৎ তার চোখে পড়ল বেষ্টির তলায় একটা হাতল ভাঙা কুড়াল।

বলল, ‘আর কিছু যখন নেই তখন ঐ কুড়ালটা দিয়েই জাউ বানান যাক।’

বুড়ি হাঁ করে তাকিয়ে রইল। বলল :

‘কুড়াল দিয়ে জাউ, সে আবার কেমন?’

‘দেখোই না! একটা পাত্র দাও তো।’

পাত্র নিয়ে এল বুড়ি। সৈনিকটি কুড়ালটা বেশ করে ধুয়ে পাত্রটায় রাখল। তারপর জল দিয়ে উনুনে চাপিয়ে দিল।

বুড়ির চোখ একেবারে ছানাবড়া।

একটা চামচ নিয়ে ঘটঘট করে নাড়তে লাগল সৈনিক। চেখে দেখল।

বলল, ‘এক্ষুণি হয়ে যাবে। ইস, একটু নুন যদি থাকত।’

‘তা নুন বাপু আমার আছে,’ বুড়ি বলল, ‘এই নাও!’

নুন দিয়ে আবার চেখে বলল :

‘ইস্, এর মধ্যে এক মুঠো খুদ যদি পড়ত, তাহলে আর দেখতে হত না।’

বুড়ি ভাঁড়ার থেকে ছোট একটা থলে ভর্তি করে খুদ এনে দিল।

‘তা নাও, যেমনটি দরকার তেমনি করেই রাঁধো!’

সৈনিকটি রাঁধছে তো রাঁধছেই। খালি চামচ নাড়ছে আর থেকে থেকেই চাখছে।

বুড়ি আর সেদিক থেকে চোখ ফেরাতে পারে না।

‘আহ্, দিব্যি হয়েছে জাউ। শুধু এই সঙ্গে একটু ঘি যদি পড়ত না, তাহলে তোফা হত!’

বুড়ি ঘিও জোগাড় করে আনল।

তৈরি হল জাউ।

‘নাও খেতে শুরু করো, গিনিমা।’

দুজনে মিলে খায়, প্রশংসা আর ধরে না।

‘দ্যাখো দিকি, ভাবতেই পারিনি যে কুড়াল দিয়ে আবার এমন খাসা জাউ রাঁধা যায়,’ অবাক হয় বুড়ি।

সৈনিকটি খেয়েই চলে আর মিটিমিটি হাসে।



## যমরাজ আর সৈনিক

পঁচিশ বছর কাজ করলে সৈনিক, তারপর বেকার হয়ে পথে নামল।

‘যতদিন মেয়াদ ছিল কাজ করেছে, এবার যেখানে খুশি যাবে যাও।’

বেঁধে ছেঁদে রওনা দিলে সৈনিক, মনে মনে ভাবে : “পঁচিশ বছর রাজার কাজ করলুম, কিন্তু পঁচিশটা শালগমও পুরস্কার মিলল না। শুকনো রুটির তিনটি টুকরো কেবল দিয়েছে পথে খাবার জন্যে। এখন কী করি? মাথাই বা গুঁজি কোথায়। যাই, দেশের বাড়িতেই যাই। বাবামার সঙ্গে দেখা হবে। যদি বেঁচে নাও থাকে তবু তো কবরের পাশে দু দণ্ড বসে জিরোতে পারব।”

এই ভেবে সৈনিক পথে নামল। চলেছে, চলেছে, চলেছে। শুকনো রুটির দুটো টুকরো খেয়ে ফেলল। রইল কেবল একটি বাকি, অথচ এখনও বহুদূর রাস্তা।

এমন সময় এক ভিখারির সঙ্গে দেখা। ভিখারি বলল :

‘বুড়ো অথর্বকে কিছু দাও না সৈনিক!’

সৈনিকটি তার শেষ রুটির টুকরোটাও বের করে বুড়ো ভিখারিকে দিয়ে দিল। ভাবল, “আমি যা হোক করে চালিয়ে নেব, হাজার হোক সৈনিক, কিন্তু অথর্ব বুড়ো ভিখারি, কীই বা ওর উপায়।”

পাইপটা আবার জ্বালিয়ে নিয়ে ধোঁয়া ছাড়তে ছাড়তে পথে চলে সৈনিক।

যায়, যায়, দেখে পথের পাশেই একটা হ্রদ। পারের কাছেই সব বুনো হাঁস সাঁতার কাটছে। সৈনিকটি পা টিপে এগিয়ে গেল। তারপর সুযোগ বুঝে তিনটে হাঁস মারল।

“যাক কিছু খাওয়ার যোগাড় হল!”

রাস্তা ধরে হাঁটতে হাঁটতে কিছুক্ষণের মধ্যেই সৈনিকটি এসে পৌঁছল শহরে। একটা সরাইখানা খুঁজে বের করে, সরাইওয়ালাকে তিনটে হাঁস দিয়ে বলল :

‘এই নাও তিনটে হাঁস। একটা আমায় ভেজে দাও। তুমিও নিও একটা। আর এই তিন নম্বর হাঁসটার বদলে কিছু মদ দিও।’

সাজসরঞ্জাম সব নামিয়ে রেখে আরাম করে বসতে না বসতেই খাবার তৈরি।

ভাজা হাঁসটা আর এক বোতল মদ নিয়ে সৈনিকটি খেতে বসল। এক এক ঢোক মদ তারপর এক এক কামড় মাংস, মদ আর কী!

সৈনিক খেতে লাগল ধীরে সুস্থে। খেতে খেতে সরাইওয়ালাকে জিজ্ঞেস করল :

‘আচ্ছা, বলতে পার, রাস্তা পেরিয়ে ঐ নতুন বিরাট বাড়িটা কার?’

সরাইওয়ালার জবাব দিল :

‘শহরের সবচেয়ে ধনী সওদাগর ওটা নিজে থাকবার জন্যে বানিয়েছিল। কিন্তু কিছুতেই আর ওখানে থাকা হয়ে উঠছে না।’

‘তার মানে?’

‘ওটা ভুতুড়ে বাড়ি। শয়তানের আড্ডা—রাত্রে লাফলাফি চেষ্টামেচি করে নরক গুলজার করে। সন্ধ্যার পর লোকে বাড়িটার কাছে যেতেও ভয় পায়।’

সওদাগরটির ঠিক-ঠিকানা জেনে নিলে সৈনিকটি। বলল :

‘দেখা করে দু চারটে কথা বলতে চাই। হয়ত তার কিছু সাহায্যেও লাগতে পারি।’

খাবার পর সৈনিক একটু ঘুম দিয়ে নিল। তারপর অন্ধকার হয়ে আসছে দেখে বেরিয়ে পড়ল সৈনিক। খুঁজে বার করল সওদাগরকে। সওদাগর বলল :

‘কী চাও সৈনিক, বলো।’

‘আমি এক যাত্রী। তোমার নতুন বাড়িটায় রাতটা কাটাতে দাও, ওটা তো খালিই পড়ে আছে।’

‘বলছ কী! নির্ধাৎ মরণের পথ নেবার কী দরকার? বরং অন্য কোথাও থাকবার জায়গা দেখো। শহরে বাড়ি তো কম নয়। আমার নতুন বাড়িটা যেদিন থেকে করেছি সেদিন থেকেই ওখানে শয়তানেরা ডেরা বেঁধেছে। কারো সাধি নেই যে ওদের নড়ায়।’

‘দেখা যাক, শয়তানগুলোকে তাড়াতে পারি কিনা। কে জানে, ভূতগুলো হয়তবা বুড়ো সৈনিকের হুকুম মানতেও পারে।’

‘তোমার মত সাহসী লোকেরাও চেষ্টা করেছে, কিন্তু কোন ফল হয়নি। কোন উপায় নেই। এক পর্যটক এসেছিল গত বছর, তোমার মত সেও বাড়িটা থেকে ভূত তাড়াতে চেয়েছিল। কিন্তু পরদিন সকালে পাওয়া গিয়েছিল কেবল কয়েকটা হাড়। ভূতের হাতে মারা পড়েছিল লোকটা।’

‘রুশি সৈনিক আগুনে পোড়ে না, জলে ডোবে না। পঁচিশ বছর কাজ করেছি আমি, লড়াই করেছি, যুদ্ধ করেছি, তবু বেঁচে আছি। শয়তানগুলোর হাত থেকেও বাঁচব, হার মানব না।’

‘বেশ, যা ভালো বোঝো। ভয় না পেলে যাও। যদি সত্যিই শয়তানগুলোকে তাড়াতে পার, তবে পুরস্কার দিতে ভুলব না।’

সৈনিকটি বলল, ‘আমাকে কয়েকটা মোমবাতি, কিছু ভাজা বাদাম, আর বড় সড়ো একটা শালগম সেক করে দাও।’

‘এসো বাপু তুমি দোকানে, যা দরকার সব দেখে শুনে নাও।’

সৈনিকটি দোকানে গেল। গোটা দশেক মোমবাতি, দেড় সের ভাজা বাদাম নিয়ে সওদাগরের রান্নাঘর থেকে সবচেয়ে বড় শালগমটা তুলে নিয়ে নতুন বাড়ির দিকে চলে গেল।

ঠিক মাঝ রাত্তে হঠাৎ প্রচণ্ড তাণ্ডব শুরু হল। দড়াম্ দড়াম্ করতে লাগল দরজা, কাঁচাচকঁচিয়ে উঠল কাঠের মেঝে, শুরু হল পাগলের মত চেষ্টামেচি লাফলাফি। কানে একেবারে তাল লাগে। তোলপাড় লেগে গেল সারা বাড়িটায়।

সৈনিকটি কিন্তু শান্তভাবে বসে বাদাম ভাঙে আর পাইপে টান দেয়।

হঠাৎ দরজাটা খুলে গেল। একটা বাচ্চা শয়তান মাথা চুকিয়ে সৈনিককে দেখেই চিৎকার করে উঠল :

‘একটা মানুষ যে রে! চলে আয় সব! জ্যান্ত খাওয়া যাবে।’

দুমদাম করে এসে জুটল সবকটা শয়তান। দরজার কাছে ভিড় করে তারা উঁকি মেরে সৈনিককে দেখে আর এ ওকে ঠেলা মেরে চেষ্টিয়ে বলে :



‘ছিড়ে ছিড়ে খাব।’

সৈনিক বলে, ‘বড়াই থামা। জীবনে অমন ঢের দেখেছি। গিটিয়ে ঠাণ্ডা করতে হয়েছে কম নয়। ভালোয় ভালোয় সরে পড়।’

এই শুনে একটা শয়তান ঠেলেঠেলে এগিয়ে এসে বলল :

‘হয়ে যাক শক্তি পরীক্ষা!’

সৈনিক বলল, ‘ঠিক আছে। হাতে করে পাথর নিঙড়ে রস করে বার করতে পরিস তোরা?’

গোদা-শয়তান রাস্তা থেকে একটা পাথর আনবার হুকুম দিল। একটা শয়তান তক্ষুণি দৌড়ে গিয়ে নিয়ে এল। সৈনিকের হাতে পাথরটা দিয়ে বলল, ‘নাও, রস বার করো দেখি।’

‘আমি পরে, আগে দেখি তোদের মধ্যে কেউ পারে কিনা।’

গোদা-শয়তান পাথরটা বাগিয়ে ধরে এমন জোর চাপ দিল যে তক্ষুণি গুটা গুঁড়িয়ে এক মুঠো বালি হয়ে গেল।

‘দেখেছিস তো!’ সৈনিক ঝোলার ভিতর থেকে বের করল শালগমটা।

‘দেখ, আমার পাথরটা তোর চেয়ে ঢের বড়,’ এই বলে সৈনিক শালগমটা চিপে চিপে রস বরাতে লাগল।

‘দেখলি তো!’

হাঁ হয়ে গেল শয়তানরা। মুখে আর কথা নেই। পরে জিজ্ঞেস করল :

‘কী তুমি খাচ্ছে অনবরত?’

‘বাদাম। কিন্তু আমার বাদাম ভাঙবার সাধ্য তোদের নেই।’

সৈনিক গোদা-শয়তানের হাতে দিল একটা বুলেট।

‘খেয়ে দেখ একবার সৈনিকের বাদাম।’

শয়তানটা গুটা কপ করে মুখে পুরে দিল। চিবোতে চিবোতে বুলেটটা চ্যাপ্টা হয়ে গেল, কিন্তু ভাঙতে আর পারে না। এদিকে সৈনিক কিন্তু একটা করে বাদাম মুখে দেয় আর খায়, মুখে দেয় আর খায়।

ঠাণ্ডা হয়ে এল শয়তানেরা, শান্ত হয়ে এল, এপায়ে ভর দিয়ে ওপায়ে ভর দিয়ে উঁকি দিয়ে দেখতে লাগল সৈনিককে।

সৈনিক বলল, ‘শুনেছি তোরা নাকি অনেক রকম ভাল ভাল কায়দা দেখাতে পারিস। ছোট থেকে বড়, আবার বড় থেকে ছোট হয়ে যেতে পারিস, সরু ফাটল দিয়ে দিব্যি গলে যেতে পারিস।’

‘হ্যাঁ, হ্যাঁ, একাজটা আমরা সবাই পারি!’ চেষ্টা করে উঠল শয়তানগুলো।

‘আচ্ছা, দেখি তো তোরা যতকটা আছিস সবাই কেমন গুঁড়ি মেরে আমার ঝোলার মধ্যে ঢুকে যেতে পারিস!’

শয়তানগুলো অমনি এ ওকে গুঁতো দিয়ে, ধাক্কা মেরে ছুটল ঝোলার দিকে। এক মিনিটের মধ্যেই বাড়ি খালি। সবকটা ঝোলার মধ্যে।

সৈনিক অমনি ঝোলার মুখ বন্ধ করে, আড়াআড়ি বেল্ট দিয়ে শক্ত করে বকলস আটকে দিল।

‘এবার একটু ঘুমিয়ে নেওয়া যাক!’ বলে শুয়ে পড়ল ফৌজি কায়দায়—কোট দিয়েই বিছানা, কোট দিয়েই কম্বল।

পরদিন সকালে সওদাগর তার চাকরকে পাঠিয়ে দিল।

‘যা দেখে আয়, সৈনিক বেঁচে আছে কি না? যদি মরে গিয়ে থাকে তবে অন্তত হাড়গুলো নিয়ে আসিস।’

চাকররা যখন এসে পৌঁছল, ততক্ষণে সৈনিক জেগে উঠে ঘরের মধ্যে পায়চারি করছে আর পাইপ টানছে।

‘নমস্কার, সৈনিক! ভাবিইনি তোমায় জলজ্যান্ত দেখব, বাস্তব নিয়ে এসেছিলাম, তোমার হাড় নিয়ে যাব বলে।’

সৈনিকটি হাসল।

‘আমায় কবর দিতে এখনো দেরি আছে। তার চেয়ে বরং একটু হাত লাগাও তো কামারের কাছে এই ঝোলাটা নিয়ে যাব, কামারবাড়ি কত দূরে?’

ওরা বলল, ‘না, দূর নয়।’

তারপর ওরা সবাই মিলে ঝোলাটা নিয়ে চলল কামারবাড়ি। সেখানে গিয়ে সৈনিক কামারকে বলল :

‘তা কামার-ভাই, নেহাই’এ চাপিয়ে এই ঝোলাটাকে আচ্ছা করে পেটাও তো!’

কামার আর তার সাগরেদ দুজনে মিলে কামারে হাতুড়ি নিয়ে লেগে গেল পিটতে।

শয়তানগুলোর যা অবস্থা সে আর কী বলব। সমস্বরে চেষ্টাতে লাগল :

‘দয়া করো সৈনিক, ছেড়ে দাও!’

কিন্তু কামাররা আরো থামে না, সৈনিকও কেবলি তাতায় :

‘জোরে, আর জোরে! লোকের উপর উপদ্রব করার মজা বুঝুক এবার!’

শয়তানগুলো চেষ্টায়, ‘আর করব না, জীবন থাকতে ঐ বাড়ির ছায়া মাড়াব না। অন্যদেরও বলে দেব এ শহরে যেন না আসে। অনেক পুরস্কার দেব তোমাকে! কেবল প্রাণে মেরো না!’

‘এতক্ষণে কথা বেরিয়েছে। রুশি সৈনিকের সঙ্গে লাগতে হলে বুঝে শুনে এগোবি!’

কামারদের থামতে বলল সৈনিক। তারপর ঝোলার মুখটা আলগা করে শয়তানগুলোকে একটার পর একটা ছেড়ে দিল, শুধু গোদা-শয়তানকে ছাড়ল না। ‘যতক্ষণ না পুরস্কার আনছিস ততক্ষণ ওকে ছাড়ছি না।’

পাইপটা তখনো শেষ হয়নি, সৈনিক দেখে কি, একটা বাচ্চা শয়তান হনহন করে ফিরে আসছে, হাতে একটা পুরনো থলি।

‘এই নাও তোমার পুরস্কার!’

সৈনিক হাতে নিয়ে দেখল নেহাত হালকা। খুলে দেখে ফাঁকা। সৈনিক শয়তানটাকে ধমকে উঠল :

‘আমায় বুদ্ধ বানাবার চেষ্টা? দাঁড়া,তোদের গোদাটাকে দুটো হাতুড়ি দিয়ে আচ্ছা করে শিক্ষা দেব!’

এই না শুনে গোদাটা ঝোলার ভিতর থেকে চেষ্টিয়ে বলল :

‘মেরো না সৈনিক, পিটিও না, শোনো বলি, থলিটা সাধারণ নয়। ওটা যাদু-থলি। পৃথিবীতে একটিই আছে। মনে মনে কিছু ইচ্ছে করে থলি খুলে দেখবে, যা ইচ্ছে করেছিলে এসে গেছে। পাখি চাও, যা খুশি চাও, থলিটা দুলিয়ে কেবল তিনটি কথা বলবে : “থলির ভিতর আয়!” ব্যাস, অমনি যা চাইবে থলিতে এসে হাজির হবে।’

‘বটে, বটে, তাহলে একবার পরীক্ষা করা যাক, সত্যি বলছিস কিনা।’ আর মনে মনে ভাবল : “তিনটে মদের বোতল চাই।” মনে করতে না করতেই সৈনিক দেখল থলিটা ক্রমে ভারি হয়ে উঠছে। খুলে দেখে, সত্যিই তিন তিনটে মদের বোতল! সৈনিক বোতল তিনটে কামারদের দিয়ে দিল।

‘খাও, ভাই তোমরা!’

তারপর সৈনিক বাইরে গিয়ে দেখে, এক বাড়ির ছাদে একটা চড়াই বসে আছে। সৈনিক থলি দুলিয়ে বলল :

‘থলির ভিতর আয়!’

কথা শেষ হতে না হতেই চড়াইটা সোজা এসে ঢুকল থলিতে।

সৈনিক কামারের বাড়িতে ফিরে এসে বলল :

‘ঠিকই বলেছিস। আমাকে ঠকাসনি। বুড়ো সৈনিকের খুব কাজে লাগবে থলিটা।’

এই বলে ঝোলা খুলে গোদা-শয়তানকে বের করে দিল।

‘পালা এবার, কিন্তু মনে রাখিস, ফের চোখে পড়লে আর রক্ষা থাকবে না।’

গোদা-শয়তান, বাচ্চা শয়তান সব এক নিমেষে পালিয়ে গেল। সৈনিক ঝোলা আর থলি নিয়ে কামারদের বিদায় জানিয়ে সওদাগরের বাড়ি চলে গেল। বলল :

‘এবার যাও, তোমার নতুন বাড়িতে বাস করো। আর কেউ তোমায় বিরক্ত করবে না।’

সওদাগর সৈনিকের দিকে তাকায়, নিজের চোখকে বিশ্বাস হয় না।

‘সত্যিই দেখছি রুশ সৈনিক আগুনে পোড়ে না, জলে ডোবে না। বলো তো শুনি কী করে তুমি শয়তানগুলোর হাত এড়িয়ে ফিরে এলে? জলজ্যান্ত বেঁচে রইলে?’

যা যা ঘটেছিল সৈনিক সব বলল। চাকররা সায় দিল। সওদাগর ভাবল :

“দু’চারদিন বরঞ্চ দেখি। যাচাই করে নিই সত্যিই বাড়িটা শান্ত কিনা, শয়তানগুলো ফেরে কিনা!”  
সকালে সেদিন সৈনিকটির সঙ্গে যারা গিয়েছিল, তাদেরকে সওদাগর বলল সৈনিকটির সঙ্গে যেতে।  
‘রাত কাটিয়ে দেখ, যদি কিছু হয় সৈনিক আছে, বাঁচবে।’

সারা রাত নির্বিবাদেই কাটল। পরদিন সকালে নিরাপদে, খুশি মনে সব ফিরে এল।

তৃতীয় রাতে সওদাগর নিজেই ভরসা করে গেল রাত কাটাতে। সেদিনও রাতটা বেশ ভালভাবেই কাটল। সবাই শান্তিতে ঘুমল। সওদাগর হুকুম দিলে ঘর দোর পরিষ্কার করতে। শুরু হল গৃহপ্রবেশের তোড়জোড়। ভাজা হল, রাঁধা হল, সেকা হল সবকিছু। অতিথিরা এল, খাবারের ভায়ে টেবিল প্রায় ভেঙ্গে পড়ে। একেবারে দীয়াতাং ভূজ্যতাং!

সওদাগর সৈনিককে সবচেয়ে ভাল আসনটিতে সম্মান করে বসিয়ে খুব করে আপ্যায়ন করতে লাগল।

‘খাও সৈনিক, খাও, তোমার উপকার আমি জীবনে ভুলব না!’

খাওয়া-দাওয়া চলল একেবারে ভোর পর্যন্ত। ঘুম থেকে উঠে সৈনিক বলল এবার সে বাড়ি যাবে। সওদাগর তাকে থাকবার জন্যে পিড়াপিড়ি করতে লাগল।

‘এত তাড়া কিসের? আমাদের সঙ্গে আর একটা সপ্তাহ অন্তত থেকে যাও।’

‘না ভাই, এমনিতেই দেরি হয়ে গেছে। এবার বাড়ি যেতেই হবে।’

সওদাগর সৈনিকের ঝোলাটা রূপো দিয়ে বোঝাই করে দিয়ে বলল, ‘এই নাও তোমার যৌতুক।’

কিন্তু সৈনিক বলল :

‘তোমার রূপো আমি চাই না। আমি একলা মানুষ, গতির আছে। নিজেই নিজেরটা চালাব।’

সওদাগরের কাছ থেকে বিদায় নিয়ে শূন্য ঝোলা আর যাদু-খলিটা কাঁধে ঝুলিয়ে রওনা হল সৈনিক।

গেল সে অনেক দিন নাকি অল্প দিন, অনেক পথ নাকি অল্প পথ, কে জানে। শেষকালে নিজের দেশে এসে পৌঁছল সে। পাহাড়ের পাশ থেকে গ্রামটা চোখে পড়তেই খুশি আর তার ধরে না। দুপাশে তাকাতে তাকাতে দ্রুত পা চালান সৈনিক।

“কী সুন্দর! কী শোভা! কত দেশ ঘুরেছি, কত শহর, গ্রাম দেখেছি, কিন্তু সারা পৃথিবীতে নিজের দেশটির মত এমনিটি আর চোখে পড়ল না!”

সৈনিক নিজের কুঁড়েঘরের কাছে এসে দাওয়ায় উঠে দরজায় টোকা দিল। দরজা খুলে দিল এক থুথুরে বুড়ি। সৈনিকটি বুড়িকে জড়িয়ে ধরে আদর করতে লাগল।

ছেলেকে চিনতে পেরে বুড়ি আনন্দে যত হাসে তত কাঁদে।

‘বুড়ো তোর কথা খুব বলত রে, কিন্তু কপাল আমার, আজকের দিনটা সে আর দেখে যেতে পারল না। পাঁচবছর হল তাকে গোর দিয়েছি।’ তারপর হুঁশ হল বুড়ির, কাজক্মে লেগে গেল। সৈনিক তাকে সান্ত্বনা দেয় :

‘ব্যস্ত হলো না, মা। এখন থেকে আমিই তোমার সুখ সুবিধে দেখব।’

এই বলে সৈনিক যাদু-খলি বের করে নানা রকম খাবার-দাবার চাইল। তারপর থলি থেকে সব বের করে টেবিলের ওপর সাজিয়ে রেখে মাকে বলল :

‘নাও, যত পারো খাও!’

পরদিন সৈনিক আবার যাদু-খলির কাছে গিয়ে রূপো চাইল। তারপর কাজে হাত দিল। নতুন বাড়ি তুলল সে, গরু কিনল, ঘোড়া কিনল, সংসারে যা দরকার সব জোগাড় করলে। তারপর একটি কনে দেখল, বিয়ে করে ঘর সংসার করতে লাগল। বুড়ীমা তো নাতিনাতিদের দেখাশোনা করতে পেয়ে ভারি খুশি।

এই ভাবে ছ সাত বছর কেটে গেছে। অসুখ হল সৈনিকের। তিনদিন বিছানায় পড়ে। খাওয়া নেই, দাওয়া নেই। অবস্থা খারাপ হতে লাগল। তৃতীয় দিনে সৈনিক দেখল যমরাজ তার বিছানার পাশে দাঁড়িয়ে ঝাঁড়ায় শান দিচ্ছে আর ঘন ঘন তার দিকে তাকাচ্ছে।

যমরাজ বলল, 'তৈরি হও সৈনিক, তোমার জন্যেই এসেছি। প্রাণ নেব তোমার।'

সৈনিক বলল, 'এত তাড়া কিসের? আরও তিরিশ বছর বাঁচতে দাও। ছেলেপুলেদের মানুষ করি, বিয়ে দিই, নাতিনাতিদের মুখ দেখি, তারপর না হয় এসো। এক্ষুনি যে আমার মরা চলবে না।'

'নাহে, সৈনিক, তিনটি ঘণ্টাও আর পরমায়ু নেই তোমার।'

'বেশ, যদি তিরিশ বছর না হয়, অন্তত তিন বছর সময় দাও। কাজ তো আমার কম নয়, সব গুছিয়ে যেতে হবে।'  
যমরাজ বলল, 'তিন মিনিটও নয়।'

সৈনিক আর অনুরোধ করল না, কিন্তু মরবার তার একটুও ইচ্ছে ছিল না। অতি কষ্টে বালিশের তল থেকে যাদু-খলিটা বের করে দুলিয়ে সে বলল :

'খলির ভিতর আয়!'

বলতে না বলতেই সৈনিক একটু সুস্থ বোধ করতে লাগল। যম যেখানে দাঁড়িয়েছিল তাকিয়ে দেখে সেখানে কেউ নেই। খলির মধ্যে তাকিয়ে দেখে কি, স্বয়ং যমরাজ বসে।

খলিটা এঁটে বাঁধতেই সৈনিক বেশ সুস্থ হয়ে গেল, খিদেও ফিরে এল।

বিছানা থেকে নেমে এক টুকরো রুটি কেটে নুন দিয়ে খেয়ে ফেলল সৈনিক। তারপর এক জগ ক্ভাস খেতেই একেবারে সেরে গেল।

'ভাল কথাই মানুষ নও, নাককাটা কোথাকার, রুশ সৈনিকের সঙ্গে লাগতে আসার মজাটা এবার টের পাবে।'

'কী করতে চাও আমায় নিয়ে?' খলির ভিতর থেকে আওয়াজ এল।

সৈনিক উত্তর দিল :

'খলিটার জন্যে মায়া হচ্ছে, কিন্তু কী আর করা যায়! বিসর্জনই দিতে হবে। তোমাকে পানা পুকুরে ডুবিয়ে দেব। সারা জীবনেও খলির বাইরে আসতে পারবে না।'

'ছেড়ে দাও, সৈনিক, আরও তিনবছর পরমায়ু দেব।'

'উই, আর ছাড়ছি না।'

'দোহাই তোমার, ছেড়ে দাও, তোমার কথাই রইল, আরও তিরিশ বছরই না হয় বাঁচতে দেব!'

'বেশ, ছেড়ে দেব শুধু একটি শর্তে—এই তিরিশ বছরের মধ্যে তুমি কারও প্রাণ নিতে পারবে না।'

যম বলল, 'সে হয় না। কারও প্রাণ নেব না তো খাব কী?'

'এই তিরিশ বছর গাছের ফলমূল, ছাল, পাথর খেয়ে কাটাবে।'

যম কোন উত্তর দিল না। কাজেই সৈনিক জামা জুতো পরে তৈরি হয়ে বলল :

'রাজি যখন হলে না তখন চলো তোমাকে পানা পুকুরে দিয়ে আসি।' বলে খলিটা তুলে নিল কাঁধে।

যম তখন বলে উঠল :

'বেশ তাই হোক, তিরিশ বছরের মধ্যে আমি কারও প্রাণ নেব না। কেবল ফলমূল, ছাল, পাথর খেয়ে মাঠে মাঠে কাটাব। এখন আমায় ছেড়ে দাও।'

'সাবধান, ঠকাবার চেষ্টা করো না যেন।'

সৈনিক যমকে গ্রামের বাইরে নিয়ে গিয়ে খলিটা খুলে ছেড়ে দিল। বলল :

'যাও, আমার মত বদলাবার আগেই পালাও!'

যম খাঁড়াটা তুলে নিয়েই বনের মধ্যে দৌড়। মাঠে মাঠে ফলমূল, ছাল, পাথর খুঁজে বেড়াতে লাগল সেখানে। খোঁজে আর কামড়ায়। তাছাড়া আর উপায় কী?

আর লোকেদের তখন আর আনন্দ ধরে না। কারও অসুখ নেই, কেউ মারা যায় না!

এই ভাবে তিরিশ বছর কেটে গেল। ইতোমধ্যে সৈনিকের ছেলেপুলেরা বড় হয়ে উঠল, ছেলেদের বৌ জুটল, মেয়েদের স্বামী। বড় হয়ে উঠল সংসার। কারও দরকার সাহায্য, কারও প্রয়োজন উপদেশ, কাউকে বা বুদ্ধি দিতে হয়। সবাইকে বুঝিয়ে শুনিয়ে কাজ দিতে হয়।

সৈনিকের তাই ভারি কাজ। ভীষণ খুশি। সব দিকেই সৈনিকের ভাগ্য খুলে গেল। গড়গড়িয়ে চলল জীবন। কাজ নিয়েই মেতে আছে সে, মরণের কথা ভাবার সময় কোথায়?

একদিন কিন্তু সত্যিই এসে হাজির হল যম।

‘আজ তিরিশ বছর পূর্ণ হল। দিন ফুরিয়েছে, সৈনিক। তৈরি হও, আমি তোমাকে নিতেই এসেছি।’  
সৈনিক আর তর্ক করল না।

‘আমি সৈনিক, এক ডাকেই খাড়া। দিন যদি ফুরিয়ে থাকে তো বেশ, কফিন নিয়ে এসো।’

যমরাজ এনে হাজির করল একটা ওক কাঠের কফিন, তাতে লোহার হাড়কো লাগান।

ডালা খুলে বলল, ‘চুকে পড়ো, সৈনিক।’

সৈনিক একেবারে রেগে আশুন। চেষ্টা করে উঠল :

‘সে কী! নিয়মকানুন কিছু জানো না দেখছি! পুরনো সৈনিক হুট করেই নিজে থেকে কিছু করে বসবে, এ নিয়ম কোথায় পেলো? সৈন্যদলে নতুন কিছু শেখাতে হলে হাবিলদার আগে নিজে করে দেখায়, তারপরে হুকুম করে। তোমারও ঠিক তেমন করা উচিত। আগে দেখিয়ে দাও কী করতে হবে, তারপর হুকুম করো!’  
কফিনে গুল যমরাজ।

‘এই দেখো সৈনিক, এই ভাবে শোবে, পা টান করে মেলে দেবে, হাতদুটো মুড়ে রাখবে বুকের ওপর।’  
সৈনিকও ঠিক এইটেই চাইছিল। দড়াম করে কফিনের ডালাটা বন্ধ করে হাড়কো এঁটে দিল।

বলল, ‘নিজেই শুয়ে থাক ওখানে, আমি এখানে দিব্যি আরামে আছি।’

গাড়ির ওপর চাপিয়ে নদীর খাড়া পাড়ে নিয়ে গিয়ে কফিনটা সে ফেলে দিল নদীতে।

নদী কফিনটাকে ভাসিয়ে নিয়ে গেল সমুদ্রে। তারপর বছরের পর বছর ধরে সমুদ্রে ভেসে বেড়াতে লাগল যমরাজ।

আবার সুখেস্বচ্ছন্দে ভরে উঠল মানুষ। সৈনিকের জয়গান করতে লাগল তারা। সৈনিকও আর বুড়ো হয় না। নাতিনাতিদের বিয়ে দিল সৈনিক, তারপর নাতিনাতিদের ছেলেমেয়েদেরও শেখাতে পড়াতে লাগল। বাড়িঘর, ক্ষেত খামার নিয়ে বুড়ো সারাদিন ভারি ব্যস্ত, কিছুতেই যেন বুড়োর ক্লান্তি নেই।

একদিন হয়েছে কি, সমুদ্রে ভীষণ ঝড় উঠল। ঢেউয়ের ধাক্কায় পাহাড়ের গায়ে লেগে টুকরো টুকরো হয়ে গেল কফিনটা। মরোমরো হয়ে কোনরকমে তীরে এসে পৌঁছল যম। বাতাসের ঝাপটে টলে টলে পড়ে।

তারপর সমুদ্রতীরে শুয়ে, একটু জিরিয়ে কোনক্রমে গিয়ে পৌঁছল সৈনিকের গ্রামে। গিয়ে খামারে লুকিয়ে রইল। ওঁৎ পেতে রইল কখন সৈনিক বেরয়।

এদিকে মাঠে বীজ বুনতে যাবার জন্যে তৈরি হচ্ছিল সৈনিক। বীজ নেবার জন্যে একটা খালি বস্তা নিয়ে গোলাঘরে গিয়ে পৌঁছতেই যম বেরিয়ে এল।

‘এবার আর আমার হাত থেকে রেহাই পাচ্ছ না!’ হেসে উঠল যম।

সৈনিক দেখল সত্যিই বিপদ! ভাবল :

‘যা হবার তা হবেই। নাককাটাটার হাত থেকে যদি নেহাত ছাড়া নাই পাই, তবু কিছুটা ভয় দেখাতে পারব তো!’

এক ঝটকায় খালি বস্তাটা কোটের তল থেকে বের করে নিয়ে সে চেষ্টা করে উঠল :

‘ফের চুকতে সাধ হয়েছে খলিটায়, তাই না! আবার পানা পুকুরে চুবুনি খাবার ইচ্ছে হয়েছে, নাকি?’

সৈনিকের হাতের ফাঁকা বস্তাটাকে যাদু-খলি মনে করে যম তখন ভীষণ ভয় পেয়ে দে ছুট, দে ছুট। সৈনিকের চোখে পড়তে সে আর রাজি নয়। সেই থেকেই লোকের প্রাণ নিতে যম আসে খুব চুপিসারে। ভাবে, ‘সৈনিকের চোখে যেন না পড়ি। দেখতে পেলেই পানা পুকুরে চুবুনি না খাইয়ে ছাড়বে না।’

সৈনিক বেশ সুখেস্বচ্ছন্দে দিন কাটাতে লাগল, লোকে বলে, এখনও সে বেঁচে, মুখে তার হাসি লেগেই আছে।



## গল্পী-বৌ

এক ছিল চাষি আর তার বৌ। বৌটা ভারি গল্পী ছিল, কোন কথা পেটে থাকত না। কানে তার কোন কথা পৌঁছেলেই অমনি সেটা সারা গ্রামে রাস্তা হয়ে যেত।

একদিন চাষি তো বনে গেল। বনের মধ্যে নেকড়ে ধরার গর্ত খুঁড়তে গিয়ে হঠাৎ গুপুধন পেয়ে গেল। চাষি ভাবল, “এখন কী করি? আমার বৌ তো গুপুধনের কথা শুনেই সারা পাড়ায় রটিয়ে দেবে। জমিদারের কানে কথাটা যাবে—ব্যস—টাকাও আর পেতে হবে না। জমিদারই সবটা গায়েব করবে।”

ভাবতে ভাবতে একটা বুদ্ধি মাথায় এল। গুপুধনটা আবার পুঁতে রেখে জায়গাটা চিহ্ন দিয়ে ফিরে গেল। নদীর কাছে আসতে জালের দিকে তাকিয়ে দেখে, জালের মধ্যে মাছ ছটফট করছে। মাছটা বের করে নিয়ে চাষি আবার চলল। একটু পরেই তারই পাতা একটা ফাঁদের কাছে এসে দেখে একটা খরগোস তাতে আটকা পড়েছে।

চাষি খরগোশটা বের করে নিয়ে মাছটা সেই জায়গায় রাখল। তারপর খরগোসটা জড়ালে জালের মধ্যে।

বাড়ি ফিরল বেশ রাত হয়ে যাবার পর।

‘উনুন জেলে বেশ কিছু সরু চাকলি বানাও তো, তাতিয়ানা!’

‘সে কী? সন্ধ্যার পর কেউ কখনো উনুন ধরায় নাকি? এত রাতে কেই বা আবার সরু চাকলি তৈরি করে! খেয়াল দ্যাখো!’

‘যা বলছি করো! তর্ক করো না। গুপুধন পেয়েছি আমি, আজ রাতেই বাড়ি নিয়ে আসব।’

চাষির বৌয়ের তো আর খুশি ধরে না। এক নিমেষে উনুন ধরিয়ে সরু চাকলি বানাতে বসে গেল সে। বলল, ‘গরম, গরম খাও গো!’

চাষি একটা করে সরু চাকলি খায় আর বৌয়ের অজান্তে গোটা দু চার করে থলিতে পোরে, একটা করে খায়, আর গোটা দুই করে রাখে।

চাষির বৌ বলল, 'আজ যে দেখি তুমি গোছ্রাসে গিলছ, আমি যে ভেজে উঠতেই পারছি না!'  
'বহুদূর যেতে হবে গো, গুগুধনটাও খুব ভারি, তাই পেট পুরে খেয়ে নিচ্ছি।'

সরু চাকলি দিয়ে থলিটি ভরে নিয়ে চাষি বলল :

'আমার পেট ভরেছে, এবার তুমি কিছু খেয়ে নাও আর চলো বেরিয়ে পড়ি, তাড়াতাড়ি করো।'

খুব তাড়াতাড়ি খেয়ে নিল বৌ, তারপর দুজনে বেরিয়ে পড়ল।

ততক্ষণে বেশ রাত হয়ে গেছে। চাষি আগে আগে যায় আর থলি থেকে একটা একটা করে সরু চাকলি বার করে গাছের ডালে বুলিয়ে দেয়।

সরু চাকলিগুলো চোখে পড়ল চাষি বৌয়ের।

'দেখো দেখো, সরু চাকলি হয়ে রয়েছে গাছে!'

'এ আর এমন কি? এই মাত্র দেখলে না সরু চাকলি বৃষ্টি হচ্ছিল।'

'না, কই দেখিনি তো! আমি মাটিতে চোখ রেখে হাঁটছিলাম, যাতে গাছের শেকড়ে পা বেধে হুমড়ি খেয়ে না পড়ি।'

চাষি বলল, 'এই খানে একটা খরগোশ ধরা ফাঁদ পেতেছিলাম। একবার দেখে আসি চলো তো।'

ফাঁদের কাছে গিয়ে চাষি একটা মাছ বের করে আনল।

'আরে! মাছ এসে কী করে এই ফাঁদে ঢুকল?' চাষির বৌ জিজ্ঞেস করল।

'তাও জানো না? জলের মাছের মত ডাঙার মাছও যে আছে!'

'জানতাম না তো! নিজের চোখে না দেখলে বিশ্বাসই হত না!'

তারপর ওরা এল নদীর ধারে। চাষির বৌ বলল :

'এখানেই নিশ্চয়ই কোথাও তোমার জাল পাতা আছে। চলো একবার দেখে আসি।'

ওরা যেই জালটা টেনে তুলেছে, দেখে একটা খরগোস।

'মা গো! কী কাণ্ড!' চাষির বৌ গালে হাত দিল। 'কী সব হচ্ছে আজ। খরগোস কিনা আটকা পড়ল মাছ-ধরা জালে!'

চাষি বলল, 'এতে অবাক হবার কী আছে? জীবনে যেন জল-খরগোশ দেখনি!'

'সত্যি দেখিনি তো।' ইতোমধ্যে যেখানে গুগুধন পোঁতা রয়েছে সেই জায়গাটায় এসে পৌছল ওরা। চাষি খুঁড়ে খুঁড়ে টাকার পাত্র বের করে আনল, তারপর যতটা করে পারে টাকাটা ঘাড়ে করে বয়ে নিয়ে চলল বাড়ি।

রাস্তাটা আবার জমিদারের বাড়ির পাশ দিয়ে। বাড়িটার কাছে যেতেই ওরা শোনে: 'ব্যা.... ব্যা.... এ্যা...' করে একটা ভেড়া ডাকছে।

চাষির বৌ ফিসফিস করে বলল, 'ও বাবা, ওটা কী গো! ভীষণ ভয় করছে আমার!'

'দৌড়ে চলো শীগগির! জমিদার বাবুকে গলা টিপে মারছে ভূতে। আমাদের যেন ওরা দেখতে না পায়!'

দুজনেই ভীষণ হাঁপাতে হাঁপাতে এক দৌড়ে বাড়ি।

টাকা লুকিয়ে রেখে দুজনে ঘুমোতে গেল।

চাষি বলল, 'দেখো, তাতিয়ানা, গুগুধনের কথা আবার কাউকে বলে বেড়িয়ে না যেন। তাহলে বিপদে পড়তে হবে।'

'কী যে বলো, ঘুণাঙ্করেও কাউকে বলব না!'

পরদিন ওরা ঘুম থেকে উঠল দেরি করে।

চাষির বৌ উনুনে আগুন দিয়ে, বালতি নিয়ে গেল জল আনতে।

কুয়োর কাছে পাড়াপড়শিরা জিজ্ঞেস করল, ‘ও তাতিয়ানা, আজ এত দেরিতে উনুনে আঁচ পড়ল যে?’  
‘আর বোলো না, কাল সারারাত বাইরে ছিলাম কিনা, ঘুম ভেঙেছে দেরি করে।’

‘কেন, রাতে গিয়েছিলে কোথায়?’

‘আমার স্বামী গুগুধন খুঁজে পেয়েছে যে, রাতে গিয়েছিলাম টাকা আনতে।’

ব্যাস, সারাদিন গ্রামে শুধু ঐ এক আলোচনা : “তাতিয়ানা আর তার স্বামী গুগুধন পেয়েছে। দু’বস্তা ভর্তি করে টাকা এনেছে।”

সন্ধ্যাবেলাতেই কথাটা কানে উঠল জমিদারের। জমিদার ডেকে পাঠাল চাষিকে।

‘গুগুধন পেয়েছো, আমায় জানাওনি কেন?’

চাষি বলল, ‘গুগুধন? জীবনে কোনদিন কথাটা কানেও শুনিনি, বাবু।’

জমিদার চিৎকার করে উঠল, ‘বাজে কথা রাখো! আমি সব জানি, তোমার বৌই তো সবাইকে বলে বেড়িয়েছে!’

‘ওর মাথার ঠিক নেই, বাবু। এমন সব কথা বলে যার মাথামুগু নেই।’

‘বেশ, পরীক্ষা করে দেখছি, দাঁড়াও!’

জমিদার চাষির বৌকে ডেকে পাঠাল।

‘তোমার স্বামী কি গুগুধন পেয়েছে?’

‘আজ্ঞে হ্যাঁ বাবু, পেয়েছে।’

‘তোমরা দুজনে টাকা আনতে বেরিয়েছিলে রান্তিরবেলা?’

‘আজ্ঞে হ্যাঁ, বেরিয়েছিলাম।’

‘সব কথা বলো তো দেখি, কী হয়েছিল।’

‘প্রথমে তো আমরা বনের ভিতর দিয়ে যাচ্ছি, দেখি কী, গাছে গাছে সরু চাকলি ফলে রয়েছে।’

‘সরু চাকলি?’

‘আজ্ঞে হ্যাঁ, সরু চাকলি বৃষ্টি হচ্ছিল কিনা। তারপর খরগোস ধরা ফাঁদে দেখি একটা মাছ আটকে রয়েছে। মাছটা আমরা বের করে নিয়ে আবার চলতে লাগলাম। নদীর ধারে এসে জালটা টেনে তুলে দেখি, জালে পড়েছে একটা খরগোশ! খরগোসটাও নিয়ে নিলাম। তারপর নদী থেকে খানিকটা দূরে জমি খুঁড়ে আমার স্বামী গুগুধন বের করল। আর আমরা দু’থলি ভর্তি টাকা নিয়ে বাড়ি ফিরে গেলাম। আপনার বাড়ির পাশ দিয়ে আমরা যখন পেরিয়ে যাচ্ছি, ঠিক তখনই তো ছজুরের গলা টিপে ধরেছিল ভূতে।’

এই না শুনে জমিদার তো ভীষণ রেগে, মাটিতে পা ঠুঁকে চিৎকার করে বলল :

‘বেরিয়ে যাও এখান থেকে, হাঁদা মেয়ে কোথাকার!’

চাষি বলল, ‘দেখলেন তো, আমার বৌয়ের কোন কথাই বিশ্বাস করা চলে না। এই ভাবেই জীবন কাটাচ্ছি ওকে নিয়ে, অশান্তির শেষ নেই।’

‘খুব বুঝতে পারছি, এবার তুমি বাড়ি যেতে পারো,’ জমিদার হাত নেড়ে বলল।

বাড়ি চলে গেল চাষি। সুখেস্বচ্ছন্দে ঘরকন্না করতে লাগল। এখনো পর্যন্ত সে বেঁচে আছে, আর জমিদার বাবুর কথা ভেবে মনে মনে হাসে।





## জমিদারের সঙ্গে কাঙালের ভোজন

রবিবারের এক চমৎকার দিন। জনকয়েক চাষি দাওয়ায় বসে গল্প করছিল।

গ্রামের দোকানদারও এসে জুটল সেখানে। এসেই হেন করেছে, তেন করেছে, বড়াই শুরু করে দিল, বলল সে নাকি জমিদারের খাস-কামরাতেও গিয়েছে।

দলের সবচেয়ে কাঙাল চাষিটি কিন্তু বসে বসে হাসে।

‘ভারি তো ব্যাপার—না, জমিদারের খাস-কামরায় গেছি! আমি ইচ্ছে করলে জমিদার বাবুর সঙ্গে একাসনে খেয়েও আসতে পারি।’

‘কী, জমিদার বাবুর সঙ্গে ভোজন? সারা জীবনেও পারবে না হে!’ পয়সাওয়ালাটা বলল চিৎকার করে।

‘বলছি খেয়ে দেখিয়ে দেব!’

‘কিছুতেই পারবে না!’

তর্ক লেগে গেল ওদের। শেষকালে কাঙাল বলল :

‘আচ্ছা, এক হাত বাজি হয়ে যাক। যদি জমিদার বাবুর সঙ্গে বসে খেতে পারি তবে তোমার কালো ঘোড়াটা, বাদামি ঘোড়াটা, দুটাই আমার। আর যদি না পারি তবে তিন বছর বিনা পয়সায় তোমার কাছে খাটব।’

দোকানদার তো ভারি খুশি।

‘ঠিক আছে, আমার কালো ঘোড়াটা, বাদামি ঘোড়াটা বাজি, তার সঙ্গে একটা বাছুরও ফাউ রইল! তোমরা সব সাক্ষী!’

সাক্ষীদের সামনে হাতে হাতে চাপড় মেরে বাজি ধরা হল।

তারপর কাঙাল গেল জমিদার বাবুর কাছে।

‘কিছু কথা আছে হুজুর, গোপনে জিজ্ঞেস করতে চাই—একটা সোনার তাল, ধরুন এই আমার টুপির মত, কত দাম হবে?’

জমিদার বাবুর মুখে আর রা নেই। হাততালি দিয়ে ডেকে বলল :

‘ওহে, কে আছ হে, আমাদের জন্যে কিছু মদ পাঠিয়ে দাও শীগ্গির! খাবার টাবারও সব দিয়ে যাও! বসো, বসো, লজ্জা করো না, খাও, দাও, যা মন চায় নাও!’

কাঙালের সে কী আদর আপ্যায়ন, যেন এক সম্মানিত অতিথি, আর মনে মনে ছটফট করে জমিদার। কেবল চিন্তা কতক্ষণে ওই সোনার তালটি হস্তগত করবে।

‘এবার তাহলে যাও তো বাপু, দৌড়ে সোনার তালটি নিয়ে এসো। তার বদলে আমি এক পুদ\* ময়দা আর একটি আধুলি দেব তোমায়।’

‘কিন্তু সোনার তাল তো আমার কাছে নেই। আমি কেবল জিজ্ঞেস করছিলুম আমার টুপির মত এক তাল সোনার দাম কত হবে।’

জমিদার বাবু তো একেবারে রেগে কাঁই :

‘বেরিয়ে যা, হতভাগা! হাঁদা কোথাকার!’

‘বারে, হাঁদা কোথায়, দেখুন না, আপনি নিজেই আমায় সম্মানিত অতিথির মত আপ্যায়ন করলেন। তাতে আবার এই খাওয়ার জন্যেই দোকানদারও আমায় দুটো ঘোড়া আর একটা বাছুর দেবে।’

এই বলে মনের আনন্দে ফিরে গেল চাষি।

---

\* পুদ-প্রায় ষোল সের ওজনের রুশীয় মাপ।



## অভাব

এক গাঁয়ে ছিল দুই ভাই চাষি। একজন গরিব আর একজন ধনী। ধনী চাষি গ্রাম ছেড়ে শহরে গিয়ে মস্ত একটা বাড়ি তৈরি করে বিরাট ব্যবসা ফেঁদে বসল। ওদিকে গরিব চাষির বাড়িতে মাঝে মাঝে এমন অবস্থা হত যে একটুকরো রুটিও থাকত না। চাষির ছোট ছোট ছেলেমেয়েগুলো সারাক্ষণ খিদেয় কাঁদত। সকাল থেকে রাত অবধি চাষি খেটে খেটে হয়রান, জলের তলের মাছগুলো যেমন বরফে মাথা কুটে মরে, চাষিরও সেই দশা। শত চেষ্টাতেও কোন ফল হত না।

একদিন চাষি তার বৌকে বলল :

‘যাই, শহরে গিয়ে দাদাকে বলি, হয়ত কিছু সাহায্য করবে।’

এই ভেবে চাষি গেল ধনী দাদার কাছে।

বলল, ‘দোহাই দাদা, কিছু সাহায্য করো। বড়ো অভাব। একটু রুটিও নেই যে স্ত্রীপুত্রের মুখে দিই। দিনের পর দিন ওরা না খেয়ে থাকে।’

‘এ সপ্তাহটা আমার কাছে কাজ করো, তাহলে দেব।’

গরিব চাষি কী আর করে? কাজেই লেগে গেল। জ্বালানি কাঠ কাটে, জল তোলে, ঘোড়াগুলোকে দলাই-মলাই করে, আর উঠোন ঝাঁট দেয়।

সপ্তাহের শেষে বড়লোক দাদা চাষিকে একটা রুটি দিল।

বলল, ‘এই নাও তোমার কাজের মজুরি।’

‘তা যা দিলে তার জন্যেই ধন্যবাদ।’ এই বলে চাষি বেরিয়ে যাবে, এমন সময় ধনী দাদা আবার ডাকল :

‘দাঁড়াও দাঁড়াও! কাল আমার বাড়ি তোমাদের নেমন্তন্ন। তোমার বৌকেও এনো। কাল আমার জন্মদিন জানো তো?’

‘না ভাই, তা কী করে হয়। তুমি নিজেই জানো, কত বড় বড় সওদাগরেরা নেমন্তন্নে আসবেন ভাল ভাল জুতো, লোম-দেওয়া কোট পরে, আর আমার পায়ে লাপ্তি\*, গায়ে ছেঁড়া জামা!’

‘আরে, তাতে কিছু হবে না! চলে এসো, জায়গা একটা করে দেব,’ দাদা বলল।

\* লাপ্তি—গাছের ছাল বুনে তৈরি করা জুতো, সাধারণত সকালে রাশিয়ায় গরিব চাষিরা পরত।

চাষি বলল, 'বেশ, তাহলে আসব।'

গরিব চাষি বাড়ি ফিরে বৌকে রুটিটা দিয়ে বলল :

'শুনছো বৌ, কাল আমাদের নেমন্তন্ন।'

'তার মানে? কে করল নেমন্তন্ন?'

'দাদা নেমন্তন্ন করেছে, কাল দাদার জন্মদিন।'

'তা বেশ, যাব।'

পরদিন সকালে উঠে ওরা তো শহরে গেল। ধনী দাদার বাড়িতে পৌঁছে, শুভেচ্ছা জানিয়ে একটা বেধিগতে বসে পড়ল। বহু ধনী অতিথি এর মধ্যেই টেবিলে বসে গেছে, প্রচুর পরিমাণ আয়োজন করেছে বাড়ির কর্তা। সকলকেই মুক্তহস্তে দিচ্ছে। কিন্তু গরিব ভাই আর ভাইয়ের বৌয়ের কথা একবারও মনে পড়ল না তার, কিছু খেতেও দিল না। কাজেই বসে বসে ওরা শুধু অন্যের খাওয়া দেখে গেল।

ভোজ শেষ হল। কর্তাগিনীকে ধন্যবাদ দিয়ে সবাই টেবিল ছেড়ে উঠতে লাগল। গরিব ভাইও উঠে দাঁড়িয়ে বিনীত অভিবাদন করল। ধনী অতিথির দল নেশা করে, ফুর্তি করে, কলরব করে গান করতে করতে গাড়ি চড়ে বাড়ি গেল।

আর গরিব ভাই ফিরে চলল খালি পেটে হেঁটে হেঁটে।

বৌকে বলল, 'আমরাও একটা গান ধরি, কেমন?'

'বোকার মত করো না। ওরা পেটপুরে খেয়েছে তাই গান করছে! তুমি গান গাইতে যাবে কেন?'

'যাই হোক ভাইয়ের জন্মদিন, গান না গেয়ে বাড়ি ফেরা লজ্জার কথা, গান করলে লোকে ভাববে সবার মত আমাকেও যত্ন আতি্য করেছে...'

'তা, ইচ্ছে হয় গান ধরো, কিন্তু আমি বাপু গাইছি নে।'

চাষি গান ধরল, কিন্তু মনে হল যেন দুটো গলা শুনতে পাচ্ছে। তাই গান থামিয়ে জিজ্ঞেস করল :

'ও বৌ, তুমিও বুঝি সরু গলায় আমার সঙ্গে গান ধরেছিলে?'

'তোমার হয়েছে কী বলো তো ? গান গাইতে আমার বয়ে গেছে।'

'তাহলে কে গাইল?'

'আমি কী জানি? আচ্ছা, আবার গাও তো এবার আমি শুনব,' চাষির বৌ উত্তর দিল।

চাষি আবার গাইতে শুরু করল। গাইছে একজন, কিন্তু শোনা যাচ্ছে দুটো গলা। চাষি থেমে গিয়ে জিজ্ঞেস করল :

'অভাব, ও অভাব! তুমিই গান ধরছো বুঝি!'

অভাব বলল, 'হ্যাঁ মালিক, আমিই।'

'তাহলে এসো, আমাদের সঙ্গে চলো।'

'তাই যাব মালিক, কখনো তোমায় ছেড়ে যাব না।'

বাড়ি এল চাষি, আর অভাব তাকে শুঁড়িখানায় যাবার জন্যে ডাকতে লাগল। চাষি বলল :

'উহুঁ, আমার টাকাকড়ি নেই, যাব না।'

'কেন, টাকার কী দরকার ? তোমার ভেড়ার চামড়ার কোটটা দেখছো না? ওটার কী দরকার? গ্রীষ্মকাল এসে গেছে। আর তো ওটা পরবে না! তার চেয়ে চলো ওটার বদলে কিছু মদ খেয়ে আসা যাক...'

চাষি আর অভাব তাই শুঁড়িখানায় গিয়ে কোটটার বদলে মদ খেল।

পরদিন সকালে অভাব মাথার যন্ত্রণায় "বাবারে মারে" করতে লাগল। গত রাত্রে ফলে। তারপর সেদিনও আবার মালিককে মদ খেতে যাবার জন্যে টানাটানি করতে লাগল অভাব।

চাষি বলল, 'টাকা নেই।'

অভাব বলল, 'টাকার কী দরকার? তোমার গাড়িটা আর স্লেজটা নিয়ে চলো, ওতেই হয়ে যাবে!'

কোন উপায় নেই—অভাবের হাত থেকে রেহাই নেই চাষির। কাজেই গাড়ি আর স্লেজ টেনে নিয়ে চলল শুঁড়িখানার দিকে। সেখানে গিয়ে সেগুলো বেচে মদ খেল।

পরদিন অভাব মাথার যন্ত্রণায় আরও কাহিল। চাষিকে ডাকে মদ খেয়ে যন্ত্রণা সারাতে। চাষি আর কী করে! সেদিনও মই আর লাঙল বেচে মদ খাওয়া হল। একমাসের মধ্যেই চাষি সব কিছু উড়িয়ে দিল। এমনকি বসতবাড়িটাও প্রতিবেশীর কাছে বাঁধা রেখে সেই টাকা দিয়ে মদ খাওয়া হল।

কিন্তু তবু অভাব ছাড়ে না। পিড়াপিড়ি করে, চলো যাই, চলো যাই শুঁড়িখানায়।

'না অভাব, যতোই বলো, আর কিছুই নেই যার বদলে মদ খাওয়া চলতে পারে।'

'কিছু নেই মানে? তোমার বৌয়ের দুটো সারাফান\* রয়েছে না? একটা ওর থাক। অন্যটা নিয়ে চলো যাই, মদ খেয়ে আসি।'

চাষি সারাফানটা বিক্রি করে মদ খেল, তারপর ভাবল :

'এবার একেবারে পরিষ্কার, চাল নেই, চুলো নেই। গায়ে দেবার জামা নেই, আমারও না বৌয়েরও না।' অভাব সকালে উঠে দেখে মালিকের কাছে চাইবার মত আর কিছুই নেই।

ডাকল, 'মালিক!'

'কী অভাব, কী চাও?'

'শোনো বলি, তোমার প্রতিবেশীর কাছে গিয়ে গাড়িটা আর বলদজোড়া চেয়ে আনো।'

চাষি তাই প্রতিবেশীর কাছে গিয়ে বলল :

'তোমার গাড়িটা আর বলদজোড়া আমায় দেবে? তাহলে আমি সারা সপ্তাহ তোমার হয়ে খাটব।'

প্রতিবেশী জিজ্ঞেস করল, 'কেন? কী দরকার বলো তো?'

'জঙ্গল থেকে কিছু জ্বালানি কাঠ আনব।'

'তা নিয়ে যাও, তবে বেশি বোঝা চাপিও না।'

'না, না, কী যে বলো, অনুদাতা!'

চাষি বলদ আর গাড়িটা নিয়ে এল। তারপর চাষি আর অভাব তাতে চড়ে চলে গেল খোলা মাঠে।

অভাব জিজ্ঞেস করল, 'মাঠের মধ্যে সবচেয়ে বড় পাথরটা কোথায় জানো?'

'তা আর জানব না কেন!'

'তাহলে সিধে ওটার কাছে চলো।'

পাথরটার কাছে পৌঁছে চাষি গাড়ি থামাল। গাড়ি থেকে নেমে অভাব চাষিকে পাথরটা তুলতে বলল।

চাষি হাঁপায়, অভাব কাঁধ দেয়। পাথরটা তুলেই দেখে একটা গর্ত, সোনার ভর্তি।

'হাঁ করে দেখছো কি, চটপট গাড়িতে তোলো।'

চাষি লেগে গেল কাজে। সোনা দিয়ে গাড়িটাকে বোঝাই করে ফেলল। একটি মোহরও আর গর্তে পড়ে রইল না। গর্তটা খালি দেখে চাষি অভাবকে ডেকে বলল :

'দ্যাখো তো অভাব, মোহর কিছু পড়ে রইল কি না?'

অভাব ঝুঁকে দেখে বলল :

'কোথায়? আমি তো কিছু দেখতে পাচ্ছি না!'

'না তো, দেখতে পাচ্ছি না।'

'গর্তের ভিতরে নামো, তাহলে ঠিক দেখতে পাবে।'

\* সারাফান—হাতকাটা লম্বা ঢোলা মেয়েদের পোষাক।

অভাব তো গর্তে নামল। আর যেই না নেমেছে, অমনি চাষি পাথরটা দিয়ে মুখটা বন্ধ করে দিল। বলল, 'এই বরং ভাল, সঙ্গে নিয়ে গেলে সব টাকা তুমি আজ না হোক কাল মদ খেয়ে উড়িয়ে দিতে, হতভাগা অভাব!'

তারপর চাষি বাড়ি ফিরল। মাটির নিচের গুদামঘরে সব টাকা জমা করে, প্রতিবেশীর বলদ গাড়ি ফিরিয়ে দিয়ে চাষি ভাবতে লাগল কী করে একটু গুছিয়ে বসা যায়। কিছু কাঠ কিনে একটা সুন্দর বাড়ি বানাল সে, তারপর দাদার চেয়ে দ্বিগুণ সুখেস্বচ্ছন্দে বাস করতে লাগল।

একদিন যায়, দুদিন যায়, চাষি একদিন শহরে গিয়ে ধনী দাদা বৌদিকে নিজের জন্মদিনে নেমন্তন্ন করে এল।

দাদা বলল, 'বলছ কী তুমি? নিজেরই তোমার খাবার কিছু নেই, জন্মদিন পালন করার শখ?'

'আগে সত্যিই কিছু ছিল না দাদা, কিন্তু এখন আছে। ভগবানের কৃপায় তোমার চেয়ে কিছু কম নয়। গিয়ে নয় দেখে এসো!'

'বেশ, যাব!'

পরদিন সকালে ধনী ভাই আর তার বৌ ভাইয়ের বাড়ি জন্মদিনের নেমন্তন্নয় গেল। কপর্দকহীন ভাইয়ের বিরাট সুন্দর বাড়ি দেখে তো ওরা অবাক। শহরের বড় বড় সওদাগরেরও অমন বাড়ি নেই। চাষি ভাইকে বৌদিকে আদর যত্ন করে চর্বা-চোষ্য-লেখ্য-পেয় খাওয়াল।

খাওয়া দাওয়ার পর ধনী দাদা ভাইকে জিজ্ঞেস করল :

'বলো তো শুনি, এত ধনদৌলত পেলে কী করে?'

গরিব চাষি সব কথা খুলে বলল। কেমন করে হতভাগা অভাব জুটেছিল তার সঙ্গে, কেমন করে অভাবের পীড়নে সবকিছু বেচে গুঁড়িখানায় ছুটতে হত। যখন কেবল প্রাণটুকু শুধু সম্বল, তখন কেমন করে অভাব মাঠের মধ্যে লুকানো ধনদৌলতের সন্ধান দেয়, কী করে অভাবের হাত থেকে রক্ষা পেল।

ধনী দাদা এদিকে হিংসেয় বাঁচে না। মনে মনে ভাবল, "যাই গিয়ে খোলা মাঠে পাথরটা তুলে অভাবকে বার করে দিই, ভাইটাকে আবার সে সর্বস্বান্ত করে দিক, জীবনেও যেন আর আমার সঙ্গে দৌলতের বড়াই করতে না আসে।" তাই সে বৌকে বাড়ি পাঠিয়ে দিয়ে নিজে চলল মাঠের দিকে। গর্তটার কাছে এসে, মুখ থেকে পাথরটা একটানে পাশে সরিয়ে বলল :

'যাও অভাব আমার ভাইয়ের কাছে, ভাইটিকে একেবারে সর্বস্বান্ত করে দিও!'

অভাব বলল :

'উই, আমি বরং তোমার কাছেই থাকব। ওর কাছে যাব না। তোমার দয়ামায়া আছে, আমায় ছেড়ে দিলে। আর ঐ হতভাগা আমায় কিনা আটকে রেখেছিল!'

কিছুদিনের মধ্যেই হিংসুক দাদা সর্বস্বান্ত হল। বড়লোকি রইল না, হয়ে গেল কপর্দকহীন কাঙাল।



## বরফ-বুড়ো

এক ছিল বুড়ো আর তার দ্বিতীয় পক্ষের বৌ। বুড়োর এক মেয়ে আর দ্বিতীয় পক্ষের বৌয়ের নিজের এক মেয়ে।

সৎমায়েরা কেমন সে তো সবাই জানে। ভাল কাজ করলেও লাখি ঝাঁটা, মন্দ কাজ করলেও লাখি ঝাঁটা। নিজের মেয়েটির বেলায় কিন্তু অন্যরকম—সে যাই করে তাই ভাল: সবতেই তার আদর।

সূর্য ওঠার আগেই সৎমেয়েটি ওঠে, গরুবাছুরকে খাওয়ায়, জ্বালানি কাঠ আর জল আনে, উনুনে আগুন দেয়, ঘর ঝাঁট দেয়। কিন্তু বুড়ির আর মন ওঠে না, সবই তার খারাপ, সবই ঠিক তেমনটি নয়।

ঝড় উঠলে ঝড়ও শান্ত হয়ে যায়, কিন্তু বুড়িমেয়ের রাগ একবার উঠলে আর শান্তি নেই। সৎমা ঠিক করল সৎমেয়েটাকে দুনিয়া থেকেই সরাতে হবে।

বুড়োকে বলে, 'মেয়েটাকে এখান থেকে সরে বাপু। যেখানে খুশি দিয়ে আয়, চোখে যেন না দেখতে হয়! বনে গিয়ে ছেড়ে দিয়ে আয় শীতের মধ্যে।'

বুড়ো মনের দুঃখে কাঁদতে লাগল। কিন্তু জানে কোন উপায় নেই। বুড়িকে টলানো যাবে না। কাজেই লাগাম পরিয়ে ঘোড়া জুতে মেয়েকে ডাকল :

'আয় মা, স্নেজে ওঠ।'

অভাগা মেয়েটিকে দূরে বনে নিয়ে বড় ফার গাছের নিচে একটা বরফের স্তূপের মধ্যে ফেলে রেখে এল বুড়ো।

সেদিন ভীষণ ঠাণ্ডা। মেয়েটি ফার গাছতলায় বসে বসে কাঁপছে, ঠকঠক করছে। হঠাৎ শোনে আশেপাশের গাছের ডালে চড়বড় আওয়াজ তুলে এগাছ থেকে ওগাছে লাফিয়ে আসছে বরফ-বুড়ো। চোখের পলকেই বরফ-বুড়ো মেয়েটি যে গাছতলায় বসেছিল সেই গাছে এসে হাজির।

ওপর থেকে জিজ্ঞেস করল :

'বাছা, তোর শীত লাগছে না তো?'

মেয়েটি নরম করে উত্তর দিল :

'না, শীতবাবাজি, শীত করছে না।'

বরফ-বুড়ো তখন আরও নিচে নেমে এল। চড়বড় আওয়াজ উঠল আরও জোরে।

‘শীত করছে না, মেয়ে? সত্যি শীত করছে না, কন্যে?’

মেয়েটি নিঃশ্বাস নিতে পারছিল না, তবু বলল :

‘না, শীতবাবাজি, ঠাণ্ডা লাগছে না।’

বরফ-বুড়ো আরও নিচে নেমে এল। বরফ পড়ার চড়বড় শব্দ বেড়ে উঠল ভয়ানক।

জিজ্ঞেস করল, ‘শীত লাগছে না, মেয়ে? এখনো শীত করছে না, কন্যে? শীত লাগছে না তো, সুন্দরী?’

মেয়েটি তখন প্রায় জমে অবশ। জিভও যেন নড়ে না। কোনরকমে বলল :

‘না, শীতবাবাজি, শীত করছে না।’

বরফ-বুড়োর তখন দয়া হল। মেয়েটিকে সে ফোলা ফোলা নরম লোমওয়ালা কোট আর গরম লেপের পোষাক দিয়ে জড়িয়ে দিল।

এদিকে তো সৎমা মেয়েটির শ্রাদ্ধের জন্যে ভোজের আয়োজন করেছে। সরু চাকলি ভাজে আর বুড়োকে বলে:

‘এই মিন্‌সে, যা বনে যা, মেয়েটাকে নিয়ে আয়, কবর দেব!’

বুড়ো বনে গিয়ে দেখে ঠিক যে জায়গাটায় রেখে গিয়েছিল সেই বড়ো ফার গাছটির নিচে বসে আছে মেয়েটি। দেখাচ্ছে ভারি খুশি খুশি, লাল টুকটুক করছে মুখটি। গায়ে তার একটা লোমের কোট, সর্বাস্থে সোনা রুপোর গহনা। পাশেই একটা মস্ত সিন্দুক দামি দামি উপহারে ভরা।

বুড়ো আহ্লাদে আটখানা। মেয়েকে স্নেজে বসিয়ে, ধনসম্পদ তুলে নিয়ে বাড়ি ফিরে এল সে।

এদিকে সৎমা সরু চাকলি ভাজে আর ওদিকে টেবিলের নিচ থেকে কুকুরটা বলে :

‘ভেউ, ভেউ! বুড়োর মেয়ে বাড়ি ফেরে ধনদৌলত নিয়ে, বুড়ির মেয়ে রইল পড়ে, হবে না তার বিয়ে!’

বুড়ি কুকুরটাকে একটা সরু চাকলি ছুঁড়ে দিয়ে বলে :

‘ও কথা নয় কুকুর, বল্ : “বুড়ির মেয়ের বিয়ে হবে, বর আসবে তার, বুড়োর মেয়ে হতচ্ছাড়ি বেঁচে সে নেই আর!”

কুকুরটা সরু চাকলি খেয়ে ফের শুরু করে :

‘ভেউ, ভেউ! বুড়োর মেয়ে বাড়ি ফেরে ধনদৌলত নিয়ে, বুড়ির মেয়ে রইল পড়ে, হবে না তার বিয়ে!’

বুড়ি আর কতগুলো সরু চাকলি কুকুরটার দিকে ছুঁড়ে দিল। মারল কুকুরটাকে। তবু কুকুরটার মুখে শুধু ঐ একই কথা...

হঠাৎ কাঁচাকঁচিয়ে উঠল ফটক, দরজা খুলে গেল। বুড়োর মেয়ে ঘরে ঢুকল। জামাকাপড় সোনা রুপো, মণিমাণিক্যে ঝলমল করছে। পেছন পেছন বুড়ো ঢুকল মস্ত ভারি সিন্দুকটা নিয়ে। তাকিয়ে দেখেই বুড়ির হাতদুটো ঝুলে পড়ল হতাশে...

‘যা মুখপোড়া বুড়ো, গাড়ি জুতে নে! তারপর তো, তার মেয়েকে যেখানে রেখে এসেছিলি, আমার মেয়েকেও সেখানে রেখে আয়...’

বুড়ির মেয়েকে স্নেজে বসাল বুড়ো, বনে গিয়ে লম্বা ফার গাছটার তলায় বরফের টিপির মধ্যে রেখে দিয়ে এল।

বুড়ির মেয়ে বসে আছে গাছতলায়। শীতের চোটে দাঁত-কপাটি।

মড়মড়িয়ে ঠকঠকিয়ে, এগাছ থেকে ওগাছে লাফাতে লাফাতে বরফ-বুড়ো এসে হাজির। বুড়ির মেয়ের দিকে তাকিয়ে দেখে :

‘বাছা, তো, শীত করছে না তো?’



বুড়ির মেয়ে কিন্তু বলে:

‘মা গো, জমে গেছি! দোহাই শীতবাবাজি, অমন মড়মড়িয়ে না, ঠকঠকিয়ে না...’

বরফ-বুড়ো আরও নিচে নেমে এসে আর জোরে জোরে ঠকঠকায়, চড়বড়ায়।

বলল: ‘শীত করছে না, মেয়ে? শীত করছে না তো, কন্যে?’

মেয়ে বলল, ‘উহরে, হাত পা জমে গেছে! তুমি চলে যাও, শীতবাবাজি...’

আর নিচে নেমে এল বরফ-বুড়ো, আর জোরে ঝাপট মারে, ঠকঠকায়, চড়বড়ায়।

‘শীত করছে না তো, কন্যে? শীত লাগছে না তো, সুন্দরী?’

‘মা গো একেবারে হাড় জমে গেছে! দূর হ, হতচ্ছাড়া শীত কোথাকার!’

রাগ হয়ে গেল বরফ-বুড়োর, বুড়ির মেয়েকে জাপটে ধরে জমিয়ে মেরে ফেলল।

এদিকে সবে ভোর হয়েছে কি হয়নি, বুড়ি বুড়োকে বলে :

‘তাড়াতাড়ি ওঠ মুখপোড়া বুড়ো, ঘোড়ায় লাগাম পরিয়ে চট করে যা, মেয়েকে নিয়ে আয়, সোনায়  
রুপোয় সাজিয়ে আনা চাই...’

বুড়ো তো ঘোড়া ছুটিয়ে চলে গেল। আর কুকুরছানাটা ওদিকে টেবিলের তল থেকে বলে : ‘ভেউ,  
ভেউ! বুড়োর মেয়ের বিয়ে হবে, বর আসবে তার, বুড়ির মেয়ে মরল শীতে, উঠবে নাকো আর।’

বুড়ি কুকুরটাকে একটা পিঠে ছুঁড়ে দিয়ে বলে :

‘ও কথা নয়, বল: “বুড়ির মেয়ে বাড়ি ফেরে ধনদৌলত নিয়ে...”

কুকুর কিন্তু আগের মত বলেই চলল :

‘ভেউ, ভেউ! বুড়ির মেয়ে মরল শীতে, উঠবে নাকো আর...’

ফটক খোলার আওয়াজ হল। মেয়েকে এগিয়ে আনবার জন্যে বুড়ি ছুটল হুড়মুড় করে। তারপর ঢাকনা  
সরিয়ে দেখে, স্নেজের ওপর তার মরা মেয়ে শুয়ে।

ডাক ছেড়ে কেঁদে উঠল বুড়ি, কিন্তু আর তো উপায় নেই।



## রাজহাঁস আর ছোটমেয়ে

এক ছিল চাষি আর তার বৌ। তাদের এক মেয়ে আর ছোট এক ছেলে।

একদিন মা বলল :

‘শোন খুকি, আমরা কাজে যাচ্ছি, ছোট ভাইটিকে দেখিস। ঘর ছেড়ে যাস না, লক্ষ্মী হয়ে থাকবি।  
তোকে একটা সুন্দর রুমাল কিনে দেব।’

মা বাপ বেরিয়ে যেতেই মেয়েও ভুলে গেল মা কী বলেছে। ছোট ভাইকে জানলার পাশে ঘাসের ওপর  
বসিয়ে রেখে বন্ধুদের সঙ্গে খেলতে চলে গেল।

হঠাৎ কোথা থেকে এক ঝাঁক রাজহাঁস এসে বাচ্চাটাকে ডানায় তুলে নিয়ে চলে গেল।  
মেয়েটি বাড়ি ফেরে দেখে ভাইতো নেই। হায় হায় করে এদিকে ছোট্টে, সেদিকে ছোট্টে, কিন্তু কোথাও  
নেই!

ভাইয়ের নাম ধরে কত ডাকল, কত কাঁদল, কত করে বলল বাবা মা বকবে। কিন্তু ভাইয়ের কোন  
সাড়া নেই।

খোলা মাঠে ছুটে গেল মেয়েটি। দেখে, অনেক দূরে অন্ধকার বন পেরিয়ে একদল হাঁস উড়ে যাচ্ছে। অমনি  
সে টের পেলে : হাঁসগুলোই তার ভাইকে নিয়ে গেছে, হাঁসদের তো চিরকালই ভারি বদনাম; লোকে বলে, ভারি  
দুষ্টু ওরা, ছেলেধরা।

হাঁসের পিছু পিছু ছুটল মেয়েটি। ছুটতে ছুটতে দেখে কি, একটা উনুন।

‘উনুন, ও উনুন, বলো না, হাঁসের দল কোন দিকে উড়ে গেছে?’

উনুন বলে :

‘আগে আমার একটা কালো পিঠে খাও, তবে বলব।’

‘বয়ে গেছে আমার কালো পিঠে খেতে! বাড়িতে আমরা শাদা ময়দার পিঠেই বলে খাই না...’

উনুন আর কিছু বলল না। মেয়েটি তখন আর খানিকটা ছুটে গিয়ে দেখে একটা আপেল গাছ।

‘আপেল গাছ, আপেল গাছ, বলো না, হাঁসের দল কোন দিকে উড়ে গেছে?’

‘আগে আমার বুনো আপেল একটা খাও, তবে বলব।’

‘বাড়ির বাগানের ভাল আপেলই বলে আমরা খেতে চাই না,,’

আপেল গাছ তাই কিছু বলল না। মেয়েটি ছুটতে ছুটতে গিয়ে খামল সুজির পাড়, দুধের নদীর কাছে।

‘দুধের নদী, সুজির পাড়, বলো না, কোথায় হাঁসের দল উড়ে গেছে?’

‘আগে একটু দুধ দিয়ে সুজি খাও, তবে বলব।’

‘বাড়িতে বলে সরণ মুখে তুলি না...’

সারাদিন ধরে মেয়েটি মাঠে বনে ছুটে বেড়াল। সন্ধ্যা হয়ে এল। বাড়ি ফিরে যাওয়া ছাড়া আর কোন উপায় নেই। হঠাৎ দেখে মুরগির পায়ের ওপর এক জানলার এক কুঁড়েঘর, ঘুরছে তো ঘুরছেই।

কুঁড়েঘরের মধ্যে বাবা-ইয়াগা ডাইনি বসে বসে শণ নুড়ির সুতো কাটছে। ভাইটি বসে আছে বেঞ্চিতে, রুপোর আপেল নিয়ে খেলা করছে।

ঘরে ঢুকল মেয়েটি।

‘প্রণাম হই, ঠাকুমা!’

‘আয় বাছা, আয়, তা এখানে কেন?’

‘জলায় জলায় ঘুরছিলাম, জামাটা ভিজ়ে গেছে, তাই শুকিয়ে নিতে এসেছি।’

‘বস্ তাহলে, একটু শণ নুড়ির সুতো কেটে দে।’

মেয়েটির হাতে তকলি দিয়ে বেরিয়ে গেল বাবা-ইয়াগা। মেয়েটি বসে বসে সুতো কাটছে, এমন সময় একটা ইঁদুর উনুনের তলা থেকে বেরিয়ে এসে বলল :

‘মেয়ে, ও মেয়ে, আমায় একটু পায়ের দে তো, তবে একটা কথা বলব।’

মেয়েটি একটু পায়ের দিল। পায়ের পেয়ে ইঁদুর বলল :

‘বাবা-ইয়াগা চানের ঘরে আগুন জ্বালাতে গেছে। তোকে ধোবে পাকলাবে, উনুনে চড়াবে, ভেজে খাবে। তারপর তোর হাড়ে চড়ে ঘুরে বেড়াবে।’

ভয়ে মেয়েটি তো কেঁপে কেঁপে, কেঁদে কেঁদে সারা। ইঁদুর বলল :

‘আর দেরি করিস না, এই ফাঁকে ভাইকে নিয়ে পালা আমি তোর হয়ে সুতো কেটে দিচ্ছি।’

ভাইকে কোলে নিয়ে ছুটল মেয়ে। এদিকে বাবা-ইয়াগা থেকে থেকে জানলায় এসে জিজ্ঞাস করে :

‘সুতো কাটছিস তো, বাছা?’

ইঁদুর উত্তর দেয় :

‘হ্যাঁ ঠাকুমা, কাটছি...’

তারপরে তো চানের ঘরে আগুন জ্বলে মেয়েটিকে নিতে এল বাবা-ইয়াগা। কিন্তু ঘর ওদিকে খালি!

বাবা-ইয়াগা হাঁসের দলকে ডেকে বলল :

‘শীগগির ধর গিয়ে! ভাইকে নিয়ে বোন পালাল!’

ভাইকে নিয়ে মেয়েটি এসে খামল দুধ-নদীর কাছে। দেখে কী, উড়ে আসছে হাঁসের দল।

মেয়েটি চেঁচিয়ে বলল, ‘ও নদী, মা আমার, লুকিয়ে রাখো!’

‘আমার সুজি আগে খাও।’

খানিকটা সুজি খেল মেয়েটি, ধন্যবাদ দিল। দুধ-নদী তখন সুজির পাড়ে তাদের লুকিয়ে রাখল।

দেখতে না পেয়ে উড়ে চলে গেল হাঁসের দল।

ভাইকে নিয়ে মেয়েটি আবার দৌড়তে শুরু করল। হাঁসের দল কিন্তু বাঁক নিয়ে ফিরে আসছে ততক্ষণে। এই ওদের দেখে ফেলে বুঝি। সর্বনাশ! কী উপায়? মেয়েটি ছুটল আপেল গাছের কাছে।

‘আপেল গাছ, আপেল গাছ, লুকিয়ে রাখো আমায়!’

‘আগে আমার বুনো আপেল খাও, তবে!’

মেয়েটি তাড়াতাড়ি করে একটা আপেল খেল, ধন্যবাদ দিল। আপেল গাছ তখন ডাল দিয়ে ঘিরল, পাতা দিয়ে ঢাকল।

দেখতে না পেয়ে উড়ে চলে গেল হাঁসের দল।

ভাইকে কোলে নিয়ে আবার দৌড়তে শুরু করল মেয়েটি। ছুটে, ছুটে, প্রায় এসে গেছে, এমন সময় ওদের দেখে ফেলল হাঁসেরা। ডাক ছেড়ে ডানা ঝাপটে সোঁ করে এসে ছোট ভাইটিকে প্রায় ছিনিয়ে নেয় আর কি!

মেয়েটি দৌড়তে দৌড়তে উনুনের কাছে গেল।

‘উনুন, ও উনুন, লুকিয়ে রাখো আমায়!’

‘আগে আমার কালো পিঠে খাও, তবে।’

তাড়াতাড়ি করে মেয়েটি একটা পিঠে মুখে পুরে ভাইকে নিয়ে ঢুকে পড়ল উনুনের পেটের ভিতর।

হাঁসের দল ওড়ে আর ওড়ে, ডাকে আর ডাকে, তারপর খালি হাতেই ফিরে গেল বাবা-ইয়াগার কাছে।

মেয়েটি উনুনকে ধন্যবাদ দিয়ে ভাইকে কোলে নিয়ে ছুটে এল বাড়িতে।

বাবা আর মাও বাড়ি ফিরে এল তখন।



## হাভরোশেচকা

পৃথিবীতে কেউ ভাল কেউ মন্দ। কেউ আবার এতই খারাপ, যে লজ্জাও নেই।

খুকুমণি হাভরোশেচকা পড়েছিল এই রকম সব লোকের পাল্লায়। হাভরোশেচকা ছিল অনাথ। ওরা তাকে নিয়ে গিয়ে পালে আর কেবল খাটিয়ে মারে। সুতো কাটে সে, কাপড় বোনে, ঘরের কাজ করে, সব কাজই তার ওপর।

বাড়ির গিন্নির তিন মেয়ে। বড়োটির নাম এক-চোখা, মেজের নাম দু-চোখো আর ছোটটির নাম তিন-চোখো।

তিন বোন সারাদিন কুটোটি নাড়ে না। কেবল ফটকের পাশে বসে বসে রাস্তার দিকে চেয়ে দেখে। খুকুমণি হাভরোশেচকা ওদের জন্যে জামা সেলাই করে, সুতো কাটে, কাপড় বোনে। কিন্তু তার বদলে দুটো মিষ্টি কথোও কখনো শুনতে পায় না।

খুকুমণি হাভরোশেচকা চলে যেত মাঠে। তারপর নিজের দাগ-ফুটকি গরুটার গলা জড়িয়ে ধরে মনের দুঃখ জানাত :

‘গরু আমার মা-জননী, ওরা আমায় মারে, বকে, খেতে দেয় না, কাঁদাও বারণ। কালকের মধ্যে আমায় পাঁচ পুদ শণ পাকিয়ে সুতো কেটে, ধুয়ে, শাদা করে গুটিয়ে ঘরে তুলতে হবে।’

গরুটি বলে :

‘বলি শোন সুন্দরী। আমার এক কান দিয়ে ঢুকে অন্য কান দিয়ে বেরিয়ে আয়, দেখবি কাজ হয়ে গেছে।’

গরু যা বলে, তাই হয়। হাভরোশেচকা এক কান দিয়ে ঢুকে অন্য কান দিয়ে বেরিয়ে আসে। দেখে সব তৈরি: বোনা, ধোয়া, গোটানো—সব।

হাভরোশেচকা তখন গাঁঠরি নিয়ে গিন্নির কাছে যায়। গিন্নি তাকিয়ে দেখে ঘোঁৎ ঘোঁৎ করে সিন্দুকে তুলে রাখে, তারপর ফের আরও কাজ ঘাড়ে চাপায়।

খুকুমণি হাভরোশেচকা আবার যায় গরুটির কাছে। গলা জড়িয়ে আদর করে, তারপর এক কান দিয়ে ঢুকে অন্য কান দিয়ে বেরিয়ে আসে। তৈরি গাঁঠরিটা তুলে নিয়ে আবার গিন্নির কাছে ফিরে যায়।

বুড়ি একদিন এক-চোখোকে ডেকে বলল :

‘যা তো আমার সোনা, যা তো আমার মণি, দেখে আয় কে ওর কাজ করে দেয়। কে ওর কাপড় বোনে, সুতো কাটে, গুটিয়ে দেয়।’

হাভরোশেচকার সঙ্গে বনে গেল এক-চোখো, মাঠে গেল, কিন্তু মা'র লুকুম ভুলে গিয়ে সে ঘাসের ওপর রোদ পোহাল, গা গড়াল। আর হাভরোশেচকা ফিস্ফিস করে বলে :

‘ঘুমো রে চোখ! ঘুমো রে চোখ!’

এক-চোখোর চোখ বুজে গেল। এক-চোখো ঘুমোয় আর ওদিকে গরু শণ থেকে সুতো কাটে, কাপড় বোনে, তারপর ধুয়ে গুটিয়ে তৈরি করে রাখে।

গিন্নি কিছুই জানতে পারল না। তাই পরদিন মেজো মেয়েকে ডেকে বলল :

‘সোনা আমার, মণি আমার, গিয়ে দেখ তো কে ঐ অনাথটার কাজ করে দেয়।’  
দু-চোখো গেল হাভরোশেচকার সঙ্গে। কিন্তু মা’র হুকুম ভুলে গিয়ে সে ঘাসের ওপর রোদ পোহাল,  
গা গড়াল। আর হাভরোশেচকা ফিস্ফিস্ করে বলে:

‘ঘুমো রে চোখ এটা, ঘুমো রে চোখ ওটা!’

দু-চোখের চোখ বুজে গেল। দু-চোখো ঘুমোয় আর ওদিকে গরুর সুতো কাটা, কাপড় বোনা, ধোয়া, গুটনো শেষ।  
বুড়ি রেগে আগুন। তিন দিনের দিন তার ছোট মেয়ে তিন-চোখোকে পাঠাল। আর হাভরোশেচকার  
ঘাড়ে চাপাল আরও বেশি কাজ।

তিন-চোখো সারাদিন রোদে রোদে লাফলাফি করে খেলল। তারপর রোদ্দুরে হয়রান হয়ে ঘাসের উপর শুয়ে পড়ল।  
হাভরোশেচকা গান ধরল :

‘ঘুমো রে চোখ এটা, ঘুমো রে চোখ ওটা!’

কিন্তু তিন নম্বর চোখটার কথা ওর একেবারে মনে ছিল না।

তিন চোখের দুচোখে ঘুম এসে গেল। কিন্তু তৃতীয় চোখটা জেগে জেগে সব দেখতে লাগল। দেখল  
মেয়েটি গরুর এক কান দিয়ে ঢুকে অন্য কান দিয়ে বেরিয়ে এসেই তৈরি পোঁটলাটা ভুলে নিল।

তিন-চোখো বাড়ি এসে যা যা দেখেছে মাকে বলল।

বুড়ি আহ্লাদে আটখানা। পরদিনই স্বামীকে গিয়ে বলল :

‘দাগ-ফুটকি গরুটাকে বাপু জবাই করো!’

বুড়ো তো কথা শুনে থ। একথা বলে, ওকথা বলে :

‘বলিস কী বুড়ি, ভীমরতি হয়েছে নাকি ? বকনা গরু, ভাল গরু!’

‘মেরে ফেলো, কোন কথা শুনতে চাই না!’

বুড়ো কী আর করে! ছুরি শান দিতে বসল। হাভরোশেচকা সব টের পেয়ে দৌড়ে মাঠে গিয়ে গরুর গলা জড়িয়ে বলে :

‘গরু আমার মা-জননী, তোমায় ওরা কেটে ফেলবে বলছে।’

গরু বলল :

‘তোকে বলি সুন্দরী, আমার মাংস খাস না। আমার হাড়গুলো জড়ো করে রুমালে বেঁধে গোর দিস  
বাগানে। আমায় কোন দিন ভুলিস না, রোজ জল দিস সেখানে।’

বুড়ো গরুটাকে কাটল। গরু যা বলেছিল হাভরোশেচকা সব তাই করল। না খেয়ে কাটাল সে, মাংস  
মুখে তুলল না। হাড়গুলো রুমালে বেঁধে কবর দিল বাগানে। রোজ জল দিত।

সে হাড় থেকে হল একটি আপেল গাছ। সে কী গাছ! আপেল তার রসে রসাল, নুয়ে আসে রূপোর  
ডাল, সোনার পাতায় শনশন। পথের লোক থমকে দাঁড়ায়, কাছের লোক চেয়ে দেখে।

কত দিন যায়। একদিন এক-চোখো, দু-চোখো আর তিন-চোখো বাগানে বেড়াচ্ছে, এমন সময় ষোড়ায় চেপে  
কে আসে, না এক বীর তরুণ—কৌকড়া কৌকড়া চুল, অনেক তার ধনদৌলত। রসে ভরা আপেলগুলো দেখে  
সে রগড় করে বলল :

‘সুন্দরীরা শোন, আপেল পেড়ে দেবে যে, আমার কনে হবে সে!’

তিন বোন অমনি আখালিপাখালি ছুট, এ আগে যায় তা সে আগে ছোটে।

আপেলগুলো ছিল নিচে হাতের নাগালে, হঠাৎ সেগুলো উঠে গেল উঁচুতে মাথার ওপরে।

তিন বোন তখন ঝাঁকিয়ে পাড়তে চায়—ঝুরঝুরিয়ে চোখে এসে পড়ে শুধু পাতা। হাত বাড়িয়ে ছিড়তে চায়—  
ডালপালায় আটকে যায় বেণি। যতই ঝাঁপায় ততই লাফায়—আপেল আর পাড়তে পারে না, ছড়ে যায় শুধু হাত পা।

তখন এগিয়ে গেল খুকুমণি হাভরোশেচকা। নুয়ে এল ডালপালা, নেমে এল আপেলগুলো। বীর তরুণটিকে আপেল  
এনে দিল হাভরোশেচকা। তরুণ তাকে বিয়ে করল। সেদিন থেকে সুখে স্বচ্ছন্দে ঘর করতে লাগল হাভরোশেচকা।



## আলিওনুশকা বোন আর ইভানুশকা ভাই

এক বুড়ো আর বুড়ি। তাদের একটি মেয়ে আলিওনুশকা, একটি ছেলে ইভানুশকা।

বুড়োবুড়ি মারা গেল। সংসারে আলিওনুশকা ইভানুশকার আর কেউ রইল না।

আলিওনুশকা ছোট ভাইয়ের হাত ধরে কাজে বেরিয়ে পড়ল। চলেছে তারা দূরের পথ ধরে, মস্ত মাঠ পেরিয়ে; ভারি তেষ্ঠা পেল ইভানুশকার।

‘বড় তেষ্ঠা পেয়েছে রে দিদি!’

‘দাঁড়া ভাইটি, কুয়ো আসুক।’

যায়, যায়, সূর্য মাথার পরে, কুয়ো অনেক দূর, কেবলি তাপ বাড়ে, কেবলি ঘাম ঝরে। দেখে, একটা জলভরা গরুর খুর।

‘এই জলটা খাই দিদি?’

‘না ভাই, খাস্নে, তাহলে বাছুর হয়ে যাবি!’

ইভানুশকা দিদির কথা মেনে নিয়ে চলল এগিয়ে।

সূর্য মাথার পরে, কুয়ো অনেক দূরে, কেবলি তাপ বাড়ে, কেবলি ঘাম ঝরে। দেখে, একটা জলভরা ঘোড়ার খুর।

‘এই জলটা খাই দিদি?’

‘না ভাই, খাস্নে, ঘোড়ার বাচ্চা হয়ে যাবি!’

নিঃশ্বাস ফেলল ইভানুশকা। আবার চলল এগিয়ে।

হাঁটছে তো হাঁটছেই, সূর্য মাথার পরে, কুয়ো অনেক দূর, কেবলি তাপ বাড়ে, কেবলি ঘাম ঝরে। দেখে, একটা জলভরা ছাগলের খুর।

ইভানুশকা বলে :

‘আর পারি না দিদি, এই জলটা খাই?’

‘না ভাই, খাস্নে, ছাগলছানা হয়ে যাবি!’

ইভানুশকা এবার আর দিদির কথা না শুনে ছাগলের খুরের জলটা খেয়ে ফেলল।

খেতেই ছাগলছানা হয়ে গেল ইভানুশকা....

আলিওনুশকা ভাইকে ডাকে, ভাইয়ের বদলে ছুটে এল এক ধবল পানা ছাগলছানা।

আলিওনুশকা কাঁদতে লাগল। খড়ের গাদায় বসে বসে কাঁদে আর ছাগলছানাটা তার চারপাশে লাফিয়ে বেড়ায়।

ঠিক সেই সময় এক সওদাগর যাচ্ছিল ঐ রাস্তা দিয়ে।

বলল, ‘কাঁদছ কেন, সুন্দরী কন্যে?’

আলিওনুশকা তার দুঃখের কথা খুলে বলল।

সওদাগর বলল :

‘তুমি আমায় বিয়ে করো। সোনায় রুপোয় সাজিয়ে রাখব, আর ছাগলছানাটি আমাদের কাছে থাকবে।’

ভেবেচিন্তে সওদাগরকে বিয়ে করতে রাজি হয়ে গেল আলিওনুশকা।

সুখে স্বচ্ছন্দে দিন কাটতে লাগল। ছাগলছানাটাও ওদের কাছেই থাকে। আলিওনুশকার সঙ্গে একই খালা একই বাটি থেকে সব খায়।

একদিন সওদাগর বাড়ি নেই। হঠাৎ কোথা থেকে এক ডাইনি এসে হাজির। আলিওনুশকার জানালায় নিচে দাঁড়িয়ে আদর করে ডাকে, বলে: চল নদীতে চান করব।

আলিওনুশকাকে নদীতে নিয়ে এল ডাইনি, তারপর ঝাঁপিয়ে পড়ে, গলায় একটা বড় পাথর বেঁধে তাকে ছুঁড়ে ফেলে দিল নদীতে।

তারপর নিজে আলিওনুশকা সাজল, তার জামাকাপড় পরে বাড়ি ফিরে গেল। কেউ ওকে ডাইনি বলে চিনতেও পারল না। সওদাগর বাড়ি ফিরল কিন্তু সেও কিছু ধরতে পারল না।

কেবল ছাগলছানাটা জানত কী হয়েছে। বেচারী মাথা নিচু করে ঘুরে বেড়ায়, খায় না, দায় না। সকাল সন্ধ্যায় নদীর পারে ঘুরে ঘুরে বেড়ায় আর ডাকে :

‘আলিওনুশকা দিদিরে!

সাঁতরে আয় নদীরে...’

টের পেয়ে ডাইনি রোজ তার স্বামীকে বলে : মার বাপু, মেরে ফেল ছাগলটাকে... ছানাটার ওপর মায়্যা পড়ে গিয়েছিল সওদাগরের। কিন্তু ডাইনিটা খালি ঘ্যান্ঘ্যান করে, খালি পিড়াপিড়ি করে, উপায় কী, তাই শেষ পর্যন্ত সে সায় দিল।

-বলল, ‘বেশ, মার ওটাকে...’

মস্ত আগুন জ্বালাল ডাইনি, বড় কড়াই চাপল, বড় বড় ছুরিতে শান পড়ল...

ছাগলছানাটা দেখল তার মরণ ঘনিয়েছে। সওদাগরকে বলল :

‘মরার আগে আমায় একটু ছেড়ে দাও নদীতে যাব, জল খাব, গা ধোব।’

‘বেশ, যাও।’

ছাগলছানাটা দৌড়ে নদীর ধারে গিয়ে করুণ স্বরে কাঁদতে লাগল :



‘আলিওনুশকা দিদিরে!  
সাঁতরে আয় নদীরে।  
আগুন জ্বলে উনানে,  
কড়াই চাপে ভিয়ানে,  
ঝন ঝন ঝন ছুরি,  
বুঝি এবার মরি!’

আলিওনুশকা জলের ভিতর থেকে উত্তর দিল :

‘ইভানুশকা ভাইটি মোর!  
তলায় টানে ভারি পাথর,  
ঘাসেতে পা চেপে ধরে,  
হলুদ বালি বুকের পরে।’

ছাগলছানাটা কোথায় খুঁজে না পেয়ে ডাইনিটা চাকরকে ডেকে বলল :

‘যা শীগগির, ছাগলছানাটা আমায় খুঁজে এনে দে।’

নদীর কাছে গিয়ে চাকর দেখে, ছাগলছানাটা নদীর পার ধরে দৌড়াচ্ছে আর করুণ স্বরে কাঁদছে :


‘আলিওনুশকা দিদিরে!  
সাঁতরে আয় নদীরে।  
আগুন জ্বলে উনানে,  
কড়াই চাপে ভিয়ানে,  
ঝন ঝন ঝন ছুরি,  
বুঝি এবার মরি!’

আর নদীর ভিতর থেকেও স্বর ভেসে আসছে :

‘ইভানুশকা ভাইটি মোর!  
তলায় টানে ভারি পাথর,  
ঘাসেতে পা চেপে ধরে,  
হলুদ বালি বুকের পরে।’

চাকরটি তাড়াতাড়ি বাড়ি গিয়ে কী দেখেছে, কী শুনেছে—সব কথা মনিবকে খুলে বলল। সওদাগর লোকজন জড়ো করে নদীর পারে চলে গেল। তারপর রেশমের জাল ফেলে টেনে তুলল আলিওনুশকাকে। গলার পাথরটা খুলে, ঝরনার জলে চান করিয়ে সুন্দর করে কাপড় পরিয়ে দিল আলিওনুশকাকে। জীবন ফিরে পেল আলিওনুশকা, রূপ তার আরও যেন ফুটে বেরুল।

ছাগলছানাটা আনন্দে তিনবার ডিগবাজি খেতেই আবার হয়ে গেল সেই ছোট্ট খোকন ইভানুশকা। ডাইনিটাকে তখন একটা বুনো ঘোড়ার লেজের সঙ্গে বেঁধে খোলা মাঠে ছেড়ে দেওয়া হল।



## ব্যাঙ রাজকুমারী

অনেকদিন আগে এক রাজা ছিলেন। তাঁর তিন ছেলে। সবাই যখন সাবালক হল তখন একদিন রাজা তাদের ডেকে বললেন :

‘দেখো বাছারা, আমি তোমাদের বিয়ে দিয়ে মরবার আগে নাভিনাভিনির মুখ দর্শন করে যেতে চাই।’  
ছেলেরা উত্তর দিল, ‘সে তো ভাল কথা বাবা, আশীর্বাদ করুন। বলুন, কাকে বিয়ে করব?’

‘তোমরা প্রত্যেকে এক একটি করে তীর নিয়ে খোলা মাঠে গিয়ে ছুঁড়বে। যার তীর যেখানে পড়বে তার ভাগ্য সেখানে বাঁধা।’

রাজপুত্ররা বাবাকে প্রণাম করে একটি করে তীর নিয়ে খোলা মাঠে চলে গেল। ধনুক টেনে তীর ছুঁড়ল।

বড় রাজপুত্রের তীর পড়ল এক আমীরের বাড়ির উঠানে। আমীরের মেয়ে সেটি তুলে নিল। মেজ রাজপুত্রের তীর পড়ল এক সওদাগরের বাড়ির উঠানে। সওদাগরের মেয়ে সেটি তুলে নিলে।

কিন্তু ছোট রাজপুত্র ইভানের তীর উঁচুতে উঠে কোথায় যে গেল, কে জানে। তীরের খোঁজে রাজপুত্র চলে আর চলে। যেতে যেতে একটা জলার কাছে এসে দেখে একটা ব্যাঙ তীরটা মুখে করে বসে আছে।

রাজপুত্র বলল, ‘ব্যাঙ, ও ব্যাঙ, আমার তীর ফিরিয়ে দাও।’

আর ব্যাঙ বলে, ‘আগে বিয়ে করো আমায়!’

‘সে কী, একটা ব্যাঙকে বিয়ে করব কী?’

‘বিয়ে করো, সেই যে তোমার ভাগ্য।’

রাজপুত্রের ভীষণ দুঃখ হল। কিন্তু কী আর করে। ব্যাঙটাকে তুলে বাড়ি নিয়ে এল। রাজা তিনটে বিয়ের উৎসব করলেন : বড় জনের বিয়ে দিলেন আমীরের মেয়ের সঙ্গে, মেজ জনের সওদাগরের কন্যার সঙ্গে আর বোচারি রাজপুত্র ইভানের বিয়ে হল একটা ব্যাঙের সঙ্গে।

একদিন রাজা ছেলেদের ডেকে বললেন :

‘আমি দেখতে চাই, তোমাদের কোন বৌয়ের হাতের কাজ ভাল। কাল সকালের মধ্যেই সবাই একটা করে জামা সেলাই করে দিক।’

ছেলেরা বাবাকে প্রণাম করে বেরিয়ে গেল।

রাজপুত্র ইভান বাড়ি গিয়ে মাথা হেঁট করে বসে রইল। ব্যাঙটা থপথপ করে এসে জিজ্ঞেস করে :

‘কী হল রাজপুত্র, মাথা হেঁট কেন? কোন বিপদে পড়েছো বুঝি?’

‘বাবা বলেছেন, তোমায় কাল সকালের মধ্যে একটা জামা সেলাই করে দিতে হবে।’

ব্যাঙ বলল :

‘ভাবনা নেই, রাজপুত্র ইভান, বরং ঘুমিয়ে নাও, রাত পোয়ালে বুদ্ধি খোলে।’

রাজপুত্র শুতে গেল। ব্যাঙ করল কী, থপথপিয়ে বারান্দায় গিয়ে, ব্যাঙের চামড়া খসিয়ে হয়ে গেল জাদুকরি ভাসিলিসা—রূপবতী সেই, তুলনা তার নেই!

জাদুকরি ভাসিলিসা হাততালি দিয়ে ডেকে বললে :

‘দাসীবাঁদীরা জাগো, কোমর বেঁধে লাগো! কাল সকালের মধ্যেই আমায় একটা জামা সেলাই করে দেওয়া চাই, ঠিক যেমনটি আমার বাবা পরতেন।’

পরদিন সকালে রাজপুত্র ইভান উঠে দেখে, ব্যাঙ থপথপ করে ঘুরে বেড়াচ্ছে। আর টেবিলের ওপর তোয়ালে মোড়া একটি জামা। রাজপুত্রের আর আনন্দ ধরে না। জামাটা নিয়ে সোজা গেল বাপের কাছে। রাজা তখন অন্য ছেলেদের উপহার নিচ্ছেন। বড় ছেলের জামাটা নিয়ে রাজা বললেন :

‘এ জামা পরে দীন দরিদ্রে।’

মেজ রাজপুত্র জামা মেলে ধরতে রাজা বললেন :

‘এটা পরে বাইরে যাওয়া চলে না’

এবার রাজপুত্র ইভান তার জামাটা মেলে ধরল। সে জামায় সোনায় রুপোয় চমৎকার নকশা তোলা। চোখ পড়তেই রাজা বললেন :

‘একেই বলে জামা! পালাপার্বণে পরার মতো।’

বড় দু ভাই বাড়ি যেতে যেতে বলাবলি করে :

‘রাজপুত্র ইভানের বৌকে নিয়ে আমাদের হাসাহাসি করা ঠিক হয়নি। ব্যাঙ নয় ও মায়াবিনী...’

আবার রাজা তিন ছেলেকে ডেকে পাঠালেন।

‘তোমাদের বৌদের বলো কাল সকালের মধ্যে আমায় রুটি বানিয়ে দিতে হবে। কে সবচেয়ে ভাল রাঁধে দেখব।’

আবার ছোট রাজপুত্র ইভান মাথা হেঁট করে বাড়ি ফিরে এল। ব্যাঙ বললে :

‘রাজপুত্র, এত মনভার কেন?’

‘রাজামশাই বলেছেন কাল সকালের মধ্যে রুটি বানিয়ে দিতে হবে।’

‘ভাবনা করো না, রাজপুত্র। শুতে যাও, রাত পোহালে বুদ্ধি খোলে।’

অন্য বৌরা ব্যাঙকে নিয়ে আগে হাসাহাসি করেছে। এবার কিন্তু একটা বুড়ি দাসীকে পাঠিয়ে দিল দেখে আসতে, কী করে ব্যাঙ রুটি বানায়।

ব্যাঙ কিন্তু ভারি চালাক। টের পেয়ে গেল ওদের মতলব। তাই ময়দা মেখে লেচি তৈরি করে নিয়ে চুল্লির উপরটা ভেঙে সবটা লেচি সেই গর্তে ঢেলে দিল। বুড়ি দাসী দৌড়ে গিয়ে রাজবধূদের খবর দিলে। বৌরাও ঠিক তাই করতে লাগল।

তারপর ব্যাঙ কিন্তু ওদিকে লাফিয়ে বাইরে গিয়ে জাদুকরি ভাসিলিসা হয়ে গেল। হাততালি দিয়ে ডেকে বলল :

‘দাসীবাঁদীরা জাগো, কোমর বেঁধে লাগো! সকালের মধ্যেই আমায় একটা শাদা ধবধবে নরম রুটি বানিয়ে দিতে হবে, ঠিক যেমনটি আমি বাড়িতে খেতাম।’

পরদিন সকালে রাজপুত্র উঠে দেখে টেবিলের ওপরে এক রুটি, গায়ে তার নানা রকম নকশা : চারিপাশে কত শত মূর্তি, উপরে নগর আর তোরণ।

রাজপুত্র ভারি খুশি। তোয়ালে মুড়ে রুটি নিয়ে গেল বাবার কাছে। রাজা তখন বড় ছেলেদের রুটি নিচ্ছিলেন। বুড়ি দাসির কথা মত বড় দুই ভাইয়ের বৌ ময়দাটা সোজা ছুল্লির ভিতর ফেলে দিয়েছিল। ফলে যা হল সে এক পোড়াধরা এক একটা তাল। রাজা বড় ছেলের হাত থেকে রুটিটা নিয়ে দেখেই পাঠিয়ে দিলেন নোকর মহলে। মেজ রাজপুত্রের রুটিরও সেই একই দশা হল। আর ছোট রাজপুত্র ইভান রাজার হাতে রুটি দিতেই রাজা বলে উঠলেন :

‘একেই বলে রুটি! এই হল পালপার্বণে খাওয়ার মতো।’

রাজা তার পরদিন তিন ছেলেকে বৌ নিয়ে নেমন্ত্নে আসতে বললেন।

রাজপুত্র ইভান আবার মুখভার করে বাড়ি ফিরল, দুগুখে মাথা হেঁট করল। ব্যাঙ থপথপ করে লাফায় :

‘ঘ্যাঙর ঘ্যাঙ, ঘ্যাঙর ঘ্যাঙ, রাজপুত্র, মন খারাপ কেন তোমার? বাবা বুঝি কিছু মন্দ কথা বলেছেন!’

‘ব্যাঙ বৌ, ব্যাঙ বৌ, মন খারাপ না হয়ে করি কী? বাবা চান তোমাকে নিয়ে আমি নেমন্ত্নে যাই। কিন্তু লোকজনের সামনে তোমায় দেখাই কী করে?’

ব্যাঙ বলে :

‘রাজপুত্র, ভাবনা করো না; একাই যেও নেমন্ত্নে, আমি পরে যাব। খটখট দুমদাম শব্দ হলে ভয় পেও না। কেউ জিজ্ঞেস করলে বলো, “ও আমার ব্যাঙ বৌ আসছে কৌটোয় চড়ে”।’

রাজপুত্র ইভান তাই একাই গেল। বড় দুই ভাই গেল গাড়ি হাঁকিয়ে, বৌ জাঁকিয়ে। কত বেশ, কত ভূষা, গালে রঙ, চোখে কাজল। সবাই ছোট রাজপুত্রকে নিয়ে হাসাহাসি করতে লাগল।

‘সে কী, তোর বৌকে আনলি না যে? একটা রুমালে করেও তো আনতে পারতিস, সত্যি, রূপসীকে জোটালি কোথা থেকে? কোন খাল বিল তল্লাশ করে?’

তিন ছেলে নিয়ে, ছেলের বৌ নিয়ে, অতিথি অভ্যাগত নিয়ে রাজামশাই বসলেন এক জাজিম ঢাকা ওক কাঠের টেবিলে। ভোজ শুরু হবে। হঠাৎ শুরু হল খটখট দুমদাম আওয়াজ। সে আওয়াজে সারা রাজপুরী কেঁপে উঠল থরথরিয়ে, অতিথিরা ভয়ে লাফিয়ে উঠল। কিন্তু রাজপুত্র ইভান বললে :

‘অতিথি সজ্জন, ভয় নেই, আমার ব্যাঙ বৌ এল কৌটোয় চড়ে।’

ছটা শাদা ঘোড়ায় টানা সোনা মোড়া এক জুড়ি গাড়ি এসে থামল রাজপুরীর অলিন্দে। গাড়ি থেকে নেমে এল জাদুকরি ভাসিলিসা, আকাশি নীল পোষাকে তার ঝলমলে তারা, মাথায় জুলজুল বাঁকা চাঁদ; সে কী রূপ, জানার নয়, বোঝার নয়, রূপকথাতেই পরিচয়। রাজপুত্রের হাত ধরে নিয়ে গেল জাজিম ঢাকা ওক কাঠের টেবিলে।

শুরু হল পানভোজন, ফুটি। জাদুকরি ভাসিলিসা করল কি, গেলাশ থেকে পান করে বাকিটুকু টেলে দিলে বাঁ হাতার মধ্যে। মরালীর মাংসে কামড় দিয়ে হাড়গুলো রেখে দিল ডান হাতার মধ্যে।

দেখাদেখি বড় বৌ দুজনও তাই করল।

খাওয়া হল, দাওয়া হল, শুরু হল নাচ। জাদুকরি ভাসিলিসা রাজপুত্র ইভানের হাত ধরে এগিয়ে গেল। তালে তালে নাচে, ঘুরে ঘুরে নাচে! সবাই একেবারে অবাক। নাচতে নাচতে বাঁ হাত দোলালে ভাসিলিসা

আর হয়ে গেল একটা সরোবর। ডান হাত দোলালে, অমনি শাদা শাদা মরালী জেগে উঠল। রাজা আর অতিথি অভ্যাগতেরা সবাই বিস্ময়ে হতবাক।

তারপর অন্য বৌরাও নাচতে উঠল। ওরাও এক হাত দোলাল, অতিথিদের গা ভিজল শুধু। অন্য হাত দোলাল, ছড়িয়ে পড়ল শুধু হাড়। একটা হাড় গিয়ে লাগল একেবারে রাজার চোখে। রাজা ভয়ানক রেগে তক্ষুনি দুই বৌকে বের করে দিলেন।

ইতোমধ্যে রাজপুত্র ইভান করেছে কি, লুকিয়ে লুকিয়ে দৌড়ে বাড়ি গিয়ে ব্যাঙের চামড়াটা সোজা একেবারে উনুনে।

জাদুকরি ভাসিলিসা বাড়ি এসে ব্যাঙের চামড়া আর খুঁজে পায় না! মনের দুঃখে একটা বেঞ্চে বসে রাজপুত্রকে বলল :

‘এ কি করলে রাজপুত্র! আর যদি তিনদিন অপেক্ষা করতে তবে আমি চিরদিনের মত তোমার হয়ে যেতাম। কিন্তু এখন বিদায়। তিন নয়ের দেশ পেরিয়ে তিন দশের রাজ্যে যেখানে অমর-কাশ্চই থাকে, সেখানে আমার খোঁজ করো...’

এই বলে জাদুকরি ভাসিলিসা একটা ধূসর রঙের কোকিল হয়ে উড়ে গেল জানালা দিয়ে। রাজপুত্র কাঁদে কাঁদে, তারপর উত্তর দক্ষিণ পূর্ব পশ্চিমে প্রণাম করে চলে গেল যেদিকে দুচোখ যায় : জাদুকরি ভাসিলিসাকে খুঁজে বার করবে। গেল অনেক দূর, নাকি অল্প দূর, অনেক দিন, নাকি অল্প দিন কে জানে; বুটের গোড়ালি ক্ষয়ে গেল, কাফতানের কনুই ছিড়ে গেল, টুপি হল ফাড়া ফাড়া। যেতে যেতে এক খুড়খুড়ে ক্ষুদে বুড়োর সঙ্গে দেখা।

‘কুশল হোক কুমার, কিসের খোঁজে নেমেছ, কোন পথে চলেছ?’

রাজপুত্র বুড়োকে তার বিপদের কথা খুলে বলল। ক্ষুদে বুড়ো বলল :

‘হায়, হায়, ব্যাঙের চামড়াটা পোড়াতে গেলে কেন, রাজপুত্র? ওটা তোমার পরার নয়, ওটা তোমার খোলারও নয়। জাদুকরি ভাসিলিসা তার বাবার চেয়েও বেশি যাদু জ্ঞান নিয়ে জন্মেছিল। তাই ওর বাবা শাপ দিয়ে তিন বছরের জন্যে ওকে ব্যাঙ করে দিয়েছিলেন। যাক, এখন তো আর কোন উপায় নেই। এই সুতোর গোলা নাও। এটা যেদিকে গড়াবে সেদিকে যেও, ভয় পেয়ো না।’

রাজপুত্র ইভান বুড়োকে ধন্যবাদ দিয়ে সুতোর গোলার পেছনে পেছনে চলল। সুতোর গোলা আগে আগে গড়িয়ে চলে, আর রাজপুত্র পেছন পেছন যায়। একদিন এক খোলা মাঠে এক ভালুকের সঙ্গে দেখা। রাজপুত্র লক্ষ্য স্থির করে মারতে যাবে, হঠাৎ মানুষের গলায় কথা কয়ে উঠল ভালুক :

‘মেরো না রাজপুত্র, কোনদিন হয়ত আমি তোমার কাজে লাগতে পারি।’

রাজপুত্র ভালুককে আর মারল না, এগিয়ে চলল। হঠাৎ দেখে একটা হাঁস মাথার উপর দিয়ে উড়ে যাচ্ছে। রাজপুত্র লক্ষ্য স্থির করতেই হাঁসটা মানুষের গলায় বলে উঠল :

‘আমায় মেরো না, রাজপুত্র, কোনদিন হয়ত আমি তোমার কাজে লাগতে পারি।’

রাজপুত্র হাঁসটাকে ছেড়ে দিয়ে এগিয়ে চলল। হঠাৎ একটা খরগোশ দৌড়ে বেরিয়ে এল। রাজপুত্র ধনুক তুলে মারতে যাবে; খরগোশটা মানুষের মত গলায় বলে উঠল :

‘আমায় মেরো না, রাজপুত্র, কোনদিন হয়ত আমি তোমার কাজে লাগতে পারি।’

রাজপুত্র খরগোশটাকে আর মারল না, এগিয়ে চলল। হাঁটতে হাঁটতে রাজপুত্র নীল সমুদ্রের ধারে এসে দেখে, একটা মাছ ডাঙার বালিতে পড়ে খাবি খাচ্ছে।

‘রাজপুত্র ইভান, দয়া করো আমায়, নীল সমুদ্রে ছেড়ে দাও!’

রাজপুত্র মাছটা জলে ছেড়ে দিয়ে সমুদ্রের তীর ধরে হাঁটতে লাগল কতদিন কে জানে, সুতোর গোলা গড়াতে গড়াতে এল এক বনের কাছে। সেখানে রাজপুত্র দেখে মুরগির পায়ের উপর একটা কুঁড়েঘর ক্রমাগত ঘুরে চলেছে।

‘কুঁড়েঘর, ও কুঁড়েঘর, বনের দিকে পিঠ ফিরিয়ে আমার দিকে মুখ করে দাঁড়াও!’

কুঁড়েঘরটা বনের দিকে পিঠ রেখে রাজপুত্রের দিকে মুখ করে দাঁড়াল। রাজপুত্র ঘরে ঢুকে দেখে, চিম্নীর কাছে ন’থাক ইঁটের ওপর শুয়ে আছে ডাইনি, বাবা-ইয়াগা, তার খেংরাকাঠি পা, দাঁত নেমেছে হেথা, নাক উঠেছে হোথা! রাজপুত্রকে দেখে ডাইনিটা বলে উঠল, ‘তা আমার কাছে কেন, সজ্জন কুমার? কাজ আছে কি করার, নাকি কাজের ভয়ে ফেরার?’

‘ওরে পাজি বুড়ি খুবড়ি, আগে খাওয়া দে, দাওয়া দে, চানের জন্যে জল দে, তারপর শুধোস।’

বাবা-ইয়াগা রাজপুত্রকে গরম জলে চান করালে, খাওয়ালে দাওয়ালে, বিহানা পেতে শোয়ালে। রাজপুত্র ইভান তখন বাবা-ইয়াগাকে বলল যে সে তার বৌ জাদুকরী ভাসিলিসাকে খুঁজে বেড়াচ্ছে।

ডাইনি বলল, ‘জানি, জানি! তোমার বৌ এখন অমর-কাশ্চই’এর কবলে। ওকে ফিরে পাওয়া বাপু মুশকিল। কাশ্চই’এর সঙ্গে এঁটে ওঠা সহজ নয়। ওর প্রাণ আছে এক ছুঁচের ডগায়, ছুঁচ আছে এক ডিমের ভিতর, ডিম আছে এক হাঁসের পেটে, হাঁস আছে এক খরগোসের পেটে, খরগোস আছে এক পাথরের সিন্দুক, সিন্দুক আছে এক লম্বা ওক গাছের মাথায় আর ঐ গাছটা অমর কাশ্চই’এর চোখের মণি, কড়া পাহারা সেখানে।’

রাজপুত্র রাত্তিরটা বাবা-ইয়াগার বাড়িতেই কাটাল। পরদিন সকালে বুড়ি তাকে সেই লম্বা ওক গাছে যাবার পথটা দেখিয়ে দিল। অনেক পথ, নাকি অল্প পথ, কতদূর রাজপুত্র গেল কে জানে; দেখে, দাঁড়িয়ে আছে এক লম্বা ওক গাছ। শনশন করছে তার পাতা, সেই গাছের মাথায় একটা পাথরের সিন্দুক। কিন্তু তার নাগাল পাওয়া অসম্ভব।

হঠাৎ কোথা থেকে সেই ভালুকটা এসে করল কি, শেকড়শুদ্ধ উপড়ে দিলে গাছটাকে। সিন্দুকটা দুম করে মাটিতে পড়ে ভেঙ্গে চৌচির। অমনি সিন্দুক থেকে একটা খরগোস বেরিয়ে যত জোর পারে দৌড়ে পালাতে গেল। কিন্তু সেই আগের খরগোশটা ওকে তাড়া করে ধরে টুকরো টুকরো করে ছিঁড়ে ফেলল। অমনি খরগোশটার পেট থেকে একটা হাঁস বেরিয়ে সাঁ করে আকাশে উঠে গেল। তখন দেখতে না দেখতে সেই আগের হাঁসটা তাকে ধাওয়া করে ঝাপটা মারতেই ডিম পাড়ল হাঁসটা, আর ডিম পাড়ল নীল সমুদ্রে।

রাজপুত্র তখন ভীষণ কাঁদতে লাগল। সমুদ্র থেকে কী করে এখন ডিম খুঁজে পাবে! হঠাৎ দেখে, সেই মাছটা সাঁতার কেটে পারের দিকে আসছে, মুখে সেই হাঁসের ডিমটা। রাজপুত্র ডিমটা নিয়ে ভেঙ্গে ফেলল। তারপর ভাঙতে লাগল ছুঁচের ডগা। রাজপুত্র ভাঙে আর উথালপাথাল করে অমর-কাশ্চই’দাপাদাপি করে। কিন্তু যতই করুক অমর-কাশ্চই, ছুঁচের ডগাটি ভেঙে ফেলল রাজপুত্র, মরতে হল অমর-কাশ্চইকে।

রাজপুত্র তখন চলল কাশ্চই’এর শ্বেতপাথরের পুরীতে। জাদুকরি ভাসিলিসা ছুটে এল রাজপুত্রের কাছে, চুমো খেল তার মধুঢালা মুখে। তারপর জাদুকরি ভাসিলিসা আর রাজপুত্র ইভান দুজনে নিজেদের দেশে ফিরে গেল। সেখানে তারা সুখে স্বচ্ছন্দে ঘরকন্না করতে লাগল অনেক বুড়ো বয়স অবধি।



## জাদুকরি ভাসিলিসার কথা

এক চাষি বীজ বুনল, ফসল হল আশ্চর্য, ঘরে তোলাই দায়। আঁটি তুলে ঝাড়াই মাড়াই করে ভর ভরন্ত গোলায় তুলল। গোলায় তুলে চাষি ভাবল : “সুখে স্বচ্ছন্দে দিন কাটবে এবার।”

এদিকে এক ইঁদুর আর এক চড়াই শুরু করল চাষির গোলায় যাতায়াত। দিনে বার পাঁচেক করে আসে; পেট পুরে খেয়ে চলে যায়—ইঁদুর যায় তার গর্তে আর চড়াই যায় তার বাসায়। এমনি করেই মিলেমিশে তিন বছর কাটল তাদের। গোলার সব দানা শেষ হল, রইল কিছুটা ক্ষুদকুঁড়ো পড়ে। ইঁদুর দেখে ভাঁড়ার তো শেষ হয়-হয়, চড়াইটার ওপর বাটপারি করে একলাই বাকিটুকু দখল করা যাক। এই ভেবে মেঝেতে সিঁধ কেটে বাকি দানা সব মাটির নিচে জমা করল।

সকালে চড়াই গোলায় খেতে এসে দেখে, একটা দানাও পড়ে নেই। বেচারি খিদে নিয়েই ফিরে গেল। ভাবল :

“হতভাগা ইঁদুরটা আমায় ঠকিয়েছে! গিয়ে একবার পশুরাজ সিংহের কাছে নালিশ করি। পশুরাজ নিশ্চয়ই ন্যায় বিচার করবেন।”

এই ভেবে চড়াই উড়ে চলল সিংহের কাছে।

পশুরাজের কাছে গিয়ে চড়াই কুর্নিশ করে বলল, ‘সিংহমশাই, আপনি পশুরাজ! আমি আপনার এক পশু, দৈতো ইঁদুরের সঙ্গে ছিলাম। গত তিন বছর ধরে একই গোলা থেকে আমরা খেয়েছি, কোনদিন ঝগড়া বিবাদ করিনি। কিন্তু খাবার ফুরিয়ে আসতেই ইঁদুর আমাকে ভারি ঠকিয়েছে। গোলার মেঝেয় সিঁধ কেটে বাকি দানাগুলো সব মাটির নিচে চালান করে দিয়েছে। আমি উপোস করে মরছি। ন্যায় মতে আপনি বিচার করে দিন। আর যদি বিচার না করেন, তবে আমি আমাদের রাজা ঈগলমহারাজের কাছে আর্জি করব।’

‘তাই যা বাপু, যেখানে পারিস যা,’ সিংহ বলল।

চড়াই গিয়ে কুর্নিশ করলে ঈগলের কাছে। ইঁদুর কী রকম ঠকিয়েছে, আর পশুরাজই বা কেমন এক-চোখোমি করলেন—সে সব কথা ঈগলমহারাজকে খুলে বলল।

শনে ঈগলমহারাজ রেগে লাল। তক্ষুণি সিংহের কাছে দূতের হাতে খবর পাঠাল : কাল অমুক সময়, অমুক মাঠে তোমার সব জন্তুজানোয়ার নিয়ে হাজির থেকো, আমিও আমার পাখির দল জুটিয়ে তৈরি থাকব। যুদ্ধ হবে।

পশুরাজ সিংহ তাই টেঁড়া দিলে, পশুদের ডাক পড়ল যুদ্ধে। জুটল তারা কাতারে কাতারে। কিন্তু যেই ওরা খোলা মাঠে এসেছে অমনি যত ডানাওয়ালা সৈন্য নিয়ে মেঘের মত ওদের ওপর ঝাঁপিয়ে পড়ল ঈগল। তিন ঘণ্টা তিন মিনিট ধরে যুদ্ধ চলল। জিত হল ঈগলমহারাজের। সারা মাঠ ভরে উঠল পশুদের লাশে। ঈগল তখন পাখিদের বাড়ি পাঠিয়ে নিজে চলে গেল এক গহীন বনে, বসল এক মস্ত ওক গাছের মাথায়, সারা গায়ে জখম, ভাবতে লাগল, কী করে আবার আগের শক্তি ফিরে পাওয়া যায়।

এ সব অনেক পুরাকালের কথা। সেই সময় একলা একলা বাস করত এক সওদাগর আর তার বৌ। তাদের একটিও ছেলে মেয়ে ছিল না। সকালে উঠে সওদাগর তার বৌকে বলল :

‘গিন্নি, বড় খারাপ স্বপ্ন দেখেছি, এক মস্ত পাখি এসেছে আমাদের কাছে। আস্ত ঝাঁড় গিলে খায়, পুরো গামলা চুমুক দেয়। হাত থেকে তার রেহাই নেই, না খাইয়ে উপায় নেই। যাই, বনের মধ্যে গিয়ে খানিকটা ঘুরে আসি।’

সওদাগর বন্দুক নিয়ে বনে চলে গেল। বনে বনে সে ঘুরলে অনেকক্ষণ নাকি অল্পক্ষণ, শেষকালে এল সেই ওক গাছটার কাছে। দেখে, একটা ঈগল, বন্দুক তুলে গুলি করতে যাবে। হঠাৎ মানুষের ভাষায় কথা কয়ে উঠল পাখি :

‘মেরো না ভালমানুষের পো, আমায় মেরে তোমার কোন লাভ হবে না। তার চেয়ে আমায় বাড়ি নিয়ে চলো। তিন বছর তিন মাস তিন দিন আমায় খাইয়ো। তোমার ওখানে সেরে উঠি, ডানায় পালক গজাক, গায়ে জোর ফিরুক, তখন তোমার উপকারের শোধ দেব।’

‘ঈগল আবার কী দেবে?’ এই ভেবে সওদাগর আবার বন্দুক তুলল।

ঈগল ফের সেই কথা বলে। আবার সওদাগর বন্দুক তুলল, বার বার তিনবার। ঈগল ফের বলল :

‘মেরো না ভালমানুষের পো, তিন বছর তিন মাস তিন দিন আমায় খাইয়ে দাইয়ে তোমার বাড়িতে রাখো। সেরে উঠি, ডানায় পালক গজাক, গায়ে জোর হোক, তোমার সব উপকার শোধ দেব।’

দয়া হল সওদাগরের, ঈগলকে বয়ে নিয়ে এল বাড়িতে। বাড়ি এসেই সওদাগর তক্ষুনি একটা ঝাঁড় মেরে এক গামলা ভর্তি মধুর সরবৎ করে রাখল। ভাবল এতে ঈগলটার বেশ কিছুদিন চলে যাবে। ঈগল কিন্তু এক গ্রাসেই সব শেষ করে দিল। অনাহৃত অতিথি নিয়ে খুবই বিপদ হল সওদাগরের, একেবারে নিঃস্বল হয়ে পড়ল সে। তা দেখে ঈগল সওদাগরকে বলল :

‘শোনো কর্তা, খোলা মাঠটায় চলে যাও, দেখবে সেখানে আহত-নিহত অনেক পশু পড়ে আছে। জন্তুগুলোর ছাল ছাড়িয়ে দামি ফার নিয়ে শহরে বেচে এসো। প্রচুর টাকা হবে। সে টাকায় আমি খেয়ে, তুমি খেয়েও বাকি থাকবে।’

সওদাগর খোলা মাঠে গিয়ে দেখে, সত্যিই আহত-নিহত অনেক পশু পড়ে আছে। তা থেকে দামি দামি চামড়া ছাড়িয়ে, শহরে ফার বেচে সওদাগর অনেক টাকা পেল।

এক বছর কেটে গেল। ঈগল সওদাগরকে বলল : যেখানে বড় বড় ওক গাছ আছে সেখানে আমায় নিয়ে চলো। সওদাগর গাড়িতে ঘোড়া জুতল তারপর ঈগলকে নিয়ে গেল বড় বড় ওক গাছগুলোর কাছে। ঈগল মেঘের চেয়েও উঁচুতে উড়ে গেল। তারপর সোঁ করে নেমে এসে যত জোরে সম্ভব তার বুক দিয়ে একটা ওক গাছ মারল ধাক্কা। গাছ দু টুকরো হয়ে গেল।

ঈগল বলল, ‘না সওদাগর, এখনও আমার আগের শক্তি ফিরে পাইনি, আরও পুরো একবছর খাওয়াতে হবে।’

দ্বিতীয় বছরও কেটে গেল। ঈগল আবার কালো মেঘের মাথার উপর উড়ে গেল, তারপর সোঁ করে নেমে এসে ধাক্কা মারল গাছে। কয়েক টুকরো হয়ে ভেঙে পড়ল গাছ।

‘আরও একবছর খাওয়াতে হবে সওদাগর, ভালমানুষের পো, আগের শক্তি এখনও আসেনি গায়ে।’

এই ভাবে তিন বছর তিন মাস তিন দিন কেটে যেতেই ঈগল সওদাগরকে বলল:



‘আবার আমাকে সেই বড় বড় ওক গাছের কাছে নিয়ে চलो।’

সওদাগর ঈগলকে ওক গাছগুলোর কাছে নিয়ে গেল। এবার ঈগল আগের চেয়েও উঁচুতে উড়ে গেল, তারপর সবচেয়ে বড় ওক গাছটার গায়ে মারল এক প্রচণ্ড ধাক্কা। গাছটা আগা থেকে গোড়া পর্যন্ত টুকরো টুকরো হয়ে ভেঙ্গে পড়ল। কেঁপে উঠল সারা বন।

ঈগল বলল, ‘অনেক ধন্যবাদ তোমায় সওদাগর, ভালমানুষের পো, এবার আমি আগের শক্তি ফিরে পেয়েছি। ঘোড়া ছেড়ে আমার পিঠে চড়ে বসো। আমার বাড়ি নিয়ে গিয়ে তোমার সব উপকারের শোধ দেব।’

সওদাগর ঈগলের পিঠে চড়ে বসল। ঈগল নীল সমুদ্রের ওপর দিয়ে উঠে গেল একেবারে উঁচুতে। বলল : ‘নীল সমুদ্রটা একবার দেখ তো, কত বড়?’

সওদাগর উত্তর দিল, ‘একটা বড় চাকার মত।’

তখন মৃত্যুভয় দেখাবার জন্যে সওদাগরকে পিঠ থেকে ফেলে দিল ঈগল, কিন্তু সমুদ্রে পড়বার আগেই ঈগল তাকে ধরে ফেলল। তারপর আরো উঁচুতে উঠে গেল।

‘এবার নীল সমুদ্রের দিকে তাকিয়ে বলো তো, কত বড়?’

‘মুরগির ডিমের মত।’

ঈগল আবার এক ঝাঁকুনি দিয়ে সওদাগরকে ফেলে দিল, তারপর সমুদ্রে পড়বার আগেই ধরে নিয়ে আরও উঁচুতে উড়ে চলল।

‘এবার দেখো তো, নীল সমুদ্র কত বড়?’

‘একটা দোপাটির বিচির মত।’

এবার তৃতীয় বার ঈগল এক ঝাঁকুনি দিয়ে সওদাগরকে ফেলে দিল একেবারে সেই আকাশ থেকে। কিন্তু এবারেও সমুদ্রে পড়ে যাবার আগেই ধরে ফেলল। বলল :

‘কী সওদাগর, ভালমানুষের পো, এবার বুঝেছো মৃত্যুভয় কাকে বলে?’

সওদাগর উত্তর দিল, ‘বুঝেছি, মনে হয়েছিল এই শেষ।’

‘আমার দিকে যখন বন্দুক তুলে তাক করেছিলে আমারও তাই মনে হয়েছিল।’

ঈগল সওদাগরকে নিয়ে সমুদ্র পেরিয়ে সোজা উড়ে চলল তামার রাজ্যে।

ঈগল বলল, ‘এখানে আমার বড় বোন থাকে। আমরা তার অতিথি হব। ও যখন উপহার দিতে চাইবে, কিছু নিও না যেন, কেবল তামার কৌটা চাইবে।’

এই বলে ঈগল নেমে সোঁদা মাটিতে আছাড় খেতেই একটি সুন্দর তরুণ হয়ে গেল।

মস্ত একটা আঙিনা পেরিয়ে চলেছে ওরা, বোন ওদের দেখতে পেয়ে ভারি খুশি হয়ে স্বাগত জানাল।

‘ভাই আমার, সোনা আমার, তুই বেঁচে আছিস! কোথা হতে এলি ? তিন বছর তোকে দেখিনি। ভেবেছিলাম বুঝি বা মরেই গেছিস। কী তোকে খেতে দিই, কী দিয়ে আপ্যায়ন করি?’

‘আমায় শুধিয়ে না দিদি, আমায় জিজ্ঞেস করো না, আমি তো বাড়ির লোক। এই লোকটিকে জিজ্ঞেস করো, একে শুধোও। আমায় তিন বছর খাইয়েছে, দাইয়েছে, উপোস রাখিনি।’

মেয়েটি ওদের এক নকশি জাজিম ঢাকা ওক কাঠের টেবিলে বসালে, খাওয়ালে, আপ্যায়ন করলে। তারপর রত্নভাণ্ডারে নিয়ে গিয়ে তার অগুনতি ধনসম্পদ দেখিয়ে সওদাগরকে বলল :

‘এই তোমার সোনা, রূপো, মণিমাণিক্য যত নেবে নাও।’

সওদাগর বলল :

‘সোনা চাই না, রূপো চাই না, মণিমাণিক্য চাই না; আমায় কেবল তামার কৌটাটি দাও।’

‘যতই করো, সেটি হচ্ছে না। বাঁদরের গলায় কি আর মুক্তোর হার?’  
বোনের কথা শুনে ভাই খুব রেগে উঠল, তাই সে আবার ঈগল হয়ে সওদাগরকে পিঠে নিয়ে উড়ে চলে গেল।  
দিদি চোঁচিয়ে ডাকতে লাগল, ‘ভাই আমার, সোনা আমার, ফিরে আয়! না হয় তামার কৌটাই দেব,  
আপত্তি করব না!’

‘এখন আর হয় না দিদি, দেরি হয়ে গেছে,’ এই বলে ঈগল আকাশের ভিতর দিয়ে উড়ে চলল।  
ঈগল বলল, ‘দেখো তো সওদাগর, ভালমানুষের পো, কী দেখছো সামনে, কী দেখছো পিছনে?’  
চারদিক দেখে সওদাগর বলে :

‘পিছনে জ্বলন্ত আগুন আর সামনে ফুটন্ত ফুল।’

‘তার মানে তামার রাজ্য পুড়ে যাচ্ছে, আর রুপোর রাজ্যে ফুল ফুটছে।

রুপোর রাজ্যে থাকে আমার মেজ বোন। আমরা তার অতিথি হব। সে যখন উপহার দিতে চাইবে  
আর কিছু নিও না, শুধু ঐ রুপোর কৌটা চাইবে।’

পৌছিল ঈগল, সোঁদা মাটিতে আছাড় খেতেই আবার একটি সুন্দর তরুণ হয়ে গেল।

মেজ বোন বলল, ‘ভাই আমার, সোনা আমার, কোথেকে এলি? কোথায় ছিলি, এতদিন আসিসনি  
কেন? কী দিয়ে তোর আপ্যায়ন করি?’

‘আমায় জিজ্ঞেস করো না দিদি, শুধিয়ে না, আমি তো বাড়ির লোক। এই ভালমানুষের পোকে  
জিজ্ঞেস করো, এর আপ্যায়ন করো। আমায় পুরো তিন বছর খাইয়েছে, দাইয়েছে, উপোসে রাখেনি।’

মেজ বোন ওদের নকশি জাজিম ঢাকা ওক কাঠের টেবিলে বসিয়ে খাওয়ালে, আপ্যায়ন করলে।  
তারপর রত্নভাণ্ডারে নিয়ে গিয়ে বলল :

‘এই রইল সোনা, রুপো, মণিমাণিক্য যত খুশি সাধ মিটিয়ে নাও।’

‘সোনা চাই না, রুপো চাই না, মণিমাণিক্য চাই না; আমায় কেবল রুপোর কৌটাটি দাও।’

‘না ভালমানুষের পো, সেটি হচ্ছে না। ও কৌটা তোমার গলায় ঠেকে মরবে।’

বোনের কথায় রাগ হয়ে গেল ভাইয়ের, তাই ফের সে পাখি হয়ে সওদাগরকে পিঠে চাপিয়ে উড়ে গেল।

‘ফিরে আয় ভাই, ফিরে আয়! না হয় কৌটাই দেব, আপত্তি করব না!’

‘আর হয় না দিদি, দেরি হয়ে গেছে।’

ঈগল আবার উড়ে চলল আকাশে।

‘চেয়ে দেখো সওদাগর, ভালমানুষের পো, কী দেখছো সামনে, কী দেখছো পিছনে?’

‘পিছনে জ্বলন্ত আগুন, সামনে ফুটন্ত ফুল।’

‘তার মানে রুপোর রাজ্য পুড়ে যাচ্ছে, আর আমার সবচেয়ে ছোট বোনের সোনার রাজ্যে ফুল ফুটছে।  
আমরা ওর অতিথি হব। সে যখন উপহার দিতে চাইবে কিছু নিও না, শুধু তার সোনার কৌটা চাইবে।’

উড়তে উড়তে সোনার রাজ্যে পৌঁছে ঈগল আবার সেই সুন্দর তরুণ হয়ে গেল।

ছোট বোন বলল, ‘ভাই আমার, সোনা আমার, কোথেকে এলি? কোথায় ছিলি, এতদিন আসিসনি  
কেন? কী তোকে দিই, কী দিয়ে আপ্যায়ন করি?’

‘আমায় জিজ্ঞেস করো না দিদি, আমায় আপ্যায়ন করো না, আমি তো বাড়ির লোক। জিজ্ঞেস করো  
এই সওদাগরকে, ও আমায় তিন বছর খাইয়েছে, দাইয়েছে, উপোসে রাখেনি।’

নকশি জাজিম ঢাকা ওক কাঠের টেবিলে বসিয়ে মেয়েটি ওদের খাওয়ালে, দাওয়ালে। তারপর  
রত্নভাণ্ডারে নিয়ে গিয়ে সওদাগরকে সোনা, রুপো, মণিমাণিক্য সব দিতে চাইল।

‘কিছু চাই না আমার, কেবল ঐ সোনার কৌটাটি দাও।’

বোন বলল, 'এই নাও। ভাগ্য ফিরুক তোমার। তুমিই আমার ভাইকে তিন বছর খাইয়েছ, দাইয়েছ, উপোসে রাখোনি। আমার ভাইয়ের জন্যে তোমায় না দিতে পারি এমন কিছু নেই।'

তাই সোনার রাজ্যে দিন কাটাল সওদাগর, ভোজ খেল। শেষে একদিন বিদায় নেবার সময় এল।

ঈগল বলল, 'বিদায় বন্ধু। ক্রটির কথা ভুলে যেয়ো, আর মনে রেখো, বাড়ি না পৌঁছনো পর্যন্ত কৌটা খুলবে না কিছু।'

সওদাগর বাড়ির দিকে রওনা হল। গেল অনেক দিন, নাকি অল্প দিন, ক্লান্ত হয়ে সওদাগর ভাবল একটু জিরিয়ে নেওয়া যাক। থামল সে এক বিড়ুই মাঠে, রাজা অদীক্ষিত ললাটের রাজ্যে। সোনার কৌটার দিকে চেয়ে চেয়ে দেখে সওদাগর, শেষে আর পারল না, খুলে ফেলল কৌটা। কৌটা খোলামাত্র দেখে—কোথা থেকে জেগে উঠল এক মস্ত রাজপুরী, কত তার সাজসজ্জা। লোকজন দাসদাসি গিজগিজ করছে।

'আজ্ঞা করুন হজুর, হুকুম করুন?'

সওদাগর খেল, দেল, বিছানায় গা এলাল।

রাজা অদীক্ষিত ললাট দেখে, তার রাজ্যে মস্ত এক রাজপুরী। দূতকে বলল :

'দেখে এসো তো, কোন শয়তান আমার রাজ্যে আমার অনুমতি ছাড়া প্রাসাদ তুলেছে। ভালোয় ভালোয় এক্ষুনি যেন রাজ্য ছেড়ে চলে যায়।'

এই শাসানি শুনে সওদাগর ভাবতে লাগল কী করে আবার রাজপুরীকে কৌটার ভিতরে ঢোকান যায়। ভেবে ভেবেও কোন উপায় বের করতে পারল না।

দূতকে বলল, 'খুশি হয়েই যেতে রাজি, কিন্তু কী করে যে যাব, সেটাই জানি না।'

দূত ফিরে গিয়ে রাজাকে সব কথা জানাল।

রাজা বলল, 'ওর বাড়িতে অজানা যেটি আছে সেটি আমায় দিক, তবে আমি প্রাসাদটা আবার সোনার কৌটায় পুরে দেব।'

সওদাগর আর কী করে, প্রতিজ্ঞা করল বাড়িতে তার অজানা যা আছে সেটি দেবে রাজাকে। রাজা অদীক্ষিত ললাট তক্ষুনি প্রাসাদটা মুড়ে কৌটায় ঢুকিয়ে দিল। সওদাগর কৌটা নিয়ে রওনা হল বাড়িযুখো।

গেল অনেকদিন, নাকি অল্পদিন, এল বাড়িতে। বৌ বলল :

'এসো গো, ঘরে এসো! কোথায় ছিলে?'

'যেখানে ছিলাম ছিলাম, এখন তো আর নেই।'

'তুমি যখন বাড়িতে ছিলে না, ভগবান তখন একটি খোকা দিয়েছেন আমাদের।'

"এটাই তাহলে আমার অজানা জিনিস!" মনে মনে ভাবল সওদাগর, দুঃখ হল তার, শোক হল।

বৌ বলল, 'তোমার কী হয়েছে? নাকি বাড়িতে মন টিকছে না।'

সওদাগর বলল, 'না, না, সে কথা নয়।' তারপর সব ঘটনা খুলে বলল বৌকে।

ওরা তখন খুব দুঃখ করে কাঁদতে লাগল, কিন্তু চিরকাল তো আর কেউ কাঁদে না।

সওদাগর তাই সোনার কৌটা খুলল। দেখতে দেখতে তৈরি হয়ে গেল একটা মস্ত জমকালো রাজপুরী, কত তার সাজসজ্জা। স্ত্রীপুত্র নিয়ে সওদাগর মনের সুখে থাকে সেখানে। ধন তাদের উপচে ওঠে।

বছর দশ পেরিয়ে গেল। রূপবান বুদ্ধিমান হয়ে বেড়ে উঠল সওদাগরপুত্র, যেমন রূপ তেমন গুণ।

একদিন মনমরা হয়ে ঘুম ভাঙল ছেলেটির, বাবাকে বলল :

'রাজা অদীক্ষিত ললাট আমায় স্বপ্নে দেখা দিয়েছে বাবা, বলেছে তার কাছে যেতে। অনেকদিন থেকে নাকি অপেক্ষা করে আছে, আর চলে না।'

চোখের জল ফেললে বাবা মা। তারপর আশীর্বাদ করে ছেলেকে দূর দেশে পাঠিয়ে দিলে।

যায় সে সড়ক বেয়ে, পথ উজিয়ে, শূন্য কান্তার, স্তম্ভের প্রান্তর, পেরিয়ে এল এক গহন বনে। জন নেই, প্রাণী নেই। কেবল একটেরে একটি কুঁড়ে, বনের দিকে মুখ আর সওদাগরপুত্র ইভানের দিকে পিঠ ফিরিয়ে দাঁড়িয়ে আছে।

‘কুঁড়েঘর, ও কুঁড়েঘর, বনের দিকে পিঠ ফিরিয়ে আমার দিকে মুখ করে দাঁড়াও।’

কুঁড়েঘর ইভানের কথামত বনের দিকে পিঠ করে ঘুরে দাঁড়াল।

সওদাগরপুত্র ইভান ভিতরে ঢুকে দেখে, খেংরাকাঠি পা, বাবা-ইয়াগা ডাইনি শুয়ে। ইভানকে দেখে ডাইনি বলল :

‘রুশি মানুষ যে, না শুনেছি কানে, না হেরেছি নয়নে, আজ দেখি আপনা থেকেই হাজির। কোথা থেকে আসছ কুমার, কোন পথ ধরেছ?’

‘ধিক তোকে, বুড়ি ডাইনি, অতিথির জন্যে খাবার নেই, দাবার নেই, শুরু করেছিস জেরা!’

বাবা-ইয়াগা টেবিল সাজিয়ে খাবার দিল, দাবার দিল, ভোজন শেষে শুইয়ে দিল। ভোর হতেই জাগিয়ে তুলে শুরু করল জিজ্ঞাসাবাদ। সওদাগরপুত্র ইভান আদ্যোপান্ত সব বলে জিজ্ঞেস করল :

‘বলো দিদিমা, রাজা অদীক্ষিত ললাটের কাছে যাব কী করে?’

‘ভাগ্যে এ পথে এসেছিলে, সাক্ষাৎ যমের হাতে পড়তে। রাজার কাছে এতদিন যাওনি বলে সে ভীষণ রেগে আছে। শোনো বলি, এই পথ ধরে যাও, পুকুর পাবে। গাছের আড়ালে লুকিয়ে থাকো। উড়ে আসবে তিনটি কপোত, তিন সুন্দরী, রাজার তিন মেয়ে। এসে তারা ডানা খুলে রেখে, পোশাক ছেড়ে পুকুরে নাইবে। একজনের ডানায় দাগ-ফুটকি। সুযোগ বুঝে সেই ডানা জোড়াটি ছিনিয়ে নিও। তারপর যতক্ষণ না তোমায় বিয়ে করতে রাজি হয় কিছুতেই ফেরত দিও না। ব্যস্ সব ঠিক হয়ে যাবে।’

বাবা-ইয়াগার কাছ থেকে বিদায় নিয়ে ইভান তার কথামত পথ ধরে চলতে লাগল।

হাঁটতে হাঁটতে এল সেই পুকুরটার কাছে। লুকিয়ে রইল একটা ঝাঁকড়া গাছের আড়ালে। কিছুক্ষণ পরে তিনটি কপোত উড়ে এসে নামল, একজনের ডানায় দাগ-ফুটকি। মাটিতে আছাড় খেতেই তিনটি সুন্দরী মেয়ে হয়ে গেল তারা। ডানা খুলে, জামা ছেড়ে তারা নাইতে নামল। ইভান ওদিকে ওঁৎ পেতে ছিল, চুপিচুপি গুটিগুটি এগিয়ে দাগ-ফুটকি ডানা জোড়া চুরি করে নিল। দেখে, কী হয়। সুন্দরীরা স্নান শেষ করে জল ছেড়ে উঠে এল পাড়ে। জামাকাপড় পরে ডানা লাগিয়ে কপোত হয়ে উড়ে চলে গেল দুজন, কিন্তু বাকি একজন পড়ে রইল, খুঁজতে লাগল হারান ডানা।

খোঁজে, খোঁজে, আর বলে :

‘সাদা দাও গো, বলো, কে আমার ডানা নিয়েছ। যদি বুড়ো মানুষ হও তবে তোমায় বাবা বলব, যদি মাঝবয়সী হও তবে তোমায় কাকা বলব, কিন্তু যদি রূপবান কুমার হও তবে হবে আমার স্বামী।’

এই শুনে গাছের পিছন থেকে বেরিয়ে এল সওদাগরপুত্র ইভান।

‘এই নাও তোমার ডানা!’

‘বলো কুমার, বাগদত্ত বর আমার, কী তোমার কুল, কী গোত্র ? কোথায় চলেছ?’

‘সওদাগরপুত্র ইভান আমি, চলেছি তোমার বাবা, রাজা অদীক্ষিত ললাটের কাছে।’

‘আমার নাম জাদুকরি ভাসিলিসা।’

জাদুকরি ভাসিলিসা ছিল বাবার সবচেয়ে আদরের কন্যা। যেমন রূপ তেমনি তার বুদ্ধি। ভাসিলিসা ইভানকে রাজা অদীক্ষিত ললাটের দেশে যাবার পথ বলে দিয়ে নিজে কপোত হয়ে অন্য বোনদের পিছন পিছন উড়ে চলে গেল।

ইভান প্রাসাদে পৌঁছলে রাজা তাকে লাগালে রান্নাঘরের কাজে : কাঠ কাটতে, জল তুলতে। রান্নাঘরের বাবুর্চি কেলেভুষো কিন্তু ইভানকে দুচোখে দেখতে পারত না। রাজার কাছে গিয়ে বানিয়ে বানিয়ে ইভানের নামে লাগাতে শুরু করল সে।

‘হুজুর মহারাজ, ঐ সওদাগরপুত্র ইভানটা বড়াই করে, সে নাকি এক রাত্রে মধ্য গহন বন কেটে, কাঠ গাদা করে, শিকড় উপড়িয়ে, জমি চষে, বীজ বুনে, গম কেটে, ঝেড়ে বেছে, পিষে, আপনার সকালে খাওয়ার জন্যে পিঠে তৈরি করে দিতে পারে।’

রাজা বলল, ‘ডেকে আনো ওকে।’

এল ইভান।

‘শুনেছি খুব নাকি বড়াই করো: এক রাত্রে মধ্য গহন বন কেটে, কাঠ গাদা করে, শিকড় উপড়িয়ে, জমি চষে, বীজ বুনে, গম কেটে, ঝেড়ে বেছে, পিষে, আমার সকালের খাবার মত পিঠে তৈরি করে দিতে পারো।’ বেশ, কাল সকালের মধ্যেই করে দেখাও।’

সওদাগরপুত্র ইভান যতই অস্বীকার করুক কোন লাভ হল না। হুকুম হয়ে গেছে, মানতেই হবে। উঁচু মাথা নিচু করে সে ফিরল রাজার কাছ থেকে। রাজার মেয়ে, জাদুকরি ভাসিলিসা তাকে দেখে বলল :

‘এত দুঃখ কেন তোমার?’

‘তোমায় বলে কী হবে, তুমি তো আর উপায় করতে পারবে না!’

‘বলা যায় না, হয়ত পারব!’

ইভান তখন ভাসিলিসাকে সব বলল, রাজা অদীক্ষিত ললাট তাকে কী কাজ করতে দিয়েছে।

‘ধ্যুৎ, এ আবার একটা কাজ নাকি, এতো ছেলেখেলা! আসল কাজ পরে আসছে। ঘুমতে যাও; রাত পোহালে বুদ্ধি খোলে, কাল সকালের মধ্যে সবই ঠিক হয়ে যাবে।’

ঠিক রাত দু প্রহর হতেই ভাসিলিসা প্রাসাদের রাঙা অলিন্দে দাঁড়াল। জোর গলায় ডাক পাঠাল। এক মিনিটের মধ্যেই চারিদিক থেকে ভিড় করে এল মজুর, লোকে লোকারণ্য। কেউ গাছ কাটে, কেউ মাটি খুঁড়ে শিকড় উপড়ায়, কেউ জমি চষে। একজায়গায় বীজ পোঁতে, ততক্ষণে অন্য জায়গায় ফসল কেটে সুরু হয়ে যায় ঝাড়াই মাড়াই। ধুলোর মেঘে ছেয়ে গেল। সকালের মধ্যে ময়দা করে পিঠে ভেজে সারা। রাজার সকালের জলযোগের জন্যে ইভান নিয়ে গেল পিঠেগুলো।

‘বাহবা!’ বলে রাজা রাজভাণ্ডার থেকে ইভানকে পুরস্কার দেবার হুকুম দিলে।

বাবুর্চি কেলেকুশো এতে গেল আরো রেগে। রাজার কাছে সে নতুন করে লাগাতে গেল :

‘হুজুর, ইভান বলছে সে নাকি রাতারাতি এমন একটা জাহাজ বনিয়ে দিতে পারে যেটা আকাশে উড়বে।’

‘বেশ, ডেকে নিয়ে এসো ওকে।’

ডেকে আনা হল সওদাগরপুত্র ইভানকে।

‘তুমি নাকি আমার দাসদাসিদের কাছে বড়াই করেছে, এমন একটা চমৎকার জাহাজ রাতারাতি বানাতে পারো যেটা আকাশে উড়বে? অথচ আমায় সে কথা জানাওনি! শোনো, কাল সকালের মধ্যেই ওরকম একটা জাহাজ তৈরি করে দিতে হবে।’

দুঃখে ইভানের উঁচু মাথা হেঁট হয়ে নামল কাঁধের নিচে। রাজার কাছ থেকে ফিরে এল যেন আর সে মানুষটি নয়। জাদুকরি ভাসিলিসা তাকে দেখে বললে :

‘কীসের দুঃখ তোমার, কীসের খেদ?’

‘দুঃখ না করে কী করি বলো, রাজা আদেশ করেছে এক রাত্রে মধ্য গহন বন কেটে, কাঠ গাদা করে, শিকড় উপড়িয়ে, জমি চষে, বীজ বুনে, গম কেটে, ঝেড়ে বেছে, পিষে, আপনার সকালের খাওয়ার জন্যে পিঠে তৈরি করে দিতে হবে।’

‘এ আবার কাজ নাকি, এতো ছেলেখেলা! আসল কাজ পরে। ঘুমতে যাও তো; রাত পোহালে বুদ্ধি খোলে, কাল সকালের মধ্যে সবই ঠিক হয়ে যাবে।’

মাঝ রাত্রে ভাসিলিসা প্রাসাদের রাঙা অলিন্দে এসে জোরে জোরে ডাক পাঠাল। এক মুহূর্তে চারিদিক থেকে ছুতোরের দল ছুটে এল। তারপর করাত, কুড়াল নিয়ে ফুর্তি করে কাজে লেগে গেল সব। সকালের মধ্যে সব তৈরি।

রাজা বললে, 'খাসা হয়েছে! চলো আমরা একটু বেড়িয়ে আসি।'

উঠে বসল ওরা দুজনে। সঙ্গে নিল বাবুর্চি কেলেভুষোকেও। জাহাজ উড়ে চলল আকাশ দিয়ে। রাজার বুনো জানোয়ারগুলোকে যেখানে রাখা হত তার ওপর দিয়ে উড়ে যাবার সময় কেলেভুষো উঁকি মেরে যেই দেখতে গেছে, অমনি ইভান তাকে এক ধাক্কা মেরে নিচে ফেলে দিল। চোখের পলকে জানোয়ারগুলো বাবুর্চিকে ছিঁড়ে টুকরো টুকরো করে দিল।

ইভান চিৎকার করে উঠল, 'যাঃ! কেলেভুষো যে পড়ে গেল!'

রাজা বললে, 'চুলোয় যাকগে! কুকুরের মরণ কুস্তার মতই!'

প্রাসাদে ফিরে এল ওরা।

রাজা বললে, 'তোমার মাথায় বুদ্ধি আছে, ইভান। এবার তিন নম্বরের কাজ : একটা বুনো ঘোড়াকে বশ করতে হবে। যদি পারো, আমার মেয়ের সঙ্গে তোমার বিয়ে দেব।'

খুশি হয়ে সওদাগরপুত্র ইভান ফিরে এল, ভাবল : "এ আর কঠিন কী।"

ফের জাদুকরি ভাসিলিসার সঙ্গে ইভানের দেখা। সব কথা শুনে ভাসিলিসা বলল :

'বোঝানি তুমি, ইভান। এবার সত্যিই তোমার কাজটা সহজ নয়, কঠিন কাজ, কারণ বুনো ঘোড়াটি হচ্ছে স্বয়ং অদীক্ষিত লনাট নিজে। উড়িয়ে তোমায় নিয়ে যাবে বাড়ন্ত গাছের উঁচুতে, উড়ন্ত মেঘের নিচুতে, খোলা মাঠে ছড়াবে তোমার হাড়গোড়। এক্ষুণি দৌড়ে কামার বাড়ি যাও। বলো একটা তিন পুদ ওজনের লোহার হাতুড়ি বানিয়ে দিতে। ঘোড়ার পিঠে শক্ত হয়ে চড়ে বসেই ওটার মাথায় বাড়ি মেরে ঠাণ্ডা রেখো।'

পরদিন আস্তাবল থেকে সহিসরা বের করে নিয়ে এল একটা বুনো ঘোড়া। ধরে রাখাই দায়। কী তার ডাক, কী তার চাঁট! সওদাগরপুত্র ইভান পিঠে চড়ে বসতেই ঘোড়াটা উঠে গেল একেবারে বাড়ন্ত গাছের উঁচুতে, উড়ন্ত মেঘের নিচুতে, ছুটতে লাগল বাতাসের আগে আগে। ইভান কিন্তু শক্ত হয়ে বসে ঘোড়াটার মাথায় হাতুড়ি মেরে চলল ক্রমাগত। শেষ পর্যন্ত হয়রান হয়ে ঘোড়াটা নামল সোঁদা মাটিতে। সওদাগরপুত্র ইভান ঘোড়াটা সহিসদের কাছে ফেরত দিয়ে একটু বিশ্রাম করে প্রাসাদে ফিরে গেল। গিয়ে দেখে, রাজা অদীক্ষিত লনাটের মাথায় পণ্ডি বাঁধা।

'বুনো ঘোড়াটাকে বাগ মানিয়েছি, মহারাজ।'

'বেশ, কাল এসো। বউ পছন্দ করে নিও। আজ আমার মাথাটা ধরেছে।'

পরদিন সকালে জাদুকরি ভাসিলিসা সওদাগরপুত্র ইভানকে বলল :

'আমরা রাজার তিন মেয়ে। রাজা তিনজনকেই মাদি ঘোড়া বানিয়ে দিয়ে তোমায় বলবে বৌ বেছে নিতে। ভাল করে নজর রেখো, দেখবে আমার লাগামের একটা মণি প্যাট প্যাট করছে। তারপর রাজা আমাদের কপোত করে দেবে। বোনেরা দানা খুটে খুটে খাবে। আর থেকে থেকেই আমি ডানার বাপটা মারব। তিন বারের বার আমাদের তিন কন্যে করে দেবে, তিনজনের একই মুখ, মাথায় এক, একই রকম চুল। আমি ইচ্ছে করে রুমাল নাড়াব; তাই দেখে চিনে নিও।'

জাদুকরি ভাসিলিসা যা বলেছিল তাই হল। রাজা তিনটে ঠিক একরকমের মাদি ঘোড়া এনে সার করে দাঁড় করিয়ে দিলে।

'যেটা খুশি বেছে নাও।'

সওদাগরপুত্র ইভান ভাল করে নজর করলে; দেখল, একটার লাগামের মণি প্যাট প্যাট করছে। ইভান সেই লাগামটা ধরে বলল :

'এই আমার বৌ!'

‘ভালটা ছেড়ে খারাপটাই বেছেছো।’

‘তা হোক, এই আমার ভাল।’

‘আর একবার বাছ।’

তিনটে কপোত ছাড়ল রাজা, পালকে পালকে অবিকল এক, দানা ছড়িয়ে দিলে। ইভান দেখল একটা কপোত কেবলি ডানার ঝাপটা মারছে। ইভান তার ডানা চেপে ধরল।

‘এই আমার বৌ!’

‘ঠিকটিকে ধরলে না। পরে পস্তাবে। বরং বারবার তিনবার বেছে দেখো।’

রাজা তিন কন্যা এনে দাঁড় করিয়ে দিলে। তিনজনের একই মুখ, মাথায় এক, একই রকম চুল। ইভান দেখল একজন রুমাল নাড়াচ্ছে। অমনি ইভান গিয়ে তার হাত চেপে ধরল।

‘এই আমার বৌ!’

আর উপায় নেই। রাজা অদীক্ষিত ললাট তাই ইভানের হাতেই জাদুকরি ভাসিলিসাকে সম্প্রদান করল।  
বিয়ে হয়ে গেল খুব ধুমধাম করে।

গেল অল্পদিন, নাকি অনেকদিন, সওদাগরপুত্র ইভান ঠিক করল এবার ভাসিলিসাকে নিয়ে নিজের দেশে পালিয়ে যাবে। ঘোড়ায় লাগাম পরিয়ে অন্ধকার রাতে বেরিয়ে পড়ল ওরা দুজন। পরদিন সকালে রাজা টের পেলে, ধরে আনবার জন্যে লোক ছুটল।

ভাসিলিসা স্বামীকে বলল, ‘সোঁদা মাটিতে কান পাতো দেখি, কী শুনতে পাচ্ছে বলো!’

ইভান মাটিতে কান পেতে বলল :

‘ঘোড়ার ডাক শুনতে পাচ্ছি।’

ভাসিলিসা অমনি স্বামীকে একটা ছোট সবজি ক্ষেত বানিয়ে দিয়ে নিজে একটা বাঁধা কপি হয়ে গেল।  
যারা ধরতে এসেছিল তারা রাজার কাছে ফিরে গেল শূন্য হাতে।

‘হজুর মহারাজ, খোলা মাঠে কিছুই দেখলাম না, শুধু একটা সবজি ক্ষেত ছাড়া, সে ক্ষেতের মধ্যে একটা বাঁধাকপির মাথা।’

‘যাও, ঐ বাঁধাকপিটাই কেটে নিয়ে এসো। এ ওই মেয়েরই একটা যাদু।’

লোকজন আবার ছুটল ওদের ধরতে। ইভান আবার সোঁদা মাটিতে কান পেতে শুনল। বলল :

‘ঘোড়ার ডাক শুনতে পাচ্ছি।’

ভাসিলিসা তখন নিজে একটা কুয়ো হয়ে গেল। আর ইভানকে করে দিল একটা ঝলমলে বাজপাখি।  
পাখিটা কুয়ো থেকে জল খেতে লাগল।

লোকজনেরা কুয়ের পাড়ে এসে দেখে, রাস্তাটা সেখানেই শেষ হয়ে গেছে। তাই ফিরে গেল আবার।  
‘হজুর মহারাজ, খোলামাঠে কিছুই দেখলাম না, কেবল একটা কুয়ো আর তার পাশে একটা ঝলমলে বাজপাখি বসে জল খাচ্ছে।’

এবার রাজা অদীক্ষিত ললাট নিজেই বেরল।

জাদুকরি ভাসিলিসা ইভানকে বলল, ‘এবার দেখো তো, মাটিতে কান পেতে কী শুনতে পাও!’

‘ওরে বাবা! আগের চেয়েও যে জোরাল ধূপধাপ, গুরগুর!’

‘তার মানে এবার বাবা আসছে নিজে। কী করি? কী উপায়?’

‘আমার মাথাতেও আর কিছু আসছে না।’

জাদুকরি ভাসিলিসার কাছে ছিল তিনটি জিনিস : একটা বুরুশ, একটা চিরুণি আর একটা তোয়ালে।  
সেগুলোর কথা মনে পড়তে ভাসিলিসা বলে উঠল :

‘আছে রাজা অদীক্ষিত ললাটের হাত থেকে বাঁচার উপায়।’

ভাসিলিসা বুরুশটা দোলাতেই হয়ে গেল একটা বিরাট গহন বন, গাছে গাছে এত ঠেসাঠেসি যে হাত গলে না। তিন বছরেও সারা বনটা ঘুরে আসা যাবে না। রাজা অদীক্ষিত ললাট এখানে কামড়ায়, সেখানে কামড়ায় শেষ পর্যন্ত অতিকষ্টে একটু পথ করে নিয়ে আবার ধাওয়া শুরু করল। রাজা তাদের প্রায় ধরে ধরে, হাত বাড়ালেই হয়; ভাসিলিসা তার চিরুণিটা দুলিয়ে দিল—অমনি পথ আটকে দাঁড়াল একটা বিরাট খাড়া পাহাড়। পায়ে হেঁটে ডিঙানো যায় না, ঘোড়ায় চড়ে পেরনো যায় না।

রাজা পাহাড়টার গায়ে সুড়ঙ্গ কাটতে শুরু করল। কাটতে কাটতে এদিক থেকে ওদিক পর্যন্ত একটা সুড়ঙ্গ হয়ে যেতেই রাজা আবার ধাওয়া শুরু করল। ভাসিলিসা তখন তোয়ালেটা পিছন দিকে দোলাতেই অমনি একটা বিরাট সমুদ্র হয়ে গেল। ঘোড়া ছুটিয়ে তীর পর্যন্ত এসে থমকে দাঁড়াল রাজা—রাস্তা বন্ধ। ফিরে যেতে হল।

ভাসিলিসা আর ইভান যখন প্রায় এসে গেছে ইভান বলল :

‘আমি আগে গিয়ে বাবা-মাকে খবর দিই, তুমি ততক্ষণ অপেক্ষা করো।’

জাদুকরি ভাসিলিসা বলল, ‘শুধু একটা কথা মনে রেখো কিন্তু, বাড়ি পৌঁছে সবাইকে চুমো দিও। কিন্তু ধর্মমাকে নয়, ধর্মমাকে চুমো দিলেই আমার কথা সব ভুলে যাবে।’

সওদাগরপুত্র ইভান বাড়ি ফিরে এল, খুশি হয়ে চুমু খেল সবাইকে। ধর্মমাকেও চুমু দিল, ভুলে গেল জাদুকরি ভাসিলিসার কথা। আর বেচারি ভাসিলিসা একা একা রাস্তায় অপেক্ষা করে; ইভান আর আসে না। তাই শহরে গিয়ে এক বুড়ীর বাড়ি কাজ নিল ভাসিলিসা। এদিকে সওদাগরপুত্র ইভানের বিয়ে করার ইচ্ছা হল। একটি কনে পছন্দ করে বিরাট ভোজের আয়োজন করতে লাগল।

জাদুকরি ভাসিলিসা তা জানতে পেরে ভিখারি সেজে সওদাগরের বাড়ি গেল ভিক্ষা করতে।

সওদাগরের বৌ বলল, ‘একটু দাঁড়াও, বাছা; তোমায় একটা ছোট পিঠে ভেজে দিই। বিয়ের বড় পিঠেটা কাটবার আমার ইচ্ছে নেই।’

‘যা দাও মা, তাই ভাল। মঙ্গল হোক তোমার।’

বড় পিঠেটা কিন্তু পুড়ে গেল, আর সেই ছোটো পিঠেটা হল ভারি সুন্দর। সওদাগরের বৌ ছোট পিঠেটা ভোজের জন্যে রেখে পোড়া পিঠেটা দিল ভিখারীকে। ছোট পিঠেটা টেবিলের ওপর কাটতেই ফুডুৎ করে বেরিয়ে এল একজোড়া ঘুঘু।

ঘুঘু তার জুড়িকে বলে, ‘আমায় একটা চুমু দাও না!’

‘না, দেব না। তাহলে তুমিও আমায় ভুলে যাবে, সওদাগরপুত্র ইভান যেমন ভুলে গেছে জাদুকরি ভাসিলিসাকে।’

ঘুঘুটা বারবার তিনবার বলল, ‘চুমো দাও না!’

‘না, দেব না। তাহলে তুমিও আমায় ভুলে যাবে, সওদাগরপুত্র ইভান যেমন ভুলে গেছে জাদুকরি ভাসিলিসাকে।’


সব কথা মনে পড়ে গেল ইভানের, চিনতে পারলে কে ঐ ভিখারি মেয়েটি। বাবা-মাকে অতিথি অভ্যাগতকে সে বললে :

‘এই আমার বৌ!’

‘তা তোমার যখন এক বৌ আছেই, তখন তার সঙ্গেই ঘর করো!’

নতুন কনেটিকে তারা দামি দামি উপহার দিয়ে বাড়ি পাঠিয়ে দিল। আর সওদাগরপুত্র ইভান তার জাদুকরি ভাসিলিসার সঙ্গে মনের সুখে ঘরকন্না করতে লাগল। ধনধান্যে ঘর ভরা, দুগ্ধের মুখ দেখে না।





## ঝলমলে বাজ ফিনিস্ত

এক যে ছিল চাষি। তিন মেয়ে রেখে মারা গেল চাষির বৌ। চাষি ভাবল একটা ঝি রাখা যাক, সংসারের কাজকর্ম করবে। কিন্তু চাষির সবচেয়ে ছোট মেয়ে মারুশকা বলল :

‘ঝি আর রেখো না, বাবা। আমি একাই সংসার দেখব।’

তাই সই। মারুশকাই সংসার দেখে। সবতেই তার হাত। সবতেই সে দড়। মারুশকাকে খুব ভালবাসে চাষি। এমন চালাক চতুর কাজের মেয়ে পেয়ে তার ভারি আনন্দ। দেখতেও পটের সুন্দরী! তার অন্য বোনরা কিন্তু হিংসুটে আর লোভী। এদিকে রূপ নেই আর ফ্যাশনের ঘট্টা, সারাঙ্কণ রং মাখে, রুজ মাখে, সেজেগুজে বসে থাকে। এ সাজ, সে সাজ, এ জুতো, সে জুতো, এ রুমাল, সে রুমাল।

একদিন বুড়ো চাষি বাজারে যাবে। মেয়েদের ডেকে বলল :

‘তোদের কার জন্যে কী আনব, বাছারা? কী পেলে খুশি হবি?’

বড় দু বোন বলল :

‘একটা করে শাল এনো—ফুল-তোলা, সোনা-ঝলা।’

মারুশকা কিন্তু চুপ করে থাকে। বাপ জিজ্ঞেস করল :

‘আর তোর কী চাই, মারুশকা?’

‘আমার জন্যে বাবা, ঝলমলে বাজ ফিনিস্তের একটা পালক এনো।’

চাষি বাজার থেকে দুটো শাল নিয়ে ফিরে এল। কিন্তু পালক আর পেল না।

পরের বার চাষি আবার বাজারে গেল। বলে :

‘কী চাই তোদের, ফরমাশ কর।’

বড় দুজন খুশি হয়ে বলল :

‘আমাদের জন্যে এক জোড়া করে রূপোর নাল বসানো জুতো এনো।’

মারুশকা কিন্তু আবার বলে :

‘আমার জন্যে বাবা, ঝলমলে বাজ ফিনিস্তের একটা পালক এনো।’

সারাদিন বাজারে ঘুরে ঘুরে চাষি দু জোড়া জুতো কিনলে। কিন্তু ঝলমলে বাজ ফিনিস্তের পালক কিছুতেই পেল না। পালক ছাড়াই ফিরে এল।

বারবার তিন বার। চাষি আবার চলল বাজারে। বড় দুই মেয়ে বলে :

‘আমাদের জন্যে দুটো নতুন পোষাক এনো, বাবা।’

কিন্তু মারুশকা আবার বলে :

‘আমার জন্যে বাবা, ঝলমলে বাজ ফিনিস্তের পালক এনো।’

বেচারি চাষি সারা দিন ঘুরে বেড়াল। কিন্তু পালক কোথাও পেল না। শহর ছেড়ে বেরুতেই এক বুড়োর সঙ্গে দেখা।

‘কী দাদু, ভাল তো?’

‘ভালই বাছা! চললে কোথায়?’

‘বাড়ি ফিরছি দাদু, গ্রামে। কিন্তু ভারি মুশকিলে পড়েছি। ছোট মেয়ে বেরবার সময় বলে দিয়েছিল ঝলমলে বাজ ফিনিস্তের একটা পালক আনতে। তা আমি কোথাও খুঁজে পেলাম না।’

‘তেমন পালক আমার একটা আছে। এ কিন্তু যাদুর পালক। তবে ভাল লোককে দিতে বাধা নেই।’

বুড়ো বের করে চাষির হাতে দিল পালকটা—সাধারণ পালক। যেতে যেতে চাষি ভাবে, “এর মধ্যে ভাল কী দেখল মারুশকা?”

বাড়ি পৌছে চাষি মেয়েদের জিনিস ভাগ করে দিল। বড় দুই বোন তাদের নতুন সজ্জায় সাজে আর মারুশকাকে দেখে হাসে :

‘যা বোকা ছিল সেই বোকাই রয়ে গেল! এবার পালকটি মাথায় গৌজ, চমৎকার দেখাবে!’

মারুশকা উত্তর না দিয়ে সরে গেল। তারপর বাড়ির সকলে যখন ঘুমিয়ে পড়েছে, মারুশকা তখন পালকটা মেঝেয় ফেলে আস্তে আস্তে বলে কি :

‘লক্ষ্মী ফিনিস্ত—ঝলমলে বাজ, পথ চাওয়া বর এসো গো আজ।’

অমনি এক অপরূপ সুন্দর কুমার এসে হাজির। ভোর হতেই কুমার মেঝেয় আছাড় খেয়ে আবার বাজপাখি হয়ে গেল। মারুশকা জানলা খুলে দিতেই পাখিটা উড়ে গেল নীল আকাশে।

পর পর তিন রাত্তির মারুশকা কুমারকে ডেকে আনল। সারাদিন সে বাজপাখি হয়ে নীল আকাশে উড়ে বেড়ায়, কিন্তু যেই রাত হয়ে আসে অমনি মারুশকার কাছে এসে দাঁড়ায় অপূর্ব এক সুন্দর কুমার। চতুর্থ দিন হিংসুটে দুই বোন তা দেখে ফেললে। বাবার কাছে গিয়ে নালিশ করলে।

চাষি বলল, ‘তোরা বাপু নিজেদের চরকায় তেল দে তো।’

বোনেরা ভাবে, “বেশ, দেখা যাবে কী দাঁড়ায়।”

কতগুলো ধারালো ছুরি জানলার বাজুতে পুঁতে রেখে লুকিয়ে রইল তারা।

উড়ে এল সেই ঝলমলে বাজপাখি। জানলা অবধি আসে, কিন্তু মারুশকার ঘরে আর ঢুকতে পারে না। জানলার কাঁচে পাখিটা সমানে ঝাপটা মেরে চলে। বুক তার কেটে কেটে যায়। মারুশকা কিন্তু কিছুই জানে না। অঘোরে ঘুমচ্ছে। পাখিটা তখন বলে উঠল :

‘যে আমায় চায়, সে আমায় পাবে, কিন্তু সহজে নয়। তিনজোড়া লোহার জুতোর তলা ক্ষইয়ে, তিনটে লোহার দণ্ড ভেঙ্গে, তিনটে লোহার টুপি ছিঁড়ে তবে।’

এই কথা মারুশকার কানে যেতেই সে লাফিয়ে উঠল, চাইল জানলার দিকে, কিন্তু বাজপাখি নেই, জানলায় শুধু রক্তের দাগ। খুব কাঁদতে লাগল মারুশকা। চোখের জলে রক্তের দাগ মুছে নিল, হয়ে উঠল আরও সুন্দর। বাবার কাছে গিয়ে মারুশকা বলল :

‘আমায় বকো না বাবা, আমি চললাম দূরের পথে। বেঁচে থাকি দেখা হবে। না থাকি, তবে সেই আমার নির্বন্ধ।’

খুব কষ্ট হচ্ছিল চাষির তবু শেষ পর্যন্ত ছেড়েই দিতে হল তার আদরের মেয়েটিকে।

মারুশকা তাই তিনজোড়া লোহার জুতো, তিনটে লোহার দণ্ড, আর তিনটে লোহার টুপি ফরমাশ দিল। তারপর তার চিরবাহিত বন্ধু ঝলমলে বাজ ফিনিস্তকে খুঁজতে পাড়ি দিল দূরের পথে। চলল সে খোলা মাঠ ভেঙ্গে, ঘন বন পেরিয়ে, খাড়া পাহাড় ডিঙিয়ে। পাখিরা ওকে গান শুনিয়ে খুশি করে, ঝরণা ওর সুন্দর ধবধবে মুখখানি ধুয়ে দেয়, ঘন বন ওকে ঢেকে নেয়। মারুশকার কোন ক্ষতি কেউ করতে পারে না। পাঁশুটে নেকড়ে, ভালুক, শিয়াল—জঙ্গলের যত জন্তু সবাই ছুটে আসে তার কাছে। হাঁটতে হাঁটতে এক জোড়া লোহার জুতো ক্ষয়ে গেল, একটা লোহার দণ্ড ভাঙ্গল, একটা লোহার টুপি ছিঁড়ল।

মারুশকা তখন বনের একটা ফাঁকায় এসে দেখে, মুরগির পায়ের উপর একটা ছোট কুঁড়েঘর ঘুরে চলেছে।

‘কুঁড়েঘর, ও কুঁড়েঘর, বনের দিকে পিঠ ফিরিয়ে আমার দিকে মুখ করে দাঁড়াও! ভেতরে যাব, রুগি খাব।’

কুঁড়েঘরটা তখন বনের দিকে পিঠ ফিরিয়ে মারুশকার দিকে মুখ করে দাঁড়াল। মারুশকা ঘরে ঢুকে দেখে, বসে আছে এক ডাইনি, বাবা-ইয়াগা— খেংরাকাঠি পা, বসেছে ড্যাং ড্যাং, ঘর জোড়া তার ঠ্যাং ঠোট উঠেছে তাকে, ছাত ঠেকেছে নাকে।

ডাইনিটা মারুশকাকে দেখেই বলে উঠল :

‘হাউমাউখাউ, রুশির গন্ধ পাউ! কীরে সুন্দরী, কাজ আছে কি করার, নাকি কাজের ভয়ে ফেরার?’  
‘ঝলমলে বাজ ফিনিস্তের খোঁজে বেরিয়েছি, ঠাকুমা।’

‘সে যে অনেক দূর গো, সুন্দরী। তিন নয়ের দেশ পেরিয়ে তিন নয়ের রাজ্যে। রানি-মায়াবিনী তাকে যাদু করা সরবৎ খাইয়ে বিয়ে করেছে। তবে আমি তোকে সাহায্য করব। এই নে একটা রুপোর পিরিচ আর একটা সোনার ডিম। তিন নয়ের রাজ্যে গিয়ে রাজবাড়ির দাসির কাজ নিস। কাজের পর এই ডিমটা রাখিস পিরিচে। নিজে থেকেই ডিমটা ঘুরবে। কিনতে চাইলে এমনতে দিস না। ঝলমলে বাজ ফিনিস্তের সঙ্গে দেখা করতে চাইবি।’

মারুশকা বাবা-ইয়াগাকে ধন্যবাদ দিয়ে বেরিয়ে পড়ল। আঁধার হয়ে উঠল বন, হয়ে উঠল ভয়ঙ্কর। পা ফেলতেও ভয় করে মারুশকার। এমন সময় এল এক বেড়াল। লাফিয়ে মারুশকার কোলে উঠে ঘড়ঘড় করে বলল :

‘ভয় পেও না মারুশকা, এগিয়ে যেও। যত এগোবে তত ভয়ানক হয়ে উঠবে বনটা। কিন্তু থেমো না আর খবরদার, পিছনদিকে তাকিও না।’

বিড়ালটা মারুশকার পায়ে গা ঘষে চলে গেল! মারুশকা তো এগিয়ে চলে। যত এগোয় বনও তত গভীর, তত অন্ধকার হয়ে ওঠে। তবু হেঁটেই চলে মারুশকা। আরও এক জোড়া লোহার জুতো ক্ষয়ে গেল, লোহার দণ্ড ভেঙ্গে গেল, লোহার টুপিটা ছিঁড়ে গেল। মারুশকা এসে পড়ল একটা কুঁড়েঘরের সামনে। কুঁড়েটা একটা মুরগির পায়ের উপর বসানো। চারিদিকে বেড়া। আর খুঁটির ডগায় সব মাথার খুলি, তাতে আগুন জ্বলছে।

মারুশকা বলল :

‘কুঁড়েঘর, ও কুঁড়েঘর, বনের দিকে পিঠ ফিরিয়ে আমার দিকে মুখ করে দাঁড়াও! ভেতরে যাব, রুটি খাব।’  
বনের দিকে পিঠ ফিরিয়ে ওর দিকে মুখ করে দাঁড়াল কুঁড়েঘর। মারুশকা ঢুকে গেল ভিতরে। দেখে, ডাইনি, বাবা-ইয়াগা—খেংরাকাঠি পা, বসেছে ড্যাং ড্যাং, ঘর জোড়া তার ঠ্যাং, ঠোট উঠেছে তাকে, ছাত ঠেকেছে নাকে।

মারুশকাকে দেখে ডাইনি বলল :

‘হাউমাউখাউ, রুশির গন্ধ পাউ! কীরে সুন্দরী, কাজ আছে কি করার, নাকি কাজের ভয়ে ফেরার?’  
‘ঝলমলে বাজ ফিনিস্তের খোঁজে চলেছি, ঠাকুমা।’

‘আমার বোনের কাছে গিয়েছিলি?’

‘গিয়েছিলুম, ঠাকুমা।’

‘বেশ। তবে আমি তোকে সাহায্য করব, সুন্দরী। এই সোনার ছুঁচ রুপোর ফ্রেমটা নে। ছুঁচটা নিজে নিজেই লাল মখমলে সোনালি রুপোলি নক্সা তুলবে। কেউ কিনতে চাইলে দিস না। ঝলমলে বাজ ফিনিস্তের সঙ্গে দেখা করতে চাইবি।’

বাবা-ইয়াগাকে ধন্যবাদ দিয়ে মারুশকা চলল। বনের মধ্যে মড়মড় করে, দুমদাম করে, শনশন করে। ঝোলানো মাথার খুলিগুলো থেকে ঠিকরে ঠিকরে পড়ে ভুতুড়ে আলো। ভয়ে মরে মারুশকা। হঠাৎ কোথা থেকে একটা কুকুর দৌড়ে এল :

‘ভেউ, ভেউ, মারুশকা, ভয় করো না লক্ষ্মীটি। এগিয়ে যেও, বন আরও ভয়ঙ্কর হয়ে উঠবে। পিছনদিকে তাকিও না।’

এই বলেই কোথায় উখাও। মারুশকা হাঁটে তো হাঁটে। আরও ঘন কাল হয়ে ওঠে বনটা। পা ঠেকে ঠেকে যায়, আস্তিন বেধে বেধে যায়...হাঁটে আর হাঁটে মারুশকা, পিছনে তাকায় না।

অনেক দিন, নাকি অল্প দিন, কে জানে। লোহার জুতো ক্ষয়ে গেল, লোহার দণ্ড ভেঙে গেল, লোহার টুপিটা ছিঁড়ে গেল। পৌছিল মারুশকা বনের মধ্যে ঘাসে ঢাকা ফাঁকা একটা জায়গায়; দেখে, মুরগির পায়ের ওপর একটা কুঁড়েঘর। লম্বা লম্বা খুঁটি দিয়ে ঘের দেওয়া। খুঁটির ডগায় ডগায় আগুনে ধকধক করছে ঘোড়ার মাথার খুলি।

মারুশকা বলল :

‘কুঁড়েঘর, ও কুঁড়েঘর, বনের দিকে পিঠ ফিরিয়ে আমার দিকে মুখ করে দাঁড়াও!’

বনের দিকে পিঠ ফিরিয়ে মারুশকার দিকে মুখ করে দাঁড়াল কুঁড়েঘর। মারুশকা ভিতরে ঢুকে গেল। দেখে, ডাইনি, বাবা-ইয়াগা—খেংরাকাঠি পা, বসেছে ড্যাং ড্যাং, ঘর জোড়া তার ঠ্যাং, ঠোঁট উঠেছে তাকে, ছাত ঠেকেছে নাকে। একটি দাঁত শুধু নড়বড় করছে মুখে। মারুশকাকে দেখে গরগর করে উঠল বুড়িটা :

‘হাউমাউখাউ, রুশির গন্ধ পাউ! কীরে সুন্দরী, কাজ আছে কি করার, নাকি কাজের ভয়ে ফেরার?’

‘আমি চলেছি বলমলে বাজ ফিনিস্তের খোঁজে।’

‘তাকে খুঁজে পাওয়া সহজ নয়, সুন্দরী। কিন্তু আমি তোকে সাহায্য করব। এই নে রুপোর তকলি, সোনার টাকু। টাকুটা হাতে ধরলেই নিজে নিজে সোনার সুতো কাটা হবে।’

‘অনেক ধন্যবাদ, ঠাকুমা।’

‘ধন্যবাদ পরে দিস, এখন কথা শোন! টাকুটা যদি কিনতে চায় দিস না, বলমলে বাজ ফিনিস্তের সঙ্গে দেখা করতে চাইবি।’

মারুশকা বাবা-ইয়াগাকে ধন্যবাদ দিয়ে চলল তার পথ ধরে। বনে তখন ঘড়ঘড় গর্জন, গুরুগুরু ডাক, সাঁইসাঁই আওয়াজ। প্যাঁচারি পাক খেয়ে পড়ে, ইঁদুরেরা গর্ত থেকে বেরিয়ে আসে—সবই মারুশকার গায়ে। হঠাৎ একটা পাঁশুটে নেকড়ে কোথা থেকে দৌড়াতে দৌড়াতে এসে বলল :

‘ভয় নেই মারুশকা, আমার পিঠে চড়ে বসো, পিছনে তাকিও না।’

মারুশকা তখন নেকড়ের পিঠে চড়ে বসতেই এক পলকে উধাও। সামনে তার অটেল স্তেপ, মখমলী মাঠ, মধুর নদী, হালুয়ার পাড়, মেঘ-ছোঁয়া উঁচু পাহাড়। ছুটে ছুটে নেকড়ে ওকে নিয়ে এল এক স্ফটিকের পুরীর সামনে। তার জালি-কাজের অলিন্দ, কারু-কাজের জানলা। জানলা দিয়ে তাকিয়ে আছে রানি।

নেকড়ে বলল, ‘তাহলে এবার পিঠ থেকে নামো, মারুশকা, রাজপুরীতে দাসির কাজ নাও গে।’

মারুশকা নেকড়ের পিঠ থেকে নেমে পোঁটলাটা নিয়ে নেকড়েকে অনেক ধন্যবাদ দিল। রানির কাছে কুর্নিশ করে মারুশকা বলে :

‘জানি না কী বলে ডাকব, কী মানে মান্যি করব, আপনার বাড়িতে কি দাসি লাগবে?’

রানি বলল, ‘হ্যাঁ হ্যাঁ, বাপু, অনেক দিন থেকে একটি দাসী খুঁজছি যে সুতো কাটতে, কাপড় বুনতে, নক্সা তুলতে জানে।’ মারুশকা বলল, ‘এ সবই পারি।’

‘তাহলে এসো, কাজে লেগে যাও!’

রাজবাড়ির দাসি হল মারুশকা। দিনভর কাজ করে, তারপর রাত হতেই রুপোর পিরিচ সোনার ডিমটা বের করে বলে :

‘রুপোর পিরিচে সোনার ডিম ঘুরে যা, ঘুরে যা। দেখিয়ে দে, কোথায় আমার ফিনিস্ত।’

আর অমনি সোনার ডিমটা ঘোরে আর ঘোরে আর সামনে এসে দাঁড়ায় বলমলে বাজ ফিনিস্ত। চেয়ে চেয়ে মারুশকার আর সাধ মেটে না, দু’চোখ তার জলে ভেসে যায়।

‘ফিনিস্ত আমার, ফিনিস্ত! কেন ছেড়ে গেলে এই হতভাগিনীকে। কেঁদে যে আর বাঁচি না...’

রানি সে কথা শুনতে পেয়ে বলে :

‘মারুশকা, তোমার রুপোর পিরিচ সোনার ডিম আমায় বেচে দাও।’

মারুশকা বলল, ‘না, এ আমার বিক্রির নয়, তবে তুমি যদি আমায় বলমলে বাজ ফিনিস্তকে দেখতে দাও তাহলে এটা তোমায় এমনিই দিয়ে দেব।’

রানি ভেবে চিন্তে বলল :

‘বেশ, তাই হোক। রাতে ও যখন ঘুমিয়ে পড়বে তখন তোমায় দেখতে দেব।’

রাত হলে মারুশকা বলমলে বাজ ফিনিস্তের ঘরে গেল। দেখে তার আদরের ফিনিস্ত গভীর ঘুমে ঘুমিয়ে আছে। সে ঘুম ভাঙে না। দেখে দেখে মারুশকার আর সাধ মেটে না। তার মধুঢালা মুখে চুমু খেল মারুশকা, নিজের ধবধবে বুকের মধ্যে তাকে জড়িয়ে ধরল। কিন্তু ঘুমিয়েই রইল তার আদরের ধন ফিনিস্ত। কিছুতেই জাগল না। ভোর হয়ে গেল, তবুও মারুশকা তার ফিনিস্তের ঘুম ভাঙাতে পারল না...’

সারাদিন সে কাজ করল। তারপর সন্ধ্যাবেলায় সে নিয়ে বসল তার রূপোর ফ্রেম সোনার ছুঁচ। সেলাই হতে থাকে, আর মারুশকা বলে :

‘ফুল তুলে যা, ফুল তুলে যা। সেই তোয়ালে দিয়ে মুখ মুছবে আমার ঝলমলে বাজ ফিনিস্ত।’

রানি সে কথা শুনতে পেয়ে বলল :

‘মারুশকা তোমার সোনার ছুঁচ রূপোর ফ্রেম আমায় বেচে দাও।’

মারুশকা বলল, ‘বিক্রি আমি করব না। তবে তুমি যদি আমায় ঝলমলে বাজ ফিনিস্তকে দেখতে দাও তাহলে অমনিই দিয়ে দেব।’

ভাবল রানি, ভেবে দেখল, তারপর বলল :

‘বেশ, তাই সই। রাত্তিরে এসে ওকে দেখে যেও।’

রাত এল। মারুশকা শোবার ঘরে ঢুকে দেখল তার ঝলমলে বাজ ফিনিস্ত অঘোরে ঘুমিয়ে।

‘ওগো ফিনিস্ত, ওগো আমার ঝলমলে বাজ, ওঠো, ওঠো, ঘুম ভেঙে ওঠো!’

ফিনিস্ত কিন্তু অঘোরে ঘুমিয়ে। মারুশকা হাজার চেষ্টা করেও তাকে জাগাতে পারল না।

ভোর হয়ে গেল। কাজকর্মে লাগল মারুশকা, রূপোর তকলি আর সোনার টাকু নিয়ে বসল। তা দেখে রানি বলে :

‘বেচে দাও মারুশকা, বেচে দাও!’

মারুশকা বলল :

‘বেচার জন্যে বেচব না। তবে যদি তুমি আমায় ঝলমলে বাজ ফিনিস্তের সঙ্গে কেবল এক ঘণ্টা থাকতে দাও তাহলে তোমায় অমনিই দিয়ে দিতে পারি।’

রানি বলল, ‘বেশ।’

মনে মনে ভাবল, ‘জাগাতে তো আর পারবে না।’

রাত্তির হল। মারুশকা এসে ঢুকল শোবার ঘরে, কিন্তু ফিনিস্ত আগের মতই অঘোরে ঘুমিয়ে।

‘ওগো ফিনিস্ত, ওগো আমার ঝলমলে বাজ, ওঠো, ওঠো, ঘুম থেকে जाগো!’

ফিনিস্ত কিন্তু ঘুমিয়েই রইল। কিছুতেই জাগল না।

মারুশকা কত চেষ্টা করল তাকে জাগাতে, কিন্তু কিছুতেই পারল না। এদিকে ভোর হয় হয়।

মারুশকা কেঁদে ফেলল। বলল :

‘প্রাণের ফিনিস্ত, ওঠো গো, চোখ মেলে দেখো, দেখো তোমার মারুশকাকে, বুকে তাকে জড়িয়ে ধরো!’

ফিনিস্তের খোলা কাঁধের ওপর তখন মারুশকার চোখের জল ঝরে পড়ল, সে চোখের জলের ছাঁকা লেগে নড়ে উঠল ঝলমলে বাজ ফিনিস্ত। চোখ মেলে দেখল—মারুশকা! অমনি দু’হাত দিয়ে জড়িয়ে ধরে চুমু খেল তাকে। বলল :

‘একি সত্যিই তুমি আমার মারুশকা! তুমি তবে তিনজোড়া লোহার জুতো ক্ষইয়ে, তিনটে লোহার দণ্ড ভেঙ্গে, তিনটে টুপি ছিঁড়ে সত্যিই এলে? আর কেঁদো না। চল এবার বাড়ি যাই।’

ওরা বাড়ি যাবার জন্যে তৈরি হতে লাগল। কিন্তু রানি তা দেখতে পেয়ে হুকুম দিল টেঁড়া দিতে, স্বামীর বেইমানি রটিয়ে দিতে।

রাজরাজড়া সওদাগররা সব জড়ো হল, পরামর্শ করতে লাগল ঝলমলে বাজ ফিনিস্তকে কী দণ্ড দেওয়া যায়।

ঝলমলে বাজ ফিনিস্ত তখন উঠে দাঁড়িয়ে বলল :

‘আপনারাই বলুন আসল বৌ কে? যে আমায় প্রাণ দিয়ে ভালবাসে সে, না যে আমায় বেচতে চায়, ঠকাতে চায়?’ সবাই তখন মেনে নিয়ে বললে, হ্যাঁ, মারুশকাই তার বৌ।

তাই সুখেস্বাস্থ্যে দিন কাটাতে লাগল তারা। নিজেদের দেশে ফিরে গেল। সেখানে বিয়ের দিন তোপের পর তোপ পড়ল, শিঙ্গার পর শিঙ্গা বাজল আর ভোজটা হল এমন জমকাল যে এখনো লোকে তার কথা ভোলে নি।



## সিঁড়কা-বুকা

এক যে ছিল বুড়ো, তার তিন ছেলে। বড় দুই ছেলে চাষবাস দেখত, মাথা উঁচিয়ে চলত, বেশভূষা করত। ছোট ছেলে বোকা ইভান তেমন কিছু নয়। সারাদিন সে বাড়িতেই চুল্লির উপরের তাকে বসে কাটাত। আর মাঝে মাঝে বনে যেত ব্যাঙের ছাতা তুলতে।

বুড়োর যখন মরবার সময়, তখন একদিন তিন ছেলেকে ডেকে বললে :

‘আমি মরে গেলে পর পর তিন রাত আমার কবরে রুটি নিয়ে আসিস।’

মরে গেল বুড়ো। কবর দেওয়া হল তাকে। সেই রাত্রে বড় ভাইয়ের কবরে যাওয়ার পালা। কিন্তু বড় ভাইয়ের আলসেমি লাগে, নাকি ভয় পায়। ছোট ভাই বোকা ইভানকে বলে :

‘ইভান, আজ যদি তুই আমার বদলে বাবার কবরে যাস, তবে তোকে একটা পিঠে কিনে দেব।’

ইভান তক্ষুণি রাজি। রুটি নিয়ে চলে গেল বাবার কবরে। বসে বসে অপেক্ষা করে ষষ্ঠিক রাত দুপুরে কবরের মাটিটা দু’ফাঁক হয়ে বুড়ো বাবা বেরিয়ে এসে জিজ্ঞেস করল :

‘কে ওখানে? আমার বড় ছেলে নাকি? বল তো শুনি রুশদেশের খবর? কুকুরেরা কি ডাকছে, নেকড়েরা গজরাচ্ছে, নাকি আমার বাছা কাঁদছে?’

ইভান বলল, ‘বাবা, এই যে আমি, তোমার ছেলে। রুশদেশ শান্তিতে আছে, বাবা!’

বুড়ো তখন পেট ভরে রুটি খেয়ে আবার কবরে গিয়ে শুয়ে পড়ল। আর ইভান পথে থামতে থামতে ব্যাঙের ছাতা কুড়িয়ে কুড়িয়ে বাড়ি ফিরল।

বাড়ি ফিরতে বড় ভাই জিজ্ঞেস করল :

‘হ্যাঁ রে, বাবাকে দেখলি?’

ইভান বলল, ‘হ্যাঁ, দেখেছি।’

‘রুটি খেল?’

‘হ্যাঁ খেল, পেট পুরে।’

আর একটা দিন কেটে গেল। সেদিন মেজ ভাইয়ের যাবার পালা। আলসেমি করেই হোক বা ভয় পেয়েই হোক মেজ ভাই বলে :

‘ইভান, তুই বরং আজ আমার বদলে যা, তোকে এক জোড়া লাপ্তি বানিয়ে দেব।’

ইভান বলল, ‘বেশ।’

রুটি নিয়ে ইভান আবার গেল কবরের কাছে। অপেক্ষা করে বসে রইল। ঠিক রাত দুপুরে কবরের মাটিটা দু ফাঁক হয়ে ইভানের বুড়ো বাবা বেরিয়ে এসে জিজ্ঞেস করল :

‘কে ওখানে? আমার মেজ ছেলে নাকি? বল তো শুনি রুশদেশের খবর? কুকুরেরা কি ডাকছে, নেকড়েরা গজরাচ্ছে, নাকি আমার বাছা কাঁদছে?’

ইভান জবাব দিল :

‘আমি তোমার ছেলে, বাবা। রুশদেশ বেশ শান্তিতেই আছে।’

বুড়ো তখন পেট ভরে রুটি খেয়ে কবরে গিয়ে শুয়ে পড়ল। পথে থেমে থেমে ব্যাঙের ছাতা কুড়িয়ে বাড়ি ফিরল ইভান। বাড়ি ফিরতে মেজ ভাই জিজ্ঞেস করল :

‘হ্যাঁ রে, রুটি খেল বাবা?’

‘খেল, পেট পুরে খেল।’

তৃতীয় রাত্তির। সেদিন ইভানের যাবার পালা। ইভান দাদাদের বলল :

‘দু’রাত্তির আমি গেছি। আজ তোমরা কেউ যাও। আমি বাড়িতে ঘুমিয়ে নিই।’

দাদারা বলল :

‘সে কী রে ইভান, তোর তো বেশ জানা শোনা হয়ে গেছে, তুই বরং যা।’

‘তা বেশ, আমিই যাব।’

রুটি নিয়ে ইভান চলে গেল। ঠিক রাত দুপুরে কবরের মাটিটা দু ফাঁক হয়ে ইভানের বুড়ো বাবা উঠে এল। জিজ্ঞেস করল :

‘কে ওখানে? আমার ছোট ছেলে ইভান নাকি? বল শুনি রুশদেশের খবর? কুকুরেরা কি ডাকছে, নেকড়েরা গজরাচ্ছে, নাকি আমার বাছা কাঁদছে?’

ইভান জবাব দিল :

‘আমি ইভান, বাবা, তোমার ছেলে। রুশদেশ বেশ শান্তিতে আছে।’

বাপ তখন পেট ভরে রুটি খেয়ে বলল :

‘তুই একমাত্র আমার কথা শুনলি। পর পর তিন রাত্তির আমার কবরে আসতে একটুও ভয় পাসনি। এবার এক কাজ কর, খোলা মাঠে গিয়ে চিৎকার করে ডাকবি : “সিভ্কা-বুর্কা, যাদুকা লেড়কা, চেকনাই ঘোড়া, সামনে এসে দাঁড়া!” ঘোড়াটা তোর সামনে আসবে, তুই ওর ডান কান দিয়ে ঢুকে বাঁ কান দিয়ে বেরিয়ে আসিস। দেখবি তোর রূপ খুলে যাবে। তারপর ঘোড়ায় চেপে যথা ইচ্ছা তথা যাস।’

বুড়ো বাবা ইভানকে একটা লাগাম দিল। ইভান লাগামটা নিয়ে বাবাকে ধন্যবাদ দিয়ে পথে পথে ব্যাঙের ছাতা কুড়িয়ে বাড়ি ফিরল। বাড়ি ফিরতেই ভাইয়েরা জিজ্ঞেস করল :

‘কিরে, বাবার সঙ্গে দেখা হল?’

ইভান বলল, ‘হল।’

‘রুটি খেল?’

‘পেট পুরে খেল। বললে কবরে আর আসতে হবে না।’

এদিকে হয়েছে কি, রাজা তখন চারদিকে টেঁড়া পিটিয়ে দিয়েছেন—রাজ্যের যত রূপবান, আইবুড়ো, কুমারদের সব তাঁর রাজদরবারে উপস্থিত হওয়া চাই। রাজকন্যা লাভণ্যবতীর জন্যে ওক গাছের বারো খুঁটির ওপর, বারো কুঁদো দিয়ে এক কোঠা বানান হয়েছে। সেই কোঠার একেবারে ওপরে রাজকন্যা বসে থাকবেন, আর যে ঘোড়ার পিঠে বসে এক লাফে পৌঁছে রাজকন্যার ঠোঁটে চুমু খেতে পারবে, রাজা তাকেই অর্ধেক রাজত্ব আর রাজকন্যা লাভণ্যবতীকে দেবেন। তা সে যে ঘরের ছেলেই হোক।

ইভানের ভাইয়েদের কানেও একথা পৌঁছতে দেরি হল না। বলল :

‘দেখা যাক ভাগ্য পরীক্ষা করে।’

তেজি ঘোড়াদুটোকে ওরা বেশ করে যবের ছাতু খাওয়াল। তারপর নিজেরা ফিটফাট পোষাক পরে, বাবরি চুলটি আঁচড়ে তৈরি হল। ইভান তখন চিমনির পেছনে চুল্লীর তাকে বসে। বলল :

‘আমাকেও সঙ্গে নিয়ে চল না দাদা, আমিও একবার ভাগ্য পরীক্ষা করে আসি!’

‘দূর, হতভাগা, তুই বরং বনে ব্যাঙের ছাতা খুঁজে বেড়া গে যা, লোক হাসিয়ে দরকার নেই!’

বড় দু ভাই তেজি ঘোড়ায় চড়ে টুপি বাঁকিয়ে, চাবুক চালিয়ে, শিস দিতেই—একরাশ ধুলোর মেঘ আকাশে। ইভান তখন বাবার দেওয়া লাগামটা নিয়ে চলে গেল খোলা মাঠে। তারপর বাবার কথামত ডাকলে :

‘সিভ্কা-বুর্কা, যাদুকা লেড়কা, চেকনাই ঘোড়া সামনে এসে দাঁড়া!’

কোথেকে কে জানে, ছুটে এল ঘোড়া। তার খুরের দাপে মাটি কাঁপে, নাক দিয়ে আগুন ছোটে, কান দিয়ে ধোঁয়া বেরয়। মাটিতে পা গাঁথে বলে :

‘বলো, কী হুকুম!’

ইভান ঘোড়াটার গলা চাপড়ে নিয়ে তাকে লাগাম পরাল, তারপর তার ডান কান দিয়ে ঢুকে, বাঁ কান দিয়ে বেরিয়ে এল। আর কী আশ্চর্য! অমনি সে হয়ে গেল এক সুন্দর তরুণ—কী তার রূপ—সে রূপ বলার নয়, শোনার নয়, কলম দিয়ে লেখার নয়। ঘোড়ার পিঠে চড়ে রাজপুরীর দিকে রওনা হল ইভান। ছুটল ঘোড়া কদমে, কাঁপল মাটি সঘনে, পেরিয়ে গিরি কান্তার, মস্ত সেকি ঝাঁপ তার।

ইভান এসে পৌঁছল রাজদরবারে, চারিদিক লোকে লোকারণ্য। বারো খুঁটির ওপর, বারো কুঁদো দিয়ে এক কোঠা। তার চিলেকোঠায় জানলার পাশে বসে আছে রাজকন্যা লাভণ্যবতী।

রাজা অলিন্দে বেরিয়ে এসে বললেন :

‘তোমাদের মধ্যে যে তার ঘোড়ার পিঠে চড়ে লাফিয়ে উঠে আমার মেয়ের ঠোঁটে চুমু খেতে পারবে, তার সঙ্গেই আমার মেয়ের বিয়ে দেব, আর যৌতুক দেব অর্ধেক রাজত্ব।’

কুমারেরা সবাই তখন এক এক করে এগিয়ে লাফাল, কিন্তু কোথায় কে, জানালার নাগাল কেউ ধরতে পারল না। ইভানের দুই ভাইও চেষ্টা করলে, কিন্তু অর্ধেকটা পর্যন্ত গেল না। এবার এল ইভানের পালা।

সিভ্কা-বুর্কাকে সে কদমে ছুটিয়ে হাঁক পেড়ে, ডাক ছেড়ে লাফ মারলে। কেবল দুটো কুঁদো বাদে সব কুঁদো সে ছাড়িয়ে গেল। ফের আবার ঘোড়া ছুটল সে। এবারকার লাফে বাকি রইল একটা কুঁদো। ফের ফিরল ইভান, পাক খাওয়ালে ঘোড়াকে, গরম করে তুললে। তারপর আগুনের হন্ধার মত এক প্রচণ্ড লাফে জানলা পেরিয়ে রাজকন্যা লাভণ্যবতীর মধুঢালা ঠোঁটে চুমু খেয়ে গেল ইভান। আর রাজকন্যাও তার হাতের আংটি দিয়ে ইভানের কপালে ছাপ ঝাঁক দিল।

লোকজনেরা সব ‘ধরো, ধরো!’ করে চেষ্টা করে উঠল।

কিন্তু ইভান ততক্ষণে উধাও।

সিভ্কা-বুর্কাকে ছুটিয়ে ইভান এল সেই খোলা মাঠে। তারপর ঘোড়ার বাঁ কান বেয়ে উঠে ডান দিয়ে বিরিয়ে এল, আর আমনি সে ফের হয়ে গেল সেই বোকা ইভান। সিভ্কা-বুর্কাকে ছেড়ে দিয়ে সে রওনা হল



বাড়ির দিকে। যেতে যেতে ব্যাঙের ছাতা কুড়িয়ে নিলে। বাড়ি এসে ন্যাকড়া দিয়ে কপালটা বেঁধে চুল্লির উপরের তাকে উঠে শুয়ে রইল।

ভাইয়েরাও যথা সময়ে ফিরে এসে বলতে লাগল, কোথায় গিয়েছিল, কী দেখল।

‘খাসা খাসা সব জোয়ান, একজন কিন্তু সবার সেরা। ঘোড়ার পিঠে চড়ে এক লাফে উঠে রাজকন্যার চৌটে চুমু খেয়ে গেছে। দেখলাম কোথেকে এল, দেখা গেল না কোথায় গেল।’

চিমনির পিছন থেকে ইভান বলে :

‘আমি নই তো?’

ভাইয়েরা সে কথা শুনে ভীষণ চটে গেল:

‘বাজে বকিস না, হাঁদা কোথাকার! তার চেয়ে চুল্লির উপর বসে বসে ব্যাঙের ছাতা গেল।’

ইভান তখন কপালের পটিটা খুলে ফেলল, যেখানে রাজকন্যা ছাপ মেরেছিল আংটি দিয়ে। সঙ্গে সঙ্গেই কুঁড়েঘরটা আলোয় আলোয় ভরে গেল। ভাইয়েরা ভয় পেয়ে চৌচিয়ে উঠল :

‘কী, করছিস কী, হাঁদা কোথাকার! ঘরবাড়ি জ্বালিয়ে দিবি যে!’

পরদিন রাজবাড়িতে বিরাট ভোজ। পাত্র মিত্র, জমিদার প্রজা, ধনী গরিব, বুড়ো বাচ্চা—সকলের নেমন্তন্ন।

ইভানের ভাই দুজনও ভোজে খেতে যাবে বলে তৈরি। ইভান বলল :

‘দাদা, আমাকেও তোমাদের সঙ্গে নিয়ে চলো!’

‘কী বললি? তোকে নিয়ে যাব? লোকে হাসবে। তার চেয়ে তুই এখানে চুল্লির উপরে বসে বসে ব্যাঙের ছাতা গেল।’

দু ভাই তারপর ঘোড়া ছুটিয়ে রাজবাড়ির দিকে চলে গেল। আর পায়ে হেঁটে ইভান গেল ওদের পেছন পেছন। রাজপুরীতে পৌঁছে দূরে এককোণে বসে রইল ইভান। রাজকন্যা লাভণ্যবতী তখন নিমন্ত্রিতদের প্রদক্ষিণ করতে শুরু করেছে। হাতে তার মধু পাত্র। তা থেকে সে এক এক জনকে মধু ঢেলে দেয় আর দেখে কপালে তার আংটির ছাপ আছে কিনা।

সকলকে প্রদক্ষিণ করে এল রাজকন্যা, বাদ রইল কেবল ইভান। ইভানের দিকে রাজকন্যা যত এগোয় তত তার বুক দুরুদুরু করে। ইভানের সারা গায়ে কালি, মাথায় খোঁচা খোঁচা চুল।

রাজকন্যা লাভণ্যবতী জিজ্ঞেস করে :

‘কে তুমি? কোথা থেকে এসেছো? কাপালে তোমার পটি বাঁধা কেন?’

ইভান বলল, ‘পড়ে গিয়ে কেটে গেছে।’

রাজকন্যা পটি খুলে ফেলতেই সারা রাজপুরী আলোয় আলোয় ভরে গেল। রাজকন্যা চৌচিয়ে উঠল :

‘এ তো আমারই ছাপ, একেই তো আমি বরণ করেছি।’

রাজামশাই কাছে এসে বলেন :

‘কী যতো বাজে কথা, এ যে একেবারে কালিবুলি মাথা এক হাঁদা!’

ইভান রাজাকে বললে :

‘রাজামশাই, অনুমতি দিন একবার মুখ ধুয়ে আসি।’

রাজামশাই অনুমতি দিলেন। ইভান উঠোনে গিয়ে বাবার কথামত হাঁক দিল :

‘সিঁড়কা-বুর্কা, যাদুকা লেড়কা, চেকনাই ঘোড়া, সামনে এসে দাঁড়া!’

অমনি কোথেকে কে জানে, ছুটে এল ঘোড়া। তার খুরের দাপে মাটি কাঁপে, নাক দিয়ে আগুন ছোট্টে, কান দিয়ে ধোঁয়া বেরয়। ইভান তার ডান কান দিয়ে ঢুকে, বাঁ কান দিয়ে বেরিয়ে এল, আর অমনি সে হয়ে গেল সেই রূপবান তরুণ—সে রূপ বলার নয়, শোনার নয়, কলম দিয়ে লেখার নয়। সব লোকে একেবারে আহামরি করে উঠল।

অমনি সব কথা মিটে গেল, বিয়ের ভোজ চলল ধুমধাম করে।



## রাজপুত্র ইভান আর পাঁশুটে নেকড়ে

এক যে ছিল রাজা। নাম তার বেরেন্দেই। রাজার তিন ছেলে। ছোটটির নাম ইভান।

চমৎকার এক বাগান ছিল রাজার, সেই বাগানে ছিল আপেল গাছ। সেই গাছে আবার সোনার আপেল হত। কে যেন রাজবাগানে চুপিচুপি ঢোকে, সোনার আপেল চুরি করে। তা দেখে রাজার মনে আর শান্তি নেই। পাইক পেয়াদা ছুটল, কিন্তু কেউ চোর ধরতে পারল না।

রাজার ভীষণ মন খারাপ। খাওয়া দাওয়া বন্ধ। ছেলেরা বাবাকে সান্ত্বনা দেয়। বলে :

‘দুঃখ করো না বাবা, আমরা নিজেরাই বাগানে পাহারা দেব।’

বড় ছেলে বলল :

‘আজ আমার পাহারা দেবার পালা।’

এই বলে সে বাগানে গিয়ে সারা সন্ধ্যা ঘুরে ঘুরে পাহারা দিল। কিন্তু কারও দেখা নেই। বড় রাজপুত্র তাই নরম ঘাসের ওপর শুয়ে ঘুমিয়ে পড়ল।

সকালবেলা রাজা বলল :

‘শুভসংবাদ কিছু আছে কী ? দেখলি কে রোজ চুরি করে?’

‘না বাবা, সারারাত্তির একটিবারও চোখ বুঁজিনি, কিন্তু কাউকে তো দেখলাম না।’

পরদিন রাত্তিরে মেজ রাজকুমার গেল পাহারা দিতে। কিন্তু সেও ঘুমিয়ে কাটাল। আর পরদিন সকালে সেও বলল কোন চোর সে দেখেনি।

এবার ছোট রাজকুমারের পালা। রাজপুত্র ইভান বাগানে পাহারা দিতে গেল। দুদণ্ড বসতেও তার ভয় হয়, কী জানি কেউ যদি ঢুকে পড়ে। ঘুম পেলেই ইভান শিশির দিয়ে মুখ ধুয়ে ফেলে, অমনি ঘুম টুম কোথায় চলে যায়।

তারপর মাঝরাত পেরতেই অবাক কাণ্ড—বাগানে আলো। সে আলো বাড়ে আর বাড়ে। সারা বাগান আলোময়। দেখে কি, আঙনে-পাখি আপেল গাছে বসে বসে সোনার আপেল ঠোকরাচ্ছে।

ইভান চুপিচুপি গাছের কাছে গিয়ে খপ্ করে পাখিটার লেজ চেপে ধরল। পাখিটা কিন্তু হাত ছাড়িয়ে ফুডুং করে উড়ে চলে গেল। কেবল একটা পালক রয়ে গেল রাজপুত্রের হাতে।

পরদিন সকালে রাজপুত্র ইভান এল বাপের কাছে।

‘কী খবর? চোর দেখলি?’

‘ধরতে পারিনি বাবা, কিন্তু দেখেছি কে রোজ চুরি করে। এই দেখো চোরের চিহ্ন। এ হল আঙুনে-পাখি।’  
রাজা ইভানের হাত থেকে পালকটা নিলে। সেই থেকে শুরু হল খাওয়া দাওয়া, আবার মুখে হাসি।  
কিন্তু আবার একদিন রাজার মনে ভাবনা দেখা দিল।

তিন কুমারকে ডেকে বললে :

‘স্নেহের ছেলেরা আমার, যা না তোরা ঘোড়ায় গিয়ে ওঠ, সারা পৃথিবী খুঁজে দেখ। আঙুনে-পাখির  
দেখা কোথাও পাস কিনা।’

রাজপুত্ররা বাপকে কুর্নিশ করে ঘোড়ায় লাগাম পরিয়ে বেরিয়ে পড়ল। বড় রাজকুমার এক দিকে চলল,  
মেজ গেল অন্য দিকে, ছোটটি আরেক পথে ঘোড়া ছোটাল।

রাজপুত্র ইভান ঘোড়ায় চলেছে অনেকদিন নাকি অল্পদিন, কে জানে। গ্রীষ্মের দিন। ক্লান্ত হয়ে ইভান  
ঘোড়া থেকে নেমে, তার সামনের পা দড়ি দিয়ে বেঁধে ঘুমতে গেল।

অনেকক্ষণ নাকি অল্পক্ষণ, কতক্ষণ কাটল কে জানে। ঘুম থেকে উঠে রাজপুত্র দেখে ঘোড়া নেই।  
ঘোড়া খুঁজতে গেল রাজপুত্র। হাঁটতে হাঁটতে শেষকালে এক জায়গায় এসে দেখে, ঘোড়ার কয়েকটা হাড়  
পড়ে আছে কেবল, তাও আবার চাঁছা পৌছা পরিষ্কার।

রাজপুত্রের ভীষণ দুঃখ হল। ঘোড়া ছাড়া এ দূরের দেশে যাবে কোথায় ?

ভাবে, “তা কী আর হয়েছে, কাজে নেমেছি, উপায় তো নেই।”

এই ভেবে রাজপুত্র পায়ে হেঁটেই চলল। হাঁটতে হাঁটতে রাজপুত্র আর পারে না। নরম ঘাসে বসে বসে  
দুঃখ করে রাজপুত্র। হঠাৎ দেখে, কোথা থেকে একটা পাঁশুটে নেকড়ে দৌড়তে দৌড়তে তার দিকেই আসছে।  
পাঁশুটে নেকড়ে জিজ্ঞেস করল, ‘কী রাজপুত্র ইভান, বসে বসে দুঃখ করছো, হেঁট করেছো মাথা?’  
‘দুঃখ না করে কী করি বলো নেকড়ে, আমার তেজি ঘোড়াটা যে নেই।’

‘আমিই সেটাকে খেয়ে ফেলেছি রাজপুত্র ইভান... তোমার জন্যে দুঃখ হচ্ছে। বলো তো, দূর দেশে  
এলে কেন, কোন পথে চলেছো?’

‘বাবা আমায় পাঠিয়েছেন সারা পৃথিবী ঘুরে দেখতে, আঙুনে-পাখির খোঁজ করতে।’

‘আরে ছ্যা, তোমার ঐ ঘোড়ায় চড়ে তুমি তিন বছরেও আঙুনে-পাখির কাছে পৌছতে পারতে না।  
আমিই কেবল জানি আঙুনে-পাখির বাসা কোথায়। বেশ, আমিই যখন তোমার ঘোড়া খেয়ে ফেলেছি, তখন  
আজ থেকে আমিই তোমার ন্যায়-ধম্মে কাজ করব। আমার পিঠে বসে বেশ করে জাপটে ধরো।’

রাজপুত্র নেকড়ের পিঠে উঠে বসল। অমনি পাঁশুটে নেকড়েও ছুট লাগাল : পলকে পেরয় নীল বন, নিমেষে ডিঙায়  
সরোবর। অনেকদিন নাকি অল্পদিন, শেষকালে ওরা এসে পৌছল এক উঁচু কেল্লার কাছে। পাঁশুটে নেকড়ে বলল :

‘রাজপুত্র ইভান, বলি শোনো, ভুলো না। পাঁচিল বেয়ে উঠে যাও। কোন ভয় নেই। আমরা ভাল সময়ে  
এসেছি, প্রহরীরা সব ঘুমাচ্ছে। কোঠায় দেখবে জানলা। সেই জানলায় সোনার খাঁচা। সেই খাঁচায় আছে  
আঙুনে-পাখি। পাখিটাকে বুকের তলায় লুকিয়ে নিয়ে চলে আসবে। কিন্তু মনে রেখো, খাঁচাটা ছুঁয়ো না যেন।’

রাজপুত্র ইভান দেওয়াল বেয়ে উঠে দেখে কোঠা, জানলায় সোনার খাঁচা আর সোনার খাঁচায় সেই আঙুনে-  
পাখি। রাজপুত্র পাখিটা নিয়ে বুকের তলায় লুকিয়ে রাখল। কিন্তু খাঁচাটা থেকে কিছুতেই আর সে চোখ ফেরাতে  
পারে না। বুক তার দুলে উঠল : “আহা, কী সুন্দর সোনার খাঁচাটা! ছেড়ে যাই কী করে!” নেকড়ের বারণ সে  
ভুলে গেল। তারপর যেই না রাজপুত্র খাঁচাটা ছুঁয়েছে, অমনি সারা কেল্লায় হেঁচো। বেজে উঠল রামশিঙা, কাঠি  
পড়ল কাড়া-নাকাড়ায়। প্রহরীরা জেগে উঠে ইভানকে ধরে নিয়ে গেল রাজা আফ্রনের কাছে।

রাজা ভীষণ রেগে জিজ্ঞেস করল :

‘কে তুমি ? কোথা থেকে এসেছ?’

‘আমি রাজা বেরেন্দেইয়ের ছেলে, রাজপুত্র ইভান।’

‘ছি ছি! লজ্জার কথা! রাজার ছেলে হয়ে কিনা শেষে চুরিবিদ্যা!’

‘কিন্তু রাজামশাই, আপনার পাখিটি যে আমাদের বাগানে আপেল চুরি করতে আসত।’

‘তুমি যদি বাছা ভালমানুষের মত এসে চাইতে, তাহলে আমি নিজে সম্মান করে তোমার বাবাকে পাখিটি উপহার দিতাম। কিন্তু এখন ? তোমাদের এই কলঙ্ক চারদিকে রাস্তা করে দেব... যাই হোক, এবারের মত তোমায় মাপ করে দিতে পারি, তবে একটি শর্তে। কুসমান নামে এক রাজার আছে স্বর্ণকেশরী ঘোড়া। তুমি যদি আমাকে সেই ঘোড়াটা এনে দিতে পারো, তবে আমি তোমায় এই খাঁচাসমেত আগুনে-পাখিটা দিয়ে দেব।’ মনের দুঃখে রাজপুত্র পাঁশুটে নেকড়েের কাছে ফিরে গেল।

নেকড়ে বলল, ‘আমি যে তোমায় খাঁচায় হাত দিতে বারণ করেছিলাম! আমার কথা কেন শুনলে না?’ রাজপুত্র বলল, ‘যাক গে, মাপ কর নেকড়ে, ক্ষমা করে দাও!’

‘আহা, বড় বললেন, ক্ষমা করে দাও... যাক গে, চড়ে বসো আমার পিঠে। নেমেছি যখন কাজে, না করা কি সাজে!’

রাজপুত্রকে পিঠে করে আবার ছুটল নেকড়ে। অনেকদিন নাকি অল্প দিন, শেষ পর্যন্ত তারা এসে পৌঁছল সেই কেল্লায়, স্বর্ণকেশরী ঘোড়া যেখানে থাকে।

‘পাঁচিল বেয়ে উঠে যাও, রাজপুত্র, প্রহরীরা সব ঘুমিয়ে আছে। আস্তাবলে গিয়ে ঘোড়া নিয়ে এসো, কিন্তু খবরদার লাগামটা ছুঁয়ো না।’

রাজপুত্র পাঁচিল বেয়ে উঠে দুর্গে ঢুকল। প্রহরীরা সব ঘুমাচ্ছে। আস্তাবলে গিয়ে স্বর্ণকেশরী ঘোড়াকে ধরল রাজপুত্র। কিন্তু লাগামটা না ছুঁয়ে সে থাকতে পারল না—একে সোনার লাগাম, তার আবার দামি জড়োয়ার কাজ—যেমন ঘোড়া তার তেমনি লাগাম।

যেই না রাজপুত্র লাগামটা ছুঁয়েছে, অমনি দুর্গের মধ্যে হৈচৈ পড়ে গেল। বেজে উঠল রামশিঙা, কাড়া-নাকাড়া। প্রহরীরা জেগে উঠে ইভানকে ধরে নিয়ে গেল রাজা কুসমানের কাছে।

‘কে তুমি? কোথা থেকে এসেছ?’

‘আমি রাজপুত্র ইভান।’

‘ছি ছি, কী বখাটেপনা, ঘোড়া চুরি! সাধারণ একটা চাষিও একাজ করবে না। তা যাক গে, তোমাকে মাপ করতে পারি, যদি তুমি আমার একটা কাজ করে দাও। রাজা দালমাতের একটি মেয়ে আছে, রূপসী ইয়েলেনা। তুমি যদি সেই মেয়েকে হরণ করে এনে দিতে পারো, তবে তোমায় স্বর্ণকেশরী ঘোড়াটি দিয়ে দেব, তার সঙ্গে লাগামটাও।’

আরও বেশি মনের দুঃখে রাজপুত্র পাঁশুটে নেকড়েের কাছে ফিরে গেল।

নেকড়ে বলল, ‘লাগামে হাত দিতে তোমায় আগেই তো বারণ করেছিলাম! আমার কথায় কান দিলে না তো।’

‘যাক গে, আমায় ক্ষমা করো নেকড়ে, মাপ করে দাও।’

‘বড়ো বললেন, ক্ষমা করো!... যাক গে, কী আর করা, আমার পিঠে চড়ে বসো।’

রাজপুত্রকে পিঠে নিয়ে আবার ছুটে চলল নেকড়ে। ছুটেতে ছুটেতে এসে পৌঁছল রাজা দালমাতের কেল্লায়। চারপাশে সখীবান্দী নিয়ে রূপসী ইয়েলেনা তখন কেল্লার বাগানে পায়চারি করছে। পাঁশুটে নেকড়ে বলল :

‘এবার তুমি নয় আমিই যাব, তুমি ফিরতি পথ ধরে ফিরে যাও, শীগগিরই আমি তোমার নাগাল ধরব।’

ফিরতি পথে ফিরে চলল রাজপুত্র ইভান। আর পাঁচিল ডিঙ্গিয়ে পাঁশুটে নেকড়ে ঢুকল বাগানে। ঝোপের পেছনে লুকিয়ে থেকে সে উঁকি দিয়ে দেখে, সখীবান্দী নিয়ে পায়চারি করছে রূপসী ইয়েলেনা। বেড়াতে বেড়াতে ইয়েলেনা তার সঙ্গীদের চেয়ে একটু পেছিয়ে পড়তেই পাঁশুটে নেকড়ে তাকে চট করে ধরে, পিঠে ফেলে উধাও।

পথে যেতে যেতে রাজপুত্র দেখে, পাঁশুটে নেকড়ে ফিরে আসছে, পিঠে তার রূপসী ইয়েলেনা। রাজপুত্রের খুশি আর ধরে না। নেকড়ে বলল :

‘তুমিও পিঠে উঠে বসো জলদি করে, নয়ত ধরে ফেলবে।’

ফিরতি পথে ছুটে চলল পাঁশুটে নেকড়ে, পিঠে তার রূপসী ইয়েলেনা আর রাজপুত্র ইভান বসে। পলকে পেরয় সুনীল বন, নিমেষে ডিঙায় সরোবর। অনেকদিন নাকি অল্পদিন, শেষ পর্যন্ত তারা এসে পৌঁছল রাজা কুসমানের দেশে। নেকড়ে জিজ্ঞেস করল :

‘কী রাজপুত্র, মুখে রা নেই, মন খারাপ?’

‘মন খারাপ না করে কী করি বলো। এমন সুন্দরীকে ছেড়ে দিই কী করে? রূপসী ইয়েলেনার বদলে কিনা একটা ঘোড়া।’

‘বেশ, সুন্দরীকে ছেড়ে দিও না। ওকে কোথাও লুকিয়ে রেখে আমিই রূপসী ইয়েলেনা হয়ে যাব। তুমি আমায় নিয়ে যেও রাজার কাছে।’

এই বলে তারা রূপসী ইয়েলেনাকে বনের মধ্যে একটা কুঁড়েঘরে লুকিয়ে রাখল। নেকড়ে শূন্যে একটা ডিগবাজি খেয়ে মাটিতে পড়তেই, ওমা, একবারে রূপসী ইয়েলেনার প্রতিমূর্তি। রাজা কুসমানের কাছে নিয়ে যেতে রাজা তো ভারি খুশি, ভারি কৃতজ্ঞ। বলল :

‘অনেক ধন্যবাদ রাজপুত্র ইভান, তুমি আমার কনে এনে দিয়েছ। আজ থেকে লাগামসমেত স্বর্ণকেশরী ঘোড়াটা তোমার হল।’

রাজপুত্র ঘোড়ায় চড়ে রূপসী ইয়েলেনার কাছে ফিরে গেল, তারপর ইয়েলেনাকে তুলে নিয়ে ঘোড়া ছুটিয়ে দিলে।

রাজা কুসমান তো ওদিকে বিয়ের উৎসবে মত্ত। সারাদিন ধরে চলল খাওয়া দাওয়ার ধুম। তারপর রাত্তিরে শোবার সময় হতে রাজা ইয়েলেনাকে নিয়ে এল শোবার ঘরে। বৌকে নিয়ে শুতে না শুতেই রাজা দেখে, কোথায় তার সুন্দরী, এ যে একটা নেকড়ের মুখ! ভীষণ ভয় পেয়ে বিছানা থেকে উল্টে পড়ল রাজা। আর নেকড়েও সেই সুযোগে লাফিয়ে পড়ে দে ছুট।

দৌড়তে দৌড়তে পাঁশুটে নেকড়ে নাগাল ধরল রাজপুত্রের। জিজ্ঞেস করল :

‘রাজপুত্র, অমন মুখভার কেন?’

রাজপুত্র বলল, ‘মুখভার না করে কী করি বলো, এমন ধন স্বর্ণকেশরী ঘোড়া, তাকে কিনা দিতে হবে আঙুনে-পাখির বদলে।’

‘ভেবো না রাজপুত্র, আমি তোমায় সাহায্য করব।’

রাজা আফ্রনের রাজ্যে পৌঁছল ওরা। নেকড়ে বলল :

‘ঘোড়াটাকে আর ইয়েলেনাকে লুকিয়ে রাখো। আমি স্বর্ণকেশরী ঘোড়া হব, তুমি আমায় রাজার কাছে নিয়ে যেও, বুঝলে!’

ঘোড়াটাকে আর রূপসী ইয়েলেনাকে ওরা বনে লুকিয়ে রেখে এল। পাঁশুটে নেকড়ে এক ডিগবাজি খেয়েই হয়ে গেল স্বর্ণকেশরী ঘোড়া। রাজপুত্র তাকে নিয়ে গেল রাজার কাছে। রাজা ভীষণ খুশি হয়ে রাজপুত্রকে সোনার খাঁচাশুদ্ধ আঙুনে-পাখি দিয়ে দিলে।

রাজপুত্রও ফিরে গেল বনে। রূপসী ইয়েলেনাকে বসাল স্বর্ণকেশরী ঘোড়ায়। হাতে নিল সোনার খাঁচায় আঙুনে-পাখি। তারপর ঘোড়া ছুটিয়ে বাড়ি ফিরে চলল।

এদিকে হয়েছে কী, রাজা আফ্রন রাজপুত্রের দেওয়া ঘোড়ার পিঠে যেই চড়তে গেছে, ব্যস—ঘোড়াটা অমনি হয়ে গেল এক পাঁশুটে নেকড়ে। আঁতকে উঠে রাজা যেখানে ছিল সেখানেই উল্টে পড়ল, নেকড়ে ততক্ষণে এক দৌড়ে নাগাল ধরল রাজপুত্রের।

‘এবার তাহলে বিদায় দাও রাজপুত্র, আর বেশি দূর আমি যেতে পারব না।’

রাজপুত্র ঘোড়া থেকে নেমে তিনবার আভূমি কুর্নিশ করলে, পাঁশুটে নেকড়েকে সম্মান করে ধন্যবাদ দিলে। নেকড়ে বলল :

‘চিরদিনের মত বিদায় দিও না কিন্তু, আবার হয়ত আমায় দরকার হতে পারে।’

রাজপুত্র মনে মনে ভাবে, “আবার কী দরকার হবে? আমার সব ইচ্ছেই তো পূর্ণ হয়ে গেছে!” তারপর স্বর্ণকেশরী ঘোড়ায় উঠে রূপসী ইয়েলেনাকে বসিয়ে হাতে সোনার খাঁচায় আগুনে-পাখি নিয়ে দেশে ফিরে চলল রাজপুত্র ইভান। নিজের দেশে পৌঁছে রাজপুত্র ভাবল একটু খেয়ে নেওয়া যাক। সঙ্গে একটু রুটি ছিল, দুজনে তাই চিবিয়ে ঝরণার টাটকা জল খেয়ে শুয়ে পড়ল।

রাজপুত্র ইভান সবে ঘুমিয়েছে, এমন সময় ঘোড়া ছুটিয়ে এল তার অন্য ভাইয়েরা। আগুনে-পাখির খোঁজে ওরা নানা দেশ ঘুরে এখন বাড়ি ফিরছে খালি হাতে।

রাজপুত্র ইভান সবকিছু পেয়ে গেছে দেখে ওরা ঠিক করল :

‘এসো, ভাইকে মেরে ফেলা যাক, তাহলে ওর সব কিছুই আমাদের হয়ে যাবে!’

এই ভেবে দুই ভাই মিলে ইভানকে মেরে স্বর্ণকেশরী ঘোড়ায় চড়ে, আগুনে-পাখি নিয়ে রূপসী ইয়েলেনাকেও ঘোড়ায় বসিয়ে শাসাল :

‘দেখো, বাড়ি গিয়ে এর একটি কথাও বলবে না কিন্তু!’

রাজপুত্র ইভান পড়ে আছে মাটিতে, মাথার ওপরে চক্কর দিচ্ছে দাঁড়কাকগুলো। হঠাৎ কোথা থেকে ছুটে এল পাঁশুটে নেকড়ে। ঝপ করে একটা দাঁড়কাক আর তার ছানাকে ধরে বলল :

‘উড়ে যা দাঁড়কাক, শীগ্গির আমায় জীবন জল মরণ জল এনে দে। এনে দিলে তবে তোর ছানাকে ছেড়ে দেব।’

দাঁড়কাক কী আর করে! উড়েই গেল, আর নেকড়ে বসে রইল দাঁড়কাকের ছানাকে নিয়ে। উড়ল অনেক দিন, নাকি অল্প দিন কে জানে, শেষ পর্যন্ত জীবন জল মরণ জল নিয়ে ফিরে এল সে। রাজপুত্র ইভানের গায়ে ক্ষতের উপর নেকড়ে মরণ জল ছিটিয়ে দিতেই জখমগুলো সব সেরে গেল। তারপর জীবন জল ছিটিয়ে দিতেই রাজপুত্র ইভান বেঁচে উঠল আবার।

‘ইস্, খুব ঘুমিয়েছি!’

নেকড়ে বলল, ‘খুবই ঘুমিয়েছ বটে, তবে আমি না থাকলে আর তোমার সে ঘুম ভাঙত না। তোমার নিজের ভাইয়েরাই তোমায় মেরে রেখে সব ধন নিয়ে চলে গেছে। শীগ্গির আমার পিঠে ওঠো।’

পিছু ধাওয়া করে ওরা অচিরেই দুই ভাইকে ধরে ফেলল। নেকড়ে তাদের টুকরো টুকরো করে সারা মাঠে ছড়িয়ে দিল টুকরোগুলো।

রাজপুত্র ইভান তখন নেকড়েকে কুর্নিশ করে চিরদিনের মত বিদায় নিল।

রাজপুত্র ইভান বাড়ি ফিরে গেল স্বর্ণকেশরী ঘোড়ায় চড়ে। বাবার জন্যে এনেছে আগুনে-পাখি আর নিজের জন্যে রূপসী ইয়েলেনা।

রাজা বেরেন্দেই তো মহা খুশি। কত কথা জিজ্ঞেস করতে লাগল। রাজপুত্র বলল পাঁশুটে নেকড়ে তাকে কী রকম সাহায্য করেছে, ভাইয়েরা তাকে কী ভাবে ঘুমের মধ্যে মেরে রেখেছিল, নেকড়ে তাদের ছিঁড়ে টুকরো টুকরো করে ফেলেছে।

সব কথা শুনে রাজার ভীষণ দুঃখ হল প্রথমে। তবে শীগ্গিরই সে দুঃখ কেটে গেল। আর রাজপুত্র ইভান রূপসী ইয়েলেনাকে বিয়ে করে সুখেস্বচ্ছন্দে ঘর করতে লাগল।



## অ-জানি দেশের না-জানি কী

এক দেশে এক রাজা ছিল। রাজা বিয়ে থা করেনি, একাই থাকে। তার কাছে এক তীরন্দাজ কাজ করত। তার নাম আন্দ্রেই।

একদিন আন্দ্রেই শিকার করতে গেছে। সারাদিন বনে ঘুরে ঘুরেও তার কপাল খুলল না, শিকার মিলল না। এদিকে সন্ধ্যা হয়ে যাচ্ছে, আন্দ্রেই বাড়ি ফিরে চলল। হঠাৎ দেখে গাছের মাথায় একটা ঘুঘু বসে। আন্দ্রেই ভাবল, “ওটাকেই মারা যাক।”

আন্দ্রেই তীর মারল পাখির ডানায়। গাছের উপর থেকে সোঁদা মাটির উপর পড়ে গেল পাখিটা। আন্দ্রেই তুলে নিয়ে গলা মুচড়ে থলিতে পুরতে যাবে, হঠাৎ পাখিটা মানুষের গলায় কথা কয়ে উঠল।

‘মেরো না, তীরন্দাজ আন্দ্রেই, গলা আমার কেটে ফেলো না। জীবন্ত বাড়ি নিয়ে গিয়ে জানলায় রেখে দিও। যেই কিমতে সুরু করব, অমনি তোমার ডান হাত দিয়ে চড় মেরো আমায়। দেখবে তোমার ভাগ্য কেমন খুলে যায়।’

নিজের কানকেই বিশ্বাস করতে পারছিল না আন্দ্রেই : এ কী ? দেখতে ঠিক পাখির মতো, আবার মানুষের মত কথা বলে! আন্দ্রেই পাখিটা বাড়ি নিয়ে গিয়ে জানলার উপর রেখে দেখতে লাগল কী হয়।

কিছুক্ষণ পরে ঘুঘুটা ডানার তলায় মাথা গুঁজে ঘুমিয়ে পড়ল। ঘুঘুটা কী বলেছিল মনে পড়ল আন্দ্রেই-এর। ডান হাত দিয়ে ঘুঘুটাকে সে চড় মারল। ঘুঘুটা মাটিতে পড়ে হয়ে গেল এক কন্যে, রাজকুমারী মারিয়া। কী তার রূপ, সে রূপ বলার নয়, কওয়ার নয়, রূপকথাতেই পরিচয়।

রাজকুমারী মারিয়া তীরন্দাজকে বলল :

‘হরণ করলে যখন, কর ভরণ পোষণ। ভোজের জন্যে তাড়া নেই, বিয়ে কর। হাসিখুশি সতীলক্ষ্মী বৌ পাবে।’

সেই কথাই ঠিক হল। তীরন্দাজ আন্দ্রেই রাজকুমারী মারিয়াকে বিয়ে করে দুজনে মনের সুখে থাকতে লাগল। আন্দ্রেই কিন্তু তার কাজ ভোলে না। রোজ সকালে আলো ফুটতে না ফুটতেই বনে গিয়ে বনমোরণ শিকার করে রাজবাড়ির রসুইঘরে দিয়ে আসে।

এইভাবে দিন কাটে। একদিন রাজকুমারী মারিয়া বলল :

‘আমরা বড় গরিবের মত দিন কাটাচ্ছি, আন্দ্রেই।’

‘তা ঠিক বলেছ।’

‘একশ’ রুবল জোগাড় করে আমায় কিছু রেশম কিনে এনে দাও, তাহলে আমাদের অবস্থা ঠিক ফেরাতে পারব।’

রাজকুমারী মারিয়া যা বলল তাই করল আন্দ্রেই। বন্ধুদের কাছে গিয়ে কারও কাছে এক রুবল, কারও কাছে দুই রুবল, এইভাবে একশ’ রুবল ধার করে রেশম কিনে বাড়ি ফিরল। রাজকুমারী মারিয়া বলল :

‘এবার শুতে যাও । রাত পোয়ালে বুদ্ধি খোলে ।’

আন্দ্রেই শুতে গেল । বুনতে বসল রাজকুমারী মারিয়া । সারারাত ধরে বনে মারিয়া এমন একটা গালিচা তৈরি করল, যা পৃথিবীতে কেউ দেখেনি । গালিচার ওপরে গোটা রাজ্যের ছবি আঁকা, শহর-গ্রাম, মাঠ-বনের নকশা তোলা, তার আকাশে পাখি, বনে পশু, সমুদ্রে মাছ, আর সবকিছুর উপর চাঁদের আলো, রবির কিরণ.....

সকালবেলা মারিয়া স্বামীকে গালিচাটা দিয়ে বলল :

‘সওদাগরদের হাতে গিয়ে বেচে এসো । কিন্তু দেখো নিজে মুখে দাম বলো না, যা দেবে তাই নিও ।’  
আন্দ্রেই গালিচা হাতে বুলিয়ে চলল সওদাগরদের হাতে ।

আন্দ্রেইকে দেখেই তক্ষুণি এক সওদাগর দৌড়ে এসে জিজ্ঞেস করল :

‘কত দাম চাও, ভাই?’

‘তুমি সওদাগর, তুমিই বলো!’

সওদাগর ভেবে ভেবে আর কিছুতেই দাম বলতে পারে না । তারপর এল আর একজন, আরও একজন, এক এক করে ভিড় জমে গেল সওদাগরের । সকলেই গালিচাটা তাকিয়ে তাকিয়ে দেখে আর অবাক হয়, কিন্তু কেউ আর দাম বলতে পারে না ।

সেই সময় পথ দিয়ে যাচ্ছিল রাজার এক মন্ত্রী । কী ব্যাপার দেখবার জন্যে গাড়ি থেকে নেমে ভিড় ঠেলে এগিয়ে এসে বলল :

‘নমস্কার সওদাগরেরা, সাগরপারের মানুষেরা! কী ব্যাপার?’

‘না, গালিচাটার দাম ঠিক করতে পারছি না ।’

রাজার মন্ত্রী তো গালিচাটার দিকে তাকিয়ে হতবাক ।

জিজ্ঞেস করল, ‘বলো তীরন্দাজ, সত্যি করে বলো তো, চমৎকার এই গালিচাটা তুমি কোথায় পেলে?’

‘না, আমার বৌ বানিয়েছে ।’

‘কত দাম চাও তুমি?’

‘আমি জানি না, বৌ বলে দিয়েছে দরাদরি কোরো না, যা দেবে তাই নেব ।’

‘তাহলে এই নাও দশ হাজার ।’

আন্দ্রেই টাকা নিয়ে গালিচাটা দিয়ে বাড়ি ফিরে চলল । মন্ত্রী প্রাসাদে ফিরে গালিচা দেখাল রাজাকে ।

নিজের সমস্ত রাজত্বটা চোখের সামনে মেলা দেখে রাজা তো হতভম্ব । আহামরি করে বলে :

‘যাই বলো মন্ত্রী, তোমাকে আর এ গালিচা ফিরিয়ে দিচ্ছি নে ।’

কুড়ি হাজার রুবল রাজা নগদ ধরে দিল মন্ত্রীকে । মন্ত্রী টাকা পেয়ে ভাবল : “যাক গে । আমি আর একখানা ফরমাশ দেব, এর চেয়ে সুন্দর ।”

গাড়ি চড়ে মন্ত্রী চলে গেল শহরতলীতে । সেখানে তীরন্দাজ আন্দ্রেই-এর বাড়ি খুঁজে বের করে দরজায় টোকা মারতে লাগল । দরজা খুলে দিল রাজকুমারী মারিয়া । মন্ত্রী এক পা দিল চৌকাঠের ওপরে, কিন্তু অন্য পা তার আর ওঠে না । কথা সরে না মুখে । কী জন্যে এসেছিল সব ভুলে গেল । সামনে তার এক অপূর্ব সুন্দরী কন্যা, রূপ দেখে তার আশ মেটে না ।

মন্ত্রী কী বলে শোনার জন্যে রাজকুমারী মারিয়া দাঁড়িয়ে রইল, কিন্তু যখন দেখল মন্ত্রী একটি কথাও বলছে না, তখন মুখ ঘুরিয়ে দরজা বন্ধ করে দিল । সন্ধ্যা ফিরে এল মন্ত্রীর । বাড়ি ফিরে চলল । কিন্তু সেইদিন থেকে মন্ত্রীর খাওয়া দাওয়া গেল ঘুচে । সারাক্ষণ খালি সে তীরন্দাজের বৌয়ের কথা ভাবে ।

রাজা বেশ বুঝল মন্ত্রীর একটা কিছু হয়েছে, তাই একদিন জিজ্ঞেস করল ব্যাপার কী ।



‘কী আর বলি রাজামশাই, তীরন্দাজের বৌকে দেখে আর কিছুতেই ভুলতে পারছি না। আমায় যেন যাদু করে ফেলেছে, কিছুতেই সে মায়া কাটাতে পারছি না।’

রাজা ভাবল, “আমিও একবার তীরন্দাজের বৌকে দেখে আসি।” সাধারণ জামাকাপড় পরে রাজা গেল শহরতলীতে। আন্দ্রেই-এর বাড়ি খুঁজে বের করে দরজায় টোকা মারল। দরজা খুলে দিল রাজকুমারী মারিয়া। রাজা এক পা বাড়াল চৌকাঠের দিকে, কিন্তু অন্য পা আর তার ওঠে না। মুখে আর কথা সরে না। হাঁ করে রাজা এই অপূর্ব মুখের স্বর্গীয় রূপ দেখতে লাগল।

রাজা কী বলে তার জন্যে দাঁড়িয়ে রইল রাজকুমারী মারিয়া। কিন্তু রাজা যখন একটি কথাও বলল না, তখন মুখ ঘুরিয়ে দরজা বন্ধ করে দিল।

ভীষণ দুঃখ হল রাজার। ভাবল, “অমিই বা কেন একা থাকি। এই তো আমার উপযুক্ত এক সুন্দরী কন্যা। এমন মেয়ের রাজরানি হওয়াই সাজে, তীরন্দাজের বৌ নয়।”

প্রাসাদে ফিরে, রাজার মাথায় এক দুষ্ট বুদ্ধি এল—স্বামী বেঁচে থাকতেও বৌ চুরি করে আনবে। মন্ত্রীকে ডেকে বলল :

‘একটা উপায় বের কর মন্ত্রী, কী করে ঐ তীরন্দাজ আন্দ্রেইকে তাড়ান যায়। আমি ওর বৌকে বিয়ে করতে চাই। তুমি যদি আমায় সাহায্য কর, তবে শহর, গ্রাম সোনাদানা অনেক কিছু উপহার দেব। আর যদি না কর তবে তোমার গর্দান যাবে।’

মন্ত্রীর ভীষণ ভাবনা হল। মাথা হেঁট করে ফিরে গেল, কিছুতেই আর আন্দ্রেইকে তাড়ানর ফন্দি বের করতে পারে না। মনের দুঃখে মন্ত্রী গেল শুঁড়িখানায় মদ খেতে।

শুঁড়িখানার এক নেশাখোর, গায়ে তার ছেঁড়া কাপড় জামা, সে এসে মন্ত্রীকে জিজ্ঞেস করল :

‘মনভার কেন রাজমন্ত্রী, মাথা হেঁট কেন?’

‘দূর হ, হতভাগা কোথাকার!’

‘আমায় তাড়িয়ে না দিয়ে যদি একটু মদ খাওয়াও, তবে খুব ভাল বুদ্ধি দিতে পারি।’

মন্ত্রী লোকটিকে এক গেলাস মদ খাইয়ে তার দুঃখের কথা খুলে বলল।

লোকটি বলল :

‘কাজটা তেমন কঠিন নয়, তীরন্দাজ আন্দ্রেই তো ভারি সরল মানুষ, তবে ওর বৌ ভারি বুদ্ধিমতী, যাক গে, এমন একটা ফন্দি বের করতে হবে যাতে কিছুতেই ও পার না পায়। এক কাজ কর, বাড়ি গিয়ে রাজাকে বলো আন্দ্রেইকে হুকুম দিক পরলোকে গিয়ে ও দেখে আসুক রাজামশাইয়ের বাবা বুড়ো রাজা কেমন আছে। আন্দ্রেই একবার গেলে আর ফিরবে না।’

বদমাইশটাকে ধন্যবাদ দিয়ে মন্ত্রী ছুটে গেল রাজার কাছে।

‘আন্দ্রেইকে সরিয়ে দেবার একটা উপায় বের করেছে।’ বলল কোথায় পাঠাতে হবে তাকে, কী কাজে। রাজা ভীষণ খুশি হয়ে তক্ষুনি তীরন্দাজ আন্দ্রেইকে ডেকে পাঠাল।

‘দেখো আন্দ্রেই, তুমি এতদিন ন্যায়ধম্মে আমার কাজ করেছো। আজ আর একটি কাজ আমার কর। পরলোকে গিয়ে দেখে আসতে হবে আমার বাবা কেমন আছেন। নইলে আমার কৃপাণ, নেবে তোমার গর্দান...’

আন্দ্রেই বাড়ি ফিরে মন খারাপ করে চৌকিতে বসে রইল।

রাজকুমারী মারিয়া বলল :

‘মন খারাপ কেন আন্দ্রেই, বিপদ হয়েছে কিছু?’

রাজা কী হুকুম করেছে আন্দ্রেই সব কথা খুলে বলল।

রাজকুমারী মারিয়া বলল :

‘এ নিয়ে এত ভাবনা? এ আবার কাজ নাকি, এত নেহাত ছেলেখেলা, আসল কাজই বাকি। যাও, শোও গে, রাত পোয়ালে বুদ্ধি খোলে।’

পরদিন সকালে আন্দ্রেই ঘুম থেকে উঠতেই রাজকুমারী মারিয়া এক থলি শুকনো রুটি আর একটা সোনার আংটি দিয়ে বলল :

‘রাজামশাইকে গিয়ে বলো, মন্ত্রীকে তোমার সঙ্গে যেতে হবে, তুমি সত্যিই পরলোকে গিয়েছিলে কিনা মন্ত্রী তার সাক্ষী থাকবে। তারপর রাস্তায় বেরিয়ে সোনার আংটিটা সামনে ছুঁড়ে ফেলে দিও, আংটি তোমায় পথ দেখিয়ে দেবে।’

বৌকে বিদায় জানিয়ে শুকনো রুটি আর আংটি নিয়ে আন্দ্রেই রাজার কাছে গিয়ে বলল মন্ত্রী সঙ্গে দিতে হবে। রাজা আপত্তি করতে পারল না।

মন্ত্রী আর আন্দ্রেই দুজনে পথে বের হ। আংটিটা গড়িয়ে দিল আন্দ্রেই। খোলা মাঠ, পানা জলা, নদী, হ্রদ পেরিয়ে আন্দ্রেই চলল আংটির পিছু পিছু। আর আন্দ্রেই-এর পিছনে পিছনে কোনক্রমে আসে রাজার মন্ত্রী। হেঁটে হেঁটে ক্লান্ত হয়ে গেলে ওরা কিছু শুকনো রুটি খেয়ে নেয়, তারপর আবার হাঁটা দেয়।

অল্পদূর নাকি অনেকদূরে, শেষ পর্যন্ত এসে পড়ল এক বিজিবিজি গহন বনের মধ্যে। সেখানে এক গভীর খাদের মধ্যে নেমে থেমে গেল আংটিটা।

আন্দ্রেই আর মন্ত্রী কিছু শুকনো রুটি খাবে বলে বসল। এমন সময় দেখে কি, বুড়ো থুথুড়ে রাজাকে দিয়ে কাঠ বইছে দুই শয়তান। সে কাঠের ভার কী! রাজার দু’দিকে দুই শয়তান বসে লাঠি মেরে মেরে তাকে চালাচ্ছে।

আন্দ্রেই বলল :

‘দেখো দেখো, রাজার মরা বাবা না?’

মন্ত্রী বলল, ‘তাই তো বটে। এষে দেখি সে-ই বোঝা বইছে।’

আন্দ্রেই চিৎকার করে শয়তান দুটোকে ডেকে বলল :

‘ও মশাইরা! বুড়োটাকে একবার ছেড়ে দাও না, দুটো কথা আছে।’

শয়তানরা বলল :

‘আমাদের অত সময় নেই। নিজেরাই আমরা কাঠগুলো বয়ে নিয়ে যাব নাকি?’

‘আমি তোমাদের একটা তাজা লোক দিচ্ছি, সে কিছুক্ষণ বুড়োর জায়গায় কাজ করতে পারে।’

এই শুনে শয়তানগুলো বুড়োর ঘাড় থেকে জোয়ালটা খুলে মন্ত্রীর ঘাড়ে পরিয়ে দিল। তারপর লাঠি দিয়ে একজন ডাইনে মারে, একজন বাঁয়ে মারে, কুঁজো হয়ে বোঝা টানতে শুরু করল মন্ত্রী।

আন্দ্রেই তখন বুড়ো রাজাকে জিজ্ঞেস করল কেমন তার দিন চলছে।

রাজা বলল, ‘কী আর বলব, তীরন্দাজ আন্দ্রেই? এ জগতে এসে বড় কষ্টে দিন যাচ্ছে। ছেলেকে গিয়ে আমার কথা জানিও আর বলো, লোকের সঙ্গে যেন খারাপ ব্যবহার না করে, নইলে এখানে এসে তারও দিন যাবে কষ্টে।’

কথাবার্তা শেষ হতে না হতেই শয়তানগুলো খালি গাড়ি নিয়ে ফিরে এল। আন্দ্রেই বুড়ো রাজার কাছ থেকে বিদায় নিল, শয়তানদের কাছ থেকে মন্ত্রীকে খালাস করে বাড়ি ফিরে চলল দুজনে।

দেশে পৌঁছে ওরা তো প্রাসাদে গেল। রাজা আন্দ্রেইকে দেখেই ক্ষেপে আশুন।

বলল, ‘ফিরে এলে যে বড় আচ্ছা আস্পর্ধা তোমার?’

‘না, আপনার বাবার সঙ্গে পরলোকে দেখা করে এসেছি। বুড়ো রাজামশাইয়ের বড় কষ্টে দিন কাটছে। আপনাকে আশীর্বাদ জানিয়ে খুব করে বলেছেন, প্রজার উপর যেন অত্যাচার না করেন।’

‘সত্যিই যে পরলোকে গিয়ে বাবার সঙ্গে দেখা করেছো তার প্রমাণ কী?’

‘আপনার মন্ত্রীর পিঠে শয়তানদের লাঠির দাগগুলো দেখুন।’

মোক্ষম প্রমাণ! রাজা আর কী করে, ছেড়ে দিল আন্দ্রেইকে। আর মন্ত্রীকে ডেকে বলল :

‘আন্দ্রেইকে সরিয়ে দেবার উপায় বের কর বাপু, নইলে আমার কৃপাণ, নেবে তোমার গর্দান।’

মন্ত্রীর এবার আরও দৃষ্টিভঙ্গি। গুঁড়িখানায় গিয়ে মন্ত্রী মদ নিয়ে বসল টেবিলে। অমনি সেই বদমাইসটা এসে হাজির। বলল :

‘কিসের এত ভাবনা তোমার, রাজমন্ত্রী? আমায় যদি একটু মদ খাওয়াও তবে আমি ভাল বুদ্ধি বাতলে দিতে পারি।’

মন্ত্রী তখন তাকে এক গেলাস মদ দিয়ে সব কথা খুলে বলল। নেশাখোরটা বলল :

‘রাজাকে গিয়ে বলো আন্দ্রেইকে এক কাজ দিতে—এ বাবা জবর কাজ, দিশা পাওয়াই কঠিন, করা তো দূরের কথা। বলবে তিন নয়ের দেশ পেরিয়ে, তিন দশের রাজ্যে এক ঘুমপাড়ানি বেড়াল আছে, আন্দ্রেইকে সেটা এনে দিতে হবে.....’

রাজমন্ত্রী ছুটে গিয়ে আন্দ্রেইকে সরিয়ে দেবার উপায় বলল রাজাকে। রাজা আন্দ্রেইকে ডেকে পাঠাল।

‘শোনো আন্দ্রেই, তুমি আমার একটা কাজ করে দিয়েছ, আর একটা কাজও করে দাও। তিন নয়ের দেশ পেরিয়ে, তিন দশের রাজ্যে গিয়ে ঘুমপাড়ানি বিড়াল নিয়ে এসো আমার জন্যে। নইলে আমার কৃপাণ, নেবে তোমার গর্দান।’

মাথা নীচু করে বাড়ি ফিরল আন্দ্রেই। বৌকে বলল রাজা কী কাজ দিয়েছে।

রাজকুমারী মারিয়া বলল, ‘এ নিয়ে এত ভাবনা? এ তো কাজ নয়, ছেলেখেলা, আসল কাজই বাকি। যাও, শোও গে, রাত পোয়ালে বুদ্ধি খোলে।’

আন্দ্রেই ঘুমাতে গেল। রাজকুমারী মারিয়া তখন কামারের বাড়ি গিয়ে বলল তিনটে লোহার টুপি, একটা লোহার চিমটে আর তিনটে দণ্ড বানিয়ে দিতে—একটা লোহার, একটা তামার আর তৃতীয়টা টিনের।

পরদিন ভোরে রাজকুমারী মারিয়া আন্দ্রেইকে ঘুম থেকে তুলে দিয়ে বলল :

‘এই নাও তিনটে টুপি, একটা চিমটে, আর তিনটে দণ্ড—এবার তিন নয়ের দেশ পেরিয়ে, তিন দশের রাজ্যে যাও। ওখানে পৌছবার তিন ভাস্কি আগে তোমার ভীষণ ঘুম পাবে—ঘুমপাড়ানি বেড়াল তোমায় ঘুম পাড়াবে। কিন্তু খবরদার, ঘুমিয়ে পড়ো না। হাত দিয়ে আড়মোড়া ভাঙবে, পা দিয়ে আড়মোড়া ভাঙবে, মাটিতে গড়াগড়িও দেবে। ঘুমিয়ে পড়লেই কিন্তু বিড়াল মেরে ফেলবে তোমায়।’

কী কী করতে হবে সব বুঝিয়ে বলে আন্দ্রেইকে বিদায় দিয়ে পাঠাল রাজকুমারী মারিয়া।

বলতে এতটুকু কিন্তু করতে এতখানি। তিন দশের রাজ্যে এসে পৌছল আন্দ্রেই। ঠিক তিন ভাস্কি আগে ভীষণ ঘুম পেতে লাগল তার। তখন তিনটে লোহার টুপি মাথায় পরে, হাত দিয়ে আড়মোড়া ভেঙে, পা দিয়ে আড়মোড়া ভেঙে এগোয় আন্দ্রেই, দরকার মত মাটিতে গড়াগড়ি দিয়ে নেয়।

কোনরকমে নিজেকে জাগিয়ে রাখল আন্দ্রেই, এসে পৌছল একটা লম্বা খামের কাছে।

ঘুমপাড়ানি বিড়াল আন্দ্রেইকে দেখেই গরুর গরুর করে গর্জে উঠে খামের উপর থেকে লাফিয়ে পড়ল আন্দ্রেই-এর মাথার উপর। প্রথম টুপিটা ভেঙে, দ্বিতীয়টা ভেঙে, তৃতীয়টা ভাঙতে যাবে, অমনি আন্দ্রেই বেড়ালটাকে চিমটে দিয়ে ধরে মাটিতে ফেলে দণ্ড দিয়ে আচ্ছা করে পেটাতে লাগল। প্রথমে মারল লোহার দণ্ড দিয়ে, সেটা ভেঙে যেতে মারল তামার দণ্ড দিয়ে, সেটাও যখন ভেঙে গেল তখন টিনেরটা তুলে নিয়ে পেটাতে লাগল।

টিনের দণ্ডটা বেঁকে যায়, কিন্তু ভাঙে না। কেবল বেঁকে গিয়ে বিড়ালটার গায়ে জড়িয়ে যায়। আন্দ্রেই যত মারে বিড়ালটা তত গল্প শোনায় তাকে—পুরুরতদের গল্প, যাজকদের গল্প, পুরুরত বাড়ির মেয়ের গল্প। আন্দ্রেই কিন্তু কোন কথা না শুনে যত জোরে পারে কেবল মেরেই চলে।

বিড়াল আর পারে না। দেখে তুকতাকে চলবে না, তাই অনুনয়-বিনয় শুরু করল :

‘ছেড়ে দাও সুজন, যা বলবে তাই করব।’

‘আমার সঙ্গে যাবি?’

‘যেখানে বলবে যাব।’

আন্দ্রেই বিড়ালটা নিয়ে বাড়ির দিকে চলতে শুরু করল। দেশে ফিরে বিড়ালটাকে নিয়ে গেল রাজার কাছে। বলল :

‘তা, হুকুম তামিল করেছি, ঘুমপাড়ানি বিড়াল নিয়ে এসেছি।’

রাজা তো নিজের চোখকেই বিশ্বাস করতে চায় না। বলল :

‘তা ঘুমপাড়ানি বিড়াল, দেখাও দেখি তোমার তেজ!’

বিড়াল অমনি খাবায় শান দেয়, রাজাকে আঁচড়ায়, এই বুঝি রাজার বুক চিরে জ্যান্ত হৃৎপিণ্ডটাই বের করে আনে।

ভয় পেয়ে গেল রাজা :

‘থামাও ওকে বাপু তীরন্দাজ আন্দ্রেই।’

আন্দ্রেই বিড়ালটাকে শান্ত করে খাঁচায় পুরল, নিজে ফিরে গেল রাজকুমারী মারিয়ার কাছে। দুটিতে মনের আনন্দেই থাকে। রাজার কিন্তু বুকের মধ্যে আরও বেশি জ্বালাপোড়া। একদিন মন্ত্রীকে ডেকে বলল :

‘যে ক’রে পারো, উপায় কর, তীরন্দাজ আন্দ্রেইকে সরাসরি। নইলে আমার কৃপাণ, নেবে তোমার গর্দান।’

রাজমন্ত্রী সোজা গেল উঁড়িখানায়। ছেঁড়া জামা পরা সেই বদমাইশটাকে খুঁজে বার করে এই বিপদ থেকে উদ্ধার করবার জন্যে সাহায্য চাইল। বদমাইশটা তার মদের গেলাস উজাড় করে গৌফ মুছে বলল :

‘রাজামশাইকে গিয়ে বলো, আন্দ্রেই অ-জানি দেশ থেকে না-জানি কী নিয়ে আসুক। একাজ আন্দ্রেই সারা জীবনেও করতে পারবে না, ফিরেও আর আসবে না।’

ছুটে গিয়ে রাজাকে সব বলল মন্ত্রী। রাজা আন্দ্রেইকে ডেকে পাঠাল। বলল :

‘তুমি আমায় দুটো কাজ করে দিয়েছ, এবার তৃতীয় কাজটাও কর। অ-জানি দেশ থেকে না-জানি কী-কে নিয়ে এসো। যদি পারো, রাজার মত খেলাৎ করব। নইলে আমার কৃপাণ, নেবে তোমার গর্দান।’

আন্দ্রেই বাড়ি ফিরে চৌকিতে বসে কাঁদতে লাগল।

রাজকুমারী মারিয়া বলল :

‘কী গো, এমন মনভার কেন গো? আবার কোন বিপদ নাকি?’

আন্দ্রেই বলল, ‘কী আর বলি, তোমার রূপই আমার কাল হল। রাজা হুকুম করেছেন অ-জানি দেশ থেকে না-জানি কী আনতে হবে।’

‘হ্যাঁ, এটা একটা কাজের মত কাজ! কিন্তু কিছু ভেবো না। শোও গে যাও, রাত পোয়ালে বুদ্ধি খোলে।’

রাত হতেই রাজকুমারী মারিয়া খুলে বসল তার যাদুর বই। পড়ে পড়ে তারপর বই ফেলে মাথায় হাত দিয়ে বসল : রাজামশাইয়ের কাজটার কথা বইয়ে কিছুই লেখা নেই। তখন রাজকুমারী মারিয়া অলিন্দে গিয়ে রুমাল বের করে নাড়তে লাগল। অমনি উড়ে এল যত পাখি, ছুটে এল যত পশু।

রাজকুমারী মারিয়া বলল :

‘বনের পশু, আকাশের পাখি, বলো তো! পশু—তোমরা সব জায়গায় চরে বেড়াও, পাখি—তোমরা সব জায়গায় উড়ে বেড়াও। শোনোনি কখনও কী করে অ-জানি দেশে গিয়ে না-জানি কী আনা যায়?’

পশুপাখির দল বলল :

‘না, রাজকুমারী, সে কথা আমরা শুনিনি।’

আবার রুমাল নাড়ল রাজকুমারী মারিয়া। পশুপাখির দল নিমেষের মধ্যে কোথায় মিলিয়ে গেল। রাজকুমারী তৃতীয় বার রুমাল নাড়তেই এসে দাঁড়াল দুই দৈত্য।

‘কী আঞ্জা, কী হকুম?’

‘বিশ্বাসী দাসেরা আমার, নিয়ে চল আমায় মহাসমুদ্রের মাঝখানে।’

দৈত্যদুটো রাজকুমারী মারিয়াকে ধরে মহাসমুদ্রের ঠিক মাঝখানে নিয়ে গিয়ে গভীর জলে দাঁড়িয়ে পড়ল উঁচু স্তম্ভের মত। রাজকুমারীকে দুই হাতে তুলে ধরে রাখল জলের ওপর। রাজকুমারী মারিয়া একবার রুমাল নাড়তেই সমুদ্রের যত মাছ, যত প্রাণী সব এসে হাজির।

‘সমুদ্রের মাছ, সমুদ্রের প্রাণী, তোমরা তো সবখানে সাঁতরে বেড়াও, সব দ্বীপে যাও, শোনোনি কখনও কী করে অ-জানি দেশে গিয়ে না-জানি কী আনা যায়?’

‘না রাজকুমারী, সে কথা আমরা শুনিনি।’

মুখড়ে পড়ল রাজকুমারী মারিয়া। দৈত্যদুটোকে বলল বাড়ি নিয়ে যেতে। দৈত্যদুটো তাকে বয়ে নিয়ে গিয়ে নামিয়ে দিল বাড়ির অলিন্দে।

পরদিন সকালে আন্দ্রেইকে বিদায় দেবার জন্যে রাজকুমারী মারিয়া তাড়াতাড়ি ঘুম ছেড়ে উঠল। তারপর আন্দ্রেইকে এক সুতোর গোলা আর একটা নকশা কাটা গামছা দিয়ে বলল :

‘সামনে এই সুতোর গোলা গড়িয়ে দেবে। ওটা যে দিকে গড়াবে সে দিকে যেও। আর যেখানেই থাকো হাত মুখ ধোবার সময় পরের গামছায় মুছো না, আমার গামছায় মুছো।’

আন্দ্রেই রাজকুমারী মারিয়ার কাছ থেকে বিদায় নিয়ে চারদিককে নমস্কার করে শহরের ফটক পার হল। তারপর সুতোর গোলা গড়িয়ে দিল সামনে। সুতোর গোলা গড়ায়, আন্দ্রেইও পিছন পিছন যায়।

বলতে এতটুকু কিন্তু করতে এতখানি। চলতে চলতে আন্দ্রেই কত রাজ্য, কত আজব দেশ পেরিয়ে গেল। সুতোর গোলা গড়াতে গড়াতে ছোট হতে হতে ক্রমে একেবারে মুরগির ডিমের মত হয়ে গেল। তারপর এত ছোট হয়ে গেল যে আর চোখেই পড়ে না... আন্দ্রেই তখন একটা বনের কাছে এসে দেখে মুরগির পায়ের উপর একটা ছোট কুঁড়েঘর।

আন্দ্রেই বলল, ‘কুঁড়েঘর, ও কুঁড়েঘর, বনের দিকে পিঠ ফিরিয়ে আমার দিকে মুখ করে দাঁড়াও তো!’ কুঁড়েঘরটা ঘুরে গেল। আন্দ্রেই ঘরে ঢুকে দেখে, এক পাকাচুলো বুড়ি ডাইনি বেধিতে বসে বসে টাকু ঘোরাচ্ছে। ‘হাউমাউখাউ, রুশির গন্ধ পাউ। কখনও চোখে দেখিনি যারে, সে দেখি এল আমার ঘারে। জ্যান্ত তোকে ভেজে খাব, হাড়ে চড়ে ঘুরে বেড়াব।’

আন্দ্রেই বলল :

‘হয়েছে, হয়েছে বুড়ি বাবা-ইয়াগা। হঠাৎ ভবঘুরেকে খাওয়ার সখ কেন? ভবঘুরের তো কেবল হাড্ডি চামড়াই সার। আগে গোসলের জল গরম কর, ধোয়াও, গোসল করাও, তারপর খেও।’

বাবা-ইয়াগা তো গোসলের আগুন জেলে জল গরম করল। আর আন্দ্রেই গা ধুয়ে বেরিয়ে এল বৌয়ের দেওয়া গামছায় গা মুছতে মুছতে।

বাবা-ইয়াগা জিজ্ঞেস করল :

‘এ গামছা তুমি পেলো কী করে? এ যে দেখি আমার মেয়ের হাতের নকশা তোলা।’

‘তোমার মেয়েই যে আমার বৌ। সেই আমাকে গামছাটা দিয়েছে।’

‘ও তাই নাকি বাহা! এসো এসো, তুমি যে আমার কত আদরের জামাই!’

বাবা-ইয়াগা তাড়াতাড়ি ব্যস্ত হয়ে কত রকম খাবার, কত রকম পানীয়, কত রকমের সব ভাল ভাল জিনিস টেবিলের উপর সাজিয়ে দিল। আন্দ্রেই কোন ভণিতা না করে বসেই খাবার কাজে লেগে গেল। বাবা-ইয়াগা পাশে বসে বসে নানা প্রশ্ন করতে লাগল কী করে আন্দ্রেই রাজকুমারী মারিয়াকে বিয়ে করল,

তারা বেশ সুখে স্বচ্ছন্দে আছে কিনা। আন্দ্রেই সব কথা তাকে জানাল। তারপর রাজা যে তাকে অ-জানি দেশের না-জানি কী আনতে পাঠিয়েছেন সে কথাও বলল।

আন্দ্রেই বলল, 'তুমি যদি আমায় একটু সাহায্য করতে বুড়ি।'

'কী আর বলব বাছা, হায় হায়, এমন তাজ্জবের তাজ্জব, আমিও কখন শুনিনি। ও কথা জানে কেবল এক বুড়ি ব্যাঙ। সে আজ তিনশ' বছর হল জলায় বাস করছে.....যাক গে, কিছু ভেবো না, শুতে যাও। রাত পোয়ালে বুদ্ধি খোলে।'

আন্দ্রেই শুয়ে পড়ল আর বাবা-ইয়াগা দুটো বাঁচ গাছের বাঁটা নিয়ে উড়ে চলে গেল সেই জলার কাছে। সেখানে গিয়ে ডেকে বলল:

'ঘ্যাঙর-ঘ্যাঙ বুড়ি ব্যাঙ, বেঁচে আছ?'

'আছি।'

'বেরিয়ে এসো জলা থেকে।'

জলার ভিতর থেকে বেরিয়ে এল বুড়ি ব্যাঙ। বাবা-ইয়াগা বলল :

'না-জানি কি কোথায় জানো কি?'

'জানি।'

'তাহলে দয়া করে বলে দাও কোথায়। আমার জামাইকে রাজা অ-জানি দেশ থেকে না-জানি কী আনতে পাঠিয়েছেন।'

বুড়ি ব্যাঙ বলল :

'আমি নিজেই তাকে নিয়ে যেতাম, কিন্তু বড্ড বুড়ো হয়ে পড়েছি। অতটা লাফের সাধি নেই। তোমার জামাইকে বলো আমায় এক ভাঁড় টাটকা দুধের মধ্যে করে নিয়ে যাক জুলন্ত নদীতে। তখন বলব।'

বাবা-ইয়াগা ঘ্যাঙর-ঘ্যাঙ বুড়ি ব্যাঙকে নিয়ে উড়ে এল বাড়ি। এক ভাঁড় টাটকা দুধ দুইয়ে বুড়ি ব্যাঙকে তার মধ্যে রাখল। পরদিন খুব ভোরে আন্দ্রেইকে তুলে দিয়ে বলল :

'তা জামাই, তৈরি হয়ে নাও, টাটকা দুধের ভাঁড়টা ধরো, এতে বুড়ি ব্যাঙ আছে। আমার ঘোড়ায় চড়ে চলে যাও জুলন্ত নদীতে। সেখানে ঘোড়াটা ছেড়ে দিয়ে বুড়ি ব্যাঙকে ভাঁড় থেকে বের করো। বুড়ি ব্যাঙ তোমায় সব বলে দেবে।'

আন্দ্রেই তৈরি হয়ে ভাঁড়টা হাতে নিল, তারপর বাবা-ইয়াগার ঘোড়ায় চড়ে রওনা দিল। অনেক দিন, নাকি অল্প দিন, শেষ পর্যন্ত জুলন্ত নদীর কাছে পৌঁছল আন্দ্রেই। সে নদী লাফিয়ে পেরবে এমন জন্তু নেই, উড়ে যাবে এমন পাখি নেই।

আন্দ্রেই ঘোড়া থেকে নামতে বুড়ি ব্যাঙ বলল :

'এবার বাছা, আমায় ভাঁড় থেকে বের করে নাও। নদী পেরতে হবে।'

আন্দ্রেই বুড়ি ব্যাঙকে ভাঁড় থেকে বের করে মাটিতে রাখল।

'এবার সূজন, আমার পিঠে চড়ে বসো।'

'সেকি দিদিমা, তুমি যে এতটুকু, আমার চাপে পিষে যাবে।'

'ভয় নেই, কিছু হবে না, ভাল করে ধরে থাকো।'

বুড়ি ব্যাঙের পিঠে চেপে বসল আন্দ্রেই। ব্যাঙ অমনি নিজেকে ফোলাতে শুরু করল। ফুলতে ফুলতে একটা বিচালির আঁটির মত বড় হয়ে উঠল ব্যাঙ।

'চেপে ধরেছ তো শক্ত করে?'

'হ্যাঁ দিদিমা, ধরেছি।'

আবার ব্যাঙ ফুলতে শুরু করল। ফুলতে ফুলতে বড় হয়ে গেল একটা বিচালির গাদার মতো।

‘চেপে ধরেছো তো শক্ত করে?’

‘হ্যাঁ দিদিমা, ধরেছি।’

আবার ফুলতে শুরু করল ব্যাঙ। ফুলতে ফুলতে এবার সে ঘন বনের চেয়েও উঁচু হয়ে গেল। তারপর এক লাফে একেবারে জলন্ত নদীর ওপারে। ওপারে গিয়ে আন্দ্রেইকে পিঠ থেকে নামিয়ে দিয়ে সে আবার আগের মত ছোটটি হয়ে গেল।

‘চলে যাও সুজন, এই পায়ে হাঁটা পথ ধরে, দেখবে এক কোঠা বাড়ি—অথচ কোঠা নয়, কুঁড়েঘর—অথচ কুঁড়ে নয়, চালা—অথচ চালা নয়। গিয়ে সোজা ভিতরে ঢুকে চুল্লির পিছনে দাঁড়িয়ে থাকো। সেখানেই পাবে না-জানি কী।’

পথ ধরে চলল আন্দ্রেই, দেখে, এক পুরনো কুঁড়েঘর, কিন্তু কুঁড়ে নয়। জানালা নেই, অলিন্দ নেই, বেড়া দিয়ে ঘেরা। আন্দ্রেই ভিতরে ঢুকে চুল্লির পিছনে লুকিয়ে রইল।

একটু পরেই বনের মধ্যে হুড়মুড়, ঘড়ঘড় শব্দ। ঘরে এসে ঢুকল এক বুড়ো আঙ্গুলে দাদা, তার দাড়ি শাদা শাদা। ঢুকেই সে চিৎকার করে উঠল :

‘ওহে নাউম বেয়াই, খেতে দাও!’

মুখ থেকে কথা খসতে না খসতেই শূন্য থেকে একটা টেবিল এসে হাজির। টেবিলের ওপর এক পিপে বিয়ার আর একটা রোস্ট করা ধারাল ছুরি বেঁধান আস্ত ঝাঁড়। দাড়ি-শাদা-শাদা বুড়ো আঙ্গুলে দাদা, ঝাঁড়টার সামনে বসে ধারাল ছুরিটা বের করে মাংস কাটে, রসুন ঘষে, খায় দায়, তারিফ করে।

ঝাঁড়টার আপাদমস্তক শেষ করল সে, বিয়ারের পিপে খালি করে দিল। বলল :

‘ওহে নাউম বেয়াই, এঁটো পরিষ্কার করে নাও!’

অমনি সঙ্গে সঙ্গে হাড়গোড়, বিয়ার পিপেস্ত্র কোথায় মিলিয়ে গেল টেবিলটা...বুড়ো আঙ্গুলে দাদা কতক্ষণে বেরিয়ে যায় আন্দ্রেই সেই অপেক্ষায় রইল। তারপর বেরিয়ে যেতেই চুল্লির পিছন ছেড়ে এসে আন্দ্রেই ভরসা করে ডেকেই ফেলল:

‘নাউম বেয়াই, আমায় কিছু খেতে দাও...’

কথাটা মুখ থেকে বেরতে না বেরতেই কোথেকে যেন একটা টেবিল এসে গেল। আর তার উপর কত রকম খাবার দাবার, মধু মদ।

আন্দ্রেই টেবিলে বসে বলল :

‘নাউম বেয়াই, তুমিও বসো, একসঙ্গে খাওয়া যাক।’

কাউকে দেখা গেল না, কিন্তু উত্তর এল :

‘ধন্যবাদ তোমায় সুজন! কত বছর ধরে এখানে কাজ করছি, কিন্তু কেউ কোনদিন আমায় একটুকরো পোড়া রুটিও খেতে দেয়নি। আর তুমি আমাকে টেবিলে বসে খেতে ডাকলে!’

আন্দ্রেই তো হতবাক। কাউকে দেখা যাচ্ছে না অথচ খাবারগুলো যেন বেঁটিয়ে সাফ হচ্ছে। আপনা থেকেই মদ আর মধুতে গেলাস ভরে উঠছে। আপনা থেকেই খুটখুট করছে গেলাস।

আন্দ্রেই বলল :

‘নাউম বেয়াই, একবার দেখা দাও না!’

‘না, আমাকে তো দেখা যায় না। আমি হলাম না-জানি কী।’

‘নাউম বেয়াই, তুমি আমার কাছে কাজ করবে?’

‘করব না কেন। দেখছি, লোকটা তুমি ভাল।’

খাওয়া শেষ হলে আন্দ্রেই বলল :

‘টেবিলটা পরিষ্কার করে চল আমার সঙ্গে।’

কুঁড়েঘর থেকে বেরিয়ে আন্দ্রেই আশেপাশে তাকাল।

‘নাউম বেয়াই, আছো তো এখানে?’

‘হ্যাঁ আছি, ভয় নেই। তোমায় আমি ছেড়ে যাব না।’

হাঁটতে হাঁটতে আন্দ্রেই এসে পৌছল জুলন্ত নদীর পাড়ে। সেখানে ওর জন্যে অপেক্ষা করে ছিল ব্যাঙ।

‘কী সুজন, না-জানি কী পেলো?’

‘পেয়েছি দিদিমা।’

‘তাহলে এবার আমার পিঠে চড়ে বসো।’

আন্দ্রেই পিঠে চড়ে বসল আর ব্যাঙ নিজেকে ফোলাতে শুরু করল আবার। তারপর এক লাফে আন্দ্রেইকে জুলন্ত নদী পার করে দিল।

আন্দ্রেই ঘ্যাঙর-ঘ্যাঙ বুড়ি ব্যাঙকে ধন্যবাদ দিয়ে নিজের দেশের পথ ধরল। আন্দ্রেই একটু যায় আর মুখ ফিরিয়ে জিজ্ঞেস করে :

‘কি নাউম বেয়াই, আছো তো?’

‘আছি আছি, কোন ভয় নেই তোমার। ছেড়ে যাব না।’

আন্দ্রেই হাঁটে আর হাঁটে। দূরের পথ। এলিয়ে পড়ে তার সবল পা, নেতিয়ে পড়ে তার খবল হাত।

বলে, ‘ওহ, কী ক্লাস্তই না হয়ে পড়েছি!’

নাউম বেয়াই বলল :

‘আগে বললে না কেন? আমি তোমায় পলকের মধ্যে বাড়ি পৌঁছে দিতাম।’

হঠাৎ একটা ঝড় এসে আন্দ্রেইকে পাহাড়, পর্বত, বন, শহর, গ্রাম পেরিয়ে উড়িয়ে নিয়ে চলল। এক গভীর সমুদ্রের উপর দিয়ে উড়ে যাবার সময় আন্দ্রেই ভয় পেয়ে বলল :

‘নাউম বেয়াই, একটু বিশ্রাম করতে পারলে হত!’

অমনি থেমে গেল হাওয়া। আন্দ্রেই নামতে লাগল। দেখে কি, যেখানে নীল ঢেউ গজরাচ্ছিল, সেখানে একটা দ্বীপ হয়ে গেছে। সে দ্বীপে এক সোনার ছাদওয়ালা প্রাসাদ আর তার চারদিকে ঘিরে অপরূপ বাগান... নাউম বেয়াই আন্দ্রেইকে বলল :

‘বিশ্রাম কর গে, চর্ব্যা-চোষ্যা-লেহ্যা-পেয় খাও আর সমুদ্রের দিকে নজর রেখো। তিনটে সওদাগরী জাহাজ আসবে। তাদের নেমস্তন্থে ডেকো, ভাল করে আপ্যায়ন করো। ওদের কাছে তিনটে আজব জিনিস আছে, চেয়ে নিও। তার বদলে আমায় দিয়ে দিও। ভয় নেই, আমি আবার ফিরে আসব।’

অনেকদিন নাকি অল্পদিন, দেখে কি, তিনটে জাহাজ পশ্চিম থেকে এগিয়ে আসছে। নাবিকরা দেখে একটা দ্বীপ, তার মধ্যে অপরূপ বাগানে ঘেরা সোনার ছাদওয়ালা এক প্রাসাদ।

ওরা বলাবলি করল, ‘কী আশ্চর্য! কতবার এই পথে গেছি, নীল ঢেউ ছাড়া কিছুই চোখে পড়েনি তো। চল জাহাজ তীরে লাগাই!’

জাহাজ তিনটে নোঙ্গর ফেলল। আর তিনজন সওদাগর ডিঙি করে এগিয়ে এল পাড়ের দিকে। তীরন্দাজ আন্দ্রেই আগেই সেখানে অভ্যর্থনার জন্যে হাজির।

‘আসুন, আসুন অতিথি সজ্জন।’

সওদাগররা যত দেখে তত অবাক হয়। আঙনের মত জ্বলছে পুরীর ছাদ। গাছে গাছে পাখির গান, পথে পথে অপরূপ সব প্রাণী।



‘বলো তো সুজন, কে এখানে এমন আশ্চর্য প্রাসাদ বানালে?’

‘আমার চাকর নাউম বেয়াই এসবই বানিয়েছে এক রাতের মধ্যে।’

আন্দ্রেই অতিথিদের নিয়ে গেল পুরীর ভেতরে। বলল :

‘ওহে নাউম বেয়াই, আমাদের কিছু খেতে দাও তো!’

হঠাৎ শূন্য থেকে একটা টেবিল এসে দাঁড়াল। আর তার উপর নানা রকম চর্ব্য-চোষ্য-পানীয়। যা মন চায় সব। সওদাগররা একেবারে অবাক। বলল :

‘এসো আমরা বদলাবদলি করি। তোমার চাকরটিকে আমাদের দাও, তার বদলে আমাদের যে কোন একটা আজব জিনিস তুমি চাও দেব।’

‘বেশ, তা কী কী আজব জিনিস তোমাদের আছে?’

এক সওদাগর জামার নিচ থেকে একটা মুগুর বের করল। কেবল বলতে হবে : “দে তো মুগুর হাড় গুঁড়িয়ে!” ব্যস, অমনি মুগুর লেগে যাবে কাজে। যত বড় পালোয়ানই হোক না কেন, তার হাড় গুঁড়িয়ে ছাড়বে।

আর এক সওদাগর পোশাকের নিচ থেকে বের করল একটা কুড়াল। সোজা করে কুড়ালটাকে দাঁড় করিয়ে রাখা মাত্রই খটাখট খটাখট ঘা পড়তে লাগল আর তৈরি হয়ে গেল একটা জাহাজ। খটাখট খটাখট—হয়ে গেল আর একটা জাহাজ। একেবারে পাল তোলা, কামান লাগানো, মাঝিমান্নারা হুকুম চাইল।

সওদাগর কুড়ালটা উল্টে রাখা মাত্র জাহাজ-টাহাজ সব মিলিয়ে গেল। যেন কিছুই ছিল না।

এবার তৃতীয় সওদাগর পকেট থেকে একটা বাঁশি বের করে বাজাতে আরম্ভ করল, অমনি এক দল সৈন্য এসে হাজির : তাদের কেউ সওয়ারী, কেউ পদাতিক কারো হাতে বন্দুক, কারো কাছে কামান। কূচকাওয়াজ শুরু হয়ে গেল, তুরীভেরি বেজে উঠল, আকাশে উড়ল পতাকা, ঘোড়সওয়াররা হুকুম চাইল।

সওদাগর তারপর বাঁশির অন্য মুখে ফুঁ দিতেই, ব্যস—ভেঁ ভেঁ, মিলিয়ে গেল সব।

তীরন্দাজ আন্দ্রেই বলল :

‘তোমাদের আজব জিনিসগুলো ভালই, তবে আমারটার দাম আরও বেশি। আমার চাকর, নাউম বেয়াইকে বদলি করতে পারি যদি তোমরা ঐ তিনটে জিনিসই আমায় দিয়ে দাও।’

‘একটু বাড়াবাড়ি হচ্ছে না ভাই?’

‘নয়তো বদলি করব না, বুঝে দেখো।’

সওদাগরেরা ভেবে দেখল : “মুগুর, কুড়াল, বাঁশি দিয়ে আমাদের কীই বা হবে? তার বদলে নাউম বেয়াই পেলেই ভাল। রাতে দিনে খাওয়া দাওয়ার কোন ভাবনাই থাকবে না।”

সওদাগরেরা আন্দ্রেইকে মুগুর, কুড়াল, বাঁশি দিয়ে দিল। তারপর চিৎকার করে বলল :

‘ওহে নাউম বেয়াই, আমরা তোমায় নিয়ে যাব। ধর্মমতে কাজ করবে তো?’

আওয়াজ শোনা গেল :

‘করব না কেন? যার কাছেই কাজ করি আমার কাছে সবাই সমান।’

সওদাগররা তখন জাহাজে ফিরে গিয়ে ফুঁটি জমাল। খায়, দায়, আর কেবলি হুকুম দেয় :

‘নাউম বেয়াই, এই আনো, সেই আনো!’

খেয়ে খেয়ে শেষ পর্যন্ত তারা বেদম মাতাল হয়ে যেখানে ছিল সেখানেই চুলে পড়ল।

ওদিকে তীরন্দাজ আন্দ্রেই প্রাসাদে একা বসে বসে মন খারাপ করে আর ভাবে : “হায় হায়, কোথায় গেল আমার সেই অনুগত চাকর নাউম বেয়াই?”

‘এই যে আমি, কী চাই?’

আন্দ্রেই তো মহা খুশি।

‘বাড়ি ফেরার সময় হয়েছে, ঘরে আমার কচি বৌ! নাউম বেয়াই, এবার বাড়ি নিয়ে চল।’

আবার একটা জোর বড় উঠল আর আন্দ্রেইকে উড়িয়ে নিয়ে ফেলল একেবারে তার নিজের দেশে।  
এদিকে তো ঘুম থেকে জেগে উঠে সওদাগরদের গা ম্যাজম্যাজ করে, তেষ্ঠায় ছাতি ফাটে।

‘ওহে নাউম বেয়াই, দেখি, কিছু খাবার দাবার এনে দাও তো, একটু চাঙ্গা করে দাও।’

কত হাঁক, কত ডাক, কিছুতেই কিছু হয় না। তাকিয়ে দেখে, দ্বীপ কোথায় মিলিয়ে গেছে। চারিদিকে কেবল ফুঁসে উঠছে নীল ঢেউ।

সওদাগররা ভীষণ চটে গেল। “আচ্ছা বদ লোক তো, আমাদের এমন করে ঠকাল!” কিন্তু তখন আর উপায় নেই, পাল খাটিয়ে যেদিকে যাবার সেদিকে গেল।

তীরন্দাজ আন্দ্রেই এদিকে দেশে গিয়ে তার কুঁড়েঘরটার পাশে নামল। কিন্তু দেখে কী, কোথায় তার কুঁড়েঘর, একটা পোড়া কালো চিমনি ছাড়া আর কিছুই সেখানে নেই।

দুঃখে মাথা নিচু করে সে শহর ছেড়ে চলে গেল নীল সমুদ্রের ধারে এক বিজন জায়গায়। সেখানে বসে আছে তো আছেই। হঠাৎ কোথা থেকে উড়ে এল একটা ঘুঘু। মাটি ছুঁতেই ঘুঘু পাখিটা হয়ে গেল আন্দ্রেই-এর বৌ রাজকুমারী মারিয়া।

দুজনে দুজনকে জড়িয়ে ধরে তখন কত কথা, কত কুশল, সবকিছু শুধায়, সবকিছু বলে।

রাজকুমারী মারিয়া বলল :

‘যে দিন থেকে তুমি বাড়ি ছেড়ে গেছ, সেদিন থেকে আমি বনে বনে ঝোপে ঝাড়ে ঘুঘু হয়ে উড়ে বেড়াচ্ছি।

তিন তিন বার রাজা আমার খোঁজে লোক পাঠিয়েছে। আমায় খুঁজে না পেয়ে বাড়িটাই পুড়িয়ে দিয়েছে।’

আন্দ্রেই বলল :

‘নাউম বেয়াই, নীল সমুদ্রের পাড়ে একটা প্রাসাদ তৈরি করে দিতে পারো?’

‘কেন পারব না? নিমিষের মধ্যেই করে দিচ্ছি।’

চোখের পলক ফেলতে না ফেলতেই প্রাসাদ একেবারে তৈরি। আর সে কী জমকালো প্রাসাদ, রাজপ্রাসাদের চেয়েও ঢের ভাল। চারদিকে সবুজ বাগান। গাছে গাছে পাখির গান, পথে পথে কত অপরূপ প্রাণী।

তীরন্দাজ আন্দ্রেই আর রাজকুমারী মারিয়া ঢুকল প্রাসাদে। জানালার পাশে বসে তারা দুঁহ দুঁহা গল্প করে, দেখে দেখে আর আশ মেটে না। এই ভাবে মহা আনন্দে দিন কাটে, একদিন যায়, দুদিন যায়, তিন দিন যায়।

রাজা ওদিকে শিকার করতে গিয়ে দেখে, নীল সমুদ্রের ধারে আগে যেখানে কিছু ছিল না, সেখানে একটা মস্ত প্রাসাদ।

‘আমার অনুমতি না নিয়ে কোন হতভাগা আমারই জমিতে বাড়ি তুলেছে?’

তক্ষুণি দূত ছুটল। খোঁজখবর নিয়ে জানাল সেই যে তীরন্দাজ আন্দ্রেই, সে এই প্রাসাদ বানিয়ে তার বৌ রাজকুমারী মারিয়াকে নিয়ে বসবাস করছে।

রাজা গেল আরও ক্ষেপে। দূত পাঠাল খবর আনতে সত্যিই আন্দ্রেই অ-জানি দেশে গিয়ে না-জানি কী এনেছে কিনা।

আবার দূত ছুটল। ফিরে এসে খবর দিল :

‘হ্যাঁ মহারাজ, আন্দ্রেই সত্যিই অ-জানি দেশে গিয়ে না-জানি কী নিয়ে এসেছে।’

এই কথা শুনে তো রাজা একেবারে রেগে আশুন, তেলে বেগুন। তক্ষুণি সৈন্যসামন্ত ডেকে পাঠিয়ে হুকুম দিল সমুদ্র তীরে গিয়ে আন্দ্রেই-এর প্রাসাদ যেন ধুলোয় মিশিয়ে দেওয়া হয়। তীরন্দাজ আন্দ্রেই আর রাজকুমারী মারিয়াকে যেন হত্যা করা হয় নিষ্ঠুরভাবে।

আন্দ্রেই দেখে, প্রবল এক সৈন্যবাহিনী তাকে আক্রমণ করতে আসছে। তক্ষুনি সে কুড়ালটা টেনে নিয়ে সোজা করে দাঁড় করিয়ে দিল। কুড়াল চলল খটাখট খটাখট—অমনি জাহাজ ভাসল সমুদ্রে। খটাখট খটাখট—অমনি আর একটা জাহাজ। একশ’ বার কুড়াল চলল, একশ’ জাহাজ পাল তুলে দাঁড়াল সমুদ্রে।

আন্দ্রেই বাঁশিটা বের করে বাজাতেই হাজির হল সৈন্যদল। তাদের কেউ সওয়ারী, কেউ পদাতিক, কারো হাতে বন্দুক, কারো কাছে কামান, কারো কাছে নিশান।

সেনাপতিরা ঘোড়া ছুটিয়ে আসে, হুকুমের জন্যে দাঁড়ায়। আন্দ্রেই হুকুম দিল যুদ্ধ শুরু করো। অমনি তুরীভেরি কাড়া-নাকাড়া রণবাদ্য বেজে উঠল। এগোতে শুরু করল সৈন্যদল। পদাতিকরা ছারখার করে রাজসৈন্য। ঘোড়সওয়াররা ঝাঁপিয়ে পড়ে বন্দি করতে থাকে। একশ’ জাহাজের কামান থেকে গোলা ছোটে।

রাজা দেখল, সৈন্যরা তার রণে ভঙ্গ দিয়ে পালাচ্ছে, নিজেই ছুটলো তাদের থামাতে। আন্দ্রেই তখন তার মুগুরটা বের করে বলল :

‘দে মুগুর রাজার হাড় গুঁড়িয়ে!’

অমনি মুগুর তিড়িং লাফে মাঠ পেরিয়ে ধেয়ে গেল। রাজাকে ধরে ফেলে তার কপালে এমন এক ঘা কষিয়ে দিল যে রাজা সেখানেই লুটিয়ে পড়ল প্রাণ হারিয়ে।

অমনি যুদ্ধ থেমে গেল। শহরের সব লোকেরা শহর থেকে বেরিয়ে এসে তীরন্দাজ আন্দ্রেইকে তাদের রাজা হবার জন্যে মিনতি করতে লাগল।

আন্দ্রেইও আপত্তি করল না। বিরাট এক ভোজ দিয়ে রাজকুমারী মারিয়াকে নিয়ে সারা জীবন সুখেস্বচ্ছন্দে রাজত্ব করতে লাগল সে।



## ক্ষুদে ইভান বড় বুদ্ধিমান

অনেককাল আগে ছিল এক বুড়ো আর এক বুড়ি। বুড়ো রোজ পশুপাখি মেরে আনত। সেই খেয়েই বেঁচে থাকত। বয়স অনেক হল, কিন্তু ধনসম্পদ নেই। বুড়ি তাই নিয়ে রোজ দুঃখ করত, ঘ্যানঘ্যান করত :

‘সারা জীবন কেটে গেল, না পেলাম একটা ভাল কিছু খেতে, না পেলাম ভাল কিছু পরতে। ছেলেপুলেও নেই যে বুড়ো বয়সে আমাদের দেখাশোনা করে।’

বুড়ো সান্ত্বনা দিয়ে বলল, ‘দুঃখ করো না বুড়ি, দুঃখ করো না। যতদিন আমার এই দুটো হাত আর দুটো পা আছে, ততদিন খাওয়া জোটা। তার পরের কথা ভেবে কী হবে।’

এই বলে বুড়ো চলে গেল শিকারে।

সেদিন সকাল থেকে রাত অবধি বুড়ো বনের মধ্যে ঘুরে বেড়াল, কিন্তু একটা পাখি পশু কিছুই মারতে পারল না। খালি হাতে বাড়ি ফিরতে মন চাইছিল না। কিন্তু উপায় নেই। ওদিকে সূর্য ডুবে যাচ্ছে—বাড়ি ফেরার সময় হল।

বুড়ো যেই বাড়ির দিকে রওনা হয়েছে, অমনি ডানার আওয়াজ শোনা গেল। ঝোপ থেকে মাথা তুললে অপূর্ব সুন্দর একটা বড় মত পাখি।

কিন্তু নিশানা ঠিক করতে করতেই উড়ে গেল পাখিটা।

‘দেখা যাচ্ছে কপালে নেই!’

যে ঝোপ থেকে পাখিটা বেরিয়ে এসেছিল বুড়ো সেখানে উঁকি দিয়ে দেখে, একটা বাসা, তাতে তেত্রিশটা ডিম।

‘নেই আমার চেয়ে কানা মামাই ভাল,’ এই বলে বুড়ো তার কোমরের বাঁধুনিটা এঁটে নিয়ে তেত্রিশটা ডিমই তার পোশাকের মধ্যে পুরে বাড়িমুখে রওনা দিল।

চলতে চলতে বুড়োর কোমরের বাঁধুনি কখন গেল আলগা হয়ে, আর ডিমগুলো সব ফাঁক দিয়ে পড়ে যেতে লাগল।

একটা করে ডিম পড়ে, আর তার ভিতর থেকে একটি করে তরুণ বেরিয়ে আসে। এমনি করে করে বত্রিশটা ডিম পড়ে গেল, আর তার ভিতর থেকে বেরিয়ে এল বত্রিশটি তরুণ।

কিন্তু ঠিক সেই সময়ই বুড়ো তার কোমরের বাঁধুনিটা এঁটে দেওয়ায় তেত্রিশ নম্বর ডিমটা আর পড়ল না। বুড়ো তারপর যেই পিছন ফিরে তাকিয়েছে,—একেবারে অবাক কাণ্ড, দেখে কি, বত্রিশটি সুকুমার তরুণ তার পিছন পিছন আসছে, চোখে মুখে গড়নে চলনে একেবারে হুবহু এক। ছেলের দল সমস্বরে বলে উঠল :

‘তুমি যখন আমাদের খুঁজে পেয়েছো, তখন তুমিই আমাদের বাবা, আমরা তোমার ছেলে, বাড়ি নিয়ে চলো আমাদের।’

বুড়ো ভাবল, “বুড়োবুড়ি আমাদের একটি ছেলেও ছিল না, আর আজ একেবারে একসঙ্গে বত্রিশটি!” সবাইকে নিয়ে বাড়ি এসে বুড়ো ডাকল :

‘বুড়ি, ও বুড়ি! এতদিন তো খালি ছেলে ছেলে করে দুঃখ করতে। এই নাও বত্রিশটি ফুটফুটে ছেলে। জায়গা কর, ছেলেদের খাওয়াও।’

বুড়ো বুড়িকে সব ঘটনা খুলে বলল।

বুড়ি তো সেখানেই থ হয়ে দাঁড়িয়ে রইল। মুখ দিয়ে রা বেরল না। গালে হাত দিয়ে দাঁড়িয়ে থেকে থেকে তারপর হঠাৎ ছুটল খাবার জায়গা করতে। বুড়ো ওদিকে কোমরের বাঁধুনিটা খুলে যেই পোশাকটা ছাড়তে গেছে, অমনি তেত্রিশ নম্বর ডিমটা গেল পড়ে আর তার ভিতর থেকে বেরিয়ে এল আর একটি তরুণ।

‘আরে, তুমি কোথা থেকে এলে?’

‘আমিও তোমার ছেলে, ক্ষুদে ইভান।’

তখন বুড়োর মনে পড়ল সত্যিই তো সে পাখির বাসায় তেত্রিশটা ডিমই পেয়েছিল।

‘ঠিক আছে, ক্ষুদে ইভান, তুমিও তবে খেতে বসে যাও।’

তেত্রিশটি ছেলে কিন্তু খেতে বসামাত্রই বুড়ির ভাঁড়ারে যা ছিল সব শেষ হয়ে গেল, টেবিল ছেড়ে উঠতে হল ভরপেটেও নয়, খালি পেটেও নয়।

রাত কাটাল ছেলেরা। পরদিন সকালে ক্ষুদে ইভান বুড়োকে বলল :

‘বাবা, আমাদের নিয়ে যখন এসেছো, কাজ দাও।’

‘কিন্তু কী কাজ দিই? বুড়োবুড়ি আমরা, জীবনে কখনও না দিয়েছি হাল, না বুনেছি বীজ। আমাদের না আছে ঘোড়া, না আছে লাঙ্গল।’

ক্ষুদে ইভান বলল, ‘নেই, তো নেই! কী আর করা যাবে। লোকের কাছে গিয়ে কাজ করব। বাবা, তুমি কামারের কাছে গিয়ে আমাদের জন্যে তেত্রিশটা কাস্তে গড়িয়ে আনো।’

বুড়ো গেল কামারের কাছে কাস্তে গড়াতে, আর এদিকে ক্ষুদে ইভান আর তার ভাইয়েরা মিলে ততক্ষণে বানিয়ে ফেলল তেত্রিশটা কাস্তের হাতল আর তেত্রিশটা আঁচড়া।

বুড়ো কামারঘর থেকে ফিরে এলে পর ক্ষুদে ইভান সবাইকে যন্ত্রপাতি বেঁটে দিয়ে বলল :

‘চল যাই মজুর খাটব, রোজগার করব, নিজেদের পেট চালাতে হবে, বাবা-মাকেও দেখতে হবে।’

তারপর বুড়ো বাবা-মা’র কাছ থেকে বিদায় নিয়ে বেরিয়ে পড়ল ভাইয়েরা। গেল তারা একটুখানি নাকি অনেকখানি, অনেকক্ষণ নাকি অল্পক্ষণ, দেখল সামনে একটা মস্ত শহর। সেই শহর থেকে তখন রাজার গোমস্তা ঘোড়ায় চেপে যাচ্ছিল। ওদের দেখে কাছে এসে জিজ্ঞেস করল :

‘ওহে জোয়ানেরা, কাজ করতে যাচ্ছে, নাকি কাজ থেকে ফিরছো? যদি খাটতে চাও, তবে আমার সঙ্গে এসো, ভাল কাজ আছে।’

ক্ষুদে ইভান জিজ্ঞেস করল, ‘কিন্তু কাজটা কী, বলবে।’

গোমস্তা বলল, ‘তেমন কঠিন কিছু নয়। রাজার খাস মাঠের ঘাস তোমাদের কেটে, শুকিয়ে, আঁটি বেঁধে, গাদা করে রাখতে হবে। তোমাদের সর্দার কে?’

কেউ উত্তর দিল না। ক্ষুদে ইভান এগিয়ে এসে বলল :

‘চল, কাজ বুঝিয়ে দাও।’

গোমস্তা তখন তাদের রাজার খাস মাঠে নিয়ে গেল। জিজ্ঞেস করল :

‘তিন সপ্তাহের মধ্যে হয়ে যাবে তো?’

ইভান বলল :

‘যদি ঝড় জল না হয়, তবে তিন দিনেই হয়ে যাবে।’

সে কথায় গোমস্তা ভারি খুশি হয়ে বলল :

‘তবে কাজে লেগে যাও, মজুরি ঠকাব না, খোরাক যা লাগবে সব পাবে।’

ক্ষুদে ইভান বলল :

‘আমাদের আর কিছুই চাই না, কেবল তেত্রিশটা ষাঁড়ের রোস্ট, তেত্রিশ বালতি মদ, আর প্রত্যেককে একটা করে কালাচ\* দিও, তাতেই হবে।’

গোমস্তা চলে গেল। তেত্রিশ ভাই কাস্তেতে শান দিয়ে এমন ফুর্তিসে টান লাগালে যে আওয়াজ উঠল শনশন। কাজ চলল খুব জোর। সন্ধ্যার মধ্যেই সব ঘাস কাটা হয়ে গেল। এদিকে রাজার রসুইঘর থেকে এল তেত্রিশটা ষাঁড়ের রোস্ট, তেত্রিশ বালতি মদ আর প্রত্যেকের একটা করে কালাচ। তেত্রিশ ভাই প্রত্যেকে আধখানা করে ষাঁড়, আধ বালতি করে মদ, আর আধখানা করে কালাচ খেয়ে ঘুমিয়ে পড়ল।

পরদিন চনচনে রোদ উঠলে তেত্রিশ ভাই ঘাসগুলো শুকিয়ে আঁটি বেঁধে সন্ধ্যার মধ্যেই গাদা দিয়ে ফেলল। তারপর আবার তারা প্রত্যেকে আধখানা করে কালাচ দিয়ে আধখানা করে ষাঁড় আর আধ বালতি মদ খেল। তারপর ক্ষুদে ইভান তার এক ভাইকে পাঠিয়ে দিল রাজদরবারে।

বলল, ‘বলো গিয়ে আমাদের কাজ দেখে যাক।’

গোমস্তাকে সঙ্গে নিয়ে সে ফিরল। পিছু পিছু রাজামশাইও তার মাঠে এসে হাজির। প্রত্যেকটি গাদা গুণে গুণে মাঠের সবটা ঘুরে ঘুরে দেখল রাজা—একটি ঘাসের শিষও কোথাও নেই। বলল :

‘চটপট আমার খাস জমির ঘাস কেটে বিচালি বানিয়ে গাদা দিয়েছ তোমরা ভালই। এর জন্যে তোমাদের বাহবা দিচ্ছি, তাছাড়া দিচ্ছি একশ’টি রুবল আর চল্লিশ-ভাঁড়ি মদের পিপে। কিন্তু আর একটা কাজ তোমাদের করতে হবে। এই বিচালি পাহারা দাও। প্রত্যেক বছর কে এসে যেন এ সব বিচালি খেয়ে যায়, কিছুতেই চোরকে ধরতে পারছি না।’

ক্ষুদে ইভান বলল :

‘হুজুর মহারাজ, আমার ভাইয়েদের আপনি বাড়ি যেতে দিন, আমি একাই পাহারা দেব।’

রাজার তাতে আপত্তি হল না। ভাইয়েরা সব রাজদরবারে গিয়ে তাদের পাওনা টাকা নিয়ে ভাল পানাহার করে বাড়ি ফিরল।

ক্ষুদে ইভান ফিরে গেল রাজার সেই খাস মাঠে। রক্তিরে সে না ঘুমিয়ে রাজার বিচালি পাহারা দেয়। আর দিনের বেলা খাওয়া দাওয়া করে জিরিয়ে নেয় রাজার রসুইঘরে।

দেখতে দেখতে হেমন্তকাল এসে গেল। রাক্তিরগুলো তখন বড় বড় আর অন্ধকার। একদিন এক সন্ধ্যায় ক্ষুদে ইভান একটা বিচালির গাদায় খড় জড়িয়ে শুয়ে আছে, চোখে ঘুম নেই। ঠিক রাত দুপুরে চারিদিক হঠাৎ যেন দিনের আলোয় ভরে গেল। ক্ষুদে ইভান মাথা বের করে দেখে কী, স্বর্ণকেশরী একটা মাদি ঘোড়া। ঘোড়াটা সমুদ্রের বুক থেকে লাফিয়ে উঠে সোজা ছুটে এল বিচালির গাদার দিকে। তার খুরের দাপে মাটি কাঁপে, সোনালি কেশর হাওয়ায় ওড়ে, নাক দিয়ে আগুন ছোটে, কান দিয়ে ধোঁয়া বেরয়।

ঘোড়াটা এসেই বিচালি খেতে লেগে গেল। পাহারাদার ক্ষুদে ইভান সুযোগ বুঝেই লাফিয়ে পড়ল ঘোড়াটার পিঠে। বিচালির গাদা ছেড়ে রাজার খাস মাঠের মধ্যে দিয়ে তখন সে কী ছুট ঘোড়াটার। ক্ষুদে ইভান বাঁ হাতে ধরেছে ঘোড়ার কেশর, ডান হাতে চামড়ার চাবুক। চাবুক মেরে মেরে জলায় শ্যাওলায় ঘোড়াকে ছোটাতে লাগল ক্ষুদে ইভান।

\* কালাচ—শাদা রুটি।

জলায় শ্যাওলায় ছুটে ছুটে শেষে পেট পর্যন্ত পাঁকের মধ্যে ডুবে গিয়ে থামল ঘোড়াটা। বলল :

‘ক্ষুদে ইভান, আমায় তুমি ধরেছ, সওয়ার হয়ে থেকেছ, বশে আনতেও পেরেছ। আর আমায় মেরো না, কষ্ট দিয়ো না, আজ থেকে আমি তোমার সব কথা শুনব।’

ক্ষুদে ইভান তখন ঘোড়াটাকে নিয়ে রাজার আস্তাবলে বেঁধে রেখে নিজে গিয়ে রসুইঘরে ঘুমিয়ে রইল। পরদিন ইভান রাজাকে গিয়ে বলল:

‘হুজুর মহারাজ, আপনার খাস মাঠ থেকে বিচালি চুরি কে করত আমি বের করেছি। চোরটাকেও ধরেছি। চলুন দেখবেন।’

স্বর্ণকেশরী ঘোড়াকে দেখে রাজা তো ভীষণ খুশি।

বলল, ‘তা ইভান, হলে কী হয় ক্ষুদে ইভান, আসলে বড় বুদ্ধিমান, তোমার ভাল কাজের জন্যে আজ থেকে তোমায় আমি আমার প্রধান সহিস করে দিলাম।’

সেই থেকে ছেলের নাম হয়ে গেল ক্ষুদে ইভান বড় বুদ্ধিমান।

ক্ষুদে ইভান রাজার আস্তাবলে কাজ করতে লাগল। সারারাত না ঘুমিয়ে সে রাজার ঘোড়ার দেখাশোনা করে। তার ফলে রাজার ঘোড়াগুলোর দিনে দিনে চেকনাই বাড়ল আর পুরুষ্ট হয়ে উঠল। গা তাদের রেশমের মত চকচক করে, লেজ ফুলিয়ে কেশর ফুলিয়ে দাঁড়ায়—সত্যিই দেখবার মত।

রাজামশাই ভারি খুশি। প্রশংসা আর ধরে না।

‘বাহবা, ক্ষুদে ইভান বড় বুদ্ধিমান! এমন সহিস আমি জীবনে দেখিনি।’

কিন্তু আস্তাবলের পুরোনো সহিসদের হিংসে হল।

‘কোথাকার একটা গৈয়ো ভূত এসে বসেছে আমাদের উপর। রাজার আস্তাবলের প্রধান সহিস হবে কিনা ওই লোকটা?’

সবাই মিলে ওরা ষড়যন্ত্র পাকাতে লাগল। ক্ষুদে ইভান কিন্তু নিজের কাজ করে চলে। কোন কিছুই টের পেল না।

একদিন এক নেশাখোর চৌকিদার এল রাজার আস্তাবলে।

বলল, ‘এক ঢোক মদ দাও তো হে। কাল রাত থেকে মাথাটা বড় ধরে আছে। যদি মদ খাওয়াও তবে তোমাদের এই প্রধান সহিসের হাত থেকে ছাড়া পাবার ফন্দি বাৎলে দেব।’

এই কথা শুনে সহিসরা সানন্দে ওকে মদ খাওয়াল। চৌকিদার তার মদের পাত্র শেষ করে বলল:

‘আমাদের রাজামশাইয়ের ভারি ইচ্ছে, আপনি-বাজা বাদ্য, নাচিয়ে হাঁস আর রঙুড়ে বেড়াল জোগাড় করেন। এই আজব জিনিসের খোঁজে কত ভাল ভাল জোয়ান গেছে নিজে থেকে, আরও কত গেছে বাধ্য হয়ে, কিন্তু তাদের একজনও আর ফিরে আসেনি। তোমরা এক কাজ কর, রাজামশাইকে গিয়ে বলো যে ক্ষুদে ইভান বড় বুদ্ধিমান বড়াই করে বলেছে যে সে অনায়াসে এই সব জিনিস এনে দিতে পারে। রাজা তখন ওকেই পাঠাবেন, তাহলে আর কোনদিনই সে ফিরে আসবে না।’

পুরোন সহিসরা চৌকিদারকে অনেক ধন্যবাদ জানিয়ে আর এক পাত্র মদ খাওয়াল। তারপর চলে গেল একেবারে সোজা রাজবাড়ির সদর অলিন্দের দিকে। সেখানে গিয়ে তারা রাজার ঘরের জানালায় ঠিক নিচে দাঁড়িয়ে গুজগুজ করতে লাগল। দেখতে পেয়ে রাজা প্রাসাদ থেকে বেরিয়ে এসে জিজ্ঞেস করল :

‘কী বলাবলি করছ হে? কী চাও, কী?’

‘না মহারাজ, বিশেষ কিছুই না, তবে প্রধান সহিস ক্ষুদে ইভান বড় বুদ্ধিমান বড়াই করে বলছিল যে সে আপনি-বাজা বাদ্য, নাচিয়ে হাঁস আর রঙুড়ে বেড়াল এনে দিতে পারে। সেই নিয়েই আমাদের মধ্যে তর্ক হচ্ছিল, কেউ বলছিল আনতে পারবে, কেউ বলছিল কেবল বরফটাই।’

এই কথা শুনে রাজামশাইয়ের মুখের চেহারা হই বদলে গেল, হাত পা কাঁপতে লাগল। ভাবল, “আঃ, যদি একবার এই দুর্লভ জিনিসগুলো পাই, তবে সব রাজা আমায় হিংসে করবে। কত লোককে পাঠালাম কিন্তু একজনও ফিরে এল না!”

তক্ষুণি রাজা প্রধান সহিসকে ডেকে পাঠাল।

প্রধান সহিস আসামাত্রই চৈঁচিয়ে উঠল রাজা :

‘দেঁরি করো না ইভান, বেরিয়ে পড়ো, আপনি-বাজা বাদ্য, নাচিয়ে হাঁস আর রঙুড়ে বেড়াল এনে দাও।’

ক্ষুদে ইভান বড় বুদ্ধিমান বলল :

‘কি বলছেন মহারাজ, আমি তো এসব জিনিসের নাম কোনদিন কানেও শুনিনি, যাব কোথায়?’

রাজামশাই তা শুনে রেগে উঠে মাটিতে পা ঠুকে বলল :

‘কী, রাজার কথার ওপর কথা! যদি আনতে পারো তবে উপযুক্ত পুরস্কার পাবে, আর যদি না পারো তবে গর্দান যাবে।’

মনের দুঃখে উঁচু মাথা নিচু করে ফিরে এল ক্ষুদে ইভান। এসে তার সেই স্বর্ণকেশরী ঘোড়াকে লাগাম পরাতে লাগল। ঘোড়া জিজ্ঞেস করল :

‘কী কর্তা, মন খারাপ কেন, বিপদ কিছু হয়নি তো?’

‘মন খারাপ না করে কী করি বলো, রাজা বলেছেন আপনি-বাজা বাদ্য, নাচিয়ে হাঁস আর রঙুড়ে বিড়াল এনে দিতে হবে। আমি তো কোনদিন তাদের কথা কানেও শুনিনি।’

স্বর্ণকেশরী ঘোড়া বলল, ‘এ আর এমন কী ব্যাপার, আমার পিঠে চড়ে বসো, ডাইনি বুড়ি বাবা-ইয়াগার কাছে গিয়ে জেনে নেব, এসব আজব জিনিস কোথায় পাওয়া যেতে পারে।’

ক্ষুদে ইভান বড় বুদ্ধিমান তাই তখন দূর পাল্লায় পাড়ি দেবার জন্যে তৈরি হল। ঘোড়ায় উঠতে দেখা গেল, কিন্তু দেখাই গেল না তার ছুটে যাওয়া।

গেল সে অল্প পথ নাকি অনেক পথ, অল্পদিন নাকি অনেক দিন, এল এক গহন বনের মধ্যে, এমন আঁধার, দিনের আলো ঢুকতে পায় না। ঘুরতে ঘুরতে স্বর্ণকেশরী ঘোড়া তার রোগা হয়ে গেল, ক্ষুদে ইভান নিজেও কাহিল। বনের মধ্যে একটা ফাঁকা জায়গায় আসতেই দেখে এক মুরগির পা, পায়ের গোড়ালির বদলে একটা টাকু আর সেই পায়ের উপর একটা কুঁড়েঘর। কুঁড়েঘরটা পূব থেকে পশ্চিমে পাক খাচ্ছে। ক্ষুদে ইভান কুঁড়েঘরটার কাছে গিয়ে বলল :

‘কুঁড়েঘর, ও কুঁড়েঘর, বনের দিকে পিঠ ফিরিয়ে আমার দিকে মুখ করে দাঁড়াও। থাকতে আসিনি চিরকাল, রাত পোয়ালে যাব কাল।’

কুঁড়েঘর ইভানের দিকে মুখ করে দাঁড়াল। ক্ষুদে ইভান তার ঘোড়াটাকে একটা খুঁটিতে বেঁধে রেখে, সিঁড়ি বেয়ে উঠে এক ধাক্কায় দরজা খুলল। খুলে দেখে কী, না বাবা-ইয়াগা খেত্রাকাঠি পা, খাঁড়ার মত বেঁকে, নাকটা ছাতে ঠেকে, হামানদিস্তা পাশে, বুড়ি মিটিমিটি হাসে।

বাবা-ইয়াগা অতিথিকে দেখে খনখনিয়ে উঠল :

‘কতদিন যে শুনিনি কানে, আজ দেখি রুশি মোর এখানে। বলো তো কিসের জন্যে এসেছ?’

‘দিদিমা, এই কি তোমার অতিথি সৎকারের ধারা? খিদেয় ঠাণ্ডায় যে মরছে আগেই তাকে জিজ্ঞাসাবাদ ? আমাদের রুশ দেশে অতিথি এলে আগে তাকে খাইয়ে দাইয়ে স্নান করতে দেয়, জিরতে বলে, তারপর নামধাম, কেন, কী, সব বৃত্তান্ত জিজ্ঞেস করে।’

‘বাবা রে বাবা, আমি বুড়ি মানুষ, রাগ করো না বাছ। এদেশটা তো আর রাশিয়া নয়। দাঁড়াও বাবা, আমি এখুনি সব ব্যবস্থা করে দিচ্ছি।’



বুড়ি তাড়াতাড়ি সব জোগাড় যন্ত্র করতে লাগল। চর্ব্য-চোষ্য-লেখ্য-পেয় খাবার সাজাল টেবিলে, অতিথিকে ডেকে বসাল। তারপর দৌড়ে গেল গোসলের ঘরে চুল্লি জ্বালাতে। ক্ষুদে ইভান বড় বুদ্ধিমান খুব আরাম করে গরম জলে গোসল করে নিল। বাবা-ইয়াগা বিছানা পেতে দিলে, শোয়ালে ইভানকে, তখন বিছানার পাশে বসে তাকে জিজ্ঞেস করলে :

‘এবার বলো, তো সুজন? নিজের ইচ্ছেয় এসেছো, নাকি অনিচ্ছায় আসতে হয়েছে? কোথায় যাবে?’

ইভান বলল, ‘রাজামশাই আমায় পাঠিয়েছেন আপনি-বাজা বাদ্য, নাচিয়ে হাঁস আর রঙুড়ে বিড়াল আনতে। এগুলো কোথায় পাওয়া যায় যদি বলে দাও দিদিমা, তবে চিরকাল তোমার গুণ গাইব।’

‘ওগুলো কোথায় আছে, সে তো জানি বাছা, কিন্তু পাওয়া যে ভারি শক্ত। কত কুমার আনতে গেল, কিন্তু তাদের কেউ ফেরেনি।’

‘কিন্তু দিদিমা, যা হবার তা হবেই! বরং আমায় সাহায্য করো, কোথায় যাব বলে দাও।’

‘আহা বাছা রে, তোমার জন্যে দুঃখ হচ্ছে। দেখি তোমায় একটু সাহায্য করে। স্বর্গকেশরীকে রেখে যাও, আমার কাছে সে ভালই থাকবে। আর এই সুতোর গোলা নাও। কাল বেরবার সময় এই সুতোর গোলাটাকে মাটিতে ফেলে দিও, তারপর সুতোর গোলা যে দিকে গড়িয়ে যাবে সেদিকে যেও। এই ভাবে ভূমি আমার মেজো বোনের কাছে গিয়ে পৌঁছবে। সুতোর গোলা তাকে দেখালেই সে যা সন্ধান জানে বলে দিয়ে তোমায় সাহায্য করবে, তোমাকে আমাদের বড় বোনের কাছে পাঠিয়ে দেবে।’

পরের দিন বুড়ি তার অতিথিকে ভোর হবার আগেই তুলে দিয়ে খাইয়ে দাইয়ে এগিয়ে দিল। ক্ষুদে ইভান বড় বুদ্ধিমান বাবা-ইয়াগার কাছ থেকে বিদায় নিয়ে, ধন্যবাদ দিয়ে দূরের পথে পাড়ি দিল। বলতে সহজ কিন্তু করতে কঠিন। যাই হোক সুতোর গোলাটা গড়িয়েই চলে আর ক্ষুদে ইভান চলে তার পিছন পিছন।

একদিন যায়, দুদিন যায়, তিনদিন যায়, শেষকালে গোলাটা এসে থামল এক চড়াইয়ের পায়ের কাছে। পায়ের গোড়ালির বদলে একটা টাকু আর সেই পায়ের উপর একটা কুঁড়েঘর। ক্ষুদে ইভান বড় বুদ্ধিমান ডেকে বলল :

‘কুঁড়েঘর, ও কুঁড়েঘর, বনের দিকে পিঠ ফিরিয়ে আমার দিকে মুখ করে দাঁড়াও।’

সঙ্গে সঙ্গে কুঁড়েঘর ঘুরে দাঁড়াল। দরজা খুলতেই ইভান গুনতে পেল হেঁড়ে গলার আওয়াজ:

‘কতদিন যে শুনি নি কানে, রুশির গন্ধ পাইনি, মানুষের মাংস খাইনি। মানুষ আজ যে নিজেই হাজির। কী চাই তোমার?’

ক্ষুদে ইভান সুতোর গোলাটা দেখতেই সে অবাক হয়ে বলে উঠল :

‘আরে আরে, তুমি তো দেখি আমার বোনের কাছ থেকে আসছো, তবে তো তুমি পর নও, আদরের অতিথি। আগে বললেই পারতে।’

তারপর ব্যস্তসমস্ত হয়ে ছোট্ট ছোট্ট লাগাল বুড়ি। আর যত রাজ্যের ভাল ভাল খাবার মদ এনে টেবিলে সাজিয়ে অতিথিকে ডেকে বসাল।

বুড়ি বলল, ‘আগে খেয়ে দেয়ে জিরিয়ে নাও, তারপর কাজের কথা হবে।’

ক্ষুদে ইভান বড় বুদ্ধিমান তো পেট পুরে খেয়ে দেয়ে বিছানায় গুয়ে জিরোতে লাগল। আর বাবা-ইয়াগার মেজো বোন তার বিছানার পাশে বসে জিজ্ঞেস করতে লাগল সব বৃত্তান্ত। কে সে, কোথা থেকে আসছে, কোথায় যাবে; সব কথা তাকে বলল ক্ষুদে ইভান। শুনে টুনে বাবা-ইয়াগা বলল :

‘পথ তো বেশি দূরের নয়, তবে জানি না তুমি শেষ পর্যন্ত প্রাণে বেঁচে থাকবে কিনা। নাগ জন্মেই গরিনিচ হল আমাদের বোন-পো। আপনি-বাজা বাদ্য, নাচিয়ে হাঁস আর রঙুড়ে বিড়াল সব তারই সম্পত্তি। কত ভরণ কুমার গেছে, কিন্তু কেউ ফিরে আসে নি। সবাই নাগের হাতে মারা পড়েছে। এই নাগ আমার দিদির ছেলে। এই কাজে এখন দিদির সাহায্য চাই, নয় তো বাছা তুমিও প্রাণ নিয়ে ফিরে আসতে পারবে

না। আজ আমার যাদু দাঁড়কাককে পাঠাব, দিদিকে আগেই সাবধান করে দিতে হবে। যা হোক, এখন তুমি ঘুমোও, কাল খুব ভোরে ডেকে দেব।’

রাতটা ঘুমাল ক্ষুদে ইভান, ভোর বেলা উঠে হাতমুখ ধুল। বাবা-ইয়াগা তাকে খাইয়ে দাইয়ে হাতে একটা লাল পশমের গোলা দিয়ে পথ দেখিয়ে বিদায় নিল। গোলা চলল গড়িয়ে আর ইভান চলল তার পিছন পিছন।

সকাল থেকে সন্ধ্যা আর সন্ধ্যা থেকে সকাল—ইভান হেঁটেই চলেছে। ক্লান্ত হয়ে ইভান পশমের গোলাটা হাতে তুলে নিয়ে একটুকরো রুটি আর এক ঢোক ঝরণার জল খেয়ে নেয়, তারপর আবার হাঁটে।

তিন দিন পূর্ণ হলে গোলাটা একটা বড় বাড়ির সামনে এসে থামল। বারোটা পাথরের উপরে বাড়ি, বারোটা থামের উপর। চারিদিকে তার উঁচু বেড়া।

কুকুর ডেকে উঠতেই বাবা-ইয়াগাদের বড় বোন অলিন্দে দৌড়ে এল। কুকুরটাকে শান্ত করে সে বলল :

‘এসো এসো, বাছা, তোমার কথা আমি সবই জানি। আমার বোনের দূত, যাদু দাঁড়কাক, আমার কাছে এসেছিল। তোমার দায়-দুঃখে সাহায্য করার উপায় একটা করা যাবে। তার আগে বরং ঘরে ঢুকে খাওয়া দাওয়া সেরে নাও।’

খাওয়ালে, দাওয়ালে। তারপর বলল :

‘তোমার এখন লুকিয়ে থাকতে হবে—আমার ছেলে জ্‌মেই গরিনিচ-এর আসার সময় হয়ে গেল। বাড়ি ফেরার সময় ক্ষিদে তেঁটায় ওর মেজাজ একেবারে তিরিক্তি হয়ে থাকে। তোমায় আবার গিলে না খায়।’

বড় বোন মাটির নিচের শুদামঘরের দরজা খুলে দিল। বলল :

‘নিচে গিয়ে বসে থাকো। না ডাকলে এসো না।’

তারপর দরজা বন্ধ করতে না করতেই সে কী ছড়মুড় দুদাম আমওয়াজ। দড়াম করে দরজা খুলে ঘরে ঢুকল জ্‌মেই গরিনিচ। সারা ঘর কেঁপে উঠল।

‘রুশি মানুষের গন্ধ পাই যে!’

‘কী যে বলিস, বাবা, কতবছর হয়ে গেল একটা পাঁশুটে নেকড়েও আসে না, একটা ঝলমলে বাজও ওড়ে না, রুশি মানুষের গন্ধ আসবে কোথা থেকে? পৃথিবীময় টুঁড়ে বেড়াস, ও গন্ধ তুই-ই নিয়ে এসেছিস।’

একথা বলে বুড়ি টেবিল সাজাতে লেগে গেল। উনুন থেকে বার করল একটা তিনবছর বয়সের ষাঁড়ের রোস্ট, টেবিলে বসালে বড় এক বালতি মদ। জ্‌মেই গরিনিচ এক ঢোকে সবটা মদ শেষ করে আন্ত ষাঁড়ের রোস্টটা মুখে পুরে দিল। খেয়ে দেয়ে বড় ফুর্তি হল তার।

বলল, ‘মা, কার সঙ্গে একটু ফুর্তি করা যায় বলো তো, অন্তত গাধা পিটোপিটি তাস খেলবার একটা সঙ্গী থাকলেও হত!’

‘গাধা পিটোপিটি তাস খেলে ফুর্তি করে সময় কাটানোর মত একজন সঙ্গী আমি দিতে পারি, কিন্তু ওর কোনও অনিষ্ট করবি না তো?’

‘ভয় নেই মা, আমি তাকে কিছু করব না। কেবল ভয়ানক ইচ্ছে হচ্ছে একটু তাস খেলি, ফুর্তি করি।’

‘কিন্তু বাবা, যা বললি মনে রাখিস,’ এই বলে বাবা-ইয়াগা শুদামঘরের ডালা খুলে বলল :

‘খুদে ইভান বড় বুদ্ধিমান, উঠে এসো। বাড়ির কর্তাকে মান্য করে একটু তাস খেলো।’

তাই শুরু হল তাস খেলা। জ্‌মেই গরিনিচ বলল :

‘বাজি রইল যে জিতবে সে যে হারবে তাকে খেয়ে ফেলবে।’

সারারাত খেলা চলল। বাবা-ইয়াগার সাহায্য নিয়ে ভোর নাগাদ ক্ষুদে ইভান হারিয়ে দিল জ্‌মেই গরিনিচকে।

তখন জ্মেই গরিনিচ মিনতি করে বলল :

‘এ বাড়িতেই থেকে যাও সুজন। কাল সন্ধ্যায় ফিরে আসার পর আবার খেলব, দেখি জিতি কিনা।’  
এই বলে সে উড়ে চলে গেল। ক্ষুদে ইভান বড় বুদ্ধিমান সেই ফাঁকে পেট ভরে খেয়ে দিব্যি একটা ঘুম দিয়ে নিল। বাবা-ইয়াগা তাকে খাওয়াল দাওয়াল।

সূর্য ডোবার পর ফিরে এল জ্মেই গরিনিচ। একটা আস্ত ষাঁড়ের রোস্ট আর বড় বালতির দেড় বালতি মদ খেয়ে বলল :

‘এসো, এবার খেলা শুরু করা যাক। দেখো এবার আমি ঠিক জিতব।’

আবার শুরু হল তাস খেলা। কিন্তু কিছুক্ষণ পরেই জ্মেই গরিনিচ ঘুমে ঢুলে পড়তে লাগল। আগের রাতটা সে মোটে ঘুমোয়নি, সারা দিনমান কেবল পৃথিবীময় টুঁড়ে বেড়িয়েছে। ক্ষুদে ইভান সেই ফাঁকে বাবা-ইয়াগার দৌলতে খেলাটা আবার জিতে নিল। জ্মেই গরিনিচ বলল :

‘এবার আমায় কাজে বেরতে হবে, কিন্তু সন্ধ্যাবলা খেলা হবে বাজির তৃতীয় দফা।’

ক্ষুদে ইভান বড় বুদ্ধিমান বেশ ভাল করে ঘুমিয়ে টুমিয়ে জিরিয়ে নিল। আর ওদিকে জ্মেই গরিনিচ ফিরল একেবারে হয়রান হয়ে, দু’রাস্তির ঘুমোয়নি, তার ওপর সারাদিন পৃথিবীময় টুঁড়ে বেড়িয়েছে। একটা আস্ত ষাঁড়ের রোস্ট আর বড় বালতির দু’বালতি মদ খেয়ে সে তার অতিথিকে ডেকে বলল :

‘এসো কুমার, বসে যাও, এবার ঠিক জিতব।’

সে কিন্তু তখন ভারি ক্লান্ত। থেকে থেকেই ঘুমে ঢুলে পড়ছে। ক্ষুদে ইভান এবারেও জিতে গেল।

জ্মেই গরিনিচ তখন ভীষণ ভয় পেয়ে, হাঁটু গেড়ে বসে মিনতি করতে থাকে :

‘আমায় খেয়ে ফেলো না সুজন, মেরে ফেলো না! তুমি যা বলবে, তাই করব!’

মায়ের পাও জড়িয়ে ধরে, ‘ওকে বলো মা, আমায় যেন ছেড়ে দেয়!’

ক্ষুদে ইভান বড় বুদ্ধিমানের ঠিক এইটেই চাই।

‘বেশ, আমি তিনবার জিতেছি জ্মেই গরিনিচ। তার বদলে তুমি যদি আমায় আপনি-বাজা বাদ্য, নাচিয়ে হাঁস আর রগুড়ে বেড়াল এই তিনটে জিনিস দাও তবে মিটে যায়।’

জ্মেই গরিনিচ তো অহ্লাদে একেবারে আটখানা। তার অতিথি আর বুড়ি মাকে জড়িয়ে ধরে কী তার আদর।

‘এ তো আনন্দ করে দেব, ভবিষ্যতে আরও কত ভাল জিনিস জোগাড় করা যাবে।’

তারপর, কী আয়োজন, মহা ভোজন, ক্ষুদে ইভানকে আদর যত্ন করল জ্মেই গরিনিচ, তার সঙ্গে ভাই ভাই পাতালে। নিজে থেকেই বলল :

‘কেন মিছিমিছি আপনি-বাজা বাদ্য, নাচিয়ে হাঁস আর রগুড়ে বিড়াল বয়ে বয়ে তুমি হাঁটবে। কোথায় যাবে বলো, আমি একদণ্ডেই পৌঁছে দিচ্ছি।’

বাবা-ইয়াগা বলল, ‘এই তো কথার মত কথা, বাছা! অতিথিকে নিয়ে তুই সোজা চলে যা আমার ছোট বোন, তোর মাসীর কাছে। আর সেখান থেকে ফিরবার সময় তোর মেজো মাসীর সঙ্গেও দেখা করে আসতে ভুলিস না যেন। কতদিন তারা তোকে দেখেনি!’

সাস্ হল ভোজ, ক্ষুদে ইভান বড় বুদ্ধিমান তার ওই আজব জিনিসগুলো নিয়ে বাবা-ইয়াগার কাছ থেকে বিদায় নিল। জ্মেই গরিনিচ তাকে তুলে নিয়ে উড়ে চলল আকাশে। একঘণ্টার মধ্যেই বাবা-ইয়াগাদের সবচেয়ে ছোট বোনের বাড়িতে এসে পৌঁছল তারা। গৃহকর্তী অলিন্দে ছুটে এল, আনন্দ করে বরণ করলে অতিথিদের।

ক্ষুদে ইভান বড় বুদ্ধিমান সময় নষ্ট না করে স্বর্ণকেশরী ঘোড়ায় লাগাম পরিয়ে পিঠে চড়ে বসল। তারপর ছোট বোন বাবা-ইয়াগা আর জ্মেই গরিনিচের কাছ থেকে বিদায় নিয়ে ফিরে চলল নিজের দেশে।

স্কুদে ইভান যখন তার আজব জিনিসগুলোকে নিয়ে বহাল-তবীয়তে বাড়ি ফিরল, রাজার কাছে তখন অতিথি এসেছে: তিন জার আর তাদের তিন জারপুত্র, তিন বিদেশী রাজা আর রাজপুত্র, মন্ত্রীসামন্ত পাত্রমিত্র।

স্কুদে ইভান ঘরে ঢুকে রাজার হাতে দিল আপনি-বাজা বাদ্য, নাচিয়ে হাঁস আর রগুড়ে বেড়াল। রাজা তো ভারি খুশি। বলল :

‘স্কুদে ইভান বড় বুদ্ধিমান, কাজ করে দিয়েছ তুমি। এর জন্যে অনেক বাহবা তোমায়। পুরস্কারও দেব। এতদিন তুমি ছিলে প্রধান সহিস। আজ থেকে তুমি হলে আমার অমাত্য।’

কিন্তু মন্ত্রী আর সামন্তেরা নাক সিটকে নিজেদের মধ্যে বলবলি করতে লাগল :

‘একটা সহিস এসে কিনা আমাদের সঙ্গে একাসনে বসবে! ছি-ছি, কী লজ্জার কথা! রাজামশাই কী পেয়েছেন?’

ওদিকে কিন্তু আপনি-বাজা বাদ্য থেকে বাজনা শুরু হয়ে গেল, রগুড়ে বেড়াল তার সঙ্গে গান জুড়ল আর সেই তালে পা মেলাল নাচিয়ে হাঁস। এমন ফুর্তি লেগে গেল যে বসে থাকা যায় না। মান্যগণ্য অতিথিরাও লেগে গেল নাচতে।

সময় চলে যায় কিন্তু নাচ আর থামে না। জারদের রাজাদের মুকুট চলে পড়ে। জারপুত্র, রাজপুত্রেরা ঘুরে ঘুরে নাচে। মন্ত্রীসামন্তেরা ঘামে আর হাঁপায়, কিন্তু থামতে কেউ পারে না। তখন রাজা হাত নেড়ে বলল :

‘হয়েছে ইভান, রগড় থামাও। আমরা সব জেরবার হয়ে পড়েছি।’

স্কুদে ইভান তখন তিনটে আজব জিনিস থলিতে ভরে ফেলল, শান্তি হল সকলের।

অতিথিরা যে যেখানে ছিল সেখানেই সবাই ধুপধাপ্ বসে পড়ে খাবি খেতে লাগল।

‘সত্যিই মজা বটে, রগড় বটে, এমনটি আর কখনো দেখিনি!’

বিদেশী অতিথিরা সবাই হিংসে করতে লাগল। রাজার আর আনন্দ ধরে না।

‘রাজামহারাজারা সব এবার আমায় দেখে হিংসেয় জ্বলে পুড়ে মরবে। এমন জিনিস আর কারও নেই!’

মন্ত্রীসামন্তের দল কিন্তু বসে বসে ফুসফুস্ গুজগুজ করতে লাগল:

‘এই যদি চলতে থাকে, তবে তো শীগগিরই এই গৈয়ো ভূতটাই হয়ে উঠবে রাজ্যের সেরা মানুষ। রাজার চাকরিবাকরিগুলোও পাবে ওর গৈয়ো জাতভাইগুলো। এখনি যদি ওকে তাড়াবার ব্যবস্থা না করা যায় তবে আমাদের ভুঁইয়া-সামন্তদের কপালে মরণ আছে।’

তাই পরের দিন মন্ত্রীসামন্তেরা সব কী করে রাজার এই নতুন অমাত্যকে তাড়ান যায় তাই ভাবতে লাগল। বুড়ো একজন রায়বাহাদুর বলল :

‘নেশাখোর চৌকিদারটাকে ডেকে আনা যাক, সে এ সব ব্যাপারে গুস্তাদ।’

নেশাখোর চৌকিদার এসে কুর্নিশ করে বলল :

‘জানি হুজুর, কেন আমায় ডেকেছেন। আমায় যদি আধবালতি মদ খাওয়ান, তবে রাজার নতুন অমাত্যকে কী করে তাড়ান যায় বাতলে দিতে পারি।’

সবাই বলে উঠল, ‘বলো, বলো, আধবালতি মদ তুমি নিশ্চয়ই পাবে।’

গলা ভেজাবার জন্যে চৌকিদারকে এক পেয়ালা মদ দেওয়া হল। চৌকিদার তা খেয়ে বলল :

‘আমাদের রাজার চল্লিশ বছর হল বৌ মরে গেছে। তারপর থেকে তিনি সুন্দরী রাজকন্যা আলিওনাকে বিয়ে করবার জন্যে নানা চেষ্টা করে আসছেন, পারেন নি। তিন তিন বার তিনি রাজকন্যা আলিওনার রাজ্য আক্রমণ করেছেন। কত সৈন্য মারা গেছে। কিন্তু জয় করতে পারেন নি। সুন্দরী রাজকন্যাকে আনার জন্যে এই বার রাজা স্কুদে ইভানকে পাঠান। একবার গেলে আর ফিরতে হবে না।’

একথা শুনে মন্ত্রীসামন্তেরা ভারি খুশি। সকাল হতেই তারা রাজার কাছে গেল।

‘মহারাজ, খুব বুদ্ধি করে আপনি এই নতুন অমাত্যটিকে খুঁজে বের করেছেন। ঐ আজব জিনিসগুলো আনা কিছু সহজ কাজ নয়। কিন্তু এখন সে বড়াই করে বলছে সে নাকি সুন্দরী রাজকন্যা আলিওনাকেও হরণ করে আপনার কাছে এনে দিতে পারে।’

সুন্দরী রাজকন্যা আলিওনার নাম শুনেই আর রাজা স্থির থাকতে পারল না। সিংহাসন থেকে লাফিয়ে নেমে চেষ্টা করে উঠল :

‘ঠিক বলেছো, এতক্ষণ তো আমার খেয়াল হয়নি! সুন্দরী রাজকন্যা আলিওনাকে হরণ করতে হলে ওই আসল লোক।’

নতুন অমাত্যকে ডেকে বলল :

‘তিন নয়ের দেশ পেরিয়ে তিন দশের রাজ্যে গিয়ে সুন্দরী রাজকন্যা আলিওনাকে নিয়ে এসো।’

তা শুনে ক্ষুদ্রে ইভান বড় বুদ্ধিমান বলল :

‘হুজুর মহারাজ, রাজকন্যা তো আর আপনি-বাজা বাদ্য নয়, নাচিয়ে হাঁসও নয়, রঙুড়ে বেড়ালও নয়, থলেতেও তো পোরা যায় না। নিজেই হয়ত আসতেও চাইবে না।’

রাজা কিন্তু রাগে পা ঠুকল, হাত নাড়ল, দাড়ি ঝাড়া দিল। বলল :

‘তর্ক কর না! কোনও কথা শুনতে চাই না। যে করে পারো তাকে নিয়ে এসো। যদি সুন্দরী রাজকন্যা আলিওনাকে আনতে পারো, তবে তোমায় নগর উপনগর দান করব, তোমায় করে দেব আমার রাজ্যের মন্ত্রী। আর যদি না পারো, তবে তোমার গর্দান যাবে!’

রাজার কাছ থেকে ক্ষুদ্রে ইভান ফিরে এল গভীর দুঃখে, মাথায় একরাশ ভাবনা। স্বর্ণকেশরী ঘোড়াকে জিন পরাচ্ছে, ঘোড়া জিঞ্জেস করল :

‘কী ভাবছো, এত মনমরা কেন কর্তা? কোনও বিপদাপদ হয়নি তো?’

‘বিপদ বড় নয়, তবে খুশিরও কারণ নেই। সুন্দরী রাজকন্যা আলিওনাকে নিয়ে আসার জন্যে রাজা আমায় পাঠাচ্ছেন। নিজে তিনি তিন বছর ধরে রাজকন্যার জন্যে সশস্ত্র করেছেন, সশস্ত্র আর হয়নি, তিন বার যুদ্ধে গেছেন, জয় করতে পারেননি, আর এখন কিনা একলা আমায় পাঠাচ্ছেন নিয়ে আসতে।’

স্বর্ণকেশরী বলল, ‘এ আর এমন কী বিপদ, আমি তোমার সঙ্গে আছি, দুজনে মিলে ঠিক একটা ব্যবস্থা করে ফেলব।’

তাড়াতাড়ি তৈরি হয়ে বেরিয়ে পড়ল ক্ষুদ্রে ইভান। ঘোড়ায় উঠতে দেখা গেল, কিন্তু দেখাই গেল না তার ছুটে যাওয়া।

অনেকদিন নাকি অল্পদিন, অনেক দূর নাকি অল্প দূর—ঘোড়া ছুটিয়ে চলল, ইভান এসে পৌঁছল তিন নয়ের রাজ্যে। দেখে—এক মস্ত বেড়া পথ জুড়ে দাঁড়িয়ে। কিন্তু স্বর্ণকেশরী এক লাফে বেড়া পার হয়ে রাজার খাস বাগিচায় গিয়ে পড়ল। বলল :

‘আমি এবার একটা আপেল গাছ হয়ে দাঁড়িয়ে থাকব, তাতে সোনার আপেল ধরবে। তুমি আমার পিছনে লুকিয়ে থাকো। সুন্দরী রাজকন্যা আলিওনা কাল বেড়াতে এসে সোনার আপেল তুলতে আসবে, তখন তুমি চুপটি করে দাঁড়িয়ে থেকো না কিন্তু, খপ করে ধরে ফেলো, আমিও তৈরি থাকব। তারপর আর এক মুহূর্তও নষ্ট করো না—সোজা আমার পিঠে উঠে যেও, আমিও পালাব। কিন্তু মনে রেখো, ভুল করলে তুমি আমি কেউ বাঁচব না।’

পরের দিন সুন্দরী রাজকন্যা আলিওনা খাস বাগিচায় বেড়াতে এল। আপেল গাছটা দেখেই সে তার দাসিবাদি সখীসহচরীদের ডেকে বলল :

‘কী সুন্দর আপেল গাছ! আপেলও আবার সোনার! তোমরা একটু দাঁড়াও, আমি একটা আপেল পেড়ে নিয়ে আসি।’

রাজকন্যা দৌড়ে যেতেই ক্ষুদে ইভান হঠাৎ কোথা থেকে লাফিয়ে এসে সুন্দরী রাজকন্যার হাত চেপে ধরল। আপেল গাছটিও অমনি স্বর্ণকেশরী ঘোড়া হয়ে গিয়ে মাটিতে পা ঠুকে তাড়া দিল। সঙ্গে সঙ্গে ক্ষুদে ইভান আলিওনাকে নিয়ে উঠে বসল ঘোড়ার পিঠে। রাজকন্যার দাসিবাঁদি সখীসহচরীরা কিন্তু দেখতে পেল।

চিৎকার করে উঠল তারা, প্রহরীরা সব ছুটে এল, কিন্তু রাজকন্যার চিহ্ন নেই। রাজা সব শুনে প্রত্যেকটি পথে ঘোড়সওয়ারদের পাঠিয়ে দিল খোঁজ করতে। পরের দিন কিন্তু তারা সবাই খালি হাতে ফিরে এল। ঘোড়া ছোটানোই সার হল, চোরকে কেউ চোখেও দেখতে পেল না।

ক্ষুদে ইভান বড় বুদ্ধিমান ততক্ষণে বহু দেশ পেরিয়ে গেছে, নদী হ্রদ উজিয়ে গেছে।

সুন্দরী রাজকন্যা আলিওনা প্রথমটা নিজেই ছাড়াতে চেষ্টা করেছিল, শেষকালে শান্ত হয়ে কাঁদতে লাগল। একটু করে কাঁদে আর তরুণ কুমারকে চেয়ে দেখে, কাঁদে আর তাকায়। দ্বিতীয় দিন রাজকন্যা ক্ষুদে ইভানের সঙ্গে প্রথম কথা কইল :

‘বলো, কে তুমি, কোন দেশে বাড়ি, কোন বাহিনীর লোক? কোন কুলের ছেলে? কী বলে ডাকব, মান্য করব?’

‘আমার নাম ইভান, সবাই আমায় ক্ষুদে ইভান বড় বুদ্ধিমান বলে ডাকে। আমি অমুক রাজার অমুক রাজ্য থেকে আসছি, বাবা মা আমার চাষি।’

‘ক্ষুদে ইভান বড় বুদ্ধিমান, তুমি কি নিজের জন্যেই আমায় হরণ করেছো, নাকি কারো হুকুমে?’

‘আমাদের রাজার আদেশে তোমায় নিয়ে যাচ্ছি।’

তা শুনে সুন্দরী রাজকন্যা আলিওনা মাথার চুল ছিঁড়ে কাঁদতে শুরু করল :

‘ঐ হাঁদা বুড়োটাকে আমি কিছুতেই বিয়ে করব না! তিন বছর ধরে সশস্ত্র করেছি, সশস্ত্র হয়নি, তিনবার রাজ্য আক্রমণ করেছে, কত সৈন্য মারা পড়েছে, জয় করে নিতে পারেনি, এবারও আমায় ও কিছুতেই পাবে না।’

তরুণ কুমারের মনে লাগল কথাগুলো, কিন্তু কিছু বলল না। ভাবল: “আমার যদি এরকম একটি বৌ হত!”

কিছু কাল পরেই ইভান তার নিজের দেশে এসে পড়ল। বুড়ো রাজা এই কয়দিন জানলা ছেড়ে নড়েনি, কেবলি পথ চেয়ে দেখেছে কখন আসে ক্ষুদে ইভান বড় বুদ্ধিমান।

ইভান শহরে এসে পৌঁছতে না পৌঁছতেই রাজা একেবারে তার প্রাসাদের সিংহদ্বারে। ইভান রাজপ্রাঙ্গণে ঢুকতে না ঢুকতেই রাজা দৌড়ে এসে সুন্দরী রাজকন্যা আলিওনাকে নামাল তার ধবধবে হাত দুটি ধরে।

বলল, ‘কত বছর ধরে ঘটক পাঠিয়েছি, নিজে গিয়ে সশস্ত্র করেছি, কিন্তু তুমি কেবলি ফিরিয়ে দিয়েছ, কিন্তু এবার তো আমায় বিয়ে করতেই হবে।’

আলিওনা একটু হেসে বলল :

‘এতটা পথ এসে আমি কাহিল হয়ে পড়েছি, মহারাজ, একটু জিরিয়ে নিতে দিন, তারপর বিয়ের কথা বলবেন।’

রাজা হস্তদস্ত ব্যস্তসমস্ত হয়ে দাসিবাঁদি সখী সহচরীদের ডেকে পাঠাল :

‘এই আমার আদরের অতিথির জন্যে ঘর সাজিয়েছ তো?’

‘অনেকক্ষণ, মহারাজ।’

‘নাও, বরণ করো তোমাদের ভাবী মহারানিকে, যা বলবে সব শুনবে, কিছুই যেন অভাব না হয়!’

দাসিবাঁদি সখী সহচরীর দল তখন রাজকন্যাকে ঘরে নিয়ে গেল। ইভানকে রাজা বলল :

‘সাবাস, ইভান! এই কাজের জন্যে তুমি আমার প্রধানমন্ত্রী হবে, পুরস্কার পাবে তিনটি নগর তিন উপনগর।’

একদিন যায়, দুদিন যায়, রাজার আর ধৈর্য ধরে না। বিয়েটা না চুকিয়ে তার শাস্তি নেই। তাই সুন্দরী রাজকন্যা আলিওনাকে গিয়ে বলে :

‘কবে সবাইকে নিমন্ত্রণ করি, কবে হবে বিয়ে?’

রাজকন্যা বলল :

‘কিন্তু কী করে বিয়ে হবে, আমার না আছে বিয়ের আংটি, না আছে রথ?’

রাজা বলল, ‘ওঃ, এ তো কোন কথাই নয়, আমার রাজ্যে কত রথ, কত আংটি। তার একটাও যদি তোমার পছন্দ না হয়, তবে আমি সাগর পারে লোক পাঠাব, সেখান থেকে আনিবে দেব।’

‘না, মহারাজ, আমার নিজের রথ ছাড়া অন্য রথে আমি বিয়েই যাব না, আমার নিজের আংটি ছাড়া অন্য আংটি বদল করব না।’

রাজা তখন জিজ্ঞেস করল :

‘কিন্তু কোথায় তোমার আংটি, কোথায় বিয়ের রথ?’

‘আমার আংটি আছে ঝাঁপিতে, ঝাঁপি আছে আমার রথে, আর আমার রথ আছে বুয়ান দ্বীপের কাছে সমুদ্রের তলে। যতক্ষণ না তাদের আনতে পারছেন, ততক্ষণ বিয়ের কথা বলবেন না।’

রাজামশাই মুকুট খুলে মাথা চুলকাতে লাগল।

‘সমুদ্রের তল থেকে রথ? সে আনা যায় কী করে?’

‘সে ভাবনা আমার নয়। যে ভাবে পারেন আনুন,’ এই বলে রাজকন্যা আলিওনা তার ঘরে চলে গেল।

রাজা একা বসে রইল।

বসে বসে ভাবে আর ভাবে, হঠাৎ মনে পড়ে গেল ক্ষুদে ইভানের কথা।

‘ও ঠিক এনে দিতে পারবে!’

তক্ষুণি রাজা তাকে ডেকে পাঠিয়ে বলল :

‘ক্ষুদে ইভান বড় বুদ্ধিমান, বিশ্বাসী সেবক আমার। তুমি ছাড়া আর কেউ আমায় আপনি-বাজা বাদ্য, নাচিয়ে হাঁস আর রগুড়ে বেড়াল এনে দিতে পারেনি। তুমিই আমায় সুন্দরী রাজকন্যা আলিওনাকে এনে দিয়েছ। এখন আমার আরেকটা কাজ করে দিতে হবে—আলিওনার বিয়ের আংটি আর রথ এনে দাও। আংটি আছে ঝাঁপিতে, ঝাঁপি আছে রথে, রথ আছে বুয়ান দ্বীপের কাছে সমুদ্রের তলে। আংটি রথ যদি এনে দিতে পারো, তবে তোমাকে আমার রাজ্যের তিনভাগের একভাগ দিয়ে দেব।’

তা শুনে ক্ষুদে ইভান বড় বুদ্ধিমান বলল :

‘কিন্তু মহারাজ, আমি তো আর ভিমিমাছ নই, সমুদ্রের তল থেকে কী করে আংটি রথ নিয়ে আসব?’

রাজা রেগে উঠে পাঠকে চেঁচাল :

‘জানতে চাই না, শুনতে চাই না। রাজার কাজ হুকুম করা, তোমার কাজ তা পালন করা। জিনিসগুলো এনে দাও—পুরস্কার পাবে, না আনলে—গর্দান যাবে!’

ইভান তাই আশ্চর্যে ফিরে গিয়ে স্বর্ণকেশরীর পিঠে জিন চড়াতে লাগল। স্বর্ণকেশরী জিজ্ঞেস করল :

‘কোথায় যাবে কর্তা?’

‘আমি নিজেই তা এখনও জানি না, কিন্তু যেতে আমায় হবেই। রাজা হুকুম করেছেন, রাজকন্যার আংটি আর রথ নিয়ে আসতে হবে। আংটি আছে ঝাঁপিতে, ঝাঁপি আছে রথে, আর রথ আছে বুয়ান দ্বীপের কাছে সমুদ্রের তলে। তার খোঁজেই চলেছি।’

স্বর্ণকেশরী বলল :

‘একাজটাই হবে সবার কঠিন। পথ দূরের নয়, তবে, কী জানি কী হয়। রথটা কোথায় আছে তা জানি, কিন্তু পাওয়া সহজ নয়। আমি সমুদ্রের তলে গিয়ে রথ টেনে এনে তুলব। কিন্তু সাগরের ঘোড়াগুলো যদি আমায় দেখতে পায় তবে কামড়ে মেরে ফেলবে। সারা জীবনেও আমাকে দেখতে পাবে না, রথও না।’

ক্ষুদে ইভান বড় বুদ্ধিমান ভাবনায় পড়ে গেল। অনেক ভেবেচিন্তে শেষকালে বের করলে একটা উপায়। রাজাকে গিয়ে বলল :

‘মহারাজ, বারোটা ঘাঁড়ের ছাল, বারো পুদ আলকাতরামাখা দড়ি, বারো পুদ আলকাতরা আর একটা বড় কড়াই চাই আমার।’

রাজা বলল, ‘তোমার যা খুশি, যতটা ইচ্ছে নাও। কেবল তাড়াতাড়ি বেরিয়ে পড়ো কাজে।’

তরুণ বীর ইভান তখন গাড়িতে ঘাঁড়ের ছাল, দড়ি আর আলকাতরা ভরা বিরাট কড়াই চাপিয়ে তার সঙ্গে স্বর্ণকেশরী ঘোড়াকে যুতে বেরিয়ে পড়ল।

এসে পৌঁছল সমুদ্রের তীরে, রাজার খাস মাঠে। সেখানে নেমে স্বর্ণকেশরী ঘোড়াকে ঘাঁড়ের ছালগুলো দিয়ে ঢেকে, ছালগুলো দড়ি দিয়ে বেঁধে দিল।

‘সাগরের ঘোড়া তোমায় দেখতে পেলেও সহজে দাঁত বসাতে পারবে না।’

বারোটা ছালই সে জড়িয়ে দিল, বারো পুদ দড়ি দিয়ে তাদের বাঁধল। তারপর আলকাতরা গরম করে ঢেলে দিল—পুরো বারোটি পুদ আলকাতরা মাখালে ছালে দড়িতে।

স্বর্ণকেশরী বলল :

‘এখন আর আমার সাগরের ঘোড়াগুলোকে ভয় নেই, তুমি এই মাঠে আমার জন্যে তিনদিন অপেক্ষা করে থাকো। বসে বসে তোমার তারের বাজনাটা বাজাও, কখনও চোখ বুজো না কিন্তু।’

এই বলে স্বর্ণকেশরী সমুদ্রে ঝাঁপিয়ে পড়ে অদৃশ্য হয়ে গেল। আর ক্ষুদে ইভান বড় বুদ্ধিমান একা একা বসে রইল সমুদ্রের তীরে। একদিন গেল, দুদিন গেল, ইভানের চোখে ঘুম নেই, সে তার বাজনা বাজায় আর সমুদ্রের দিকে চেয়ে থাকে। তিনদিনের দিন কিন্তু ঢুলুনি এল ইভানের। যুমে সে চলে চলে পড়ে, বাজনাও আর তাকে জাগিয়ে রাখতে পারে না। যতক্ষণ পারল ঘুমের সঙ্গে প্রাণপণে যুঝল, কিন্তু শেষকালে আর না পেরে ঘুমিয়েই পড়ল।

কতক্ষণ ঘুমিয়েছে কে জানে, ঘুমের মধ্যে শোনে ঘোড়ার পায়ের শব্দ। ইভান চোখ মেলে দেখে কী, তারই স্বর্ণকেশরী রথ টেনে আনছে তীরে। আর ছ’টা স্বর্ণকেশরী সাগরের ঘোড়া ঝুলছে তার দুপাশে।

ক্ষুদে ইভান বড় বুদ্ধিমান তার ঘোড়ার কাছে দৌড়ে যেতেই ঘোড়া বলল :

‘তুমি যদি আমায় ঘাঁড়ের ছাল আর দড়ি বেঁধে আলকাতরা ঢেলে না দিতে, তবে আর আমায় দেখতে পেতে না, সাগরের ঘোড়ারা দল বেঁধে আমায় তেড়ে এসেছিল। ন’টা ছাল একেবারে কুটি কুটি করে ফেলেছে, আর দুটো ছিঁড়ে ফেলেছে। এই ছ’টা ঘোড়া দড়ি আর আলকাতরায় এমন জোর দাঁত আটকে গেছে যে ছাড়াতে পারে নি। ভালই হয়েছে, এরা তোমার কাজে লাগবে।’

তরুণ বীর ইভান তখন সাগরের ঘোড়াগুলোকে দড়িতে বেঁধে চাবুক বের করে তাদের শিক্ষা দিতে শুরু করল। ঘোড়াদের চাবুক মারে আর বলে :

‘মনিব বলে মানবি কিনা বল? আমার হুকুমে চলবি কিনা বল? নইলে তোদের পিটিয়ে মারব, নেকড়ের মুখে ছুঁড়ে দেব!’

সাগরের ঘোড়া ছ’টা তখন হাঁটু গেড়ে বসে ক্ষমা চাইতে লাগল :

‘কষ্ট দিও না বীর, মেরো না, যা বলবে সব আমরা শুনব। ধর্মমতে কাজ করব। বিপদে আপদে রক্ষা করব।’

তখন ইভান মার বন্ধ করে সাতটা ঘোড়াকেই গাড়ির সঙ্গে যুতে বাড়ি ফিরল। গাড়ি ছুটিয়ে এল একেবারে সিংহদরজার সামনে। স্বর্ণকেশরী ঘোড়াটা সমেত ছ’টা সাগরের ঘোড়াকে আস্তাবলে রেখে দিয়ে ক্ষুদে ইভান গেল রাজার কাছে।



‘মহারাজ, আপনার রথ নিন। গাড়ি-বারান্দার সামনে দাঁড়িয়ে আছে, ভেতরে তার যৌতুক।’

রাজার তখন আর ধন্যবাদ দেবারও তর সয় না। এক ছুটে রথ থেকে ঝাঁপিটি নিয়ে একবারে সুন্দরী রাজকন্যা আলিওনার কাছে।

‘আলিওনা, সখ তোমার মিটিয়েছি, সব ইচ্ছে পুরিয়েছি। তোমার ঝাঁপি, তোমার আংটি এনেছি। দেখো, বিয়ের রথ বাইরে দাঁড়িয়ে আছে। এবার বলো, কবে আমাদের বিয়ে হবে, কোন তারিখে নেমন্তন্ন করব?’

সুন্দরী রাজকন্যা উত্তর দিল :

‘বিয়ে করতে রাজি আছি, ভোজও শীগগিরই হতে পারে। তবে অমন শাদাচুলো বুড়ো আসবে বর হয়ে, সেটা আমার মন চাইছে না। লোকে নিন্দে করবে, দোষ ধরবে। দেখে হাসবে, বলবে, “একটা বুড়ো হাবড়ার কচি বৌ।” বুড়োর বউ পরের ধন। লোকের মুখের কথা, চাপা দেবে কে তা! তাই বলি, বিয়ের আগেই আপনি যদি আবার জোয়ান হয়ে যেতে পারেন, তাহলে সব দিক থেকেই ভাল।’

রাজা বলল :

‘জোয়ান হতে পারলে তো ভালই। তুমিই না হয় শিখিয়ে দাও কেমন করে হব। বুড়ো আবার ফিরে জোয়ান হয় এমন কথা তো রাজ্যের কেউ কখনও শোনেনি।’

সুন্দরী রাজকন্যা আলিওনা বলল :

‘তিনটে বড় বড় তামার কড়াই চাই। একটাতে থাকবে এক কড়াই ভর্তি দুধ, অন্য দুটোতে ঝরণার জল। একটা জলের কড়াই আর দুধের কড়াইটা আগুনে চড়াবেন। যেই ফুটতে আরম্ভ করবে অমনি আপনি প্রথমে লাফিয়ে পড়বেন দুধের কড়াইতে, তারপর গরম জলেরটাতে আর শেষকালে ঠাণ্ডা জলে। ডুব দিয়ে বেরিয়ে এলেই দেখবেন আপনি আবার কুড়ি বছরের সুন্দর জোয়ান হয়ে গেছেন।’

রাজা জিজ্ঞেস করল, ‘কিন্তু পুড়ে যাব না তো?’

‘আমাদের রাজ্যে একটিও বুড়ো নেই। সবাই এই ভাবে পুনর্যৌবন পায় কিন্তু কেউ তো কোনদিন পুড়ে যায় নি।’

রাজামশাই ফিরে গিয়ে আলিওনার কথামত সব জোগাড় যন্ত্র করল।

দুধ আর জল যখন টগবগ করে উঠল, রাজা তখন আর মন স্থির করতে পারে না। ভীষণ তার ভয়। কড়াই তিনটির চারদিকে কেবলি পায়চারি করে বেড়ায়। হঠাৎ তার মাথায় খেলল :

‘আরে, আমি এত ভাবছি কেন? আগে ক্ষুদে ইভান বড় বুদ্ধিমান ঝাঁপ দিয়ে চান করে আসুক, দেখি কী হয়। যদি ওর কিছু না হয় তাহলে পরে আমিও ডুব দেব। আর যদি পুড়েই যায় তাহলে কাঁদবার কিছু নেই। ওর ঘোড়া কটা আমার হয়ে যাবে, রাজ্যের তিন ভাগের এক ভাগও দিতে হবে না।’

এই ভেবে রাজা ক্ষুদে ইভানকে ডেকে পাঠাল :

‘হুজুর মহারাজ, আবার কী প্রয়োজন? আমি যে এখনও একটু জিরিয়ে নিতেও পারিনি।’

‘বেশিক্ষণ আটকাব না। তুমি কেবল একবার এই কড়াইগুলোতে ঝাঁপ দাও, ব্যস তারপর তোমার ছুটি।’

ক্ষুদে ইভান কড়াইগুলোর দিকে তাকাল। দুটো কড়াইতে জল আর দুধ ফুটছে। কেবল তৃতীয় কড়াইয়ের জল ঠাণ্ডা।

ইভান বলল, ‘বলেন কী মহারাজ, আপনি আমাকে জ্যাস্ত পুড়িয়ে মারতে চান নাকি? এই বুদ্ধি বিশ্বাসী কর্মচারীর পুরস্কার!’

‘আরে না না ইভান, কোন বুড়ো যদি ঐ কড়াইগুলোতে একবার করে ডুব দিতে পারে, ব্যস অমনি সে জোয়ান সুপুরুষ হয়ে যাবে।’

‘হুজুর মহারাজ, আমি তো এমনিতেই বুড়ো নই, জোয়ান হবার কী আছে আমার?’

ভীষণ রেগে গেল রাজা :

‘আচ্ছা বেয়াদব তো হে তুমি! আমার কথার ওপরে কথা। নিজের ইচ্ছেয় যদি ডুব না দাও তবে জোর করে দেওয়াব, যম দুয়ারে পাঠাব।’

ঠিক সেই সময় সুন্দরী রাজকন্যা আলিওনা ছুটে এল ঘর থেকে। সুযোগ বুঝে রাজার অলক্ষ্যে ফিসফিস করে ক্ষুদে ইভানকে বলল :

‘ঝাঁপ দেবার আগে তোমার সাগরের ঘোড়া আর স্বর্ণকেশরী ঘোড়াকে জানিয়ে দাও। তাহলে আর ভয় থাকবে না।’

রাজাকে বলল :

‘দেখতে এলাম যা বলেছি সব ঠিকঠাক আয়োজন করা হয়েছে কিনা।’

এই বলে রাজকন্যা এগিয়ে গিয়ে কড়াইগুলোর মধ্যে উঁকি মেরে দেখল।

বলল, ‘ঠিক আছে। এবার মহারাজ চান করে নিন। আমি বিয়ের জন্যে তৈরি হই গে।’

এই বলে রাজকন্যা ঘরে চলে গেল। ক্ষুদে ইভান বড় বুদ্ধিমান রাজার দিকে একবার চেয়ে বলল :

‘বেশ, রাজামশাই, শেষবারের মত আপনার সখ মেটাব। কী আর আছে করবার, মরবে মানুষ একবার। কেবল আমার স্বর্ণকেশরী ঘোড়াটাকে দেখে আসি। আমরা দুজন একসঙ্গে কত ঘুরে বেড়িয়েছি। কে জানে, হয়তো এই শেষ দেখা।’

‘যাও, কিছু বেশি দেরি করো না।’

ক্ষুদে ইভান তখন আস্তাবলে গিয়ে তার স্বর্ণকেশরী ঘোড়া আর ছ’টা সাগর ঘোড়ার কাছে সব কথা খুলে বলল। ঘোড়ারা বলল :

‘আমরা যেই একসঙ্গে তিনবার ডাকব অমনি তুমি নির্ভয়ে ঝাঁপ দিও।’

ইভান রাজার কাছে ফিরে গিয়ে বলল :

‘মহারাজ! আমি প্রস্তুত, এই মুহূর্তে ঝাঁপ দেব।’

ইভান সনতে পেল ঘোড়াগুলো ডাকছে—এক বার, দুই বার, তিন বার—তিনডাক শোণামাত্র ঝপাং—ইভান একেবারে গরম দুধের মধ্যে ঝাঁপিয়ে পড়ল। তারপর বেরিয়ে এসে গরম জলে লাফিয়ে পড়ল। আর সবশেষে ঠাণ্ডা জলে ডুব দিয়ে ইভান যখন বেরিয়ে এল তখন সে কী তার রূপ! সে রূপ বলার নয়, লেখার নয়, রূপকথাতেই পরিচয়।

রাজা ক্ষুদে ইভানকে দেখে আর ইতস্তত করল না। কোনক্রমে বেদির উপর উঠে গরম দুধে ঝাঁপ দিল, সিদ্ধ হতে থাকল সেখানেই।

সুন্দরী রাজকন্যা আলিওনা তখন পড়িমরি ছুটে এল। ক্ষুদে ইভান বড় বুদ্ধিমানের ধবধবে হাতটা তুলে নিয়ে আঙুলে পরিয়ে দিলে আংটিটা। মিষ্টি হেসে বলল :

‘তুমি আমায় রাজার হুকুমে হরণ করেছো। এখন তো আর রাজা নেই; এখন তোমার যা খুশি। ইচ্ছে হয় আমায় আবার ফিরিয়ে দিও, ইচ্ছে হয় কাছে রেখো।’


খুদে ইভান বড় বুদ্ধিমান সুন্দরী রাজকন্যার হাতটি ধরে বৌ বলে ডাকলে, আঙুলে তার নিজের আংটি পরিয়ে দিলে।

তারপর দূত পাঠিয়ে বাবা, মা, তার বত্রিশ ভাইকে বিয়ের নেমন্তুলে ডেকে আনলে গ্রাম থেকে।

কিছু পরেই রাজবাড়িতে এসে হাজির হল বত্রিশটি তরুণ বীর, আর তার বাবা আর মা।

বিয়ে হল, ভোজ হল। ক্ষুদে ইভান বড় বুদ্ধিমান আর তার সুন্দরী বৌ নিয়ে সুখেস্বচ্ছন্দে দিন কাটায়।

মা বাপের দেখাশোনা করে।



## মাছের আঙুরায়

এক যে ছিল বুড়ো। বুড়োর তিন ছেলে। দুজন ছিল খুব চালাক চতুর কিন্তু তৃতীয় জন হাঁদা ইয়েমেল্যা। বড় দু ভাই সারাক্ষণ কাজ করে আর ইয়েমেল্যা খালি চুল্লির তাকে শুয়ে থাকে, কোন কিছু শেখার আগ্রহ নেই। একদিন বড় ভাইয়েরা হাটে গেছে, তাদের দু'বৌ ইয়েমেল্যাকে বলল :

'ইয়েমেল্যা, যাও তো, জল নিয়ে এসো।'

ইয়েমেল্যা চুল্লির তাকে শুয়ে শুয়েই বলে :

'ইচ্ছে করছে না...'

'যাও ইয়েমেল্যা, নইলে কিন্তু দাদারা তোমার জন্যে হাট থেকে কিছু আনবে না, দেখো!'

'বেশ, তবে যাচ্ছি।'

তড়াক করে চুল্লি থেকে নেমে ইয়েমেল্যা জামা জুতো পরে বালতি কুড়াল নিয়ে নদীর দিকে চলল। নদীতে গিয়ে ইয়েমেল্যা কুড়াল দিয়ে বরফের গায়ে একটা গর্ত খুঁড়ে দু বালতি জল তুলল। তারপর বালতিদুটো নামিয়ে রেখে উঁকি দিয়ে দেখল বরফের গর্তের ভিতরে। দেখে কি, একটা মাছ। ধাঁ করে ইয়েমেল্যা মুঠোর মধ্যে মাছটাকে ধরে ফেলল।

'বাঃ, তোফা মাছের ঝোল হবে আজ!'

মাছটা হঠাৎ মানুষের গলায় বলে উঠল :

'ছেড়ে দাও, ইয়েমেল্যা, উপকার করব।'

ইয়েমেল্যা কিন্তু হেসে উঠল :

'তুমি আবার কী উপকার করবে? না হে বাপু, আমি তোমায় বাড়িতেই নিয়ে যাব, বৌদিদের বলব ঝোল বানিয়ে দিতে। চমৎকার ঝোল হবে।'

কিন্তু মাছটা আবার মিনতি করে বলতে লাগল :

'আমায় ছেড়ে দাও, ইয়েমেল্যা, তুমি যা চাও আমি তাই করব।'

ইয়েমেল্যা বলল, 'ঠিক আছে, তবে আগে দেখাও যে তুমি ফাঁকি দিচ্ছ না, তবে ছেড়ে দেব।'

‘মাছ বলল :

‘তুমি কী চাও, বলো।’

‘আমি চাই আমার বালতিদুটো নিজেরাই হেঁটে হেঁটে বাড়ি চলে যাক, কিন্তু এক ফোঁটা জলও যেন চলকে না পড়ে...’

মাছ বলল :

‘আমার কথা মনে রেখো, তোমার কিছু দরকার হলে কেবল বলো :

মাছের আঙ্জায়,

মোর ইচ্ছায়!’

ইয়েমেল্যা বলে উঠল :

‘মাছের আঙ্জায়,

মোর ইচ্ছায়—

বালতি, তোরা নিজেরা হেঁটে হেঁটে বাড়ি চলে যা তো!’

যেই না বলা, অমনি সত্যি সত্যি বালতি পাড় বেয়ে উঠতে শুরু করল। ইয়েমেল্যা মাছটাকে সেই বরফের গর্তে ছেড়ে দিয়ে বালতিদুটোর পিছন পিছন হাঁটতে লাগল।

বালতিদুটো গ্রামের পথ দিয়ে হেঁটে হেঁটে চলেছে। গ্রামবাসীরা সব অবাক। ইয়েমেল্যা কিন্তু হাসে আর বালতির পিছন পিছন আসে...বালতিদুটো সোজা ইয়েমেল্যার বাড়ি পর্যন্ত হেঁটে গিয়ে মাচার উপর উঠে বসল। ইয়েমেল্যাও তার চুল্লির তাকে উঠে গা গড়ালে।

গেল অনেক দিন নাকি অল্প দিন। বৌদিরা এসে আবার ইয়েমেল্যাকে বলে :

‘ইয়েমেল্যা, শুয়ে আছো যে? বরং কিছু কাঠ চালা কর।’

‘আমার ইচ্ছে করছে না...’

‘না গেলে কিন্তু হাট থেকে দাদারা তোমার জন্যে কিছু আনবে না।’

ইয়েমেল্যার মোটেই চুল্লির তাক ছেড়ে যাবার ইচ্ছে ছিল না। মাছের কথা মনে পড়ল তার, ফিস্ ফিস্ করে বলল :

‘মাছের আঙ্জায়,

মোর ইচ্ছায়—

যা কুড়াল গিয়ে কাঠ চালা কর আর চালা কাঠ, তোরা বাড়িতে ঢুকে চুল্লির মধ্যে লাফিয়ে পড়।’  
যেই না বলা, অমনি সত্যি সত্যি কুড়ালটা বেঞ্চির তল থেকে বেরিয়ে এসে উঠোনে কাঠ কাটতে লাগল, আর চালা কাঠগুলোও সার বেঁধে নিজেরাই ঘরের মধ্যে ঢুকে চুল্লিতে লাফিয়ে পড়তে লাগল।

অনেকক্ষণ নাকি অল্পক্ষণ। বৌদিরা আবার এসে ইয়েমেল্যাকে বলল :

‘একটুও কাঠ নেই, ইয়েমেল্যা, যাও বনে গিয়ে কিছু কাঠ কেটে আনো।’

ইয়েমেল্যা চুল্লির ওপর থেকে বলে :

‘তোমরা রয়েছে কী করতে?’

‘কী বলছো তুমি, ইয়েমেল্যা? বনে গিয়ে কাঠ কাটা কি আমাদের কাজ?’

‘আমার ইচ্ছে করছে না...’

‘তবে কোনও জিনিসও পাবে না।’

কী আর করে, ইয়েমেল্যা চুল্লির তাক থেকে নেমে এসে জুতো জামা পড়ে দড়ি আর কুড়াল নিয়ে উঠোনে গেল। তারপর স্নেজে চড়ে চৌঁচিয়ে উঠল :

‘ফটক খুলে দাও!’

বৌদিরা বলল :

‘করছো কী হাঁদারাম, স্নেজে বসেছো ঘোড়া জোতেনি?’

‘ঘোড়া টোড়ার দরকার নেই আমার।’ বৌদিরা ফটক খুলে দিল আর ইয়েমেল্যা ফিস্ফিস্ করে বলল :

‘মাছের আঙ্জায়,  
মোর ইচ্ছায়—

‘যা স্নেজ, চলে যা বনে...’

যেই না বলা, আমনি সত্যি সত্যি স্নেজটা এমন জোরে ফটক পার হয়ে দৌড়তে লাগল, যে ঘোড়া ছুটিয়েও তার নাগাল পাওয়া ভার।

বনের পথটা গেছে এক শহরের মধ্যে দিয়ে, স্নেজটা যে কত লোককে উল্টে ফেলে দিল, কত লোককে চাপা দিল, তার আর ইয়ত্তা নেই। শহরের লোক সব ‘ধরো, ধরো, পাকড়ো, পাকড়ো!’ করে চেষ্টা করে উঠল। ইয়েমেল্যা কিন্তু তোয়াক্কাই করল না, কেবল স্নেজটাকে আরও জোর ছোটাল। বনে এসে সে বলে :

‘মাছের আঙ্জায়,  
মোর ইচ্ছায়—

যা কুড়াল, কিছু শুকনো দেখে ডাল কেটে নিয়ে আয় আর কাঠরা, তোরা স্নেজে উঠে আপনা থেকেই বাঁধা হয়ে যা...’

যেই না বলা, আমনি সত্যি সত্যি কুড়াল খটখট খটখট—শুকনো কাঠ কাটতে লেগে গেল, আর কাঠগুলোও একটার পর একটা স্নেজে উঠে দড়ি বাঁধা হয়ে যেতে লাগল। ইয়েমেল্যা তখন কুড়ালকে একটা ভীষণ ভারি মুণ্ডর কেটে দিতে হুকুম করল। এমন ভারি যেন তুলতে কষ্ট হয়। তারপর সেই কাঠের বোঝার উপর বসে বলল :

‘মাছের আঙ্জায়,  
মোর ইচ্ছায়—

‘চল্ স্নেজ, বাড়ি চল!’

স্নেজটাও ছুটল বাড়িমুখে। যে শহরটার অনেক লোককে সে আসার সময় চাপা দিয়েছিল, তারা তো লাঠি সোঁটা নিয়ে তৈরি—কখন সে ফেরে। ইয়েমেল্যাকে তারা ধরে স্নেজ থেকে টেনে নামিয়ে গাল দেয়, পিটোয়।

ব্যাপার সঙ্গীন দেখে ইয়েমেল্যা ফিস্ফিস্ করে বলে উঠল :

‘মাছের আঙ্জায়,  
মোর ইচ্ছায়—

‘আয় মুণ্ডর, দে ব্যাটাদের হাড় গুঁড়িয়ে...’

মুণ্ডরও অমনি লাফিয়ে উঠে দে পিটুনি। শহরের লোক দে ছুট। ইয়েমেল্যা তখন বাড়ি ফিরে আবার চুল্লির তাকে উঠে শুয়ে পড়ল।

অনেক দিন নাকি অল্প দিন—ইয়েমেল্যার কীর্তির কথা রাজার কানে গেল। রাজপ্রাসাদে তাকে নিয়ে যাবার জন্যে লোক পাঠাল রাজা।

রাজার লোক এল ইয়েমেল্যার গ্রামে । তার কুঁড়েঘরে ঢুকে জিজ্ঞেস করল :

‘তুমিই কি হাঁদা ইয়েমেল্যা?’

চুল্লির তাকের উপর থেকেই ইয়েমেল্যা বলে :

‘তোমার তাতে কী?’

‘তাড়াতাড়ি জামাকাপড় পরে নাও, তোমায় রাজার বাড়ি নিয়ে যাব ।’

‘আমার ইচ্ছে করছে না...’

রাজার লোকটা রেগে গিয়ে ইয়েমেল্যার গালে মারলে এক চড় । ইয়েমেল্যা তখন ফিস্ফিস্ করে বলল :

‘মাছের আঞ্জায়,

মোর ইচ্ছায়—

দে তো মুগুর হাড় গুঁড়িয়ে...”

সঙ্গে সঙ্গেই মুগুর লাফিয়ে উঠে এমন মার মারল যে লোকটা কোনক্রমে পালিয়ে বাঁচল ।

রাজার পেয়াদা ইয়েমেল্যাকে কাবু করতে পারেনি শুনে রাজা গেল অবাক হয়ে । মহাসামন্তকে ডেকে বলল :

‘হাঁদা ইয়েমেল্যাকে খুঁজে পেতে আমার কাছে ধরে আনা চাই, নইলে তোমার গর্দান যাবে ।’

রাজার মহাসামন্ত কিশমিশ, খেজুর আর মিষ্টি-রুটি কিনে নিয়ে সেই সে গ্রামের সেই সে বাড়িতে এসে বৌদিদের কাছে জিজ্ঞেস করল ইয়েমেল্যা সবচেয়ে কী ভালবাসে ।

ওরা বলল, ‘ইয়েমেল্যা চায় মিষ্টি কথা । ওর সঙ্গে যদি ভাল ব্যবহার করেন, লাল কাফতান উপহার দেন, তবে যা বলবেন ও তাই করে দেবে ।’

মহাসামন্ত তখন ইয়েমেল্যাকে সেই সব কিশমিশ, খেজুর, মিষ্টি-রুটি দিয়ে বলল :

‘ইয়েমেল্যা, ও ইয়েমেল্যা, কেন শুধু শুধু চুল্লির তাকে শুয়ে আছো ? চল না আমার সঙ্গে রাজার বাড়ি যাই ।’

ইয়েমেল্যা বলল, ‘এখানেই বেশ আছি...’

‘ইয়েমেল্যা, ও ইয়েমেল্যা, রাজামশাই তোমায় কত ভালমন্দ খাওয়াবেন । চল যাই ।’

‘আমার ইচ্ছে করছে না...’

‘ইয়েমেল্যা, ও ইয়েমেল্যা, রাজামশাই তোমায় দেবেন একটা লাল কাফতান, টুপি, জুতো ।’

ইয়েমেল্যা ভেবে চিন্তে বলল :

‘ঠিক আছে, আপনি আগে আগে চলে যান, আমি পরে আসছি ।’

মহাসামন্ত ঘোড়ায় চড়ে চলে গেল, ইয়েমেল্যা চুল্লীর তাকে আরও কিছুক্ষণ শুয়ে থেকে বলল :

‘মাছের আঞ্জায়,

মোর ইচ্ছায়—

চল চুল্লি, আমায় রাজার বাড়ি নিয়ে চল!’

যেই না বলা, অমনি ঘরের কোণ ফেটে গেল, বাড়ির চাল নড়ে উঠল, একদিকের দেয়াল ধসে পড়ল আর চুল্লিটা নিজে নিজেই বেরিয়ে পড়ে সোজা পথ ধরে রওনা দিল রাজবাড়ির দিকে ।

রাজামশাই তো জানলা দিয়ে বাইরে তাকিয়ে অবাক ।

‘ওটা কী ব্যাপার?’

মহাসামন্ত বলল :

‘আজ্ঞে, ঐ তো ইয়েমেল্যা, তার চুল্লিতে চড়ে আপনার প্রাসাদে আসছে ।’

রাজামশাই অলিন্দে এসে বলল :

‘শোনো ইয়েমেল্যা, তোমার নামে অনেক নালিশ এসেছে। অনেক লোককে স্নেজ চাপা দিয়েছে তুমি।’

‘ওরা আমার স্নেজের নিচে পড়ল কেন?’

রাজার মেয়ে রাজকন্যা মারিয়া সেই সময় জানলা দিয়ে তাকিয়ে দেখছিল তাকে। ইয়েমেল্যা দেখেই ফিস্‌ফিস্‌ করে বলল :

‘মাছের আঞ্জায়,  
মোর ইচ্ছায়—

রাজার মেয়ে আমায় ভালবাসুক...’

তারপর বলল, ‘চল চুল্লি, বাড়ি চল!’

চুল্লিটা ঘুরে সোজা ইয়েমেল্যার গ্রামে পৌঁছে গেল। তারপর বাড়ি ঢুকে ঠিক নিজের জায়গাটিতে দাঁড়িয়ে পড়ল। ইয়েমেল্যাও শুয়ে রইল আগের মত।

ওদিকে রাজবাড়িতে তখন কান্নাকাটি পড়ে গেছে। রাজকন্যা মারিয়া ইয়েমেল্যার জন্যে অস্থির, ওকে নইলে বাঁচবে না। রাজাকে সে কত করে বলতে লাগল ইয়েমেল্যার সঙ্গে বিয়ে দিক। বিপদে পড়ে গেল রাজা। মনের দুঃখে শেষে তার মহাসামন্তকে ডেকে বলল :

‘যাও, ইয়েমেল্যাকে নিয়ে এসো। জ্যাক্ত মরা যে ভাবে পাও, নইলে তোমার গর্দান যাবে।’

মহাসামন্ত তো আবার নানারকম সুন্দর সুন্দর খাবার দাবার, মিষ্টি মদ নিয়ে রওনা হল। সেই সে গ্রামের সেই সে বাড়িতে গিয়ে রাজভোজ খাওয়াতে লাগলো ইয়েমেল্যাকে।

ইয়েমেল্যা পান করল, ভোজন করল, বেইশ হয়ে ঘুমিয়ে পড়ল। মহাসামন্ত তখন ঘুমন্ত ইয়েমেল্যাকে গাড়িতে তুলে নিয়ে সোজা চলে গেল রাজার কাছে।

রাজামশাই তখন একটা মস্ত লোহা—লাগান পিপে নিয়ে আসার হুকুম দিল। ইয়েমেল্যা আর রাজকন্যা মারিয়াকে ভিতরে পুরে পিপেটা আলকাতরা মাখিয়ে ভাসিয়ে দেওয়া হল সমুদ্রে।

বহুক্ষণ নাকি অল্পক্ষণ, কে জানে। ঘুম ভেঙে ইয়েমেল্যা দেখে—চারিদিকে চাপাচাপি, অন্ধকার।

‘কোথায় আমি?’

উত্তর এল, ‘আমাদের কপাল খারাপ, আমার আদরের ইয়েমেল্যা! ওরা আমাদের একটা আলকাতরা মাখানো পিপেতে পুরে নীল সমুদ্রে ভাসিয়ে দিয়েছে।’

ইয়েমেল্যা জিজ্ঞেস করল, ‘তুমি কে?’

‘আমি রাজকন্যা মারিয়া।’

ইয়েমেল্যা বলল :

‘মাছের আঞ্জায়,  
মোর ইচ্ছায়—

আয় তো রে ঝড়ের হাওয়া পিপেটাকে নিয়ে যা শুকনো তীরে, হলুদ বালিতে...’

যেই না বলা, অমনি জোর হাওয়া উঠল, সমুদ্রের বুক দুলে উঠল, আর পিপেটা গিয়ে ঠেকল শুকনো তীরে, হলুদ বালিতে। ইয়েমেল্যা আর রাজকন্যা মারিয়া বেরিয়ে এল বাইরে। রাজকন্যা বলল :

‘খাকব কোথায়, ইয়েমেল্যা ? তুমি যেমন হোক একটা ঘর তোল।’

‘আমার ইচ্ছে করছে না...’

রাজকন্যা তখন অনেক সাধ্যসাধনা করল। ইয়েমেল্যা বলল :

‘মাছের আজ্ঞায়,

মোর ইচ্ছায়—

এক্ষণি এখানে সোনার ছাদওয়ালা একটা পাথরের প্রাসাদ হয়ে যাক...’

বলতে না বলতেই সোনার ছাদওয়ালা একটা চমৎকার পাথরের প্রাসাদ হয়ে গেল তাদের চোখের সামনে। চারদিকে তার সবুজ বাগান : ফুল ফুটছে, পাখি গাইছে। রাজকন্যা মারিয়া আর ইয়েমেল্যা প্রাসাদের ভিতর ঢুকে জানলার পাশে বসল।

রাজকন্যা বলল, ‘আচ্ছা ইয়েমেল্যা, খুব সুন্দর হয়ে যেতে পার না তুমি?’ ইয়েমেল্যার ভাবার কিছু ছিল না। বলে উঠল :

‘মাছের আজ্ঞায়,

মোর ইচ্ছায়—

হয়ে যাই যেন বীর তরুণ, রূপে অরুণ...’

অমনি এমন সুন্দর হয়ে উঠল ইয়েমেল্যা যে সে রূপ বলার নয়, কওয়ার নয়, কলম, দিয়ে লেখার নয়। এদিকে হয়েছে কী, ঠিক সেই সময় রাজামশাই শিকার করতে এসে দেখে, আগে যেখানে কিছু ছিল না সেখানে একটা মস্ত প্রাসাদ।

‘কার এত বড় আশ্পর্ধা, আমার অনুমতি না নিয়ে আমার জমিতে বাড়ি বানায়!’

সঙ্গে সঙ্গে দূত ছুটল খোঁজখবর করতে : কে লোকটা।

দূতেরা ছুটে গিয়ে জানলার নিচ থেকে জিজ্ঞাসাবাদ করে।

ইয়েমেল্যা বলে :

‘রাজামশাই আমার ঘরে অতিথি আসুন, আমি নিজে তাঁকে বলব।’

রাজামশাই অতিথি এল, ইয়েমেল্যা তাকে বরণ করে নিয়ে এল পুরীতে, টেবলে বসাল। শুরু হল ভোজ। রাজামশাই চর্ব্য-চোষ্য-লেখ্য-পেয় খায় আর অবাধ হয়ে যায়। শেষকালে আর থাকতে পারল না। জিজ্ঞেস করল :

‘কে তুমি তরুণ বীর?’

ইয়েমেল্যা বলল, ‘হাঁদা ইয়েমেল্যাকে আপনার মনে আছে? সেই যে চুল্লির মাথায় চড়ে আপনার সঙ্গে দেখা করতে এসেছিল। তাকে আর রাজকন্যা মারিয়াকে আলকাতরা মাখা পিপেতে পুরে সমুদ্রে ভাসিয়ে দিয়েছিলেন? আমিই সেই ইয়েমেল্যা। ইচ্ছে করলে আপনার সমস্ত রাজত্বটা জ্বালিয়ে পুড়িয়ে ছারখার করতে পারি আমি।’

রাজামশাই ভীষণ ভয় পেয়ে গিয়ে ইয়েমেল্যার কাছে ক্ষমা চাইতে লাগল। বলল :

‘আমার মেয়েকে বিয়ে কর ইয়েমেল্যা, আমার রাজত্ব ভোগ কর, কিন্তু প্রাণে মেরো না!’

অমনি, কী আয়োজন, পান ভোজন। রাজকন্যা মারিয়াকে বিয়ে করে। সুখেস্বচ্ছন্দে রাজত্ব করতে লাগল ইয়েমেল্যা। কাহিনী হল সারা, গুনল লক্ষ্মী যারা।





## নিকিতা কজেম্যাকা

একবার কিয়েভের কাছে এক নাগের উৎপাত শুরু হল। লোকের কাছ থেকে সে ভেট নিত কম নয় : প্রত্যেক ঘর থেকে একটি করে সুন্দরী মেয়ে। মেয়েটিকে নিত আর খেয়ে ফেলত।

এবার রাজার মেয়ের পালা। রাজকন্যাকে ধরে নিয়ে নাগ এল তার গুহায়। কিন্তু খেলে না, রাজকন্যা খুবই সুন্দরী, বিয়ে করে নিল। নাগ চলে যায় তার কাজে, রাজকন্যাকে দরজা বন্ধ করে রাখে যেন পালাতে না পারে।

রাজকন্যার একটা কুকুর ছিল। রাজকন্যার পিছু পিছু এসেছিল কুকুরটা। রাজকন্যা বাবা-মা'র কাছে ছোট একটা করে চিঠি লিখে কুকুরের গলায় বেঁধে দেয়, আর কুকুরটা যেখানে যাবার ছুটে যায়, উত্তর নিয়ে আসে। একদিন রাজা আর রানি রাজকন্যাকে লিখে পাঠাল, রাজকন্যা যেন জেনে নেয় নাগের চেয়েও শক্তিশালী কে।

রাজকন্যা নাগের সঙ্গে মিষ্টি ব্যবহার করতে থাকে, জানতে চেষ্টা করে নাগের চেয়ে কে বলবান। অনেক দিন নাগ কিছু বলেনি, শেষ পর্যন্ত বলেই ফেলল, কিয়েভে নিকিতা কজেম্যাকা\* আছে, তার গায়ে নাগের চেয়েও জোর। রাজকন্যা সে কথা শুনে রাজাকে লিখে পাঠাল : “নিকিতা কজেম্যাকাকে কিয়েভ শহরে খুঁজে বের করে আমায় উদ্ধারের ব্যবস্থা করুন।”

খবর পেয়ে রাজা তক্ষুণি নিকিতা কজেম্যাকাকে খুঁজে বের করে নিজেই তাকে অনুরোধ করল নাগের কবল থেকে যেন সে তার রাজত্ব আর তার কন্যাকে উদ্ধার করে।

রাজা যখন নিকিতার বাড়ি গেল, নিকিতা তখন চামড়া দলাই করছে, হাতে তার বারোট চামড়া। স্বয়ং রাজা আসছে তার কাছে এই দেখে নিকিতা ভয়ে এমন কাঁপতে লাগল যে, তার বারোট চামড়া ছিঁড়ে গেল। একেই রাজা তাকে ভয় পাইয়ে দিয়েছিল, তাতে এই লোকসান, ভারি রাগ হয়ে গেল নিকিতার, রাজারাণীর

\* কজেম্যাকা মানে চামার।

হাজার অনুরোধ সত্ত্বেও কিছুতেই নাগ মেরে রাজকন্যাকে উদ্ধার করতে যেতে রাজি হল না।

তখন, পাষণ্ড নাগের উৎপাতে যারা অনাথ হয়েছে তেমন পাঁচহাজার শিশুকে পাঠান হল নিকিতার কাছে। তারা মিনতি করে বলবে নিকিতা যেন রুশ দেশকে এই মহা বিপদ থেকে বাঁচায়।

অনাথ শিশুর দল নিকিতার কাছে গিয়ে তাদের জল ভরা চোখ তুলে নাগ মারবার জন্যে অনুরোধ করতে লাগল। অনাথের চোখের জল দেখে নিকিতার মন করুণায় ভরে গেল। তিনশ' পুদ শণের দড়ি নিয়ে তাতে আলকাতরা মাখাল নিকিতা। নাগের কামড় থেকে বাঁচবার জন্যে বেশ করে নিজের শরীর বেড়ে তা বেঁধে নিল। তারপর চলল লড়াই করতে।

নিকিতা এল নাগের গুহার কাছে। নাগ ওদিকে ছড়কো লাগিয়ে বসে আছে গুহায়, কিছুতেই বেরতে চায় না।

নিকিতা হাঁকল, 'শীগগির বেরিয়ে আয়, খোলা মাঠে লড়ব, নইলে গুহা তোর ভেঙ্গে গুঁড়িয়ে দেব এখনি।' বলে দরজা ভাঙতে শুরু করে দিল নিকিতা।

নাগ দেখল বিপদ, কী আর করে, বেরিয়ে এসে খোলা মাঠে নিকিতার সঙ্গে লড়াই শুরু করল। অনেক দিন নাকি অল্প দিন, কতদিন লড়াই চলল, শেষ পর্যন্ত নাগকে ভূপাতিত করল নিকিতা, নাগ মিনতি করতে লাগল :

'একেবারে প্রাণে মেরে ফেলো না, নিকিতা। সারা পৃথিবীতে তোমার আর আমার মত শক্তি আর কারো নেই। চলো আমরা পৃথিবীটা দু'ভাগে ভাগ করে নিই। এক অংশে থাকবে তুমি, অন্য অংশে আমি।'

নিকিতা রাজি হয়ে বলল, 'বেশ, কিন্তু আগে সীমানা ঠিক করা চাই।'

নিকিতা তখন একটা তিনশ' পুদ ওজনের লাঙল বানিয়ে সেটা নাগের ঘাড়ে যুতে মাটি ফেড়ে দাগ দিতে লাগল। সে দাগ গেল কিয়ত থেকে কাভ্রিয়ান সমুদ্র পর্যন্ত।

নাগ বলল, 'কী এবার সারা পৃথিবীটা ভাগ হয়েছে তো?'

নিকিতা বলল, 'মাটি ভাগ হয়েছে বটে, এবার সমুদ্রটাও ভাগ করব, নয়ত কে জানে, তুই হয়ত বলবি আমি তোর জল নিয়ে নিচ্ছি!'

নাগ যখন মাঝ সমুদ্র অবধি গেছে তখন নিকিতা তাকে মেরে তার শরীরটা সমুদ্রে ডুবিয়ে দিল।

নিকিতার পূণ্য কাজ শেষ হল। কাজের জন্যে কিছু সে নিল না। বাড়ি ফিরে আবার সে চামড়ার কাজে লেগে গেল।



## ইলিয়া মুরমেৎসের প্রথম অভিযান

অনেক অনেক বছর আগে মুরম শহরের কাছে, কারাচারোভো গ্রামে এক চাষি থাকত, তার নাম ইভান তিমোফেয়েভিচ। বৌয়ের নাম ইয়েফ্রোসিনিয়া ইয়াকোভলেভনা। তাদের একটি মাত্র ছেলে, ইলিয়া।

ইলিয়া একদিন সাজগোজ করে মা-বাবাকে বলল :

‘বাবা-মা শোনো, রাজধানী কিয়েভ নগরে যাব রাজা ভ্লাদিমিরের কাছে। ধর্মমতে জন্মভূমি রাশিয়ার সেবা করব। শত্রুর হাত থেকে রুশ মাটিকে বাঁচাব।’

বুড়ো বাপ ইভান তিমোফেয়েভিচ বলল :

‘তোমার ভাল কাজে আমার আশীর্বাদ রইল, মন্দ কাজে নয়। সোনাদানার জন্যে নয়, লাভের আশায় নয়, রুশ দেশকে রক্ষা করবে ইমানের নামে, বীরের গৌরবে। বিনা কারণে মানুষের রক্তপাত করো না; মায়ের চোখে জল ঝরিয়ে না; ভুলে যেও না তুমি চাষীর ছেলে, মাটির ছেলে।’

আভূমি কুর্নিশ করে ইলিয়া ঘোড়ায় লাগাম পরাতে চলে গেল। ঘোড়ার নাম ঝাঁকড়া-লোমো। ইলিয়া জিনের কাপড়টা ঘোড়ার পিঠে ফেলল, তার ওপর দিল আস্তুর, তারপর সেই চেরকেসীয় জিনটা। তার বারোটি বন্ধনী রেশমের, আর তেরটা লোহার। শোভার জন্যে নয়, মজবুতির জন্যে।

ইলিয়ার ইচ্ছে হল নিজের শক্তিটা একবার পরীক্ষা করে দেখে।

ঘোড়া ছুটিয়ে ইলিয়া ওকা নদীর তীরে গেল। নদীর পাড়ের উঁচু পাহাড়টায় কাঁধ ঠেকিয়ে ঠেলে দিল জলের মধ্যে। সে পাহাড়ে নদীর খাত বন্ধ হয়ে গেল, নদীটাকে বাঁক নিতে হল অন্য পথে।

ইলিয়া এক টুকরো কাল রুটির ছাল ছিড়ে ওকা নদীর জলে ভাসিয়ে দিয়ে বলল :

‘ওকা, আমার মা! ইলিয়া মুরমেৎসকে খাইয়েছো, দইয়েছো। তোমায় ধন্যবাদ!’

চলে যাবার আগে ইলিয়া জন্মভূমির এক মুঠো মাটি সঙ্গে নিল। তারপর ঘোড়ায় চড়ে চাবুকটা একবার সজোরে চালাল...

লোকে দেখল ইলিয়া ঘোড়ায় উঠছে। দেখতে পেল না কোথায় গেল। মাঠের মধ্যে জেগে উঠল শুধু একটা ধুলোর মেঘ।

ইলিয়ার চাবুক পড়ে আর ঝাঁকড়া-লোমো এক এক লাফে দেড় ভার্চ এগিয়ে যায়। যেখানে ঘোড়ার খুর মাটিতে ঠেকে সেখানেই জেগে ওঠে জলের ফোয়ারা। ইলিয়া একটা করে মস্ত ওক গাছ কেটে তোরণ বানিয়ে দেয় ফোয়ারার ওপর দিয়ে। তোরণের গায়ে খোদাই করে দেয় : “চাষির ছেলে রুশি বগাতির ইলিয়া ইভানভিচ এসেছিল এখানে।”

সেই ফোয়ারার ঝরনা আজও তোরণের তল দিয়ে বয়ে চলেছে। রাতের বেলা ভালুক যায় সেখানে ঠাণ্ডা জল খেতে। আর সেই জল খেয়ে খেয়ে তার গায়ে হয় বগাতিরের শক্তি।

এমনি করে ইলিয়া চলল কিয়েভ শহরের দিকে।

চেরনিগভ শহরের মধ্যে দিয়ে সিধে রাস্তা। ইলিয়া চলল সেই রাস্তা ধরে। চেরনিগভ শহরে আসতেই শোনে দেয়ালের কাছে ভীষণ গণ্ডগোল : হাজার হাজার তাতার বাহিনী শহর ঘেরাও করেছে। ঘোড়ার খুরের ধুলোয়, মুখের নিঃশ্বাসে সারা পৃথিবী আঁধার, সূর্য ঢাকা পড়েছে। মেঠো খরগোশেরও সাধি নেই গলে যায়, বলমলে বাজপাখিরও ক্ষমতা নেই উড়ে যায়। শহরের ভিতর থেকে আসে কান্নার আওয়াজ, আর্তনাদ, সৎকারের ঘণ্টাধ্বনি। শহরের লোকজন সব পাথরের গির্জার মধ্যে ঢুকে দরজা আটকে বসে বসে কাঁদছে, প্রার্থনা করছে, আর মৃত্যুর জন্যে তৈরি হচ্ছে, কারণ চেরনিগভ শহরকে ঘেরাও করেছে তিনজন তাতার রাজা, এক একজনের চল্লিশ হাজার করে সৈন্য।

ইলিয়ার বৃকে আশুন জ্বলে উঠল। ঝাঁকড়া-লোমোর রাশ টেনে একটা কাঁচা ওক গাছ শিকড়শুদ্ধ উপরে নিয়ে শক্রর উপর ঝাঁপিয়ে পড়ল ইলিয়া। বাড়ি মারে সে ওক গাছ দিয়ে, ঘোড়ার খুরে মাড়িয়ে দিয়ে যায় শক্রদের। গাছটা এদিকে হাঁকায় অমনি পথ হয়ে যায়, ওদিকে হাঁকায় অমনি গলি। ইলিয়া ঘোড়া ছুটিয়ে গেল তিন রাজার কাছে। গিয়ে তাদের সোনালি ঝুঁটি ধরে বলল এই কথা :

‘ধিক তোদের, তাতার রাজা! কী ভায়ারা, বন্দি করব নাকি মাথা কেটে ফেলব? বন্দি করব কিন্তু রাখব কোথায়? পথে বেরিয়েছি, ঘরে বসে নেই। আমার থলির রুটি নিজের জন্যে, নিষ্কর্মাদের জন্যে নয়। মাথা নেব—সেটায় বগাতির ইলিয়া মুরমেৎসের গৌরব বাড়বে না। তাই পালা তোদের বাহিনীর এলাকায়, শক্রমহলে, রাষ্ট্র করে দে, জন্মভূমি রাশিয়া জনশূন্য নয়—সে দেশে আছে মহাবল মহাবীর বগাতিররা, শক্ররা যেন তা মনে রাখে।’

এই বলে ইলিয়া ঢুকল চেরনিগভ শহরের ভিতর। পাথরের গির্জায় যেখানে সবাই কাঁদছে, কোলাকুলি করছে, শেষ বিদায় নিচ্ছে সেখানে গিয়ে ইলিয়া বলল :

‘নমস্কার চেরনিগভবাসী, পুরুষ তোমরা, কাঁদছ কেন, কোলাকুলি করছ, শেষ বিদায় নিচ্ছ?’

‘না কেঁদে উপায় কী, তিনজন তাতার রাজা চল্লিশ হাজার করে সৈন্য নিয়ে আমাদের চেরনিগভ শহর ঘেরাও করেছে! মরার অপেক্ষায় আছি।’

‘দুর্গের প্রাচীরে উঠে খোলা মাঠে শক্রবাহিনীর দিকে একবার তাকিয়ে দেখ দেখি,’ ইলিয়া বলল।

সকলে প্রাচীরের উপরে উঠে দেখে কী, শিলাবৃষ্টিতে খসে পড়া ফসলের মত সারা ময়দান ভরে উঠেছে তাতার সৈন্যের মৃতদেহে।

এই দেখে চেরনিগভবাসী সকলে সসন্ত্রমে অভিবাদন করে নুন আর রুটি, সোনা রূপো আর জড়োয়া কাপড় দিয়ে স্বাগত জানাল ইলিয়াকে।

‘তরুণ বীর রুশ বগাতির, কী তোমার কুল-বংশ, কে তোমার বাপ, কে তোমার মা? তোমার নাম কী? তুমি এস আমাদের সর্দার হও। আমরা সকলে তোমার কথা মানব, সম্মান করব তোমায়, চব্য-চোষ্য খাওয়াব। ধনে যশে উথলে উঠবে।’

ইলিয়া মুরমেৎস মাথা নাড়ল।

‘চেরনিগভের ভালমনুষেরা শোন, আমি সাধারণ রুশি বগাতির, মুরম শহরের কাছে কারাচারোভে গ্রাম, সেই গ্রামের চাষির ছেলে। লাভের আশায় আমি তোমাদের উদ্ধার করিনি; সোনা রূপের আমি পরোয়া করি না। রুশ জাতির সুন্দরী কুমারী, অসহায় শিশু আর বৃদ্ধা মায়েদের আমি উদ্ধার করেছি। আমি তোমাদের নেতা হতে চাইনে। আমার ধন আমার শক্তি আর আমার ব্রত রাশিয়ার সেবা, শত্রুর হাত থেকে রক্ষা করা।’

চেরনিগভবাসীরা তখন সকলে ইলিয়াকে অন্তত একটা দিন থেকে যেতে বলল। তাদের সঙ্গে ভোজ খেয়ে আনন্দ করে যাবার জন্যে অনুরোধ করল। কিন্তু ইলিয়া তাতেও রাজি হল না।

‘আমার সময় নেই, ভালমানুষেরা। রুশদেশ শত্রুর পীড়নে কাঁদছে, আমায় তাড়াতাড়ি গিয়ে যোগ দিতে হবে রাজা ভাদিমিদের সঙ্গে, কাজে লাগতে হবে। পথে খাবার জন্যে আমায় বরঞ্চ কিছু রুটি দাও, তৃষ্ণা নিবারণের জন্যে দাও বরণার জল, আর কিয়েভ যাবার সোজা পথটা দেখিয়ে দাও।’

চেরনিগভবাসী সকলেই ভাবনায় পড়ল, দুঃখ হল :

‘রুশ বগাতির ইলিয়া মুরমেৎস, কী বলব বল। কিয়েভ যাবার সোজা পথ ঢেকে গেছে ঘাসে। সে পথ দিয়ে ত্রিশ বছর কেউ যায় নি...’

‘তার মানে?’

‘রাখমানের ছেলে, শিসে-ডাকাত সলভেই-এর হাতে সেই পথ। স্মোরোদিনা নদীর ধারে তিনটে ওক গাছের নয়টা ডালের ওপর সে বসে থাকে। সে যখন পাখির গলায় শিস দেয়, জন্তুর গলায় গর্জে ওঠে তখন সমস্ত গাছ মাটিতে নুয়ে পড়ে, ফুলের পাপড়ি খসে যায়, ঘাস যায় শুকিয়ে, আর প্রাণ হারিয়ে মানুষ ঘোড়া সব লুটিয়ে পড়ে। তুমি বরং ঘুর পথে যাও ইলিয়া। সোজা পথে কিয়েভ অবিশ্যি তিনশ’ ভাস্ট, ঘুর পথে পুরো হাজার ভাস্ট।’

ইলিয়া মুরমেৎস কিছুক্ষণ চুপ করে থেকে মাথা নেড়ে বলল :

‘শিসে-ডাকাত কিয়েভের পথ আটকে রাখবে, জন মানুষকে উৎপাত করবে আর আমি রুশ বীর ঘুর পথে কিয়েভ যাব, এ আমায় শোভা পায় না, এ আমার সম্মানে লাগে। আমি যাব সোজা রাস্তায়, অগম পথে।’

এই বলে ইলিয়া এক লাফে জিনে চড়ে বসল, ঝাঁকড়া-লোমোকে চাবুক লাগল, চেরনিগভবাসীরা দেখতে না দেখতেই নিমেষের মধ্যে উধাও হয়ে গেল সে।

## ইলিয়া মুরমেৎস আর শিসে-ডাকাত সলভেই

বিদ্যুৎগতিতে ছুটে চলল ইলিয়া মুরমেৎস। তার ঘোড়া ঝাঁকড়া-লোমো শিখর থেকে শিখরে লাফায়। নদী, হ্রদ পেরিয়ে যায়, টিলা পাহাড় ডিঙিয়ে যায়।

শেষকালে ইলিয়া এসে পৌঁছল ব্রিসক বনে। এবার দাঁড়িয়ে পড়ল ঘোড়া। আর এগুনো যায় না। চারিদিকে জলা জমি পাঁকে ভরা। পেট অবধি ডুবে গেল ঘোড়া...

ইলিয়া লাফিয়ে নামল ঘোড়া থেকে। তারপর বাঁ হাত দিয়ে ঘোড়াটাকে টেনে তুলে, ডান হাত দিয়ে ওক গাছগুলো শিকড়শুদ্ধ উপড়ে উপড়ে ফেলে এক কাঠের রাস্তা বানিয়ে ফেলল। জলার মধ্যে দিয়ে ত্রিশ ভার্শ্ট লম্বা পথ। আজও ভালমানুষেরা সে পথ ধরে যাতায়াত করে।

এই ভাবে ইলিয়া পৌঁছল স্মোরোদিনা নদীতে।

চওড়া নদী খরস্রোতা, পাথর থেকে পাথরে লাফিয়ে পড়ছে।

ঝাঁকড়া-লোমো ডাক ছাড়ল। তারপর লাফিয়ে ঘন বনের মাথা ছাড়িয়ে পেরিয়ে গেল নদী।

ওপারে তিন ওক গাছের নয় ডালের উপর বসে শিসে-ডাকাত সলভেই। সে গাছের কাছে কোন বাজ ওড়ে না, জানোয়ার আসে না, সাপ এগোয় না। সবাই শিসে-ডাকাত সলভেইকে ভয় পায়, কে আর সেধে মরণ চাইবে...

ঘোড়ার খুরের খটখট শব্দ কানে যেতেই ওক গাছের মাথায় উঠে ভীষণ গলায় হাঁক দিল সলভেই :

‘কোন শয়তান ঘোড়া হাঁকায়, আমার খাস গাছের পাশ দিয়ে যায়, শিসে-ডাকাত সলভেই-এর ঘুম ভাঙ্গায়!’

তারপর যেই সলভেই পাখির গলায় শিস দিল, জন্তুর গলায় গর্জাল, সাপের মত হিস্‌হিসিয়ে উঠল, অমনি সারা পৃথিবী কেঁপে উঠল, ওক গাছ টলতে লাগল, ফুলের পাপড়ি ঝড়ে গেল, নেতিয়ে পড়ল ঘাসগুলো। ঝাঁকড়া—লোমো হুমড়ি খেয়ে পড়ল হাঁটুর ওপর।

ইলিয়া কিন্তু অটল হয়ে বসে রইল। মাথার চুলের গোছাও নড়ল না। রেশমি চাবুকটা নিয়ে সে শুধু সজোরে বাড়ি মারল ঘোড়াটাকে।

‘খড়ের বস্তা তুই! রুশ বগাতিরের ঘোড়া নস। কোন দিন বুঝি টুনি পাখির শিস শুনিসনি? হেলে সাপের হিস্‌হিসানি কানে যায় নি? এক্ষুণি উঠে দাঁড়া, নিয়ে চল আমায় সলভেই-এর বাসায়, নইলে আমি তোকে নেকড়ের মুখে ফেলে দেব।’

এই শুনে ঘোড়াটা লাফিয়ে উঠে একছুটে একেবারে সলভেই-এর বাসায়।

এত অবাক হয়ে গেল সলভেই, মাথা বার করলে বাসা থেকে।

এক মুহূর্ত দেরি না করে ইলিয়া তার ধনুক টেনে লোহার তীর ছুড়ল। তীরটা ছোটই বলতে হয়, ওজনে পুরো এক পুদ্।

টঙ্কার দিয়ে তীর ছুটল, সলভেই-এর ডান চোখের ভিতর দিয়ে ঢুকে বাঁ কান দিয়ে বেরিয়ে এল। সলভেই তার বাসা থেকে গড়িয়ে পড়ল যেন এক আঁটি খড়। ইলিয়া তখন ওকে ধরে, চামড়ার ফিতে দি শক্ত করে বেঁধে নিল বাঁ রেকাবেবের সঙ্গে।

সলভেই হাঁ করে তাকিয়ে রইল ইলিয়ার দিকে, মুখ দিয়ে কথা বেরয় না।

‘হতভাগা ডাকাত, কী দেখছিস হাঁ করে? রুশ বগাতিরকে দেখিসনি কখনও?’

সলভেই কঁকিয়ে উঠল, ‘হায় রে কপাল! শক্ত লোকের পাল্লায় পড়েছি। আমার স্বাধীনতা বুঝি এবার গেল!’

ইলিয়া সোজা রাস্তায় ঘোড়া ছুটিয়ে এসে পৌঁছল সলভেই-এর বাড়িতে। সে বাড়ির উঠোনটাই সাত ভাঙ লম্বা, তাতে সাতটা খুঁটি। চারিপাশে লোহার বেড়া, প্রত্যেকটি লোহার খুঁটিতে লোহার চুড়ো, প্রত্যেকটি চুড়োয় একটি করে বগাতিরের কাটা মাথা। উঠোনের মাঝখানে একটা জমকাল শ্বেত পাথরের প্রাসাদ, তার সোনার অলিন্দ আগুনের মত জ্বলছে।

সলভেই-এর মেয়ে বগাতিরের ঘোড়া দেখতে পেয়ে গলা ফাটিয়ে চোঁচিয়ে উঠল :

‘দেখ দেখ, আমাদের বাবা সলভেই রাখমানভিচ বাড়ি ফিরছে একটা গঁয়ো চাষিকে রেকাবে বেঁধে!’

সলভেই-এর বৌ জানলা দিয়ে মুখ বের করে দেখে দু হাত ছুঁড়ে বলল :

‘কী বলছিস বোকা কোথাকার! এ যে একটা গঁয়ো চাষিই আসছে, তোরই বাবাকে রেকাবে বেঁধে নিয়ে!’

এই শুনে সলভেই-এর বড় মেয়ে পেল্কা দৌড়ে উঠোনে দিয়ে একটা নব্বুই পুদ্ ওজনের লোহার ডান্ডা তুলে নিয়ে ছুঁড়ে মারল ইলিয়ার দিকে। কিন্তু বুদ্ধি করে ইলিয়া ডাঙটা লুফে নিয়ে ফের সেটাই ঘুরিয়ে ছুঁড়ে মারল। ডাঙটা গিয়ে সজোরে পেল্কার গায়ে লাগল। তক্ষুনি পড়ে মরে গেল পেল্কা।

সলভেই-এর বৌ ইলিয়ার পায়ে কেঁদে পড়ল।

‘আমাদের সোনা রূপো মণিমুক্তা যা তোমার ঘোড়া বইতে পারে সব নাও বগাতির, কেবল আমার স্বামীকে ছেড়ে দাও।’

ইলিয়া উত্তর দিল :

‘অসতের দান আমার চাই না। এ সব শিশুর কান্নায়, রুশির রক্তে ভেজা, চাষির অন্ন কেড়ে নেয়া সম্পদ। ধরা পড়লে ডাকাত তখন বন্ধু। ছেড়ে দিলেই দুঃখের আর শেষ হবে না। আমি সলভেইকে নিয়ে কিয়েভ যাচ্ছি। সেখানেই রুটি পাব কভাস খাব।’

ইলিয়া ঘোড়া ঘুরিয়ে ছোটাল কিয়েভের পথে, চুপ করে রইল সলভেই, টু শব্দটি পর্যন্ত করল না।

কিয়েভ শহরে গিয়ে ইলিয়া এসে থামল একেবারে রাজবাড়িতে, ভ্লাদিমিরের প্রাসাদে। ঘোড়াটাকে একটা খুঁটির সঙ্গে বেঁধে, ডাকাতটাকে রেকাবেবের সঙ্গেই বুলিয়ে রেখে নিজে ঢুকল বৈঠকখানায়।

রাজা ভ্লাদিমির বসে আছেন টেবিলে। খানাপিনা চলছে। রুশ বগাতিরের দল বসে আছে টেবিল ঘিরে। ইলিয়া ঢুকে কুর্নিশ করে চৌকাঠের কাছে দাঁড়িয়ে রইল।

‘জয় হোক, মহারাজ ভ্লাদিমির, রানি আপ্রাক্সিয়া! পথিক বীরকে বরণ করবেন কি?’

রক্ত-রবি ভ্লাদিমির জিজ্ঞেস করলেন :

‘কোথা থেকে আসছ বীর, কী তোমার নাম? কী তোমার বংশ-কুল?’

‘আমার নাম ইলিয়া। আসছি মুরম শহরের কাছ থেকে, কারাচারোভো গ্রামের চাষির ছেলে। এসেছি আমি চেরনিগভ থেকে সোজা রাস্তা ধরে। আপনার কাছে ধরে এনেছি শিসে-ডাকাত সলভেইকে। আপনার প্রাসাদের উঠোনেই সে রয়েছে, আমার ঘোড়ার সঙ্গে বাঁধা। একবার কি বাইরে এসে দেখবেন?’

এই কথা শুনে রাজা, রানি, বগাতিরের দল সকলে টেবিল ছেড়ে লাফিয়ে উঠে ইলিয়ার পিছন পিছন ছুটে এসে দাঁড়াল উঠোনে ঝাঁকড়া-লোমো ঘোড়ার কাছে।

দেখে কী, এক আঁটি খড়ের মত রেকাব থেকে বুলছে ডাকাতটা। আর বাঁ চোখ দিয়ে তাকিয়ে দেখছে কিয়েভ শহর, তাকিয়ে দেখছে রাজার দিকে।

রাজা ভ্লাদিমির বললেন :

‘কী রে ডাকাত, একবার পাখির গলায় শিস দে তো, জন্তুর গলায় গর্জন কর!’

শিসে-ডাকাত সলভেই কিন্তু মুখ ফিরিয়ে রইল, কথা শুনল না।

‘তুমি আমায় বন্দি করনি, হুকুম করা তোমার সাজে না।’

এই শুনে রাজা ভ্লাদিমির ইলিয়ার দিকে ফিরে বললেন :

‘হুকুম কর ডাকাতকে, ইলিয়া ইভানভিচ।’

‘বেশ মহারাজ, কিন্তু রাগ করবেন না। আমি আপনাকে আর রানিকে ঢেকে রাখব আমার চাষির কাফতান দিয়ে, কোন ক্ষতি যেন না হয়। আর সলভেই রাখমানভিচ, তোকে যা বলা হয়েছে, কর।’

ডাকাত বলল, ‘শিস আমি দিতে পারছি না। গলা শুকিয়ে গেছে।’

‘আগে দেড় বালতি মিষ্টি মদ দাও শিসে-ডাকাতটাকে আর দেড় বালতি তেতো বিয়র, আর দেড় বালতি মধু, সঙ্গে খাওয়ার জন্যে কিছুটা গমের শাদা রুটিও দিও। তাহলে শিস দেবে, আমাদের সখ মেটাবে...’

সলভেইকে পানাহার করিয়ে শিস-দেওয়ার জন্যে তৈরি করা হল।

ইলিয়া বলল, ‘কিন্তু ডাকাত, মনে রাখিস পুরো গলায় শিস দিস না, আধো গলায় শিস দিবি, আধো গলায় গর্জাবি। নয়ত মজা টের পাবি।’

সলভেই কিন্তু ইলিয়ার হুকুম মানল না। ওর মনে মনে ইচ্ছে সারা কিয়েভ শহর ধ্বংস করবে, রাজা রানি, রুশ বগাতির সকলকে মেরে ফেলবে। যত জোর পারে শিস দিয়ে ভীষণ গর্জনে গর্জিয়ে প্রাণপণে হিস্‌হিসিয়ে উঠল সলভেই।

অমনি সে কী কাণ্ড!

বাড়ির ছাদ টলে পড়ল, গাড়ি-বারান্দা খসে এল দেয়াল থেকে, জানলার কাঁচ ফেটে গেল, আস্তাবল ছেড়ে ছুটে পালাল ঘোড়াগুলো, বগাতিরের দল হুড়মুড়িয়ে পড়ে হামাগুড়ি দিতে লাগল। স্বয়ং রাজা ভ্লাদিমির প্রায় আধমরা হয়ে টলতে লাগলেন, ইলিয়ার কাফতানের আড়ালে লুকলেন।

ইলিয়া রেগে লাল। বলল :

‘আমি তোকে বলেছিলাম রাজা রানিকে একটু আনন্দ দিতে, আর তুই ঘটালি সর্বনাশ। এবার দফা সারছি। মা বাবার চোখে জল ঝরান, যুবতীদের বিধবা করা, ছোট ছেলেমেয়েদের অনাথ করা এবার তোর বন্ধ হবে, লুঠতরাজ তোর এবার শেষ।’

এই বলে ইলিয়া একটা ধারাল তলোয়ার দিয়ে সলভেই-এর মাথা কেটে ফেলল। শিসে-ডাকাতের জীবন গেল।

রাজা ভ্লাদিমির বললেন, ‘অশেষ ধন্যবাদ তোমায়, ইলিয়া মুরমেৎস, এস আমার অনুচরদলে, তুমি হবে আমার প্রধান বগাতির, সব বগাতিরের ওপর তুমি কর্তা। কিয়েভ শহরেই থাক তুমি জীবনের শেষ দিন পর্যন্ত।’





## দব্রিন্যা নিকিতিচ আর জমেই গরীনীচ

কিয়েভের কাছেই এক বিধবা থাকত, তার নাম মামেল্ফা তিমোফেয়েভনা। তার এক ছেলে, বগাতীর দব্রিন্যা। দব্রিন্যার মা তাকে খুব ভালবাসত। সারা কিয়েভ শহরশুদ্ধ লোক দব্রিন্যার প্রশংসায় পঞ্চমুখ। দেখতে সে যেমন লম্বা তেমনি সুঠাম যেমন শিক্ষাদিক্ষা তেমনি লড়াইয়ে নির্ভীক, উৎসবে ব্যসনেও হাসিখুশি। গান বাঁধত, বাজনা বাজাত, রসিক মন্তব্য করত। স্বভাব ছিল শান্তশিষ্ট মিষ্টি, কখনো কাউকে রুঢ় কথা বলত না, কাউকে অপমান করত না। সেইজন্য সবাই ওকে ডাকত সুশান্ত দব্রিন্যা বলে।

সেদিন ভীষণ গরম। গ্রীষ্মকাল। দব্রিন্যার ভীষণ ইচ্ছে হল নদীতে গিয়ে নাইবে। মায়ের কাছে গিয়ে বলল :

‘মা গো, আমায় আজ পুচাই নদীর ঠাণ্ডা জলে নাইতে যেতে দাও না। গ্রীষ্মের গরমে পুড়ে যাচ্ছি।’

মামেল্ফা তিমোফেয়েভনা ভারি দুশ্চিন্তায় পড়ল। দব্রিন্যাকে বোঝাবার চেষ্টা করল :

‘দব্রিন্যা শোন, পুচাই নদীতে যেও না বাবা। সে নদী ভয়ঙ্করী, চণ্ডমূর্তি। নদীর প্রথম দরিয়ায় আগুন, মাঝ দরিয়ায় আগুনের ফুলকি আর শেষ দরিয়ায় কেবল ধোঁয়া।’

‘বেশ, তবে অন্তত পাড়ে যাই, হাওয়া খাব।’

মামেল্ফা তিমোফেয়েভনা মত দিল।

বেড়ানোর পোশাকটা পরে, উঁচু গ্রিক টুপি মাথায় এঁটে, তীর, ধনুক, ধারালো তলোয়ার, চাবুকগাছা নিয়ে দব্রিন্যা তৈরি।

তারপর তাজা ঘোড়ায় চড়ে, বাচ্চা চাকরটাকে ডেকে নিয়ে রওনা দিল। একঘণ্টা যায়, দুঘণ্টা যায়, দব্রিন্যা চলেছে তো চলেছে। মাথার উপর গ্রীষ্মের সূর্য জ্বলছে। দব্রিন্যা মায়ের নিষেধ ভুলে গিয়ে ঘোড়ার মুখ ঘোরালে পুচাই নদীর দিকে।

নদী থেকে ঠাণ্ডা আমেজ আসছিল।

দব্রিন্যা ঘোড়া থেকে নেমে লাগামটা বাচ্চা চাকরের হাতে ছুঁড়ে দিয়ে বলল !

‘তুই এখানে থাক, ঘোড়াটার উপর নজর রাখিস।’

এই বলে তার জামাকাপড়, গ্রিক টুপি খুলে, অস্ত্রশস্ত্র সব ঘোড়ার পিঠে রেখে দব্রিন্যা ঝাঁপ মারল নদীতে। দব্রিন্যা সাঁতার কাটে আর অবাধ হয় :

“পুচাই নদী সন্ধ্যাে কী যে বলে মা! নদীটা ভয়ঙ্করী কোথায়, বরঞ্চ একেবারে বর্ষার জলভরা ডোবার মত শান্ত।”

কিন্তু দব্রিন্যার কথা শেষ হতে না হতেই আকাশ হঠাৎ কাল করে এলো। আকাশে মেঘ নেই, বৃষ্টি নেই, কিন্তু বাজের ডাক; ঝড় নেই, কিন্তু আশুন ঝলসায়...

দব্রিন্যা মাথা তুলে দেখে, নাগ জ্‌মেই গরিনিচ তার দিকে উড়ে আসছে। সে এক ভয়াবহ নাগ। তিনটে মাথা, সাতটা লেজ, নাক দিয়ে আশুন বেরয়, কান দিয়ে ধোঁয়া। খাবাগুলোর তামা নখ চক্‌চক্‌ করছে।

দব্রিন্যাকে দেখে বজ্র গর্জনে হেঁকে উঠল নাগ :

‘প্রাচীন লোকেরা ভবিষ্যদ্বাণী করেছিল নিকিতার ছেলে দব্রিন্যার হাতেই নাকি আমার মৃত্যু। কিন্তু দেখছি দব্রিন্যাই আমার খপ্পরে পড়েছে। ইচ্ছে হলে এখন জ্যান্ত খেয়ে ফেলতে পারি, ইচ্ছে হলে আবার বন্দি করে গুহায় নিয়েও যেতে পারি। বন্দি রুশ আমার কাছে কম নয়। বাকি কেবল দব্রিন্যাই।’

এই শুনে দব্রিন্যা নরম গলায় বলে উঠল :

‘ধাম, হতভাগা নাগ, আগে দব্রিন্যাকে ধর, তারপর গর্ব করিস। দব্রিন্যা এখনও তোর হাতে পড়ে নি।’

ভাল সাঁতার জানত দব্রিন্যা। এক ডুবে সে নদীর তলায় গিয়ে ডুব সাঁতার কাটতে লাগল। তারপর সাঁতরে একটা খাড়া পাড়ের কাছে গিয়ে, পাড় বেয়ে উঠে চটপট ঘোড়ায় চেপে বসবে, কিন্তু কোথায় ঘোড়া? তার চিহ্নমাত্র নেই। নাগের গর্জন শুনে তার বাচ্চা চাকরটা ভয় পেয়ে গিয়েছিল, ঘোড়ায় উঠে একেবারে উধাও। অস্ত্রশস্ত্রও সব তারই সঙ্গে।

নাগের সঙ্গে লড়াই করার মত কোন হাতিয়ার নেই।

নাগ এদিকে ফের ঝাঁপিয়ে পড়ে দব্রিন্যার উপর। আশুনের জ্বলন্ত ফুলকি ঝরিয়ে সে দব্রিন্যার ধবল দেহ পুড়িয়ে দেয়।

বগাতিরের প্রাণ কেঁপে উঠল।

ভীরে সে তাকিয়ে দেখল, হাতে নেবার মত কিছুই নেই। একটা লাঠি নেই, একটা পাথর নেই, খাড়া পাড়ের চারিদিকে কেবল হলুদ বালি। তার ওপর পড়ে আছে তার গ্রিক টুপিটা।

দব্রিন্যা টুপিটাই তুলে নিল, তাতে বালি ভরল কম নয়, বেশি নয়—পুরো পাঁচ পুন্ড, তারপর সেটা ঘুরিয়ে ছুঁড়ে মারল জ্‌মেই গরিনিচের দিকে। জ্‌মেই গরিনিচের একটা মাথা গুঁড়িয়ে গেল।

দব্রিন্যা তখন হ্যাঁচকা টানে মাটিতে আছড়ে ফেলল নাগকে, বুকের ওপর হাঁটু চেপে বসে অন্য দুটো মাথাও কেটে ফেলতে যাবে...

এমন সময় নাগ কাকুতি-মিনতি করে বলে উঠল :

‘দোহাই দব্রিন্যা, দোহাই বগাতির, আমায় মেরে ফেলো না, এবারের মত ছেড়ে দাও। তুমি যা বলবে তাই করব। তোমার কাছে এই শপথ করছি, তোমাদের সুবিপুল রাশিয়ায় কোনদিন আর আসব না, কোনদিন আর রুশিদের বন্দি করে নিয়ে যাব না। দোহাই দব্রিন্যা, প্রাণে আমায় মের না, আমার ছেলেপিলের অনিষ্ট করো না।’

নাগের চালাকিতে ভুলে গেল দব্রিন্যা, তার কথায় বিশ্বাস করে পাষণ্ডটাকে ছেড়ে দিল।

ছাড়া পেয়ে নাগটা মেঘের রাজ্যে উঠতে না উঠতেই সোজা চলল কিয়েভ শহরের দিকে, উড়ে এল রাজা ভ্লাদিমিরের বাগানে। সেই সময় রাজা ভ্লাদিমিরের ভাইঝি জাবাভা পুতিয়াতিশ্‌না বেড়াচ্ছিল বাগানে।

রাজকুমারীকে দেখতে পেয়ে তো নাগের মহা আনন্দ। মেঘের রাজ্য থেকে নেমে এসে তার তামার নখগুলো দিয়ে ছেঁ মেরে রাজকুমারীকে নিয়ে চলে গেল একবারে সরোচিনস্ক পাহাড়ে।

এদিকে দব্রিন্যা তার চাকরকে খুঁজে পেয়ে বেড়াবার পোষাকটা পরছে, এমন সময় আকাশ কালি করে এল, বাজ পড়তে লাগল। দব্রিন্যা মাথা তুলে দেখে, জ্মেই গরিনিচ তার খাবার মধ্যে জাবাভা পুতিয়াতিশ্নাকে ধরে কিয়েভের দিক থেকে উড়ে আসছে।

ভারি মন খারাপ হয়ে গেল দব্রিন্যার, ভারি দুশ্চিন্তায় পড়ল। বাড়ি ফিরে সে মন খারাপ করে চুপ করে বসে রইল একটা বেঞ্চিতে। একটি কথাও কইল না। মা জিজ্ঞেস করল :

‘কী হয়েছে দব্রিন্যা? মন খারাপ কেন? কীসের দুঃখু সোনা?’

‘দুঃখের কিছু নেই, শোকের কিছু নেই, শুধু বাড়িতে বসে থাকতে মন টিকছে না। কিয়েভে রাজা ভ্লাদিমিরের বাড়িতে আজ এক মস্ত ভোজ আছে, সেখানে যাব।’

‘না না বাছা, রাজবাড়িতে যেও না। আমার মন বলছে অমঙ্গল হবে। আমাদের বাড়িতেই বরং ভোজ লাগানো যাক।’

দব্রিন্যা মায়ের কথা শুনল না। সে চলল কিয়েভে, রাজা ভ্লাদিমিরের কাছে।

কিয়েভে পৌঁছেই দব্রিন্যা এসে দাঁড়াল রাজার ঘরে। খাবারের ভারে টেবিল ভাঙে ভাঙে, পিপে ভরতি মিষ্টি মধু, কিন্তু অতিথিরা কেউ কিছু মুখে দিচ্ছে না, মাথা নিচু করে বসে আছে। আর ঘরের মধ্যে পায়চারি করে বেড়াচ্ছেন রাজা, কাউকে খেতে ডাকছেন না। রানি মুখ ঢেকে বসে আছেন। অভ্যাগতদের দিকে চাইছেন না।

রাজা ভ্লাদিমির হঠাৎ বললেন :

‘আদরের অতিথিদল, এই ভোজে আজ আনন্দ নেই। রানির মনে ভারি শোক, আমার মনেও দুঃখ। মুখপোড়া জ্মেই গরিনিচ আমাদের আদরের ভাইঝি, তরুণী জাবাভা পুতিয়াতিশ্নাকে ধরে নিয়ে গেছে। তোমাদের মধ্যে কে আছে, যে সরোচিন্‌স্ক পাহাড়ে গিয়ে রাজকুমারীকে উদ্ধার করে আনতে পারো?’

কিন্তু কোথায় কী? অতিথিরা এ ওর পেছনে লুকোয়, লম্বারা মাঝারিদের পিছনে, মাঝারিরা বেঁটোদের পিছনে আর বেঁটোরা মুখ বন্ধ করে চুপচাপ বসে রইল।

হঠাৎ তরুণ বগাতির আলিওশা পপোভিচ টেবিল ছেড়ে উঠে দাঁড়িয়ে বললে :

‘শুনুন রাজা রক্ত-রবি! কাল আমি খোলা মাঠে বেড়াচ্ছিলুম, দব্রিন্যাকে দেখেছিলুম পুচাই নদীর ধারে। জ্মেই গরীনীচের সঙ্গে কী তার ভাব! জ্মেই গরিনিচকে ছোট ভাই বলে সে ডাকছিল। দব্রিন্যাকেই পাঠান নাগের গুহায়, সে বিনা যুদ্ধেই আপনার আদরের ভাইঝিকে চেয়ে নেবে তার পাতানো ভাইয়ের কাছ থেকে।’

রাজা ভ্লাদিমির রেগে উঠলেন :

‘এই যখন ব্যাপার তখন দব্রিন্যা, ঘোড়া ছুটিয়ে যাও সরোচিন্‌স্ক পাহাড়ে। সেখানে গিয়ে আমার আদরের ভাইঝিকে এনে দাও, নয়ত তোমার গর্দান যাবে।’

দব্রিন্যা তার উঁচু মাথা নিচু করে একটিও কথা না বলে টেবিল ছেড়ে উঠে এল, ঘোড়ায় চড়ে ফিরে এল বাড়ি।

তার মা দব্রিন্যাকে বরণ করতে এসে দেখে সে দব্রিন্যা আর নেই।

‘কী হয়েছে দব্রিন্যা, কী ঘটেছে, বাছা আমার?’ কী হয়েছে নেমন্তন্ন বাড়িতে? অপমান করেছে কেউ? মদের পেয়ালা দিতে ভুলে গেছে, ভাল আসনে বসায় নি?’

‘না মা, অপমান করেনি, পেয়ালাও বাদ পড়েনি, আসনও ছিল মানমতো, মর্যাদামতো।’

‘তবে অমন করে মুখ নিচু করেছো কেন?’

‘রাজা ভ্লাদিমির এক কঠিন কাজের ভার দিয়েছেন। জাবাভা পুতিয়াতিশ্নাকে জ্মেই গরিনিচ ধরে নিয়ে গিয়ে সরোচিন্‌স্ক পাহাড়ে রেখে দিয়েছে। গিয়ে তাকে উদ্ধার করে আনতে হবে আমায়।’

মামেল্‌ফা তিমোফেয়েভ্‌নার ভীষণ ভয় হল। কিন্তু দুঃখ করল না সে, চোখের জল ফেলল না। বরং কাজের কথা ভাবতে লাগল।

‘এবার শুতে যাও বাছা। ঘুমিয়ে জিরিয়ে গায়ে বল এনো। রাত পোয়ালে বুদ্ধি খোলে, কাল সকালে পরামর্শ করা যাবে।’

শুলো দব্রিন্যা, ঘুমায়। নাক ডাকায় যেন জলপ্রপাতের গর্জন।

কিন্তু মামেলফা তিমোফেয়েভনা শোয় না, বেষ্টিতে বসে বসে সারারাত ধরে সে সাতরঙা রেশম দিয়ে সাতগুছি চাবুক বানিয়ে চলল।

ভোরের আলো ফোটার সঙ্গে সঙ্গে সে তার ছেলেকে জাগিয়ে দিয়ে বলল :

‘ওঠো ছেলে উঠে পড়ো। সাজ করো, সজ্জা করো, চলে যাও পুরনো আস্তাবলে। দেখবে তিন নম্বর খোঁয়াড়ের দরজাটা খোলে না। অর্ধেকটা চাপা পড়ে গেছে ময়লার তলায়। কাঁধ লাগিয়ে দব্রিন্যা, দরজা খুলো। দেখবে খোঁয়াড়ের মধ্যে তোমার দাদুর ঘোড়া বুর্কা। পনেরো বছর ধরে ঘোড়াটা ওই খোঁয়াড়ে এক হাঁটু ময়লার মধ্যে দাঁড়িয়ে আছে। ঘোড়াটাকে ভাল করে দলাই—মলাই করে, দানাপানি দিয়ে নিয়ে এসো গাড়ি-বারান্দার কাছে।’

দব্রিন্যা আস্তাবলে গিয়ে দরজা ভেঙে ঢুকে বুর্কাকে নিয়ে এল গাড়ি-বারান্দার কাছে। তারপর লাগাম পরাতে লাগল। প্রথমে ঘোড়ার পিঠে জিনের কাপড় পাতল, তার উপর দিল একটা পশমি আস্তুর, তার ওপর চাপাল দামি রেশমের নকশা-তোলা সোনা-বসানো চেরকেশিয় জিন, বারো গুছি রেশম দিয়ে বাঁধল, সোনার লাগাম পরিয়ে দিল। মামেলফা তিমোফেয়েভনা বেরিয়ে এসে হাতে দিল সেই সাতগুছি চাবুকটা, বলল :

‘তুমি যখন সরোচিন্‌স্ক পাহাড়ে পৌঁছবে, জ্‌মেই গরিনিচ তখন বাড়ি থাকবে না। ঘোড়া ছুটিয়ে ঢুকে যেয়ো নাগের গুহায়, নাগশিশুদের খুরের চাপে দলে দিয়ে। ওরা তখন বুর্কার পায়ে পায়ে জড়িয়ে যাবে, তুমি এই চাবুক তুলে বুর্কার দু কানের মাঝখানে ঘা মারবে। লাফাতে থাকবে বুর্কা, পা ঝেড়ে সবকটাকে মাটিতে ফেলে পিষে মেরে ফেলবে।’

গাছ ভেঙে পড়ল ডালটি, ডাল খসে ফলটি। মায়ের বুক থেকে খসে রক্তঝরা রণে চলল ছেলে।

দিন যায় যেন বৃষ্টির ধারা, সপ্তাহ যায় যেন নদীর স্রোত। চলেছে দব্রিন্যা—আকাশে রাঙা রবি, চলেছে দব্রিন্যা—আকাশে ফুটফুটে চাঁদ, চলতে চলতে এসে পৌঁছল সরোচিন্‌স্ক পাহাড়ে।

সে পাহাড়ে নাগের গুহায় ছানাপোনায় কিলবিল। বুর্কার পায়ে পায়ে জড়িয়ে যায় তারা, খুরের গোড়ায় দাঁত বসায়। দৌড়াতে পারে না বুর্কা, হাঁটু ভেঙ্গে বসে পড়ে। দব্রিন্যার তখন মায়ের কথা মনে পড়ল, সাতগুছি রেশমি চাবুক দিয়ে বুর্কার দু কানের মাঝখানে ঘা মারতে লাগল। বলে :

‘লাফিয়ে ওঠো বুর্কা, ঝাঁপিয়ে ওঠো, নাগশিশুদের ঝেড়ে ফেলো পা থেকে!’

চাবুক খেয়ে বুর্কার শক্তি বাড়ে, লাফিয়ে লাফিয়ে ওঠে সে, ক্রোশ পেরিয়ে পাথর নুড়ি ছিটকে যায়, পা থেকে ঝেড়ে ঝেড়ে ফেলে নাগশিশুদের। খুর দিয়ে চাঁট মারে, দাঁত দিয়ে ছিড়ে ফেলে, দলে পিষে দিল সবকটিকে।

দব্রিন্যা তখন বুর্কার পিঠ থেকে নামল। ডান হাতে তার ধারালো তলোয়ার, বাঁ হাতে বগাতীরের মুগুর। দব্রিন্যা চলল নাগের বাসার দিকে এগিয়ে।

এক পা সবে এগিয়েছে হঠাৎ আকাশ কালি করে এল, বাজ ডাকতে লাগল। উড়ে আসে জ্‌মেই গরিনিচ, তামার থাবায় মরা মানুষ, মুখ দিয়ে আগুন বেরয়, কান দিয়ে ধোঁয়া, তামার নখ ঝলসাচ্ছে আগুনের মতো...

দব্রিন্যাকে দেখে জ্‌মেই গরিনিচ মৃত দেহটা মাটিতে ফেলে বাজখাঁই গলায় হেঁকে বলল :

‘কেন প্রতিজ্ঞা ভাঙলি দব্রিন্যা, কেন মেরেছিস আমার বাচ্চাদের?’

‘বটে রে পাষাণ নাগ, কথা রাখিনি, শপথ ভেঙেছি, সে কি আমি? কেন তুই কিয়েভে গিয়েছিলি? কেন জাবাভা পুতিয়াতিশ্নাকে নিয়ে এসেছিস? বিনা যুদ্ধে রাজকুমারীকে ফিরিয়ে দে। তবেই তোকে মাপ করব।’

‘দেব না জাবাভা পুতিয়াতিশ্নাকে। তাকে খাব, তোকেও খাব, বন্দি করে আনব সমস্ত রুশকে।’  
রাগে জ্বলে উঠল দব্রিন্যা, গুরু হয়ে গেল নির্মম লড়াই।

শিলাপাথর ছিটকে যায়, শিকড়শুদ্ধ উলটে পড়ে ওক গাছ, এক হাত করে ঘাস ডেবে যায় মাটির মধ্যে...

তিনদিন তিনরাত্রির লড়াই চলল। দব্রিন্যা হারে হারে, নাগ তাকে ছুড়ে দেয়, আছড়ে ফেলে ...হঠাৎ দব্রিন্যার মনে পড়ল চাবুকটার কথা। চাবুকটা নিয়েই সে নাগের দু কানের মাঝখানে লাগাল ঘা। হাঁটু ভেঙে বসে পড়ে জমেই গরিনিচ আর দব্রিন্যা তাকে বাঁ হাতে মাটিতে চেপে ধরে, ডান হাতে চাবুক মার। রেশমি চাবুক দিয়ে মেরে ঘোড়া ঠাণ্ডা করার মত ঠাণ্ডা করল তাকে, সবকটা মাথা কেটে ফেলল।

গলগল করে নাগের কালো রক্ত বেরিয়ে এসে পূব পশ্চিম গড়িয়ে গেল, কোমর অবধি ডুবে গেল দব্রিন্যা।

তিনদিন তিনরাত কাল রক্তের মধ্যে দাঁড়িয়ে রইল দব্রিন্যা পাদুটো তার অসাড় হয়ে গেল, বুকে জমল ঠাণ্ডা। নাগের রক্ত শুষে নিতে চায় না রাশিয়ার মাটি।

দব্রিন্যা দেখল তার কাল ঘনিয়ে আসছে। তখন সে তার সাতগুছি রেশমি চাবুক বার করে মারতে লাগল মাটির ওপর।

‘মা ধরণী, দ্বিধা হও, নাগের রক্ত শুষে নাও।’

কাঁচা মাটি দ্বিধা হল, নাগের রক্ত শুষে নিল।

দব্রিন্যা একটু জিরিয়ে নিয়ে, হাতমুখ ধুয়ে, বগাতীরের বর্মটি ঘষে মেজে এগোলে নাগের গুহার দিকে। সারা গুহায় তামার দরজা জোড়া, লোহার খিলে আঁটা, সোনার তালায় বন্ধ।

দব্রিন্যা তালা খুলে, খিল দরজা ভেঙে ঢুকল প্রথম গুহার ভিতরে। চল্লিশ দেশ, চল্লিশ রাজ্যের জার আর জারপুত্র, রাজা আর রাজপুত্র সেখানে। আর কত যে সাধারণ যোদ্ধা তার সংখ্যা করা যায় না।

দব্রিন্যা বলল :

‘বিদেশের জার, বিড়ুইয়ের রাজা, আর তোমরা, সাধারণ যোদ্ধারা সব শোন, খোলা আলোয় বেরিয়ে এসো, ফিরে যাও যে যার দেশে। আর রুশ বগাতীরকে ভুলো না। সে না থাকলে তোমরা চিরকাল এই নাগের কাছে বন্দি হয়ে থাকতে।’

মুক্তি পেয়ে দুনিয়ায় বেরিয়ে এল সবাই, দব্রিন্যাকে অভিবাদন করে বলল :

‘রুশদেশের বগাতীর, চিরকাল তোমার কথা মনে রাখব!’

দব্রিন্যা এগিয়ে চলে। একটার পর একটা গুহা খোলে আর বন্দিদের মুক্ত করে দেয়। বৃদ্ধ, বৃদ্ধা, যুবক যুবতী, শিশু, বালক, রুশদেশী পরদেশী—সবাই বেরিয়ে আসে, কিন্তু জাবাভা পুতিয়াতিশ্নার আর খোঁজ নেই।

দব্রিন্যা এগারোটা গুহা পেরিয়ে গেল। একেবারে শেষের গুহায় এসে দেখে—জাবাভা পুতিয়াতিশ্না : হাতদুটো তার সোনার শিকলে বাঁধা, স্যাঁৎসেঁতে দেওয়াল থেকে সে বুলছে। দব্রিন্যা শিকল ভেঙে ফেলে তাকে দেওয়াল থেকে নামিয়ে নিল। তারপর কোলে তুলে নিয়ে বেরিয়ে এল খোলা আলোয়।

জাবাভা পুতিয়াতিশ্না দাঁড়াতে যায়, পা কাঁপে, সূর্যের আলোয় চোখ বোঁজে। দব্রিন্যাকে চেয়ে দেখে না। দব্রিন্যা তখন তাকে ঘাসের উপর শুইয়ে দিয়ে খাওয়ালে, দাওয়ালে। তারপর তাকে নিজের জোকা দিয়ে ঢেকে নিজেও শুয়ে পড়ল।

আকাশের সূর্য পাটে বসল। দব্রিন্যা জেগে উঠে, বুর্কার পিঠে জিন চাপিয়ে, রাজকন্যার ঘুম ভাঙাল। তারপর রাজকন্যা জাবাভাকে সামনে বসিয়ে রওনা হল ঘোড়ার পিঠে। চারপাশে তার লোকের মেলা। গুণে আর শেষ করা যায় না। আভূমি মাথা নুইয়ে সবাই তারা দব্রিন্যাকে ধন্যবাদ জানায়, যে যার দেশের পথ ধরে।

আর দব্রিন্যা জাবাভা পুতিয়াতিশ্নাকে নিয়ে হলদে স্তেপের ভিতর দিয়ে ঘোড়া ছোটাল কিয়েভ শহরের দিকে।

## আলিওশা পপোভিচ

আকাশে সে দিন প্রতিপদের রূপালি চাঁদ, আর মাটিতে গির্জার বুড়ো পুরোহিত লেওস্তির ঘরে জন্ম নিল এক পরাক্রান্ত বীর বগাতির। নাম দেওয়া হল আলিওশা পপোভিচ। সুন্দর নামটি। খেয়ে দেয়ে মানুষ হয় আলিওশা, অন্যের যেখানে এক সপ্তাহ, আলিওশা তা বেড়ে ওঠে এক দিনেই, অন্যের যেখানে বছর, আলিওশার সেখানে এক সপ্তাহ।

হাঁটাহাঁটি করে আলিওশা, পাড়ার ছেলেদের সঙ্গে খেলে বেড়ায়। কিন্তু আলিওশা যেই কারও হাত ধরে, হাত যায় ভেঙে, যেই কারো পা ছোঁয়, পা যায় মচকে।

আলিওশা যখন জোয়ান তখন বাবা-মায়ের কাছে গিয়ে সে আশীর্বাদ চাইল খোলা মাঠে বেরবে। বাবা বলল :  
'শোন আলিওশা, খোলা মাঠে যাবে, তোমার চেয়ে ঢের বেশি গায়ে জোর রাখে এমন সব লোক সেখানে আছে। তাই পারানের ছেলে মারিশকোকে সঙ্গে নিয়ে।'

তেজি ষোড়ায় চেপে বসল তরুণ দুই বীর। ধুলোর মেঘ আকাশে উড়িয়ে বিদ্যুৎগতিতে ছুটে গেল তারা। তরুণ বীরেরা এসে পৌঁছল কিয়েভ শহরে। আলিওশা পপোভিচ সেখান থেকে সোজা গেল রাজা ভ্লাদিমিরের শ্বেতপাথরের প্রাসাদে। শাস্ত্রমতে ক্রুশ করল সে, বিধিমতে নমস্কার করল চারদিকে, আর বিশেষ করে কুর্নিশ করল রাজা ভ্লাদিমিরকে।

রাজা ভ্লাদিমির তখন এগিয়ে এসে তরুণ বীরদের স্বাগত জানালেন, ওক কাঠের টেবিলে বসালেন, তরুণ বীরদের ভালো করে খাইয়ে দাইয়ে খবরাখবর নিতে লাগলেন। তরুণ বীরেরা ভোজন করল স্বাদু ভোজ্য, পান করল মদির সুরা। রাজা ভ্লাদিমির জিজ্ঞেস তখন করলেন :

'কারা তোমরা তরুণ বীর? দুঃসাহসী বগাতীর, নাকি পথচলতি পথিক, সুখের পায়রা?'

আলিওশা জবাব দিল :

'গির্জার বুড়ো পুরোহিত লেওস্তির ছেলে আমি, আলিওশা পপোভিচ। আর সঙ্গী আমার পারানের ছেলে মারিশকো।'

খাওয়া দাওয়ার পর আলিওশা পপোভিচ ইঁটের চুল্লির উপর শুয়ে বিশ্রাম করতে লাগল। মারিশকো বসে রইল টেবিলের সামনেই।

এই সময় রাজা ভ্লাদিমিরের কাছে এল এক নাগপুত্র বগাতির তুগারিন। এল সে শ্বেতপাথরের কক্ষে রাজা ভ্লাদিমিরের কাছে। তার বাঁ পা টা তখনও চৌকাঠে আর ডান পা গিয়ে পড়ল ওক কাঠের টেবিলের কাছে। গপগপ করে সে গেলে, চোঁচোঁ করে মদ টানে, রাজার মহিষীকে জড়িয়ে ধরে আদর করে, স্বয়ং রাজা ভ্লাদিমিরকে ঠাট্টা করে, গালি দেয়। এ গালে এক, ও গালে এক—আস্ত রুটি ঠেসে, একটা আস্ত রাজহাঁস জিভ দিয়ে সাপটে, মস্ত এক পিঠে মুখে পুরে এক গরাসে গিলে নিল সবটা। ইঁটের চুল্লির উপর থেকে শুয়ে শুয়ে আলিওশা নাগপুত্র তুগারিনকে বলল এই কথা :

'গির্জার পুরোহিত আমার বাবা লেওস্তির ছিল এক পেটুকচাঁদ, ছিল একটা গরু। গুঁড়িখানায় গিয়ে গিয়ে তলানিসমেত পিপে ভর্তি বিয়ার গিলত। গেল গরুটা, গেল পেটুকচাঁদ দিঘিতে। দিঘির সব জল খেয়ে নিল। পেট ফেটেও মরল অমনি। তুমিও তুগারিন টেবিলেই ফেটে না মরো।'

এই কথা শুনে তুগারিন গেল চটে। তার দামাঙ্ক ইম্পাতের ছোরাটা ছুঁড়ে মারল আলিওশার দিকে, কিন্তু আলিওশা ছিল খুব চটপটে, ওক কাঠের খুঁটির পিছনে আড়াল নিল। আলিওশা তখন বলল এই কথা :

'ধন্যবাদ বগাতির, নাগপুত্র তুগারিন! দামাঙ্ক ইম্পাতের ছোরাটা দিলে বটে। তোমার ধবল বুক আমি চিরে দেব, তোমার উজ্জ্বল নয়ন নিভিয়ে দেব।'

এই সময় পারানের ছেলে মারিশকো টেবিল ছেড়ে লাফিয়ে উঠে তুগারিনকে জাপটে ধরে আছড়ে ফেলল শ্বেতপাথরের দেয়ালে, ঝনঝন করে ভেঙে পড়ল জানালার কাচ।

আলিওশাকে বলল মারিশকো :

‘দামাঙ্ক ইম্পাতের ছোরাটা আলিওশা আমাকেই দাও, নাগপুত্র তুগারিনের ধবল বুক চিরে দিই, উজ্জ্বল নয়ন নিভিয়ে দিই।’

কিন্তু আলিওশা উত্তর দিল :

‘শ্বেতপাথরের পুরীটাকে নোংরা করো না মারীশকো, ওকে ছেড়ে দাও খোলা মাঠে, সেখানে আর যাবে কোথায় ? কাল খোলা মাঠে ওর সঙ্গে মোকাবিলা হবে।’

পরদিন ভোর ভোর, সূর্য ওঠার সঙ্গে সঙ্গে উঠল পারানের ছেলে মারিশকো, তেজি ঘোড়াদুটোকে নিয়ে গেল খর নদীতে জল খাওয়াতে। গিয়ে দেখে তুগারিন আকাশের নিচ দিয়ে উড়ে যাচ্ছে আর আলিওশা পপোভিচকে খোলা মাঠে মোকাবিলার জন্যে ডাকছে। পারানের ছেলে মারিশকো ফিরে এল আলিওশার কাছে :

‘ভগবান তোমার বিচার করবেন আলিওশা, দামাঙ্ক ইম্পাতের ছোরাটা দিলে না, তাহলে ওর ধবল বুক চিরে দিতাম, উজ্জ্বল নয়ন নিভিয়ে দিতাম। এখন আর ওর কী করবে, আকাশে উড়ে বেড়াচ্ছে!’

আলিওশা তার তেজি ঘোড়া বের করে চেরকেশিয় জিন চাপাল। সে জিনটার বারোটা রেশমের বন্ধনী, সে বন্ধনী শোভার জন্যে নয়, মজবুতির জন্যে। তারপর ঘোড়া ছুটিয়ে খোলা মাঠে গিয়ে দেখে, নাগপুত্র তুগারিন আকাশে উড়ে বেড়াচ্ছে। আলিওশা আকাশের দিকে তাকায়, বাজডাকা মেঘকে ডেকে বলে, জল ঢেলে তুগারিনের ডানা যেন ভিজিয়ে দেয়।

অমনি কাল মেঘ উড়ে এল, বৃষ্টি ঢেলে তুগারিনের ঘোড়ার পাখা দিল ভিজিয়ে। ভেজা মাটিতে পড়ল তুগারিন, খোলা মাঠের উপর দিয়ে ঘোড়া হাঁকাল।

ধাক্কা লাগল যেন পাহাড়ে পাহাড়ে। আলিওশা পপোভিচের সঙ্গে তুগারিনের বেধে গেল যুদ্ধ। গদা হাঁকাল তারা, কিন্তু ভেঙে গেল গদা। তুলে নিল বল্লম, বল্লম গেল বেঁকে। তারপর তলোয়ার, তালোয়ারের ধার গেল ভোঁতা হয়ে। হঠাৎ আলিওশা টাল সামলাতে না পেরে খড়ের আঁটির মতো জিনের উপর থেকে পড়ে গেল গড়িয়ে। তুগারিনের উল্লাস আর ধরে না, আলিওশাকে মারতে যাবে, কিন্তু আলিওশা ছিল ভারি চটপটে। চট করে সে তুগারিনের ঘোড়ার পেটের তলা দিয়ে ঢুকে, উল্টো দিক দিয়ে বেরিয়ে এসে, দামাঙ্ক ইম্পাতের ছোরা দিয়ে তুগারিনের ডান বুক বসিয়ে দিল। ধাক্কা দিয়ে তুগারিনকে ঘোড়াটা থেকে ফেলে দিয়ে চিৎকার করে উঠল আলিওশা :

‘নাগপুত্র তুগারিন, দামাঙ্ক ইম্পাতের ছোরার জন্যে ধন্যবাদ। এইবার তোমার ধবল বুক চিরে দেব, উজ্জ্বল নয়ন নিভিয়ে দেব।’

এই বলে তুগারিনের তাজা মাথা কেটে ফেলল আলিওশা, কেটে নিয়ে গেল রাজা ভ্লাদিমিরের কাছে। ঘোড়ার পিঠে আলিওশা চলে আর খেলা করে মাথাটা নিয়ে। একবার করে আকাশে ছুঁড়ে দিয়ে ফের তাকে লুফে নেয় বল্লমের ডগায়। রাজা ভ্লাদিমির তা দেখে ভয় পেয়ে গেলেন।

‘আসছে তুগারিন, আলিওশার তাজা মাথা নিয়ে আসছে। এবার ও আমাদের সারা রাজ্য গোলাম করে রাখবে।’  
পারানের ছেলে মারিশকো বলে উঠল :

‘রক্ত-রবি ভ্লাদিমির, কিয়েভ-পতি, দুঃখ করবেন না। যমের অরুচি ঐ তুগারিন যদি না উড়ে মাটিতে ঘোড়া চালায়, তাহলে ওর তাজা মাথাটা দামাঙ্ক ইম্পাতের বল্লমের ডগায় গেঁথে নিয়ে আসব। দুঃখ করবেন না, রাজা ভ্লাদিমির।’

মারিশকো তখন তার দুরবিন দিয়ে দেখে—আলিওশা পপোভিচ। বলল :

‘দেখছি আমি বগাতিরের বিভঙ্গ, তরুণ বীরের রঙ্গ! খাড়া হয়ে বসেছে ঘোড়ায়, মুণ্ডু নিয়ে সে খেলছে, ছুঁড়ে দিয়ে লুফে নিচ্ছে বল্লমের ডগায়। এ সেই যমের অরুচি তুগারিন নয়, মহারাজ, এ আসছে আলিওশা পপোভিচ, নাগপুত্র তুগারিনের মুণ্ডু নিয়ে আসছে সে।’



## মিকুলা সেল্যানিনিভিচ

সাত সকালে, সূর্য ওঠার সঙ্গে সঙ্গে ভল্গা বেরল সওদাগরি শহর গুরুচেভেৎস আর অরেহভেৎস থেকে ভেট নজরানা আদায় করতে।

তেজি বাদামি ঘোড়ায় চড়ে যাত্রা করল সৈন্যসামন্তের দল। খোলা মাঠে ফাঁকা ডাঙায় পৌঁছতে কানে এল হাল দেবার শব্দ। হাল দিচ্ছে চাষি, মনের আনন্দে শিস দিচ্ছে। তার লাঙলের ফালের মুখে পাথর পড়ে শব্দ তুলছে। মনে হল চাষি যেন কাছেই কোথাও কাজ করছে।

বীররা চলল চাষির খোঁজে : দিন গিয়ে রাত হয়, কিন্তু চাষির দেখা মিলল না। শিসের আওয়াজ শোনা যাচ্ছে, লাঙলের ক্যাঁচকোঁচ, পাথরের ধুপধাপ—সবই কানে আসছে, চাষিকে কিন্তু আর দেখা যায় না।

পরদিন আবার তারা ঘোড়া ছোটাল, সঙ্গে পর্যন্ত এল, তবু চাষির দেখা মিলল না। অথচ শিসের আওয়াজ আর লাঙলের ক্যাঁচকোঁচ, পাথরের ধুপধাপ সবই শোনা যাচ্ছে।

অবশেষে তৃতীয় দিন সন্ধ্যার দিকে ভল্গা আর তার লোকজন পৌঁছল চাষির কাছে। লাঙল দিচ্ছে চাষি, তাড়া দিচ্ছে, হেটহেট করছে ঘোড়াকে, ফালের দাগ পড়ছে যেন এক একটা গভীর গড়ুখাই। বিরাট বিরাট ওক গাছ উপড়ে তুলছে, বড় বড় পাথরের চাঁই পাশে ছুঁড়ে ফেলছে। দুলছে শুধু মাথার কোঁকড়া চুল, রেশমের মত লুটিয়ে পড়ছে ঘাড়ে।

চাষির ঘোড়া কিন্তু খুবই সাধারণ জাতের। লাঙলটা মেপল কাঠের, দড়িগুলো রেশমের। চাষিকে দেখে আবাক হয়ে গেল ভল্গা, অভিবাদন করে বলল :

‘কুশল হোক সুজন, চাষ করছো?’

‘কুশল হোক ভল্গা ভ্লেস্লাভিয়েভিচ, চলেছো কোথায়?’

‘গুরুচেভেৎস আর অরেহভেৎস শহরে চলেছি, সওদাগরদের কাছ থেকে ভেট নজরানা আদায় করব।’

‘এই দুই শহরের সওদাগররা একেবারে ডাকাত। গরিব চাষিদের ওরা চুষে খায়, রাস্তা দিয়ে গেলে কর আদায় করে। আমি একবার নুন কিনতে গিয়েছিলুম। এক এক বস্তায় একশ’ পুদ, তিন বস্তা নুন কিনে আমার ছেয়ে ঘোড়ার পিঠে চাপিয়ে বাড়ি ফিরছি। সওদাগরেরা সব আমায় ঘিরে ধরল। পথ কর দিতে হবে। যত দিই, তত চায়। রাগ হয়ে গেল আমার। ক্ষেপে গিয়ে শোধ মেটোলাম এই রেশমের চাবুক কষে। যারা দাঁড়িয়েছিল বসে পড়ল, আর যারা বসেছিল তারা ধরাশায়ী।’

শুনে আবাক হয়ে গেল ভল্গা। মাথা নুইয়ে বলল :

‘ধন্য চাষি তুমি, মহাবীর বগাতির। চলো আমার সঙ্গী হবে।’



‘তা বেশ, যাব ভল্গা ভস্লেভিয়েভিচ, ওদের একটু সমঝে দেওয়া দরকার, চাষিদের সঙ্গে যেন দুর্ব্যবহার করতে না যায়।’

এই বলে চাষি লাঙল থেকে রেশমের দড়ি খুলে নিয়ে, ছেয়ে ঘোড়ার কাঁধ থেকে জোয়াল নামিয়ে চেপে বসল, যাত্রা করল।

প্রায় অর্ধেক পথ ঘোড়া ছুটিয়ে এসেছে বীরেরা, হঠাৎ ভল্গা ভস্লেভিয়েভিচকে চাষি বলল :

‘এই রে, একটা ভুল হয়ে গেছে ভল্গা, খোলা মাঠে লাঙলটা ফেলে এসেছি। তোমার বীর অনুচরদের পাঠিয়ে দাও। লাঙলটা টেনে তুলে কাদা মাটি ঝেড়েঝুড়ে, যেন ওটা গাছের ঝোপে রেখে আসে।’

ভল্গা দলের তিনজনকে পাঠিয়ে দিল।

তারা ঘুরিয়ে পৌঁচিয়ে কত চেষ্টা করল, কিন্তু কিছুতেই লাঙলটা তুলতে পারল না।

ভল্গা তখন তার দশজন বগাতীরকে পাঠাল। কুড়ি হাতে তারা ঠেলাঠেলি করেও নড়াতে পারল না। এবার সব লোক নিয়ে এল ভল্গা। এক কম ত্রিশজন লোক সবাই মিলে, চারদিক থেকে টানাটানি করে হাঁটু পর্যন্ত মাটিতে গেড়ে গেল, কিন্তু লাঙলটাকে এক চুলও নড়াতে পারল না।

তখন ঘোড়া থেকে নিজেই নামল চাষি। একহাতে ধরে একটানে সে লাঙলটা মাটি থেকে তুলে ফেলল। ফাল থেকে মাটি ঝেড়ে ঝুড়ে ছুঁড়ে দিল গাছের ঝোপের দিকে। মেঘের সমান উঁচুতে উঠে ঝোপ পেরিয়ে ভেজা নরম মাটিতে পড়ে হাতল অবধি ঢুকে গেল লাঙলটা।

কাজ হল, আবার পথ ধরল বগাতীরের দল।

এল ওরা গুরচেভেৎস আর অরেহভেৎস শহরের কাছে। ওখানকার সওদাগররা ছিল ধূর্ত। যেই না চাষিকে দেখা, আমনি তারা অরেহভেৎস নদীর পুলে কাঠের পাটাতনগুলোর তলা কুপিয়ে রেখে দিল।

আর যেই অনুচরদল পুলের উপর উঠেছে অমনি পুলটা হুড়মুড় করে ভেঙে পড়ল। নদীর জলে ডুবতে লাগল বীরেরা, মরতে লাগল সাহসী সৈন্য, তলিয়ে যেতে লাগল ঘোড়া মানুষ।

ভল্গা আর মিকুলা গেল ভীষণ রেগে। চাবুক কষে ঘোড়া ছুটিয়ে ওরা এক লাফে পেরিয়ে গেল নদী। ওপারে পৌঁছেই শিক্ষা দিতে লাগল দুর্বৃত্তদের।

চাবুক চালায় চাষি, আর বলে :

‘ছি-ছি, লোভী সওদাগরের দল, চাষিরা তোদের রুটি জোগায়, মধু খাওয়ায়, আর তোরা এক কথা নুন দিতেও নারাজ।’  
আর ভল্গা তার অনুচরদের, বগাতিরি ঘোড়াদের শোধ তুলতে লাগল গদা দিয়ে।

গুরচেভেৎস নগরের লোকেরা তখন অনুতাপ করতে লাগল। বলল :

‘আমাদের অপকর্ম, আমাদের ছলচাতুরি মাপ করুন। আপনার ভেট নজরানা সব দিয়ে দিচ্ছি। চাষিও যেন নিশ্চিন্তে নুন কেনে। আর এক কানাকড়িও চাইব না।’

বারো বছরের মতো ভেট নজরানা আদায় করল ভল্গা তারপর দুই বগাতিরি বাড়ির দিকে রওনা হল।

ভল্গা চাষিকে বলল :

‘রুশ বগাতীর, কী বলে তোমায় ডাকে, কী নামে মান্যি করে?’

চাষি বলল, ‘আমার বাড়ি চল, ভল্গা ভস্লেভিয়েভিচ, তাহলেই জানতে পারবে লোকেরা আমায় মান্যি করে কোন নামে ডাকে!’

বগতিররা ঘোড়া ছুটিয়ে গিয়ে সেই মাঠে পৌঁছল। চাষি লাঙলটা টেনে তুলে, সারা মাঠ চষে সোনার বীজ পুঁতে দিল...

সূর্য অস্ত যেতে না যেতে ক্ষেতে তার ঝমঝমিয়ে উঠল ফসল।

অন্ধকার রাত ঘনিয়ে আসতেই চাষি সেই ফসল কেটে নিল। সকালে ঝাড়াই করে, দুপুরবেলা মাড়াই করে, খাওয়ার আগেই পিষে, ময়দা বানিয়ে পিঠে গড়ে সন্ধ্যের মুখেই পাড়ার সব লোকজন ডেকে এক মস্ত ভোজ দিল। পিঠে খেতে লাগল লোকে, বিয়র খেতে লাগল, গুণগান করতে লাগল চাষির :

‘অনেক ধন্যবাদ তোমায় সেল্যানিনপুত্র মিকুলা!’



